

त्वमिया म्हसिका

नां : डा. चुन्दा बज्राचार्य

शिक्षा : विद्यावारिधि (नेपालभाषाया नाटक)

एम.ए (अर्थशास्त्र व नेपालभाषा)

अबु : भाजु वेदानन्द बज्राचार्य

मां : मयजु ज्वालादेवी बज्राचार्य

लजगा : प्राध्यापन

नेपालभाषा केन्द्रिय शिक्षण विभाग, त्रि.वि.वि., यलध्वाका, यल ।

थाय्वाय् : ७/८४१ मरु ख्यःक्यव, यें ।

पिदने धुंकुगु सफू :


- ❖ नेपालभाषाया आधुनिक नाटकय् मिसा समस्या
- ❖ भिक्षु सुदर्शनया नाटक छगू बिबेचना
- ❖ जितामित्र मल्लकालीन धरःपौ
- ❖ मल्लकालया छुँ संस्कृति
- ❖ मध्यकालीन छुँ घटनावली
- ❖ रणजीत मल्लया विवाहया लागि भम्बा काःवंगु धरःपौ
- ❖ मोतिलक्ष्मी उपासिकाया जीवनी
- ❖ नेवाः तजिलजिइ नखःचखः

थाकू : शाक्य अफसेट प्रेस प्रा. लि., मरुहिटी ।



Ravi Shakya

नवरा तडिलोडि
नवरा जवरा



डा. चुन्दा बज्राचार्य

नेवाः तजिलजिइ नखःचखः

डा. चुन्दा बज्राचार्य

नेपालभाषा एकेदमि

क्षेत्रपाटी, येँ ।

पिकाक : नेपालभाषा एकेदमि
क्षेत्रपाटी, येँ । फोन नं. २६८७९५
पिथना : न्हापांगु १०००
द्यब : प्रेममान पुं (चित्रकार)
कम्प्यूटर : राजभाइ श्रेष्ठ

ने.सं. ११२०
वि.सं. २०५७ बैशाख १ गते

थाकू : शाक्य अफसेट प्रेस प्रा. लि.
मरुहिटी, येँ ।
फोन नं : २६०६०८, २६०१८५
फ्याक्स : ९७७-१-२६५६०६
ई-मेल : shakya@mangal.wlink.com.np

ISBN : 99933-567-0-0

मू. - २००/-

Newa Tajilajii Nakhachakha (Culture)
Dr. Chunda Bajracharya

देखा

नेवा: संस्कृति प्रति सचेत जुया:
न्ह्या: वयात्तंपिं न्हू पुस्ताया लँजुवा:तयूत ।

डा. चुन्दा बज्राचार्य

नेपाल भाषा संशोधन परिषद्
काठमाडौं, नेपाल
पिछाडः २०७०
रकमः २००/-
पिछाडः २०७०

नेपाल भाषा संशोधन परिषद्
काठमाडौं, नेपाल

१३३

नेपाल भाषा संशोधन परिषद्
काठमाडौं, नेपाल
पिछाडः २०७०
रकमः २००/-
पिछाडः २०७०

नेपाल भाषा संशोधन परिषद्
काठमाडौं, नेपाल
पिछाडः २०७०
रकमः २००/-
पिछाडः २०७०



भाजु रामहरिकृष्ण मानन्धर

नेवाः संस्कृतिया मूलगु हा (Root) जुयाच्चंगु
“नेवाः तजिलजिइ नखःचखः” नांगु थुगु सफू नेवाः भाषा व नेवाः
संस्कृतिस अतिकं नुगः क्वसाःम्ह भाजु रामहरिकृष्ण मानन्धरजुया
धर्मचित्त उत्पत्ति जुयाः नेपालभाषा एकेदमि (Nepal Bhasa
Academy) अन्तर्गत नीस्वनातःगु लघु शोधकार्यया ज्याइवः
न्ह्याकेगु ‘अक्षयकोश’या रकमं पिदंगु खः । महादया



धलः

पौ ल्याः

मन्तुना

नेवाः तजिलजिइ नखःचखः

थःगु खँ

नखःचखःया परिभाषा

खाइसंलू

अक्षयतृतिया

स्वांया पुन्हि

मांया ख्वाःस्वयेगु

सिथिनखः

दसहरा

ज्यापुन्हि

दिसिपुजा

गुरुपुन्हि

गुंला

गथांमुगः

नागपञ्चमी

यलपञ्चदान

गुंपुन्हि

सापारू

मतयाः

पञ्चदान (पंजरां)

अबुया ख्वाः स्वयेगु

चथाः

यैयाः

सोन्हसराद

मोहनि

स्वन्ति

सकिमिला पुन्ही

१

६

८

१०

११

१५

२१

२३

२४

२५

२७

३४

४२

४८

४९

५५

६३

६९

७८

८५

९०

१०९

११३

१३३

१५६

धलः

पौ ल्याः

बालाचःऱे	१५८
यःमरिपुन्हि	१६२
मालखःदिसि	१६९
मिलापुन्ही	१७०
घ्यःचाकु सल्लू	१७१
सिलाचःऱे	१७५
श्रीपञ्चमी	१७९
होलि	१८४
पाहाँचःऱे	१९०
मर जाः	१९७
लिधंसा	२०१
नखःचखः हनाः	२०८

मन्तुना

गुगुं इलय् नेवाःजातिया मांभाषा नेवाःभाषा (नेपालभाषा) देशभाषाया नामं नं अतिकं च्वछाये धुंकू जुल । थौं नेपाःदेया स्वनिगलय् ब्वलनाच्वंगु सभ्यता व संस्कृतिया विकासक्रमया च्वः मालावं वनेबलय् व हे नेवाःभाषा ल्हानावंपिं व ल्हानाच्वंपिं नेवाःत ध्वोदूवइ । अथेनं आः नेवाःतय्सं ब्वलंकूगु स्वनिगःया सभ्यता व संस्कृति नेवाःतय्गु जक मज्जे सकल नेपाःमितय्गु मंकाःगु राष्ट्रिय सम्पदा जूगु दु, अज्ज विश्व संस्था यूनेस्को (UNESCO) या धलखय् दुने विश्व सम्पदा (WORLD HERITAGE) कथं नं दुथ्याके धुंकूगु दु ।

खः, थीथी हुनिंयानाः छुं ईतक महितातय्गु बेकोगु मिखाय् लानाः नेवाःतय्गु मांभाषा व साहित्यया छयलय् वज्रं क्वच्यवल । नेवाःभाषा व नेवाः संस्कृतियात न्हंकाव्छ्येगु कुतःतक नं जूवन गथेकि वि.सं. २००७ सालया जनक्रान्ति कालनिसें हे रेडियो नेपालय् सक्रिय भूमिका दयेकाः नेवाःभाषां सुथय् बहनी प्रसार यानावयाच्वंगु समाचार व “जीवन दबू” नामं न्ह्याकावयाच्वंगु साहित्यिक व सांस्कृतिक ज्याइवः वि.सं. २०२२ सालय् विनाकारणं हे छत्थं लिंक्याः हाकुतिनाबिल महितातय्सं ।

लिपा, वि.सं. २०४६ सालय् जूगु जनआन्दोलनं निर्दलीय पञ्चायती व्यवस्थायात हानिसें ल्यँथनाः हानं बहुदलीय प्रजातन्त्रया पुनर्बहाली हसंलि, वि.सं. २०४७ स प्याहाँवोगु नेपाः अधिराज्ययागु न्हूगु संविधानं नेवाःतय्गु मांभाषायात “राष्ट्रिय भाषा” यागु मान्यता बिल । अनलि, नेवाःभाषा, नेवाः साहित्य व नेवाः संस्कृतिया अध्ययन व अन्वेषण, संरक्षण व सम्बर्द्धन यायेत योजनाबद्ध रुपं थीथी ज्याइवः न्ह्याकेत छगू आधिकारिक प्राज्ञिक संस्था मदेकं मजिल धइगु वाःचायेकाः नेपालभाषा परिषदया तत्वावधानय् ने.सं. १९९२ पोहेलाख १४ कुन्हु “नेपालभाषा एकदमि” दयेकेगु विषययात कयाः छगू विद्वद् गोष्ठी जुल । थुनियागु हे लिच्वःकथं थुगु छयलय् थःपिन्त पानाःजूपिं मांभाषाया छथः ह्यमिपिनिगु मंकाः कुतलय् जनस्तरं

नेपालभाषा एकेदमि (NEPAL BHASHA ACADEMY) नीस्वंगु जुल । श्वयात श्री ५ या सरकार, गृह मन्त्रालय, जिल्ला प्रशासन कार्यालय, येँ (काठमाडौं) पाखें वि.सं. २०५६ भाद्र २१ गते विधिपूर्वक दतां याना: दसिपौ (प्रमाणपत्र) औपचारिक रुपं ब्यूगु जुल ।

थौं नेपालभाषा एकेदमिया न्ह्यःने वयाच्चंगु छगू तःधंगु जिम्मेवारी धइगु नेपालभाषा व साहित्य अथेहे नेवा: संस्कृतिया थीथी विधाया आधारभूत व सृजनात्मक ग्रन्थत च्वयेगु, च्वकेगु व पिथनेगु नं खः । थुजोगु ग्रन्थत मौलिक जक जुइमा: धइगु मदु, मेमेगु भाषां नेपालभाषाय् हीकगु नं जुइफु । हानं नेपालभाषां थीथी विषयस अध्ययन, अन्वेषण व अनुसन्धानया मालेज्या न्ह्याका: थीथीकथंया ग्रन्थसूची, शब्दकोश, साहित्यकोश आदि सम्पादन याना: पिथनेगु ज्याइवः न्ह्याकेगु नं जुइफु । थुलि ज्याइवः युगानुकूलकथं न्ह्याका: वनेफत धा:सा नेवा: जातिया भाषा, साहित्य व संस्कृतियात नेवा: समाजय् दुने ब्वलंका: वनेगुया ल्यल्य, विश्वया न्ह्यःने नं थुकिया म्हसीका ब्वयेगु जुइ । थथेहे तुं हानं विश्वया थीथी भाषाया च्वन्त्यानाच्चंगु ग्रन्थत नेपालभाषाया धुकुतिइ दुथ्याका: वनेबलय् नेवा:तय्गु मांभाषा (नेपालभाषा) स्वभावतः यक्को च्वन्त्याना: तःमिनं जुइगु जुल । थुजोगु हे तथ्यया लिधंसाय् नेपालभाषा एकेदमि थःगु तातुनाकथं थुगु ग्रन्थ पिथंगु जुल । थुकिं नेपा: अधिराज्यया मंका: क्यबय् ला व लुसि थें जुया: ब्याच्चंगु थीथी भाषा, साहित्य व संस्कृतिरूपी स्वांफवःया मा:दुने नेपा:मितय्गु राष्ट्रिय भावना व एकतायात यक्को योगदान जुइफु तथा देश देशान्तरय् नेपा: राष्ट्रयागु गौरव नं स्वतः अभिवृद्धि जूवने फु ।

नेपालभाषा, साहित्य व संस्कृतिया छ्यलय् थथे न्ह्यब्वयेवहःगु ग्रन्थ च्वया: च्वछायेवहःगु सेवा याना: योगदान बियादीपिं हनेबहःपिं सकल च्वमि भाजु/मय्जुपिन्त नेपालभाषा एकेदमिया पाखें यक्को यक्को सुभाय् दु ।

नेपाल संवत् १९२० दिलापुन्ही
वि.सं. २०५७ श्रावण १ गते

सत्यमोहन जोशी
चान्सलर

नेपालभाषा एकेदमि

नेवा: तजिलजिइ नखःचखः : जिगु मिखाय्

नेवा: नेवा: हे जुइ । थौं झीगु हलिमय श्व सः श्वयाच्चन । बलुहुं स्विगलं पिने नं श्व सः श्वया वनाच्चन । सः श्वयेवं, मनं तुनेवं जक कु मगा: थः नेवा: जुयागुया बिस्कं म्हसीका नं ब्वये फयेमा: मखुसा नेवा: जुयागु वा मेगु छुं जुयागुया छुं सार दइमखु । खःला स्विगःदुनेया नेवा:तय्गु थःगु हे म्हसीका दु, थःगु हे मूल्य दु, थःगु हे गौरव दु, अले थःगु कथंया महत्ता नं दु । गुकिंयाना थौं मेगु जाति नाप अःपुक न्ह्याम्हसिनं नेवा: धका: म्हसीका कायेफु । तर पिनेया नेवा:तय्सं थीथी कारणं याना: थःगु म्हसीका स्विगःलय् थें बिस्कं तये मफु । गुकिंयाना इलय्ब्यलय् पिनेयापिं नेवा:तय्सं न्यनेमुया: झीगु संस्कृति, संस्कार व परम्परा बारे च्वयातःगु छुं सफू मदु ला ? श्व हे खँयात आत्मसात याना: झीगु नखःचखःया सामान्य परिचय बीगु कुत कथं श्व सफू पिदनाच्चंगु खः ।

झीसं परम्पराकथं नखःचखः गुकथं हनावयाच्चंगु दु उकिंया सामान्य ज्ञान बीगु गुगु तातुना खः श्व सफूया मू आजु थें जितः ताः । श्वहे आजुयात दृष्टिगत याना: दुवला यंकेबलय् डा. चुन्दा बज्राचार्यजुं च्वयादीगु “नेवा: तजिलजिइ नखःचखः” सफुतिइ नखःचखः गुकथं हनीगु व नखःचखः हनिबलय् छ्यलीगु ज्वलंया नाप नखःया महत्तायात सरल व स्पष्ट भाषां सम्प्रेषित याये फूगु हे छगू विशेषता थें जितः ताः । सामान्य जीवन हना:च्वम्ह नेवा:यात नेवा: जुइगु गौरव तायेका बीगु, नेवा:या महत्ता थुइका बीगु अले

झीगु नखःचखः गुकथं हनीगु, झीगु रीतिरिवाजयात समयानुकूलकथं हिडका गुकथं माने यायेगु व ध्वाथुडका बीगु हे थौया आवश्यकता खः । “नेवा तजिलजिइ नखःचखः” थ्व मिखां स्वयेबल्य सफल धाये बह जू ।

नखःचखः हनीगु धकाः मिखा तिसिना हनीगु नं पाय्छि मजु । झीसं नखःयात ध्वाथुडका, उकिया महत्तायात आत्मसात यानाः जक हने दःसा उकिया मू चकनी । थ्व खँय् डा. चुन्दा बज्राचार्य उप्वः अवलम्बित जुया वंगु खने दु । खःला फुक्क नखःचखःया विवरणय् एकरूपता मदु, संयोजनय् भचा मिखा तिसिना ब्यगु दु अयनं सामान्य ब्वमिया नितिं नेवाः जुया नं नखःचखः मस्युपिन्त थ्व छगू तःधंगु लिधंसा खः ।

नेवाः नखःचखःया वर्णन जक मखु नखःचखः गुगु तिथि लाइ, नखःबल्य नइगु नसा विशेष व उगु इलय् जुइगु जात्रा, मेमेगु ज्याइवः नं ब्रिया तःगुलिं झीगु नखः परम्परां तापाय् धुकूपिनिगुया लागि थ्व सफू उप्वः ज्याब्यलय् जूवनीगु आशा दु । झीगु परम्परायात अन्धविश्वास, रूढीग्रष्ट व पूर्वाग्रहया मिखां विश्लेषण यायेगु कुतः मयासैं बरू समय सापेक्षकथं न्ह्यब्वयेगु कुतः यानातःगुयात प्रशंसनीय जू ।

खःला थज्याःगु सफू समाजशास्त्र वा नृतत्वशास्त्रया लिधंसाय् दुवाला यंकूगु जूसा उप्व स्याचुइगु व धिसिमिसि धाइगु खः । तर च्वमिं सामान्य ब्वमि व नेवाः जुयाः नं थःगु नखःचखः गुकथं हनेमा धैगु मस्युपिन्त केन्द्रित यानाः च्वयातःगु खः । उकिंयानाः थुकिइ गहन मालेज्याया थासय् फच्छिफतलय् उप्वः सूचना प्रवाहित यायेगु कुतः जुयाच्वंगु दु । जितः ताः नखःचखः हने मसये धुकूपिं नेवाःतय्गु लागि गुगु आवश्यकता जुयाच्वंगु खः उकियात थ्व सफुलिइ पूर्ति याना बी फइगु भलसा दु । थुगु मिखां स्वयेबल्य “नेवाः तजिलजिइ नखःचखः” झीगु संस्कृतिया छगू धरोहर खः, नेवाः जुया नं नेवाः संस्कृतिं तापानाच्वपिनिगु नितिं थ्व छगू ज्वालान्हाय्क खः ।

ताहाच्वः
चउलाथ्व ४, ११२०

इन्द्र माली

थःगु खँ

नेवाः तजिलजिइ नखःचखः सफू च्वयेगुया लागि नेपालभाषा एकेदेमिपाखें दकलय् न्हापां बःचाधंगु लघु योजना अन्तर्गत च्वयेगु जिम्मा जितः ब्यगु खः । नेवाः तजिलजिइ नखःचखः सफू च्वयेगु जिम्मा कयाः जि थम्हं हनावयाच्वनागु नखःचखः, जिगु समाजं हनावयाच्वंगु नखःचखःयात स्वखनार्थे थःम्हं आत्मसात यानाः तयार यानागु थ्व सफू खः । नेवाः जाति छगू हे जूसां अमिसं हनावयाच्वंगु नखःचखः छगू हे तं जूसां जात कथं, थाय्बाय् कथं, परिवार कथं छुं छुं पाःगु खनेदु । छगू हे नखःयात गुम्हसि नं नखः कथं हनेगु याःसा गुम्हसिनं चखः कथं हनेगु याः । गुम्हगुम्हसि नं विशेष छुं छुं नखःचखःयात छुं हे महत्व बीगु मयाः । गथे बालाचःन्हे नखः यँया थःने च्वपिं नेवाःतय्सं तःधंगु नखः कथं हनेगु याःसा क्वःनेच्वपिसं पचिमाहूः धकाः तःधंगु नखः यानाः हनेगुयाः । मेपिनि उगु दियात विशेष छुं महत्व बीमाः धयागु मदु । छँय् परिवार सं स्वर्गे जूसा स्वर्गे जूपिन्त स्वर्ग व्छयेगु धकाः पशुपतिया श्लेशमान्तक वनय् बालू वनेगु, सतबीज व्छलेगु धकाः यायेमा अथेतुं याइबलय् सीपिनिगु नामय् मतः तःवनाः उपाकू वनेगु धकाः वनेमाः । मेमेपिनि छुं छुं हे याये म्वाःपिं नं दु ।

विश्वया न्ह्यागु समाजय् च्वपिं मनूतय् नं थःथः कथं नखःचखः हनाः मानव मूल्य व मान्यतायात कायम याना वयाच्वंगु दु । अथेतुं नेवाःतय्सं नं पुर्खा, आज्ञा, अजिपिसं थःगु समाजयात सुसंस्कृति कथं न्ह्याकेया लागि लः फय् बुँया उत्पादन, धार्मिक सामाजिक, आर्थिक दृष्टिकोण मू दयेकाः स्वनावंगु नखःचखः थौं भीसं नं हना वयाः च्वनागु दनी । नेवाःतय्गु मूल्य व मान्यतायात थुथुं वःपिसं थौं जक थ्व नखःचखः न्ह्याका यंका हे च्वनी । जुइफु थौंकन्हय् जीवन ल्किष्ट जुया वं वं थःगु पुर्खानिसे न्ह्याकाः वयाःच्वंगु नखःचखःया मूयात लुमंकाः च्वनेगु फुसंद हे मदया वन । नखः छाय् हनेमाल, थी थी इलय् थी थी नखः हनेगुया कारण छु ? थी थी इलय् बलय् हनीगु नखःया महत्व छु ? छाया हन ? आदि आदि मसिया वने धुकल । भी पुर्खापिसं स्वनावंगु नखः खालि नयेत त्वनेत

न्याइपुकेत जक अवश्य मखु । प्रत्येक नखःया थःगु हे महत्व दु, थःगु हे मान्यता दु । गुगु मूल्य व मान्यता प्रकृतिनाप भेलयपुनाः समाजय् च्वनाः च्वपिं नेवाःतय्गु वैज्ञानिकता, स्वास्थ्यदायक, लःफय् नाप न्यानाः म्वाये फैगु जीवन दु । जीवनयात माःगु परम आनन्दया अनुभूति दु । जीवन न्याका च्वपिन्त जक मखु । समाजया लागि व परिवारया लागि थःगु जीवन फुकावपिं परमात्मातय्गु मोक्षता दु, नाप वडगु पिढीयापिन्त बांलाःगु सांस्कृतिक समाज दु ।

नेवाःतय्सं हनावयाः च्वंगु नखःचखः गुबलय् गुकथं हनी, छु नखः छाय् हन, उगु नखःबलय् छु छु याइ अले उगु नखःबलय् छु छु विशेष नसा नइ धयागु नेवाः तजिलजिइ नखःचखः सफुतिइ दुथ्यानाः च्वंगु दु । भीसं हनावयाः च्वनागु नखःचखः भी पुर्खापिसं हनावल, उकिं जिं नं हने धयागु भावनां जक हनेगु मजुसे भीसं दछियकं हनावयाच्वनागु नखःचखः धार्थे भीसं हनेमाः प्रत्येक नखःया थःगु हे विशेषता दु, गुगु विशेषता समाजया लागि मदयेक मगाःगु धकाः वाः चायेके कथंया यक्व न्यःनिसं हनावया च्वंगु खः । गुगुं गुगुं नखःचखः वैदिककालं निसं थौतक्क कथंहक हनावया च्वंगु जूसा गुगुं नखःचखः मल्लकालय् हनेगु परम्परा जूगु खः । नखःचखः अप्वः धयाःथें लःफय् व समाजय् च्वपिं भी पुर्खाया सुस्वास्थ्यया कथंहक हना वयाच्वंगु खः । नखःचखःबलय् चन्द्रमा, नाग, क्वः खिचा, ब्यांचा, सा, आदि प्राकृतिक वस्तु व प्राणीयात पूजा यानाः न्याकेगुनिसं थः दाजुकिजा, थःत जन्म याःम्ह मां, अबु, अले थःथम्ह थःत पूजा याना तक्क नं नखःचखः हनेगु भीगु नेवाः परम्परा खः । अथेतुं नखःचखःबलय् थःम्ह न्हिन्हि ज्या छ्यलेगु वस्तुनिसं थःम्ह ज्या यानाः थःगु जीवन निर्वाह यायेगु वस्तुयात समेत पूजा यानाः भव्य छानाः हनावयाच्वनागु दु । थथे हनेगुया नं तःधंगु महत्व दु । गथेकि वाया भखारी पूजा, ब्वनेगु ग्वःहःपूजा, उगः लुसि, घः, तुफि, हासा आदि आदियात पूजा यानाः भव्य छानाः हनेगु नखः खः ।

नखः धकाः खालि नयेगु त्वनेगु जक मयासे नखःज्वलं ज्वरे यानाः थःगु छैय्या पुर्खापिं वा जःपिं मदये धुंकूसा अमिगु नामय् सिकाब्व तयाः थःपिसं नं छसि कथं इवःछुनाः भव्य नयेगु परम्परा दु । भव्य धुंकाः थःथाय् छैय् जन्म जुयाः करकिया छै थःगु छै यानाच्वपिं म्हाय्मचा व भिनामचातय् नखत्याः सःताः नकेगु परम्परा नेवाः जाति बाहेक सु नं मेगु जातिया मदु । सिम्हसिया नामय् सिकाब्व तयाः थःपिसं नयाः नखत्या नकाः तिनि नखःया परम्परा क्वचाःगु जुइ ।

नेवाःतय्सं हनावयाः च्वंगु नखःचखःया थःगु हे कथं बिस्किंगु महत्व दु । नापनापं नखःचखःया इलय् विशेष नसा नयेगु परम्परा दु । विशेष यानाः ई कथं बुई सःगु न्ह्नुगु तरकारी, बूबः आदियात सुसाःयात ल्वयेक नयाः हनेगु नखःचखः खः । उगु नसां बीगु तागतया गुण थःगु हे शरीरय् लानाः सुस्वास्थ्य व दीर्घायुया

कामना याना हनीगु खः । उकिं हे खाइसंलु धकाः खाइबःसिमाय् चुलिजागु खाइचवःया नापं लैसु, कुनःबुँ, कःछे आदि तयाः क्वाति दायेकाः खायुक्वाति त्वनेगु खः । अथेतुं सिनाज्याबलय् ज्यूगु नं मज्यूगु नं नयाः स्वास्थ्य बिकार जुइ धकाः गुंपुन्हिबलय् गुताः बूबःया क्वाति दायेकाः क्वाति त्वनाः प्वाथय् च्वंगु बिकारयात अन्त यानाः सुस्वास्थ्य जुइ । पुष माघया चिकुगुलिं मुक्त जुइगुयालागि घ्यः चाकु, सन्याः, पँलः आदि Iron युक्तगु नसा नयाः दुने जक म्ह क्वाइगु मयासे न्हिछि निभालय् च्वनाः चसुप्वाल्य, न्हाय्पनय् चिकं तयाः म्हाय् चिकं बुया थःगु म्ह क्वाकेगु नखः घ्यःचाकु संलु हनेगु खः । चाःया तःलय् सःगु तरुल निसं खाइबसिमाया चुलितक नयेगु नं नखःचखः दुने हे लाकातःगु दु ।

नखःया मू हुनि नये त्वनेगु न्याइपुकेगु छगू जूसाः मेगु पुजाआजा यानाः दानधर्म यायेगु नं खः । आगंछःनिसं कयाः भूतप्रेत सागालय् सुलाच्वंम्ह महाद्यःयात समेत पूजा यानाः हनेगु नखःचखः दुने हे ला । लाकाः पूजा यायेगु परम्परा दु । सिलाचःहेबलय् सिं दान यानाः, यःमरिपुन्हिबलय् यःमरि दान यानाः न्यागु पञ्चदानबलय् न्याताजि वस्तुया दान यानाः नं नखःचखः हनेगु नेवाःतय्गु परम्परा खः ।

नखःचखःया मेगु पक्ष धयागु सुसाकुसाः यायेगु खः । न्यागु नं नखःचखः हंसां छै छ्वां नीसीयानाः छैजःपिं सकसियां म्वःल्ह्याः लुसि ध्यानाः, वसः हियाः तिनि हे नखःचखः हनेगु याइ । अथेतुं सिथिनखःकुन्हु लःया मुहान तुं, तुथि, बुंगाः आदि सफा यानाः दछियकया त्वनेगु लःयात सफा यायेगु नं नखः दुने हे लाना च्वंगु दु । मचातय्गु सुस्वास्थ्ययात कामना यानाः मलःजा नकेगु, समाजय् मभिं याःम्ह गुरुमापायात भव्य नकेगु ज्या नं नखःचखः दुने हे लाः । अथेतुं थाय् थासय् रक्षकया रूपय् पलिस्था यानातःपिं छःछःपिन्त बाजं थानाः जात्रा यायेगु ज्या नं नखःचखः दुने लाः । नखःचखः दुने मलाःगु जात्रा जुल धाःसा स्थानीय मनुतय्सं उगु जात्रायात हे नखः कथं तःजिक हनेगु नं नेवाःतय्गु परम्परा खः । गथे यें जनमाःछःया रथ सालीबलय् लगमय् च्वपिनि लगजात्रा धकाः सिकाब्व तयाः म्हाय्मचा भिनामचात सःता तःजिक नखः हनेगु चलन दु ।

नखःचखःबलय् खःजात्रा यानाः जक न्याइपुकीगु मखु सीपिं स्वर्गय् थ्यनेमा धकाः नं हनेगु परम्परा दु । अथेतुं गुंपुन्हि छ्यालि न्हिलि यानाः उकुसमुकुस जुयाच्वंगु समाजयात न्हीकाः नं नखःचखः हनेगु खः । गुंपुन्हिबलय् छ्यालः व येंयाःबलय् थी थी प्याखं पिदनाः मनोरञ्जन बीगु थज्याःगु हे नखःचखः मध्यय् छगू नखःचखः खः ।

“नेवाः तजिलजिइ नखःचखः” च्वयेत अवसर चुलाका ब्यूगुलिं नेपालभाषा एकैदमियात व कोष स्वना मालेज्या यायेगु लकस दयेका ब्यूम्ह हनेबःम्ह

भाजु रामहरिकृष्ण मानन्धरयात नं आपालं आपाः सुभाय् देछानाच्चवना । सफू पिथनेगुया लागि सरसल्लाह बियादीम्ह संस्कृतविद, नेपालभाषा एकेदमिया चान्सलर हनेबःम्ह भाजु सत्यमोहन जोशीयात आपालं सुभाय् । थव सफू तयार यायेत योजनायात माःगु गुहालि यानादीम्ह निवर्तमान सदस्य-सचिव मल्ल के. सुन्दरयात नं सुभाय् । थव सफू क्वचायेकेगुया लागि वःगु समस्या समाधानया नापनापं माःमाःगु सकतां ग्वाहालि यानादीगुलिं नेपालभाषा एकेदमिया सदस्य-सचिव व समालोचक भाजु इन्द्र मालीयात आपालं आपाः सुभाय् । दकले लिपा सफूया व प्रुफ स्वायाः ग्वाहालि यानादीम्ह नादंम्ह साहित्यकार भाजु राजा शाक्य व कम्प्यूटरय् सेटिङ्ग यानादीम्ह भाजु राजभाइ श्रेष्ठयात नं सुभाय् । थव सफूया लागि माःगु खंलाबल्हाः यानाः ग्वाहालि यानादिपिं भाजु पं. बद्रीरत्न वज्राचार्य, सर्वज्ञरत्न वज्राचार्यया नापं खनेदयेक खनेमदयेक ग्वाहालि यानादीपिं सकसितं सुभाय् ।

चुन्दा वज्राचार्य
मरु छयःक्यब, यें

नखःचखःया परिभाषा

दुपिनि नखः मदुपिनि चखः

दुपिनि चखः मदुपिनि अःखः

चव्य न्ह्यब्वयागु कवितात्मक वाक्य सुं कवि वा साहित्यकार विशेष थःगु नुगःखँ प्वकातःगु वा चवयातःगु अभिव्यक्ति मखु, नखःचखःया बारेय् आर्थिक विपन्न समाजपाखें दुनुगलंसिं पिदंगु छगू मर्मशील लोकोक्ति जक खः । गुगु खँ सी मदयेक आर्थिक सम्पन्न व विपन्न समाजदुनेया नखःचखःप्रतिया भावानात्मक अभिव्यक्ति खः । आर्थिक सम्पन्न समाजं नखःयात भव्यताकथं हनेगु याःसां आर्थिक विपन्नपिसं नखःयात साधारणकथं चीधंक थःगु गच्छेकथं हनेगु यानावयाच्चवंगु खः । अथे तुं चीधंगु नखःया आर्थिक सम्पन्नपिसं चीसकं जक हनिगु जूसां विपन्नपिसं उगु चखः हने हे मफैगु कथं जुइगु खँयात न्ह्यब्वयातःगु खः ।

न्ह्यब्वया तःगु लोकोक्ति खँकथं नं नखःचखःया सी मदयेक परिभाषा न्ह्यब्वयाच्चवंगु दु । नखः तच्चवतं लसताकथं हनेगु जूसा चखः चीसकं हनिगु

नखः कथं न्ह्यः ब्वयातः गु दु । आर्थिक स्थितिनाप स्वानाच्वंगु न्ह्यथनागु वाक्यं नखः चखः या परिभाषा बियाच्वंगु दु । गुगुं नं उत्सव, पर्व जात्रायात तः जिक हनेगु जुल धाः सा नखः व हे उत्सव, पर्व वा जात्रायात चीजिक हनेगु जुल धाः सा चखः धाइगु खँ च्वय् न्ह्यथनागु वाक्यं यचुकाब्यगु दु ।

नेपाल राजकीय प्रज्ञा प्रतिष्ठानं पिदंगु नेपाली संक्षिप्त शब्दकोषय् चाडपर्व व पर्वयात थुकथं परिभाषित यानातः गु दु —

चाड :- नियमित दिनमा गरिने उत्सव, पूजाआजा वा भोज-भतेर-पर्वको दिन धकाः धयातः गु दुसा चाडपर्व/चाडबाडयात कुनै जाति वर्ग वा सम्प्रदायमा पहिलेदेखि चली आएको देवपूजा, जात्रा आदि (ज्ञवाली, २०४०) धायेगु याः ।

भाजु सत्यमोहन जोशीया सम्पादनय् पिदंगु बःचाधंगु खँवः धुकु सफुतिइ नखः चखः यात थुकथं परिभाषित यानाः न्ह्यब्वयादीगु दु ।

नखः (नखत) - धार्मिक, सांस्कृतिक वा सामाजिक पर्व विशेष - गथांमुगः, पाहाँचःहे, मोहनि, स्वन्ति आदि ।

चखः (नखत) नखः थें हे हनेमाः गु चिचीधंगु नखः गथेकि गथांमुगः, यँयाः चथाः आदि (जोशी, १९०७)

च्वय् न्ह्यब्वयातः गु भाजु सत्यमोहन जोशीजुं सम्पादन यानाः पिदंगु खँवः धुकुतिइ धार्मिक व सांस्कृतिक पक्षयात केन्द्रित यानाः हनिगु दिंयात नखः धाइगु खँ जक उल्लेख यानादीगु मखु, नखः व चखः या परिभाषा नापनापं दसुया रुपय् छुं नखः चखः गथे पाहाँचःहे, मोहनि, स्वन्ति नखः कथं व चखः कथंया गथांमुगः, यँयाः, चथाः धकाः न्ह्यब्वयादीगु दु । नखः व चखः निगुलिसं गथांमुगः छगू हे तुं दसुया रुपय् न्ह्यब्वयादीगु दु ।

नेवाः समाजदुने हनिगु गुलि नखः चखः खः व फुकक समान रुपं नखः हे धकाः वा चखः हे धकाः हनेगु धाः सा यानावयाच्वंगु खनेमदु । उकिं छगू हे नखः यात गुम्हेस्यां नखः कथं हनेगु यानावः सा मेम्हसिगु निंति व नखः या रुपय् मजुसे चखः या रुपय् जुयाच्वनी । उकिं छगू हे नखः गुम्हेसिया नखः कथं हनाच्वंसा व हे नखः यात मेम्हसिनं चखः या रुपय् हनेगु नं यानाच्वंगु दु । नखः चखः हनेगु नेवाः समाजदुने समान मजु, थाय्कथं, जातकथं, परम्पराकथं व सम्प्रदायकथं नखः व चखः थी-थी कथं हनेगु जुयाच्वंगु दु । समाजया परम्परागत प्रचलनयात ध्यान तयाः धायेगु खः सा बःचाधंगु खँवः धुकुतिइ प्रस्तुत यानाः गुगु दंसु बियातः गु खः वयात पाय्छि जू धाये माः ।

भाजु ईश्वरानन्द श्रेष्ठार्यया बःचा धंगु नेवाः खँवः धुकूकथं नखः धायेबलय् तःधंगु नखः, व चखः धायेबलय् चीधंगु नखः धकाः न्ह्यब्वयातः गु दु (श्रेष्ठार्य, १९८७) ।

भाजु ठाकुरलाल मानन्धरया खँवः धुकू Nepal-Bhasa-English-Dictionary कथं नखः चखः यात नखत्या - ब्वनेमाः गु व नखत्या ब्वनेम्वाः गुया आधारय् पानाच्वंगु खँ न्ह्यब्वयादीगु दु ।

नखः A festival in which the central event involves a fest (called nakhatya) put on the home. (ठाकुरलाल) अथें तु नेपाल राजकीय प्रज्ञा प्रतिष्ठानपाखें पिदंगु नेवार-नेपाली-अंग्रेजी शब्दकोषय् नखः यात मू नखः व चखः यात चिचाधंगु नखः, चखतय् नखत्या ब्वनाच्वने म्वाः (प्रधान, २०५४) धकाः उल्लेख यानातः गु कथं नखः व चखः या विविधता नखत्या ब्वनेगु व नखत्या ब्वनेम्वाः गु कथं परिभाषित यानातः गु दु ।

च्वय् न्ह्यब्वयागु थी थी शब्दकोषकथं नखः चखः धार्मिक, सांस्कृतिक, आर्थिक, मनोवैज्ञानिक दृष्टिकोणं थी थी महत्व दुगु थः थः गु सांस्कृतिक परम्परायात न्ह्याका वयाच्वंगु छुं विशेष निश्चित दिक्कुहु हनिगु नखः चखः धायेगु थः । विशेष यानाः धार्मिक व सांस्कृतिक गरिमामय न्हि तच्चतं हनेगु जुल धाः सा नखः, चिसकं हनेगु दिं जुल धाः सा चखः दु ।

भाजु ठाकुरलाल मानन्धरया Nepal-Bhasa-English-Dictionary कथं नखः चखः यात नखत्या - ब्वनेमाः गु व नखत्या ब्वनेम्वाः गुया आधारय् पानाच्वंगु खँ न्ह्यब्वयादीगु दु । नखः चखः पाः गु खँ धयागु नखः धुंकाः थः न्ह्याय् व भिनामस्तयत नखत्या सः तेमाः सा वयात नखः धायेगु याः सा, नखत्या सः ते म्वाः सा चखः धकाः परिभाषित यानातः गु दु । थः न्ह्याय्मचातयत नखः धुंकाः नखत्या सः ते माः गु म्वाः गु धयागु थः छँ खलः व न्ह्याय्मचा दथुइया स्वाप् खः । भौमचा, न्ह्याय्मचा नखः न्ह्यः निसं व भाः तपिनिगु छँ बँ थिलाः, नीसी यानाः, वसः हियाः नी यानाः भव्यज्वलं ज्वरे यानाः आपालं ज्याय् संलग्न जूम्ह न्ह्याय्मचायात थः छँय् याउँक झासु लनेगु कथं ब्वनीगु नखत्या । उलि जक मखु थः छँया थः मां, अबु, दाजु, किजापिं सकलें मुनाः नखः कथं पूजा यानाः नसाज्वलं ज्वरे यानाः नयाः व हे छँय् जन्म जूम्हसित नं नकेगु खः नखत्या । न्ह्याय्मचा थः गु छँ नखः हंसा न्ह्याय्मचाया भाग नं थः छँय् तयेगु जुइ उगु भाग हे नकेत न्ह्याय्मचापिन्त सः तीगु नखत्या खः । थव खँ पाय्छि जूसां मेकथं नेवाः समाजय् नखः चखः समान मजु गुम्हसिनं नखः कथं हनेगु जूसां गुम्हसिनं व हे दिनयात चखंकथं हनेगु याः । थव नखः हनेगु चखः हनेगु व न्ह्याय्मचा सः तेगु धयागु नेवाः तय्गु जात व थाय्बाय् कथं नं पाः ।

नखः चखः हनाः तच्चतं व्यावहारिक जीवनया नापं परम्परायात महत्व बियाः नखः चखः बारेय् जिमि मां ज्वालादेवी बज्राचार्यया कथं च्वय् न्ह्यथनागु परिभाषा पाः । वय्कः या धापूकथं शुक्ल पक्षय् हनिगु नखः जूसां कृष्ण पक्ष हनिगु गुलित नखः दु व फुकक चखः खः । शुक्ल पक्षय् वडगु नखः दक्क तः जिक हनेमाः उकिं नखः जुल । कृष्ण पक्षय् वडगु नखः तः जिक हनेम्वाः उकिं

चखः जुल । कृष्ण पक्षय् वडगु चखः मध्यय् पाहाँचःहे छगू तःजिक हनेगु जूगुलिं नखः थें जुल । पाहाँचःहे चखः विशेष यानाः यें दुने च्वपिं नेवाःतयसं जक हनिगु खः । जनमाःद्यः रथयात्रा याइबलय् जात्रायात नखःकथं हनिगु थासय् गथेकि असं, लगंयापिनि नेवाःतयसं पाहाँचःहे तःजिक हनेगु मयाः । असंयापिनि चैत्र दशै वा जनमाःद्यःया जात्रा हे हनेगु परम्परा दु । अथे तुं लगंयापिसं नं जनमाःद्यःया जात्रायात लगं जात्राकथं हनेगु परम्परा दु । पाहाँचःहे थें भाद्र शुक्ल ४ कुन्हु हनेगु यानाच्वंगु चथाःयात नं नखःथें शुक्लपक्ष हनेगु जूसा नं मोहनि नखःया समयकथं हनेगु नखःकथं कयावयाच्वंगु चखः खः । चथाःयात नं तःजिक हनेम्वाः । सुन्तिया पञ्चक हनेगुकथं कार्तिक कृष्ण १३, १४, व १५ अर्थात् क्वःपुजा, खिचापुजा व लक्ष्मीपुजा तःजिक हनेगु मयाःसां पूजा याना सिधयेकेगु जूसा म्हपुजा व किजापुजा निगुलिं कार्तिक शुक्ल १ व २ कुन्हु हनिगु नखःकथं तःजिक हनिगु खः । नखः चखःया छुं दसु क्वय् न्ह्यब्वये —

ल्याः चखः हनीगु दिं	चखःया नां	नखःया
१. बैशाख कृष्ण औसी	मांया ख्वाः स्वयेगु	ब्वने म्वाः
२. श्रावण कृष्ण १४	गथांमुगः चःहे	ब्वने म्वाः/ माः
३. भाद्र कृष्ण १४	पञ्चदान	ब्वने म्वाः
४. भाद्र कृष्ण १५	बौया ख्वाः स्वयेगु	ब्वने म्वाः
५. माघ कृष्ण १४	सिलाचःहे	ब्वने म्वाः
६. चैत्र कृष्ण १४	पाहाँचःहे	ब्वने माः

ल्याः नखः हनीगु दिं	नखःया नां	नखःत्या
१. जेष्ठ शुक्ल ६	सिथि नखः	ब्वने माः
२. जेष्ठ शुक्ल १०	दशहरा	ब्वने म्वाः
३. श्रावण शुक्ल १५	गुपुन्हि	ब्वने माः
४. भाद्र शुक्ल ४	चथाः	ब्वने माः/ माःपिं
५. भाद्र शुक्ल १५	येंयाः पुन्हि	ब्वने म्वाः
६. आश्विन शुक्ल १-१५	मोहनि	ब्वने माः
७. कार्तिक शुक्ल १-२	म्हपुजा, किजापुजा	ब्वने माः
८. कार्तिक शुक्ल १५	सकिमना पुन्हि	ब्वने म्वाः
९. मंसीर शुक्ल १५	यःमहि पुन्हि	ब्वनेमाः/ म्वाः

च्वय् न्ह्यब्वया कथं कृष्ण पक्षय् जूसा गुंगू नखःकथं शुक्ल पक्षय् हनिगु दु । शुक्ल पक्षय् हनिगु नखः मध्यय् मोहनि, सुन्ति, सिथि नखः व गुपुन्हि खः । नखः चखः परिभाषाय् नखत्या ब्वने माः म्वाःया आधारय् धायेगु खःसा थः म्हाय् मचातयत् नखत्या ब्वनेगु धयागु थः म्हाय्मचातयत् गुलि सतिका तल धाःसा न्ह्यागु हे नखः वा चखः जूसां नखत्याः सःतेगु याइ । नखः वा चखः तःजिक वा चीजिक हनेगुलिइ नेवाःतय् जातकथं पाः । नखः चखःनाप तच्चवतं सतिक स्वापू दुगु जाति मध्यय् छगू ज्यापु जाति नं खः । ज्यापु जातिं मोहनि, सुन्तिया नापनापं यःमरि पुन्हि, गुपुन्हि, पाहाँचःहे, सिथि नखः आदि नखःयात तःजिक हनेगु याःसां गथांमुगः चःहे न्ह्यः सिनाज्या नी ब्यंके धुंकूसा नखः हना च्वनेमाः धयागु मदु । सिनाज्या सिधयेकाः छेंय् नी धायेमाल धाःसा गथांमुगः तक्क हे मप्युसे गथांमुगः स्वयां न्हापा हे छेंय् नीसी यानाः सिनाज्या नी ब्यंकाः व्छयेगु याः । थथे याये धुंकल धायेवं हानं सिनाज्या नी मब्यंकूपिं ज्यापुतयगु छेंय् वनेगु याइमखु ।

गथांमुगः चःहेबलय् गुम्ह गुम्हसिया थःथःगु छेंय् दुहां वयाच्वपिं भुत प्रेतयात पितना व्छयेगु धकाः पुरुसं च्वनाः गुम्हकथं पूजा यानाः बौ बियाः बौ वानाः तच्चवतं हनेगु चलन दु । अथें तुं गुभाःजु, बरे जातिया विशेष तःजिक हनीगु नखः मध्यय् पञ्चदान नं खः । उकिं नखः तःजिक चीजिक हनेगु वा नखत्या सःतेमाःगु व नखत्या सःते म्वाःगुया आधारय् नखःचखःयात परिभाषित यायेगु स्वयां नखःचखःया परिभाषा शुक्ल पक्ष व कृष्ण पक्षयात बः कयाः नखः चखःयात परिभाषित यायेगु स्वाभाविक जू । छायाःसां दच्छि यंक वडगु नखः वा चखः हना वयाच्वंगु दु । श्री पुर्खापिसं नखः व चखः हनेगुलिइ प्रकृतियात थःगु हे मुख्यम्ह द्यःकथं हनावया च्वपिं सुद्यः व चन्द्रमाया गतियात थःगु दिनचर्या प्राकृतिक उत्पादननाप स्वापू दुगुयात छखे शुक्ल पक्ष व कृष्ण पक्षया आधारय् नखःचखः हनेगु याःसा मेगु नखः चखः बुज्या अथवा कृषि उत्पादनयात दृष्टिगत यानाः नखःचखः हनेगु याःगु जुइमाः । उकिं हे नखःचखः पतिं कृषि उत्पादनयात दृष्टिगत यानाः नखः चखः हना वयेगु याना वयाच्वंगु दु ।

नेवाः जातिं हना वयाच्वंगु नखः चखः सकसिनं समानकथं हना वयाच्वंगु मदु । मोहनि नखः छगू हे जक सकसिनं तःजिक हनिगु नखः जूसा मेमेगु नखः गुम्हस्यां नखः कथं हनेगु याःसां गुम्हसिनं चखःकथं हनेगु याना वयाच्वंगु दु । उकिं सुयां नखःसा सुयां चखः, सुयां चखःसा सुयां अःखः धयागु धापू थौतक्क नं नेवाः समाजय् भेलय् पुनाच्वंगु व्यावहारिक खँपु खः ।

खाइसल्लु

विक्रम संवत्तया न्हापागु दिं अर्थात् बैशाख १ गतेयात् नेवाःतय्सं थःगु हे पहःकथं खाइसल्लु धकाः नामाकरण यानातःगु दु । नेवाःतय्सं हनावयाच्चंगु परम्परागत नखः चखः नेपाल संवत्तया तिथि मितिकथं हनेगु यानावयाच्चंगु दु सा विक्रम संवत्तया छुं छुं दियात नं नखः चखः कथं हनावयाच्चंगु मदुगु मखु । नेवाःतय्सं गुलि नं नखः चखः दु अप्वः धयाःथें धार्मिक अनुरूप बुज्याया पाखें वःगु फल अर्थात् कृषि उत्पादन नाप सम्बन्धित नसा त्वेसा नयाः मौसम अनुसारया वःगु ल्वय् ब्वमलंकेगुलिइ केन्द्रित खः ।

बैशाख महिना प्राकृतिक तापमान कथं तांन्वःगु महिना खः । तां न्वयाः मनूया स्वास्थ्य गरवरी ल्वचय् वडगु पने कथं हनेगु नखःचखः मध्यय् खाइसल्लु नं छगू खः । खाइसल्लुयात् नेवाःतय्सं साधारण चखः कथं हनेगु याः । थ्व चखः विशेष यानाः तां न्वःबलय् प्वाथय् दुने हानिकारक कीत च्वनाः स्वास्थ्ययात् मस्यंकेमा धैगु धारणाय् खायुगु क्वाति त्वनाः प्वाथय् दुने च्वंगु हानिकारक कीत स्याये कथं हनीगु चखः खः ।

थ्वकुन्हु साधारण सुचिनिचि यानाः साधारण द्यः पूजा यानाः द्यःयात् खाइक्वाति छानाः छैं जःपिं मुनाः हनिगु चखः खः । थ्व चखः हनिगु इलय् बुँड लैं पिनाः, लैया बुँ ह्वयाच्चनिगु, बसन्त ऋतुं सिमाया चुलिचुलि जायेकेगुलिइ खाइबःसि माय् नं चुलिचुलि जाया वडगुलिं व हे खाइच्चःचा खाइक्वातिया मुख्यगु नसाया रुपय् न्ह्यब्वयेगु खः । अथे तं चिग्वः कय्गु तग्वः कय्गुया कःछे सडगु ई कुन बुँ ह्वया च्वनिगु ई जगुलिं विशेष थुपिं हे कृषि उत्पादनया नसा तयाः क्वाति दायेकाः त्वनिगु खः । क्वाति दायेकेगुलिइ न्ह्यागु नं तयेफु तर विशेष यानाः दायेकेगुलिइ तैगु विशेष ज्वलं थये खः ।

१ खाइच्चःचा

२. लैसू - लैलय् बुँ ह्वये धुकुंगुलिं लैसू दयेकाः तयार जुडगु खः ।

३. लैसि - लैया बुँ

४. कःछे - तग्वः कय्गु / चिग्वः कय्गु कःछे

५. कुनःबुँ -

६. जाकि सिया चु

७. थ्व इलय् खनेदैगु वाउँचा / प्याज / छाःचा आदि

नेवाःतय्सं क्वाति त्वनेगु नखःचखः मध्यय् थ्व चखः कुन्हु खालि वाउँचा (vegetable) या जक क्वाति दयेका त्वकिगु/त्वनिगु दिं खः । थ्व दिं कुन्हु बागद्वारया सपं तिर्थय् वनाः म्वःल्ह्याः दान धर्म यानाः, खाइ क्वाति दान यानाः लिहां वयाः खाइ क्वाति त्वनेगु याः ।

अक्षय तृतीया

बछलाश्वः ३ कुन्हु अर्थात् बैशाख शुक्ल तृतीया कुन्हुया दिनयात नेवाः परंपरा कथं अक्षय तृतीया धायेगु याः । त्रेतायुग सुरू जूगु दिक्थं हनिंगु श्व न्हि कुन्हु बुद्धमार्गीपिसं दिपंकर बुद्धयात पूजा यानाः पञ्चदान बीगु साखःति चप्पा, चिग्वः कय्गु फ्वयाः दान यायेगु नं चलन दु । येंया १८ गू त्वाःया ज्यापुतय्सं सायात छ्वकुमना नकेगु चलन नं दु । साधारण चखःकथं हना वयाच्चंगु श्व दिं कुन्हु किलागःया देवी प्याखं हयाः हनुमान ध्वाखाया लायकुलिइ हुइकेगु नं यानावयाच्चंगु दु ।

अक्षय तृतीया तांन्वःगु इलय् जूगुलिं त्वाः त्वालय् देव देवालय, चुक, गल्ली लें आदि थाय् थासय् साखःति दयेका लेंय् जुइपिं मनूतय्त, बाहाः चुकय् च्वपिं, त्वाः त्वाःयापिं मनूतय्त साखःति त्वंकेगुया नापनापं चप्पा, चिग्वः कय्गु फ्वयाः नं नकेगु याइ ।

बुंगःछः रथय् तये धुकलकि गुलिं गुलिं मनूत वनाः बुंगःछःयाथाय् वनाः बुंगःछः दर्शन याःवःपिं भक्तजनपिन्त साखःति, चप्पा, आदि नं दान यायेगु याः । बुंगःछः पूजा याइबलय् विशेष यानाः चप्पा साखःति तयाः नं पूजा यायेगु याः ।

नेपाः कृषि प्रधान देश खः । नेवाः समाजया परम्परा कथं बुज्या याइपिं ज्यापु जाति खः । श्व नखःयात ज्यापु जाति थःगु कृषि उत्पादननाप सम्बन्धित यानाः नं ज्या न्ह्याकाच्चंगु खनेदु । अक्षय तृतीया कुन्हु ज्यापुतय्सं सिनाज्या न्यायेकीबलय् क्वातुक बांलाक याये फयेमाः धकाः भुतिसलय् बौ तयाः छैय् छैय् भूत दुबिकेगु धकाः नं यायेगु चलन दु । भूत दुबित धायेवं थाकूगु ज्या याःसां त्यानु मचासे सक्रिय जुइफै धयागु बिश्वास दु । थनंसिं हे ज्यापुतय्सं थःगु मुख्य कृषि उत्पादनयात शक्ति संचयया पूर्व तयारी याइगु खः । भूत छैय् छैय् दुतकाये धुकाः निसं झारावान्ता जुइ धायेगु नं चलन दु ।

हिन्दू धर्माबलम्बीतय्त अक्षय तृतीयायात महाद्यः व पार्वतीया इहिपाः जूगु दिक्थं कायेगु याः । महाद्यः व पार्वतीया इहिपाः जूगु दिं जूगुलिं यानाः श्व दिं कुन्हु अप्वःसिया इहिपाः यायेगु चलन दु । श्व दिन कुन्हु इहिपाः यायेत साइत तकं स्वये म्वाः धैगु जन विश्वास दु । बौद्ध धर्माबलम्बीतय्सं श्व न्हिकुन्हु त्रेतायुगया

उदय जूगु तःधंगु दिन धकाः श्व दिक्कुन्हु इहिपा याये भिं धायेगु चलन नं दु । बौद्धमार्गीपिसं नं भिंगु दिं धकाः इहिपाःयात साइत स्वयेमाःगु आवश्यकता तायेकाच्चंगु धाःसा खनेमदु ।

हिन्दू धर्माबलम्बी व बौद्ध धर्माबलम्बी निगुलिं धर्म माने याइपिसं हनिंगु श्व दिन कुन्हु साखःति, चप्पा निगुलिं धर्माबलम्बीपिसं दान यायेगु व त्वंकेगु, नकेगु यायेगु याइ । बौद्ध धर्माबलम्बीपिसं दिपंकर बुद्धया जन्म जूगु दिनकथं पञ्चदानया नापनापं साखःति, चप्पा, चिग्वःगु कय्गु (स्वंगुलिं शक्ति बीगु नसा त्वंसा) आदि नं दान यायेगु चलन दु । बुज्या याइपिं ज्यापुपिनिगु लागि श्व दिन साखःति त्वनाः, चप्पा व चिग्वः कय्गु नयाः सिनाज्याया लागि बल्लाकेगु कथं प्रतीकात्मक दिन कथं कयातःगु खः ।

साखःति दयेकेगु तरिका

यला, पिपि, सुकुमेल, दालचिनी साखःति निन्हु न्ह्यः फ्वयाः त्वनेगु दिन कुन्हु लखय् तयाः दयेकीगु खः । साखःति दयेकेगुलिइ नैक्याःया रस तयेगु नं चलन दु । आधुनिक प्रभाव लाःपिसं साखःया सत्ता चिनि तयेगु नं याः । चिनि तयेगु याःसां साखः छुं भतिचा नं तयेगु याइ । यला, सुकुमेल, पिपि आदि मसला तयाः चाया घःचाय् तयेगु याइगुलिं श्व लः ख्वाँउँक सिचुक त्वनेगु जुइ । आधुनिक प्रविधियात मध्यस्थ परंपरागत कथं छ्यलेबुले कथं चाया घःचाय् साखःति तयेगु चलन दु । साखःति दान याइबलय् चाया ग्वपचा वा अँपचाय् तयाः दान यायेगु चलन दु ।

स्वांयापुन्हि

बैशाख शुक्ल पूर्णिमा कुन्हु सिद्धार्थ गौतम बुद्धया जन्म जूगु दिं खः । बोधिज्ञान नापं निर्वाण नं प्राप्त थ्व हे न्हि कुन्हु जूगु खः । उकिं थ्व न्हिकुन्हु बौद्ध धर्माबलम्बीपिसं भगवान् बुद्धयात लुमंकाः छैय् छैय् भगवान् बुद्धयात पूजा यायेगु, बौद्ध धर्वाय् ब्वयेकेगु, गुम्ह गुम्ह पञ्चशीलय् च्वनेगु, गुम्ह अष्टशीलय् च्वनेगु, अले ध्यानय् च्वनेगु नं थ्व न्हि कुन्हुनिसं याइ । थ्व कुन्हु विशेष यानाः हिंसा यायेगु जुइ मखु । ला मनसं भोजन यायेगु चलन दु । नापं बिहार बिहारपतिं बुद्ध पूजा यायेगु बुद्धया अस्ति धातुयात शहरय् परिक्रमा यायेगु ज्या नं थ्व कुन्हु जुइ । बौद्ध धर्माबलम्बीपिनिगु नितिं थ्व दिं साप हे महत्वपूर्ण जू ।

मांया ख्वाः स्वयेगु

बैशाख कृष्ण पक्ष औंसी/ चौलागाः औंसी कुन्हु थःपिन्त जन्म यानातःम्ह मांयात हनेगु, लुमंकेगु, भक्तिभाव यायेगु दियात मांया ख्वाः स्वयेगु दिन धकाः हना वयाच्वन । थ्व दियात खालि नेवाः समाजय् जक प्रचलित जूगु मजुसे नेवाः मखुपिं मेमेगु जातिं नं हनेगु याः । थःत जन्म ब्यूम्ह मांया महिमायात लुमंकाः हनिगु दिन हे मांया ख्वाः स्वयेगु खः । पाश्चात्य समाजय् Mother Day धकाः हनिगु दिन व मांया ख्वाः स्वयेगु दिं छन्हु हे मखुसां नेवाःतय्गु परंपरागत संस्कृतिकथं समाज वा राष्ट्र वा मानव मात्रया ज्या न्ह्याःवनेगु कथं ज्या यानावपिं वा ज्या याःपिन्त अमिगु ज्यायात लुमंकाः हनेगु चलन दु । अथे तुं थःथःपिन्त संसार खंकाः सृष्टि यानाः, सुसाकुसा यानाः हुकंयाःम्ह मांया महत्व लुमंके कथं हनिगु दिं मांया ख्वाः स्वयेगु खः । मां जुयाः स्वानाच्वपिं मांयात थःम्ह जन्म यानातःम्ह काय् न्ह्याय्पिसं मांयात ग्वःसगं (खैय् सगं वा ला मनःपिन्त लड्डु सगं) बियाः मांयात यःगु नसा त्वंसा नकेगु चलन दु ।

मांया ख्वाः स्वयेगु छगू हे तुं जूसां थःम्ह बुइकातःपिं मचातय्स ख्वाः स्वयेगुयात विशेष यानाः निथी कथं खनेदु -

१) मां स्वर्गे जुइधुकूपिसं मांया ख्वाः स्वइगु

२) मां दुपिसं ख्वाः स्वइगु

१) मां स्वर्गे जुइधुकूपिसं मांया ख्वाः स्वइगु

मां स्वर्गे जुइधुकूपिसं थःमांयात दीर्घायु कामना यायेगु ला खं हे मन्त । मामं यानावंगु गुण व थःत जन्म याःम्ह मांयात लुमंकाः निसलाः वा सिधा दान यायेगु व मांया नामय् सराद्ध यायेगु, जलदान यायेगु चलन नं दु । मां मदुपिसं थः मांयात लुमंकाः सी धुंकाः नं पुनरजन्म जुइ धैगुलिइ विश्वास याइगु जगुलिं

मांया नामं सराद्ध व निसलाः व जलदान यात धाःसा पुनरजन्म जूम्ह मांया नये खनी धयागु धापू दु । मदयेधुकूपिं न्ह्याम्हेसिया नामय् जूसा नं निसलाः, सिधा, सराद्ध, जलदान न्ह्यागु हे याःसां नं दकले न्हापां थःगु छँ नीसी यायेगु, निसलाः बीम्हसिया म्वःल्ह्याः नी लं पुनाः बीगु चलन दु । निसलाः, सिधा थःथः पुरोहितया मिसापिन्त बीगु चलन दु । गुरुजु वा पुरोहित मन्त धाःसा छःछःया मन्दिरय् वनाः थः मांया नामय् छःयात निसलाः सिधा छायेगु चलन दु ।

निसलाः धकाः अन्नया रूपय् बजि, महि, फलफूल, मसलाया रूपय् पालु व चि व धौ/दुरु बीगु चलन नं दु ।

सिधा धकाः न्हि निछाः नयेगु जाया रूपय् जाकि, कै, तरकारी, मसला, घ्यः, सिं आदि बीगु चलन दु ।

जलदान धकाः पञ्चामृत तयाः ग्वंपचाय्, लः तयाः दान बीगु खः अथें तुं सराद्ध याइगु खः । सराद्ध विशेष यानाः मातातीर्थय् वनाः सराद्ध यायेगु चलन दु । मांया छ्वाः स्वयेगु दिनय् जलदान व सराद्ध याइपिं खास यानाः थः मां मदुगु दिन लुमं मजुपिं व सराद्ध यायेगु याना मतःपिसं याइगु खः । सराद्ध याइपिसं विशेष यानाः मातातीर्थय् वनाः यायेगु चलन दु ।

सराद्ध जक मयासे निसलाः सिधा बीपि नं वा जलदान न्ह्यागु यायेत नं मातातीर्थय् वनाः बीगु याइपिं नं दु । मांया छ्वाः स्वयेकुन्हु मातातीर्थय् दुने थः मदये धुकूम्ह मां खनी धयागु जन धारणा दु । थ्व जनधारणा अथें दुगु मखु । जनधारणायात म्वाकेकथं लोकबाखं नं दु । थ्व लोकबाखंयात थीथी कथं धायेगु याना वयाच्वंगु दु । न्ह्यागु हे लोकबाखं जूसां नं मातातीर्थय् मदुम्ह मां लुमंकाः नसा तया बी । थुबलय् मदये धुकूम्ह मां हे वयाः ल्हाः फयाः नयेगु काइ धयागु चलन धाःसा दु । थथे मामं काःगु दिन धयागु बैशाख कृष्ण औसीकुन्हु लाःगुलिं व हे दिनयात मांया छ्वाः स्वयेगु कथं कयावयाच्वंगु खः । अथे जूगुलिं हे मां मदये धुकूपिसं मातातीर्थय् थः मांया छ्वाः स्वये दइ धयागु आशाय् मातातीर्थय् वनाः निसलाः, सिधा, सराद्ध याना कुण्डय् कुर्का छ्वयेगु वा तयेगु चलन दु ।

२) मां दुपिसं छ्वाः स्वइगु

मां दनिपिसं मांयात छ्वाः स्वयेगु धकाः थः थःपिन्त बुइकातःपिं मां मापिन्त छँय् सगं बियाः महिचहि, फलफूल लः ल्हानाबीगु याइ अले मांयात तुति

भागियायेगु याइ । मचाजंकु याये धुकूम्ह मचानिसेंया मन्तय्सं मांया छ्वाः स्वयेगु चलन दु ।

विवाह यानावपिं न्ह्याय्मचातय्सं विवाह यानाया दकले न्हापांगु दँय् मांया छ्वाः स्वयेगु धकाः भाःतपिं पाखे बजि, महि, फलफूल, छँय् सगं, लोसा घासा समेत तयाः मांयात छ्वाः म्वः वयेगु चलन दु । विवाह यानाः मां व अबुया छ्वाः स्वयेगु धकाः थःछँय् ल्हाः स्वयेगु कु ज्वना वइ । मांया छ्वाः स्वयेगु जूसा अबु व अबुया छ्वाः स्वयेगु जूसा मांयात उलि उलि हे नसा घासा तयाः छँय् सगं बीगु चलन दु । तुलि हे जक पाः मांया छ्वाः स्वयेबलय् न्हापां मांयात छँय् सगं लःल्हाइ । मां अबुयात जक मखु छँय् च्वपिं जःपिन्त नं महिचहि तयाः पाहाँ याकेगु चलन दु । मांया छ्वाः स्वयेकुन्हु मां मदुपिसं म्वः ल्ह्याः सुचुपिचु यायेगु चलन दु तर मां दुपिसं उखुन्हु म्वः ल्हइ मज्यू धैगु छगू चलन दु । अथें तुं मां दुपिसं उखुन्हुया दिनय् वसः हि ज्यू तर मां मदुपिसं धाःसा उखुन्हुया दिनय् वसः हि मज्यू धायेगु चलन नं दु । मां मदुपिं तर मां धकाः सुयातं हना तयेगु जुल धाःसा बुइकातःम्ह मांया नामं म्वः ल्ह्याः सुचि नियम यानाः मदुम्ह मांया नामं निसलाः सिधा आदि दान याइ । थुलि यायेधुंकाः मांकथं हनातःपिं मापिन्त मां दुपिसं थें महिचहि तयाः छँय् सगं बिया छ्वाः स्वयेगु चलन दु । मां मदयेकाः अबु मेम्ह मिसा विवाह यानाः चिरमां दत धाःसा थः मांया नामं निसलाः बिया लिपा चिरमांयात छ्वाः स्वयेगु चलन नं दु । विवाह मजुपिं स्वयां विवाह जुइ धुकूपिं न्ह्याय्मचातयत् भाःतपिनि थासं वयाः मांयात थें चिरमांयात व छँय् च्वपिं मचातय्सं छ्वाः स्वयेगु चलन दु । अथे तुं सुयां मां यानातःगु दु सा मांयात थें हे थ्वकुन्हु छ्वाः स्वयेगु याः । थ्याकमचाया रूपय् कयातःपिं मचातय्सं नं मां धकाः छ्वाः स्वयेगु याः ।

मां मखयाः नं मां कथं छ्वाः स्वयेगु याना तल धाःसा समाजं मां कथं छ्वाः स्वःम्ह व स्वकूम्ह निम्हेसिगु दथुइ तच्चवं सतिगु स्वापू खंकेगु याः । नापं मांया छ्वाः स्वयातःपिं मन्तय् दथुइ क्वातुगु सम्बन्ध दैगु स्वाभाविक खः । सुयां त्वाय्चिना तःसा त्वाय् मांयात गुम्ह गुम्हसिनं मांया छ्वाः स्वयेगु नं याः ।

मांया छ्वाः स्वयेगु छगू मांयात दीर्घायु व भिसुसाःया कामना यायेगु ला जुल वया नापनापं छ्वाः स्वःम्ह व स्वकूम्हसिगु दथुइ क्वातुगु स्वापू स्वाइगु जुल । बिया छ्वये धुकूम्ह न्ह्याय्मचा थःछँय् सतिना च्वनीगु स्वाभाविक खः । अथे तुं मां यानाः छ्वाः स्वयेगु धयागु भावनात्मक सम्बन्ध क्वातुकेगुया नाप काय् वा न्ह्याय्या रूपय् स्वीकार याके बीगु खः । अथे तुं छ्वाः स्वःपिन्त काय् न्ह्याय् सरह व्यवहार यायेगु भावना पिदनीगु खः ।

थ्व दिन मां दुपिनिया लागि न्ह्याइपुगु उत्सवया दिं थें जूसा मां मदयेधुकूपिन्त मां लुमंकाः म्हाइपुकेगु दिं नं खः । मांया छ्वाः स्वयेबलय् विशेष यानाः महिचहि तयाः मांया छ्वाः स्वयेगु जूगुलिं पसः पसलय् महि ब्वयेगु जुइ । न्हापां पसः महि तयेगु जूगुलिं महि पसः पसलय् आपाल आपाः थी थी महि दया

चवनी । थौकन्हय् न्हून्हुगु केक वा पसः महि दया वःगुलिं थज्याःगु नं तयेगु याः ।
थःथःगु इच्छा अनुसार नयेगु जूगुलिं सहर बजारय् थी थी महि नं खनेदै । नयेगुलिइ
मांया छ्वाः स्वयेबलय् महिचहि, फलफूल, बजि, धउ/दुरू गुम्ह गुम्हसिया थः मांयात
यःगु घासात दयेका यंकेगु चलन नं दु ।

समाजय् दक्वसिया व्यवहार व हे तुं मखु । साधारण छ्वाः
स्वयेगुनिसैं तःजिक छ्वाः स्वयेगु स्वयां अप्वः क्यने थें नं न्याचवंगु दु ।

मां दुपिं मनूतय्सं विशेष यानाः मिसापिं बालक झःझः धायेकाः
तिसा वसः तियाः छ्वाः स्ववनेगु चलन दु ।

मांया छ्वाः स्वयेगु धकाः मांमदुपिसं निसलाः, सिदा आदि मांया
नामं दान यायेत म्वः ल्हुइगु याइ । मां दुपिं काय् म्हायापिसं थ्व कुन्हु म्वः
ल्हुइमखु । मां दु मदु सिकेगु चिं धयागु हे म्वः ल्हुयातःपिं व मतःपिं खः ।

सिथि नखः

परिचय : जेष्ठ कृष्ण चःहेकुन्हु पिगं पीठय् विशेष यानाः “सिनाज्या याइपिसं
शक्ति सञ्चय यायेगु जूसा जेष्ठ शुक्ल षष्ठीयात सिथिनखः कथं हनेगु याः । सिथि
नखःयात कुमार षष्ठी नं धायेगु चलन दु । थ्व दिनकुन्हु कुमारयात विशेष यानाः
पूजा यानाः कुमारयात जात्रा यायेगु चलन दु । नेवाः समाजय् गणेश व कुमारया
बिस्कंगु स्थान दु । छुं नं ज्या यायेबलय् बिघ्न बाधा मवयेमा धकाः गणेशयात पूजा
यायेगु जूसा ज्या वा पूजा बांलाक न्त्याये मा धकाः पिखालखुइ कुमारयात पूजा
यायेगु चलन दु । नेवाः समाजय् मूलखा न्त्यःने पिखालखु जुइ अत हे कुमारया
वासस्थान खः । पिखालखुइ हिन्दुमार्गीपिसं कुमार कथं नालेगु याःसा बौद्धमार्गीपिसं
वयात हे क्षेत्रपाल कथं हनेगु याः । अथेतुं प्रत्येक त्वाःत्वालय् छम्ह छम्ह स्थान
गणेश धकाः दु ।

सिथिनखः षष्ठी जेष्ठ शुक्ल षष्ठीकुन्हु हनीगु षष्ठीया अपभ्रंस जुयाः
सिथि जुयाब्यूगु खः । थुकिया मुख्य नां षष्ठी नखः खः । थ्व सिथि नखःयात कुमार
षष्ठी धायेगु याः । थ्व कुन्हु हे कुमार जन्म जूगु दिं जूगुलिं धायेगु याःगु खः ।

कुमार जन्म जूगु बारे महाद्यः व पार्वती निम्ह तिपूया लिला
न्त्याका वंगु इलय् लाक हे स्वर्गय् दानवपिं वयाः स्वर्गया द्यःपिं नाप लाः बल उगु
इलय् छु याये छुयाये जुयाः महाद्यःयाथाय् दक्व द्यःपिं वयाः नापलाः बल । उगु
इलय् महाद्यःया कामाग्नी दनावःगु जुयाचवन । उगु कामाग्नी पार्वतीयाथाय् लाये
माःगुलिइ पिने इन्द्रपिं वःगुलिं कामाग्नी चूरम्ह महाद्यवं थःगु अन्तपुरं खापा
चायेकाः तं प्वकूबलय् व हे कामाग्नी वनाः इन्द्रयात जू वन । इन्द्रं कामाग्नी पुनाः
स्यायेगुयां लागि थः गंगाया लखय् वनाः शान्त याःबलय् महाद्यःया कामाग्नी इन्द्रया
शरीरं गंगाया लाःवन । व हे गंगाया स्वर्गया परीपिं म्वःल्ह वःगु जुयाचवन । गंगाया
चुइका वनाचवंगु महाद्यःया कामाग्नी वनाः छव्व जुयाः म्वः ल्हुयाचवम्ह
परीपिन्तलाःवनी छम्हछम्ह परिं छगू छगू खँय् पूर्णपिं, अमिसं थःथःगु प्वाथय् चवम्ह

मचायात थःथःगु गुणं पूर्ण यात । लिपा गुम्हसिनं नं छम्ह हे जक मचा बुइकल व खः कुमार । थ्व हे कुमारयात महादेवं हयाः पार्वतीयात काय् धकाः लः ल्हानाबिल । कुमारया जन्म षष्ठीकुन्हु जक जूगु मखु कुमारयात जन्म हे खुम्ह मामं यात । थुकथं कुमार नापनापं षष्ठी स्वानावयेगु जुल । अले कुमार षष्ठी धायेगु जुल ।

सिथिनखः अर्थात कुमार षष्ठीयात रावण संजिता षष्ठी धकाः नं धायेगु धाः । छायाःसा थ्वकुन्हु अयोध्यायाया जुजु दशरथया तःधिकाःम्ह काय् रामचन्द्रं थः तिरिमयजुयात रावणं हरण यानायंकूगु जूगुलिं रावणनाप ल्वानाः त्याकूगु दिं नं खः । थुकिं थ्व दिनयात रावण संजिता षष्ठी नं धायेगु याः । अर्थात रावण पराजित जूगुदिं धकाः नं धायेगु नं याः ।

बौद्ध मार्गीपिसं थ्व दिनयात भगवानबुद्ध न्हापा महासत्व जुयाः जन्म काःबलय् थौकन्ह्य नमुरा (नमो बुद्ध) धयागु थासय् मचा बुया अशक्त जुयाच्चम्ह धुंयात थःथम्ह थःगु ला ध्यनाः नकाः निर्वाण प्राप्त जूगु दिं कथं नं कायेगु याः । अथे जूगुलिं थ्वकुन्हु तक्क महासत्व राजकुमारया म्ये हालेगु चलन दु ।

सिथिनखःकुन्हु बैय् गोवरं चाकलाक इलाः उकिइ छःने खुहः दुगु पलेस्वां च्वयाः श्री कुमार (सिथिद्यः) या आराधना यायां पंचोपचार पूजा यात धाःसा व पूजा यायेबलय् माय् मू वा कःसूवः, चतामरि, दुसिमरि व कःनि मरि व खुताजि तरकारी छाल धाःसा छैय् छुं कथं विघ्न बाधा वइमखु धयागु जनधारणा दु । अथे तुं मोहनिबलय् भुतुमालि ब्वयेकी थें थ्वकुन्हु नं छैखा छैखा पतिं पलिइ पलिइ भ्वंयागु फयलिंचा चाःहीकेगु याइगु नं खः । थ्व प्रचलनत थौकन्ह्य उलि खनेमदुसां च्याकुं दुगु व छक् छक् कुं पतिकं पलेस्वां च्वयातःगु भ्वंयागु वा कापःयागु फयलिंचा ब्वयेकेगु यात धाःसा फुक्क दोषं मुक्त जुइ अष्ट महाभयं रक्षा जुइ अले अष्टसिद्धि दइ धयागु धापू दु ।

सफासुगधर

थ्व नखः धुनेवं सिनाज्या जुइगुलिं छैय् सफासुगधर याये लाइमखु धकाः छै छखां बै पुनाः, बै थिलेगु, छै जः सकसियां सफा सुगधर यानाः म्वः ल्हुइगु ज्या नं थ्वकुन्हु जुइ । खुताजि वः व खुताजि तरकारी अप्वः यानाः वः तयाः कुमारयात पूजा यायेगु याः । नापनापं कुमारया नामं व्रत च्वबनेगु, थःथः आगमय् छःछःपिन्त पूजा यानाः वः छायेगु नं चलन दु ।

थःथःगु म्ह व छैय् जक सफासुगधर याइगु मखुसैं सिनाज्या ज्वःछिं वा वइबलय् फोहर जुइ धकाः त्वाःत्वालय् च्वंगु तुं जरं बूंगाः चुक धः सफा यानाः दछि यंकयात लः सफा यायेगु नं जुइ । थ्वकुन्हु विशेष यानाः लः बुयावइगु मुहान सफा याइगु खः । सिथिनखः धुंकाः लिपानिसैं थःथःगु बूँइ वा पीगु ज्या न्ह्याकेगु जूगुलिं सिथि नखः छगू कथं शक्ति वा वः नयाः बल पिकायेगु जूसा मेगु सफा लः त्वनाः सुस्वास्थ्य जुइगु कथंया नखः हनेगु खः । यलय् बूंगद्यः रथय् तसानिसैं न्ह्याइगु देगुपुजा सिथि नखःकुन्हुतक हे जक न्यायेकेगु परम्परा दु । यदि सुयां देगुपुजा मदु वा देगुपुजाया दिनकुन्हु देगुपुजा याये मखन वा देगुपुजाया दिं मसिल धाःसा अज्याःपिं फुक्कसित थ्व दिनकुन्हु हे देगुपुजा न्यायेकीगु नं चलन दु । दिगुद्यः पूजा यायेगुलिइ छैय् छैय् च्वम्ह दिगुद्यः पूजा यायेगु जक मखु दिगुद्यः दुगु छ्यलय्तक वनाः नं पूजा याः वनेगु नं याइ ।

सिथिद्यःया जात्रा

सिथि नखःकुन्हु न्हगलय् सिथिद्यः ब्वयेगु नं परम्परा दु । थ्वबलय् भक्तजनपिं थी थी वः नापं समयबजि तयाः पूजा याःवइ । वयां कन्ह्यकुन्हु सिथिद्यः रथय् तयाः यँया शहर परिक्रमा यानाः जात्रा याइ ।

मनोरञ्जन

सिथिनखःतक महासत्व राजकुमारया नापनापं कोला म्ये हालेगु याइ । थ्वयां कन्ह्य कुन्हुनिसैं सिनाज्या म्ये हालेगु सुरू जुइ । सिनाज्या म्येया सुरू धयागु हे सिनाज्याया सुरू खः । उकिं सिथि नखतं सिनाज्या सुरू जुइ । सिनाज्याबलय् ज्या थाकुक याये माःगुलिं साःसाःगु नयाः, मनोरञ्जन यानाः मनयात स्वच्छ यायेगु नं जुइ । थुबलय्निसैं ज्यापुतय् बाजं थाये मज्यू अर्थात सिनाज्या ज्वःछिं बाजं थायेमज्यू धकाः थाइमखु । थ्व नखः धुंकाः सिनाज्या सुरू जुइगुलिं सी दुकि सिथि नखःबलय् मनूतय् छै सामाज्या थें अन्नं परिपूर्ण जुइमखु । उकिं थ्व

नखः नेवाःतय् दछि यंक हनीगु नखः मध्यय् दकले लिपायागु नखः खः । अर्थात् दछि यंकया क्वचाःगु नखः खः । श्व नखःयात म्थ्याय्मचा नखः धकाः नं धायेगु याः । श्व नखः तःजिक हनेमाःगु नखः मध्यय् छगू खः । उकिं श्व नखःबलय् म्थ्याय्मचातय् नखत्या ब्वनाः थीथी परिकारया वः नकेगु परम्परा नं दु ।

श्व नखःबलय् गनं गनं गामय् वा खुसि सिथय् निगू पुचः दुने छगू पुचलं मेगु पुचःयात त्वहँत कयेकाः हि बाः वयेकावीगु नं अन्ध परम्परा दु । अथे पिहाँवःगु हि धयागु काली वा अजिमापिन्त छायेगु धयागु परम्परागत धापू दु । थौकन्हय् श्व परम्परा पूर्णतया न्हावने धुंकूगु दु । श्व परम्परायात जङ्गबहादुर न्हंकाछ्वःगु खः । लःया मुहान सफा याये न्ह्यः अन दुपिं नागतय् शान्त यायेत पुई हायेगु नं चलन दु । प्रत्येक लःया मुहानय् लः वयेके बीगुया लागि नागतय्सं बास याना च्वनी धयागु जनविश्वास नं दु ।

सिथि नखःबलय् छःयात छाडगु वः व चतामहि दुने मनोवैज्ञानिक कथं नं विश्लेषण यायेगु जुड । कृषि उत्पादन मध्यय् दकले तःजिगु धयागु वा बाय् जाकि खः । सिनाज्या सुरू जुड छुं ई न्ह्यः हनीगु सिथि नखः खः । जाकिचुंया चतामहि पृथ्वी, उकिड छःने तडगु थीथी वः आकाशया प्रतीकात्मक चिं खः धाइपिं नं समाजय् दु । चतामहि पृथ्वी, वः परिकार पृथ्वी दुनेच्वपिं परिवारया प्रतीकात्मक चिं खः ।

सिनाज्या याडबलय् पृथ्वीड याड । तर श्वयात माःगु लः फय्, तेज फुकं च्वं वड अर्थात् आकाशं वड । अझ धायेगु हे खःसा तःताजि वः धयागु हे पञ्चतत्वया चिं खः ।

सिथि नखःया कुमार जात्रा

नेवाःतय्सं दछि यंक हनाः वयाच्वंगु नखः मध्यय् सिथि नखः खालि नखः न्यायेकाः चतामहि, थीथी बूबःया वः घासा खुताजि नयाः तुं, बूंगाः, जःहं आदि लःया मुहान जक सफा याडगु मखु । श्वया नापनापं कुमार अर्थात् सिथिद्यः नं जात्रा यायेगु चलन दु । श्व कुमार जात्रा व सिथिद्यःया जात्रा न्हापा न्हापा यँ, यल व ख्वप स्वथासं यायेगु याः । तर थौकन्हय् श्व छःयात खालि यँय् जक जात्रा यायेगु चलन ल्यानाच्वंगु दनी । झीगु नेवाः संस्कृतिड कुमारया बिस्कं थाय् दुगु जूगुलिं श्व छःयात पिखालखुड हे तयेगु चलन दु । छुं नं पूजा वा ततःधंगु कर्मकाण्ड यायेबलय् पूजा न्ह्याके न्ह्यः पिखालखुड कुमारयात पूजा याये धुंकाःतिनि मेमेपिं

छः पूजा यायेगु चलन दु । महायानीतय्सं पिखालखुड क्षेत्रपाल कथं माने याडगु जूसां मेपिसं कुमार कथं माने याड । श्वया बारे धार्मिक धारणा छु दु धाःसा महाद्यवं थः कायपिं निम्ह गणेश व कुमारयात सुमेरू पर्वत चाःहिला वा, न्हापां थ्यंकः वःम्हेसित वरदान बी धकाः उजं यात । निम्हं दाजुकिजापिं सुमेरू पर्वत चाःह्य वनेत तयार जुल । तर फरक फरक धंगं मांअबुं धाःथें वन । कुमारया बाहान म्हाय्खा उकिं वया म्हाय् च्वनाः कुमार ब्वयाः सुमेरू पर्वत चाःह्य वन । तर गणेश धाःसा लमं उकिंसं प्वाः नं तग्वःम्ह बाहन जुल तिछुं । कुमार थें सुमेरू पर्वत नं चाःह्य वनेत यक्व ई काडगु जुल । हानं लँय् सुं नं पशुपंक्षीं खन धाःसा तिछुंयात अथें स्यानावी । उकिं गणेशं महाद्यः व पार्वती च्वनाच्वंथाय् वनाः निम्हसितं चाःहिलाः मांअबुं धैम्ह हे थःगु लागि फुकं खः । उकिं सुमेरू पर्वत धयागु मांअबुं हे खः धकाः विद्वतापूर्वक थःगु बिचाः प्वकुसेलि गणेशं धाःगु खँ खः धकाः महाद्यः प्रसन्न जुयाः वरदान बिल । गुगु वरदान कथं सुनां नं पूजा यात धाःसा दकले न्हापां गणेशया निं पूजा यायेमाः नत्र उकिया फल दइमखु । उकिं त्वाः त्वालय् स्थान गणेश कथं पूजा का धकाः धयाबिज्यात । अनं लिपा कुमार म्हाय्खाय् च्वनाः सुमेरू पर्वत दक्व चाःहिलाः अबुयाथाय् लिहां वःबलय् गणेश थ्यनाच्वने धुंकल । कुमार स्वयां न्हापां थ्यंका च्वंगुलिं कुमार अजू चाल । थःम्हं सुमेरू पर्वत धाःथें चाःहिला वयागु तर गनं नाप मलाःम्ह, ध्वमदुम्ह गणेश खंगुलि अजू चाडगु स्वाभाविक खः । तर गणेशं मांअबुं अर्थात् महाद्यः व पार्वती निम्हं च्वना च्वंथाय् वनाः मां अबुयात चाःहिलागु खँ न्ह्यथसेलि मांअबुं वाः चाल । अले गणेशः स्वयाः न्हापां पूजा याकेत पिखालखुड वासस्थान धकाः उजं दयेका बिज्यात । मांअबुया आज्ञा सिरोंपर यानाः पिखालखुड थःगु स्थान काल । श्व कथं झीगु धार्मिक व सांस्कृतिक परम्पराय् कुमारया बिस्कंगु थाय् दु । पिखालखुड च्वनाः छँ छँया रक्षा यायेगु कुमारया ज्या खः । उकिं कुमारयात क्षेत्रपाल धकाः नं कायेगु याः ।

प्राचीनकालय् कुमारयात क्वाथः नायः कथं हनेगु परम्परा दु । उगु इलय् गथे थाय् थासय् कुमारी दु अथे तुं थाय् थासय् कुमार नं दु । लाय्कूया कुमारी छः जात्रा याये थें तुं लाय्कूया कुमार जात्रा यायेगु नं चलन जुल । लिच्छवि कालया न्ह्यःया लागा लाय्कू दरवारया लागा खः । उकिं उगु इलय् कुमार नं लाय्कू कुमार जूगुलिं कुमारयात जात्रा याःगु जुडमाः धयागु अनुमान दु । तर श्व जात्रा गुबलेंनिसें न्ह्यानावल धकाः यकीन धाःसा याये मफु । सिँयाम्ह ह्याउँगु वर्णया कुमारयात जात्राया स्वन्हु न्ह्यः च्वबाःछःयात न्हवं यानाः ल्यं दुगु राह्य ह्याः रङ्ग पाकाः, न्हवं यानाः कन्हय्कुन्हु कुमार छःयात क्वहितिड फल्चाय् तये हड । जात्रा याये न्ह्यः कुमारयात मचाबुडबलय् थें सिसापालु क्यनेगु, न्हाय्पं प्वाः खंकेगु, इहि यायेगु, बाहाः तयेगु व व्रतबन्ध याड अर्थात् मेमेपिं छःतय् थें न्हवं याये धुंकाः याये माःगु फुकं कर्मक्रिया यायेगु जुड । छःया न्ह्यःने कुसुन्दिका होम यायेगु जुड । वयां कन्हय्कुन्हु अर्थात् सिथि नखःया कन्हय् कुन्हु कुमार जात्राया

गुथियारपिसं खतय् तयाः क्वबुया कुमारीद्यः गन गन जात्रा चाःहिकीगु खः अन अन जात्रा यायेगु चलन दु । थथे कुमारया रथ जात्रा याइबलय् द्यःयात बिचाः याइम्ह छम्ह नं च्वनेमाः ।

द्यःखतय् तुं द्यःयात बिचाः याइम्ह छम्ह च्वनेमाः धयागुलिं द्यः न्हापा न्हापा कुमारी थें कुमार नं मिजंमचा हे तयाः जात्रा याइगु धयागु प्रमाण दु । जन धारणा अनुसार न्हापा न्हापा मिजंमचा हे तयाः जात्रा याइगु खः । अमिगु धापूकथं कुमार बलम्बुयाम्ह काय्मचा खः । उम्ह मचा तनाः छ्वयाच्चंबलय् ल्हूधलय् लूगु खः धयागु धापू दु । श्व द्यः थथे लुइधुंकाः लिपा थःगु पुर्खाय् काय्मचा मदुगु जूगुलिं व हे मचायात वः चतामहि बी धकाः ह्ययेका तःगु खः । अले तंम्ह मचा बलम्बुयापिसं काःवयाः लित यंकल । तर अथे जूसा नं व मचा हानं नं बलम्बुं लिहां वयाः न्हूधलय् वयाः अन हे तुं सिद्ध जुयावन धयागु धापू दु ।

द्यःयात ल्यंपुल्यं छायेगु बिचाःसंचाः यायेगु ज्या थसिया नेकूतय्सं (नेमकुलतय्सं) याइगु जात्रा धाःसा न्हूधःया ज्यापुतय्सं याइगु चलन दु । श्व द्यः जात्रा याइबलय् बलम्बुयापिसं मचा माःवइगु धायेगु चलन दु । कन्हय्कुन्हु अर्थात सप्तमीकुन्हु दकले न्हापां बाजं थानाः लाय्कुलिइ वनाः लाय्कूया पूजा याइ । अनं लिपा अट्कोनारायणयापिसं तपाःगु लाखामहि छायेमाः, थौकन्हय् चिपागु छायेगु याना वयाच्चंगु खनेदु । श्वया नापं न्यापा वः छायेगु यानातःगु दु । श्वया अर्थ उगु इलय् उगु क्षेत्रया कर पुलेगु कथं पुलातःगु खः । जात्रा धुंकाः द्यःयात द्यःछँया पिखालखुइ तयाः दुचायेकेगु चलन नं दु । द्यः दुचायेकाः प्यन्हुकुन्हु सुयातं नं द्यः मक्यनेगु परम्परा दु ।

दशहरा

तछलाश्व १०, अर्थात जेष्ठ शुक्ल दशमी कुन्हु नेवाःतय्सं दशहरा धकाः हना वयाच्चंगु दु । श्व दिनकुन्हु छँय् वा पिने द्यः पूजा यानाः न्हू न्हूगु क्षिता परिकारया वाउँगु तरकारी नयेगु चलन दु । गथे -

१. फकं
२. सिमि
३. चिकं फसि
४. फसिच्चचा
५. वाउँगु मल्ला
६. तुसि
७. तुकं/पाछाइ
८. च्वलःचा
९. चिचिंदा / प्वलःचा
१०. लौका ।

बजारय् न्हू न्हूगु छु छु तरकारी दु, उकिइ क्षिता खानाः फुकं छगुलिइ हे तयाः दयेकीगु खः । श्व हे तरकारी कचिं वा बुकाः द्यःद्यःपिं व पितृयात छायेगु चलन दु । श्वकुन्हु खुसिइ गन गन त्रिवेणी दु अन अन वनाः म्वःल्हूयाः पुण्य प्राप्त यायेगु नं याइ । त्रिवेणीस हे पितृया नामं दान दक्षिणा बीगु चलन दु । श्व दिनयात पितृ दिन नं धायेगु याः अथवा पितृ आत्मायात तरेयात धायेवं पितृतय्यगु आशिर्वाद बांलाःगु पुण्य लाइ धयागु नं धापू दु । थथे धायेगुया बारे छपु बाखं दु । श्व बाखं थथे खः -

परापूर्वकालय् अयोध्या राज्यय् सगर धयाम्ह जुजु दु, वया ६०,००० काय्पिं दु । जुजु सगर तच्चतं धर्मात्मा व बुद्धिमानम्ह खः । श्व जुजुं अश्वमेध यज्ञ यात । अश्वमेध यज्ञ यानाः सल त्वःताः लिपा सल ज्वना त्याकें माःगु धार्मिक परम्परा नं दु । उकिं अश्वमेधय् सल त्वःतेत माःम्ह सल मवःतलय् धकाः कपिल धाःम्ह ऋषिया आश्रमय् चिना तल । पूजा यानाः सल त्वःते मत्यवं हे सगर जुजुया ६०,००० म्ह काय्पिं वनाः ऋषियात दायाः सल कयाहगुलिं कपिल ऋषिं भुत प्रेत

जुडमा धका: सरा: बिल । लिपा ६०,००० म्ह सगर जुजुया काय्पिं सित अपिं फुकं खरानी जुया: भूत प्रेत जुयाच्चने माल । सगर जुजुया मृत्यु लिपा भगिरथ जुजु जुया: जन्म जुल । जुजु भगिरथ नं धार्मिक व भिम्ह हे जुया: जन्म जुल । छन्हू म्हगसय् खरानी जुयाच्चपिं सगरया भूत प्रेत जुडधुकूपिं काय्पिसं थःपिन्त तरे याना ब्यु धका: धा:गुलिं राजकाज फुक त्वःता: भगिरथ हिमालय वना: ब्रम्हाया तपस्या यात । तपस्या या:गु यक्व दै लिपा ब्रम्हा खुसि जुया: वर प्वं धाल । भगिरथं थः न्हापाया जुनीया थःहे काय्पिं भूतप्रेत जूपिन्त तरे याये माल धका: धाल । ब्रम्हां थ्व वर बीगु जिगु मखु महाद्यःया तपस्या यायेवं जक थज्या:गु वर महाद्यःवं जक बी फु धासेलिं हानं हिमालयय् वना: छपा: तुतिं जक चुया: महाद्यःया तपस्या यात । महाद्यः नं प्रकट जुया: थ्व ज्या जिगु मखु, उकिं गंगायात धा: हूँ धका: धाल । गंगाया थाय् मखु महाद्यःवं याये मफूगु छु दु धका: महाद्यःयात जिद्वी यासेलिं थःगु जतां गंगा पिकया नौ जुयाच्चपिं ६०,००० भूत प्रेत जुया: च्वपिन्त मुक्ति याना छ्वत । थ्व भूत प्रेतयात मुक्त या:गु दिन नं जेष्ठ शुक्ल १० कुन्हू हे जुल ।

अथे जूगुलिं थ्व कुन्हू पितृ आत्मायात दान धर्म याना: पुण्य कायेगु धका: धायेगु नं चलन दु । अथे तुं गंगा भूत प्रेत मोक्ष याना: ब्युगुलिं गंगायात पूजा यायेगु नापं महाद्यः पूजा यायेगु नं चलन जूगु खः । बौद्धमार्गीपिसं विशेष याना: न्हून्हुगु वाउँचा तरकारी दक्व: छगुलिइ तया: दयेका नयेगु चलन नं दु । आगं, दिगुद्यः, गनेद्यः, पिठ आदि द्यःद्यःपिन्त न्हून्हुगु तरकारी छाना: समय तया: पूजा यायेगु नं चलन दु । विशेष याना: थ्व कुन्हू गनेद्यःयात फकं तया: पूजा यायेगु चलन दु ।

ज्यापुन्हि

जेष्ठ शुक्ल पूर्णिमा अर्थात तछलाथ्व पूर्णिमा कुन्हूया दिनयात ज्यापुन्हि धायेगु या: । नेवा:तय्सं थ्व दिनयात दछिया दकले सकले ता:हाकगु दिन कथं कायेगु या: । थ्व दिन न्हिछि ज्या याये मसिध:म्हसिया न्ह्याक्व ज्या या:सां भा: खनी मखु धयागु धापू दु । उकिं थ्व दिन कुन्हू मन्तयसं ज्या याइमखु विशेष याना: बुँज्या व थाज्या थै ज्यागु ज्या याइमखु । उकिया थासय् द्यःद्यःथाय् वना धर्मकर्म यायेगु याइ । थ्व कुन्हू पनौतिया मेला नं जुइ ।

ज्यापुन्हिकुन्हू विशेष याना छुस्या-मुस्या सिया: नयेगु व नकेगु चलन दु । थ्वकुन्हू म्ह्याय्मचातय्त स:ता छुस्यामुस्या नकेगु नं या:। धायेबलय् छुस्यामुस्या ख: अथे जूसां छुस्या मुस्या नापनापं तुं मेमेगु बुब: गथे बकुला:, कय्गु, भुति, सिम्पु, बरां आदि सिया नयेगु चलन दु ।

दिसिपूजा

नेवाः समाजय् हनावयाच्चंगु नखःचखः मध्यय् दिसिपूजा छगू नं खः । श्व दिसि चिकुला दिसि व ताल्ला दिसि धकाः दछिया दुने निकः यायेगु चलन दु । न्हापांगु तान्वःबलय् याइगु दिसि पूजा तछलागाः १०/आषाढ कृष्ण १० व चिकुलाबलय् थिला गाः १०/पौष कृष्ण १० कुन्हु याइगु खः । श्व निन्हु छः थासय् च्वनीगु धकाः धायेगु चलन दु । श्वबलय् दिगु छः आगं छःया नापनापं मेमेपिं छःछःपिं पूजा यानाः दिसिपूजा न्यायेकीगु खः । विशेष यानाः नेवाः समाजय् नं गुभाःजु बरे व उरायतय्सं अप्वःसियां माने याइगुलिं गुम्ह गुम्हसिके श्व पूजा गुथि दयेकाः न्ह्याकाच्चंगु जूसा गुम्हसिया परिवार परिवारय् नं यायेगु चलन दु । छःछःपिं मूर्ति दुने छःत आत्मा च्वनीगु जूगुलिं छःछःपिं थःथःगु भक्ति भाव कथं पूजा याइगु खः । गुम्हसिया सिन्हःपूजा यानाः न्यागः स्वनाः पूजा याःसा गुम्हसिया लयस्व ज्वलं पूजा यायेगु, गुम्हसिया साधारण समय् तयाः पूजा जक सां यायेगु चलन दु ।

श्व पूजा यानाः बियाछ्वये धुंक्पिं म्हायमचा भिनामचा आदिपिन्त सःताः प्रसाद बीमाः धयागु नं धापू दु । छःछःपिं स्थानय् च्वंगुलिं उगु पवित्रगु प्रसाद बियाः भिं मनं प्रसाद कयाः सन्तोष जुइगु खः । श्वकुन्हु थाय् थासय् छःछःपिं गथे जनबाहाःछः, नक्वाः भिंछः, बुंगछः आदि छःछःपिं दिसि पुजाया विशेष पूजा तयाः पूजा याये माः धयागु चलन दु ।

छःयात विशेष यानाः चतामहि, छुचुमहि, वः, यःमहि, ममःचा दयेकाः छायेगुया नापनापं ला, थ्वं, फलफूल आदि नं छायेगु चलन दु ।

चिकुलाबलय् जुइगु दिसि पुजाबलय् तःखाः गोर्मा आदि ला छ्वयेकाः छायेगु चलन नं दु ।

गुरुपुन्हि

मांया ख्वाः स्वयेगु, अबुया ख्वाः स्वयेगु, थःगु आत्मायात थम्हं पूजा यायेगु म्हपूजा, थः स्वयाः थैपिं क्वैपिं दाजुकिजापिन्त पूजा यायेगु किजापूजा, इहि मयाःनीपिं मिसा मचातय्त पूजा यायेगु कुमारीपूजा, व्रतबन्ध मयाःनीपिं मिजं मचातय्त पूजा यायेगु कुमारपूजा थें तुं थःत आखः स्यनाः ज्ञान गुण बियाः शिक्षा आर्जन याकेब्यम्ह व्यक्तियात यायेगु पूजा खः - गुरु पूजा । गुरु पूजा यायेगु चलन नं नेवाः समाजया पुलांगु परम्परा खः । दिल्ताश्व पूर्णिमा अर्थात आषाढशुक्ल पूर्णिमायात गुरु पूर्णिमा धकाः गुरुयात पूजा यानाः आदर सत्कार यायेगु दिं खः । गुरु मदयेकं ज्ञान पूर्ण जुइमखु, गुरु मदुगु ज्ञान व अबु मदुम्ह मचा बराबर खः अथे धयागु अपुरो खः । न्हापा न्हापा गुरुया ज्या याइपिं बज्राचार्य, छःभाजु, आचाजु, ब्राम्हण आदि खः । थुमिसं थौकन्हय्तक नं पुरोहितया ज्या यानाच्चंगुलिं थुमित गुरु वा गुरुजु धायेगु चलन दु । नेवाः समाजय् गुरुया थाय् च्वन्ह्याका तयातःगु दु । छुं नं पूजा याये माल धाःसा गुरुजुपिन्त हे याका तयेगु चलन दु । नापं अंशबन्दा वा छुखे च्वनाः जा नयेमाल वा ब्यागलं च्वनेमाल वा छगू थासं मेगु थासय् छः तयेमाल वा परम्परा कथं न्ह्याका हयाच्चंगु छुं नं रितिथितिइ छुं परिवर्तन याये माल धाःसा थज्याःगु इलय् गुरुया वचन कयाः गुरु वचनं शिरोपर धकाः नाला कायेगु याः । श्व फुकं गुरुयात हनाबना यानातःगु कारण खः । अथे तुं झी सराद्ध याइबलय् राजमाता, राजपिता, गुरुमाता, गुरुपिता धकाः गुरुया नामय् नं पिण्डदान बीगु चलन दु । अथे तुं बौद्ध धर्मावलम्बी जुइमा वा हिन्दु धर्मावलम्बी जुइमा निगुलिं धर्मावलम्बीपिसं गुरुयात हनाबना याना वयाच्चंगु दु । गथे गुरु बुद्ध, गुरु धर्म, गुरु संघ तथाइवच . . . गुरु वज्र, धरश्चैव तस्माइश्री गुरुभ्य नमः धकाः छुं नं पूजा याइबलय् महामञ्जुश्री गुरुयात आराधना यानाः, गुरुयात नमस्कार यानाः तिनि पूजा सुरु यायेगु चलन दु । अथे तुं हिन्दू धर्मावलम्बीपिनि गुरु ब्रम्हा, गुरु विष्णु, गुरु देव महेश्वर, गुरु साक्षात धकाः सम्बोधन यानाः तःगु दु । अथे जूगुलिं हे समाजय् गुरु व विद्यार्थीया दथुइ इहिपा याये मज्यू धयागु धारणा दु । श्व धारणा नेपाली समाजय् जक मखु पाश्चात्य समाजय् नं थम्हं ब्वंकातःपिं विद्यार्थी नाप वैवाहिक स्वापू मतः ।

धयागु मिसा मिज्या आकर्षण जुडमज्य धयागु धारणा दु । गुरुप्रति छुं नं द्रोहयात धा:सा वैगु ज्ञान हास जुड धयागु विश्वास नं दु । गुरु धका: नां कायेवं पूजा याइपिं वा आख: स्यनीपिं जक मजुसे छुं नं ज्ञान बीम्ह, आख: स्यनीम्ह नं गुरु ख: । गथे चाया भाडां ज्यायेगु स्यनीम्ह गुरु, पुंज्या स्यनीम्ह, बुत्ता कीगु थाज्या स्यनीगु आदि छुं नं ज्या स्यन धा:सा व गुरु हे ख: । न्हापा न्हापा छम्ह हे गुरु त:ताजि ज्ञान बिया, विशेष विशेष ज्ञान विशेष विशेष गुरुपिसं बीगु चलन दु । उगु इलय् स्पेक्व धाक्वसित गुरु कथं हनेगु चलन दु । तर थौकन्ह्य् छुं नं छगू ज्या स्पेम्हेसित नं गुरु धका: हनाबना यायेगु उलि सम्भावना मदये धुंकल । थव सम्भावना नं मदु न्हापा न्हापा दक्व शिक्षा सफुलिइ उदधृत यानात:गु मजुसें फुक हे ज्ञान गुरुया म्हुतुं वा व्यवहारं ज्ञान बीगु जूगुलिं उगु इलय् गुरुया शक्तियात दैवीय शक्ति स्वरूप कायेगु या: । अथे तं गुरुयात महामञ्जुश्री / सरस्वतीया प्रतीकया रूप्य कायेगु या: । अज्या:पिं ज्ञानीपिन्त हनेगु दिं कथं गुरु पूर्णिमा धका: छगू विशेष दिन हे दु । व ख: आषाढ शुक्ल पूर्णिमा अर्थात दिल्लाथव पूर्णिमा ख: । उगु इलय् थ: विद्यार्थीपिन्त ज्ञान बीगुया लागि गुरुपिसं नं थ:गु अनुशासनय् च्वना: थ:गु व्यक्तिगत स्वार्थयात त्याग याना: विद्यार्थीपिन्त ज्ञान बीगु या: । अथे जूसां गुरुपिं त:धं मजुसें साधारण जीवन हनेगु या: । तर विद्यार्थीपिसं नं थ:गु लागि त्याग तपस्या याना: पुरुषार्थ क्यम्हसित हनाबना याइगु नं स्वाभाविक जुल । उगु ईया परम्परानिसें शुरुवात जूगु हनाबना थौं तक्क छगू परम्परा कथं न्ह्यानाच्चंगु दु । ब्वनेकुथि वा थ:त प्राइभेट कथं आख: ब्वंकाच्चंपिं गुरुपिन्त नं गुरुपुन्हिकुन्हु ब्वनेकुथिइ सरस्वतियात पूजा याना: वया नापनापं गुरुपिन्त भक्तिभावं पूजा यायेगु चलन दु । अथे तं व्यक्तिगत रूपं ब्वनेकने याना: च्वंपिं विद्यार्थीपिसं गुरुया छैय् वना: गुरुयात थ:गु नसा त्वेसा नकेगु नं चलन दु ।

बुद्धधर्म कथं दिल्ला पूर्णिमाकुन्हु सिद्धार्थ गौतम बुद्ध मनु जन्म कया बिज्यायेत मायादेवी गर्भय् प्रवेश जुया बिज्या:गु ख: । अथे तं थव हे दिं कुन्हु सिद्धार्थ गौतमं बुद्धत्व प्राप्त याना: बिज्यायेत थ:गु दरवार त्व:ता: महाभिनिष्क्रमण यानाबिज्या:गु दिं नं ख: । वयक:पिन्त एहिभिक्खु धका: ओवाद वाक्यद्वारा उपसम्पदा याना: बिज्याना: वसपोल गुरु जुया: बिज्या:गुलिं थव पुन्हिया महिमा अप्व: दुगु ख: । धर्मचक्र प्रवर्तन सूत्रया उपदेश बिया बिज्या:गु धैगु हे प्यंगू आर्य सत्य व च्यागू आर्य अष्टाङ्गिक लैपु नापं प्रतित्य समुत्पाद सिद्धान्त बारे धर्मोपदेश याना बिज्या:गु ख: ।

थुकथं गुरुपुन्हिकुन्हुया दियात नेवा: समाजय् थीथी कथं हनेगु या: । थज्या:गु नख: मखुसा चख: ला अवश्य ख: ।

गुंला

स्वयम्भू पुराणकथं उबलय् नेपा:गा: ल: मुनाच्चंगु छगू पुखू ख: । थज्या:गु थासय् विपश्ची बुद्ध बिज्याना: पलेस्वांमा पिनाथका बिज्या:गु ख: । व हे पिना बिज्या:गु पलेस्वां माय् पलेस्वां बुया: उकिइ छ:ने धर्म धातु ज्योति रूप स्वयम्भू उत्पत्ति जुसेलिं महाचीनं महामञ्जुश्री व वसपोलया तिरिपिं वरदा व मोक्षदापिं नापं बिज्याना: स्वयम्भूया ज्योति रूप उत्पत्ति जगु दर्शन या: बिज्यात । चोभारया जव खवं च्वंगु पहाडय् छखे वरदा मेखे मोक्षदायात तया: थ:म्हं चोभारया पहाड थ:गु खड्गं पाला: मुनाच्चंगु ल: पित छव्या: मञ्जुपत्तन नामं शहर दयेका बिज्यात । वरदायात तयाबिज्या:गु पहाड फूच्च: व मोक्षदायात तयाबिज्या:गु पहाड धिलाच्च नामं प्रख्यात जुल । थव हे ज्योति रूप स्वयम्भूयात महायान धर्मया गुरु शान्तिकराचार्य स्वयम्भू महाचैत्य दयेका बिज्यात । शान्तिकराचार्य स्वयम्भू महाचैत्य निर्माण याये न्ह्य: चैत्य सेवा यायेगु परम्परा न्ह्याये धुंकल धयागु बौद्ध विद्वानतय् धापू दु । न्हापाया उगु चैत्य सेवायात हे थौकन्ह्य् गुंलाधर्म धायेगु याना वयाच्चंगु ख: ।

नेपाल संवत्था झिनिगू ला मध्यय् छगू ला श्रावण शुक्ल पक्ष पारुं निसें लछि यंक बौद्धमार्गीपिसं गुंला बाजं थाना: चैत्य दर्शन याना: नाम संगीति पाठ याना: हनीगु ला गुंला ख: । यैया नेवा:तय् विशेष याना: गुंला बाजं थाना: स्वयम्भू महाचैत्यया दर्शन या: वनीगु हे गुंला धर्म ख: । गुंलायात न्हापा गुणिला धका: नं धायेगु या: । भृङ्गभेरी अवदान कथं गुंला धर्म थुकथं न्ह्यात धयागु सी दु । शशीपट्टन नगरया जुजु सिंहकेतुया शिकार याये तच्चतं न्ह्या:म्ह तर वया लानि धा:सा हिंसा याये मय:म्ह जुयाच्चन । जंगली चल्ता, भालु, घुँ, मेय् आदि स्या:गु पापं मेगु जन्मय् ब्राम्हणया छैय् मेय् जुया: जन्म का:वंगु जुयाच्चन । व सिंहकेतुया लानिं धा:सा थ: जुजुयात पशु पंक्षी हत्या याके मबीत कुत: याइगु कारणं मेगु जुनी व हे ब्राम्हण कुलय् रूपवति म्ह्याय् जुया: जन्म जुल । मेय्चा व रूपवति तच्चतं मिलेजू । छन्हु जंगलय् ज्वये यंकात:म्ह मेय्चां जंगलया भीरं कुतुवना: सित । थये जूगुलिं रूपवति ख्वया च्वंगु खना: बोधिसत्व प्रकट जुया व मेय्चा छिमि पूर्व जुनीयाम्ह जुजु भा:त ख: । पशु-पंक्षी स्या:गुया कारणं मेय्चाया रूपय् जन्म का:गु ख: । थवया उदार यायेगु ख:सा वया क्वैय् दक्व तया: छगू चैत्य दयेकि अले छपु न्यकुतिं पुया मेगु नेकुतिं ल: नीछन्हु तक्क तल धा:सा सीम्ह जुजु पूर्व जन्मया छिमि

भाःत मुक्त जुड धकाः धाल । बोधिसत्त्वं धयाबिज्याः यै रूपवतिं थः पूर्व जन्मया भाःतयात पापमुक्त यात धयागु उल्लेख जुयाच्चवंगु दु । थ्व हे कारण यानाः गुला लछि न्यक् पुयाः थ्वनापं मेमेगु बाजं थानाः चैत्य परिक्रमा यायेगु परम्परा न्ह्यात । नेवाः समाजय् सीपिन्त मुक्ति यायेगुया लागि गुला लछिया दुने दछि यंक मदुपिं मन्तयगु नामय् न्यक्पुजा यानाः, न्यक् पुडकाः स्वयम्भू भगवान्या चैत्य परिक्रमा यायेगु परम्परा थौं तक्क नं न्ह्यानाच्चवंगु दनि । अथे तुं सीपिनिगु अस्ति तथाः चैत्य दयेकेगु चलन म्हो हे जक जूसां ल्यं दनि । भाषा वंशावलीकथं विक्रमदेव जुजुं नेपाःया बौद्ध धर्मानुयायीपिनिगु निंतिं श्रावणशुक्ल प्रतिपदानिसं लच्छियंक गुला धर्म यायेगु ज्या न्ह्याका थकूगु दु । चैत्य प्रदक्षिणा यानाः, नेक्या नापं मेगु बाजं थानाः, नामसंगीति पाठ यातकि पुण्य सत् धर्म प्राप्त जुयाः नरक भोग यानाच्चवंगु तक्क उद्धार जुयावंगु खँ सर्वज्ञमित्रावदानय् उल्लेख यानातःगु दु । नेक् पुयाः चैत्य सेवा यायेगु प्रसङ्ग वृष जन्मावदानय् स्वीछन्हु तक्क फिया चैत्यया पूजा यानाः त्रिरत्न शरण व नामसंगीति शरण वनाया फल प्राप्ति जुड धकाः धयातःगु दु । श्रावणकृष्ण पारुनिसं मेगु पारुतक्क न्ह्याइगु गुला धर्म चैत्य पुंगवावदानय् स्वीछन्हु त्रिरत्नया नां कयाः नेक् पुगुया पुण्य पापी जुजु मुक्त जूगुलिं थ्व लच्छियंक चैत्य चाःहिल धाःसा सीम्ह मन् मुक्त जुडगु जक मखु देशय् भयंकर महामारी अनेक रोगादि नापं नास जुयाः सुख भोग याये दैगु खँ उल्लेख यानातःगु दु । नेपाःगाःया मू ज्या धयागु हे बूज्या जुयाच्चवंगु इलय् न्ह्याकूगु नखःचखः अप्वः यानाः बूज्या विशेष यानाः वा पी धुंकाः बूड वा लये मत्यनिबलय् तक्क नखःचखः अप्वः न्ह्याका वयाच्चवंगु खनेदु । उकिइ मध्यय् बूज्या धुनेसाथं न्ह्याइगु ला गुला खः । उकिं बूज्या याइपिनि आपालं फुसंद दुगुलिं थ्व इलय् आपालं नखःचखः हना वयाच्चवंगु खः ।

यै देय् दुने गुलाबलय् स्वयम्भूया महाचैत्यय् वनाः पूजा यायेगु, बाहाः बहिलय् च्वंगु चैत्यपुजा यायेगु मत च्याकेगु परम्परा मध्यय् थ्व गुला ज्वःछि माय् अबसं च्वनेगु धकाः लछियंक न्हिं छछाः जक नया अबसं च्वनेगु परम्परा नं दु । न्हापा न्हापा थ्व परम्परा आपालं खने दुसा थौकन्हय् उलि खने मदु । माय् अबसं मिसा वा मिजंत न्ह्याम्हं च्वने फु माय् अबसं च्वनेगु धयागु धार्मिक ज्या खँय् दुथ्याःगु क्रियाकलाप खः । मेमेगु अबसं छन्हु छन्हु जक च्वनेगु जूसा थ्व लच्छियंक च्वनीगु अबसं खः । अबसं च्वनीपिं धर्मात्मापिं स्वयम्भू वा चैत्य वा बुद्धया न्हिं न्हिं पूजा यानाः न्हिं छक्कः पालं यानाः च्वनीगु खः । थ्व अबसं गुला शुक्ल पारु कुन्हु सुरू यानाः गुला धुंकाःया पारु कुन्हु माय् अबसं धुंकेगु धकाः भव्य यानाः सिदयेकीगु जुड । माय् अबसं च्वम्हं मनूयात थःथितिपिसं अबसं च्वनाच्चवंगु इलय् स्वःवनेगु धकाः अबसं च्वम्हंसित पालं याये ज्यूगु वाय् पूजा यायेत ज्यूगु नसा वा पूजा सामग्री ज्वनाः स्वःवनेगु चलन नं दु । अथे स्वःवःपिन्त व थःथितिपिन्त सःताः भव्य नकेगु चलन दु । गुला ज्वःछि स्वयम्भू वनीपिं नं गुला लछि धुंकाः लिपा

वडगु पारु कुन्हु गुला धर्म धुंकेगु धकाः पारु कुन्हु पारु भव्य न्यायेकेगु परम्परा नं दु । किपू, पांगा आदि थासय् गुला लछि माय् अबसं च्वनेगु धकाः चोभार करुणामयया थाय् न्हिं न्हिं पूजा यानाः चोभारया करुणामयया सतलय् हे च्वनेगु चलन दु । थन च्वपिं वासिंदापिनि कलाःभाःत ल्वापु जुयाः वा कलाःया भाःत मयल वा भाःतया कलाः मयल धाःसा माय् अबसं च्वनाः पारपाचुकेगु नं चलन दु । थथे माय् अबसं च्वम्हं मिसा लछितक्क चोभारया करुणामयया सतलय् च्वनाः अबसं च्वनेगु याइ । लछि लिपा अबसं धुंकेकुन्हु भाःत वया सतलं थनायंकल धाःसा भाःतनाप छँ वनेगु याइ । मिले मज्जीपिं कलाःभाःत मिले जुया वनी । यदि भाःत वयाः थं मवल धाःसा भाःतनाप पारपाचुकेगु जुड । यदि भाःतम्हं थं वयेगु स्वयां न्हापां सुं मिजंम्हं वया थं वल धाःसा व हे मिजंयात भाःतया रूपय् स्वीकार यानाः व हे मिजंनाप हे वना छवइ । यदि विवाह मज्जीपिं मिसापिं सुं मिजंनं थं वल धाःसा व हे मिजंनाप वना वैवाहिक जीवन हनेगु जुड । थ्व परम्परागत ज्या पारपाचुकेगु वा ह्वनेगुयात पांगा, किपू आदि थासय् सामाजिक मान्यता दुगु ज्या खः । तर मिजपिं माय् अबसं च्वनाः थथे पारपाचुके यायेगु वा ह्वनेगु वा मिसां मिजंयात थं वनेगु चलन धाःसा मदु । खालि मिसापिन्त जक भाःतनाप ह्वनेगु वा पारपाचुकेगु चलनया परम्परा खः ।

अजिमा छःयाथाय् छाये हायेकीगु

स्वयम्भू अजिमा छःयाथाय् छाये हायेकीगु धकाः दछियंक पूजा यायेगुलिइ गुला लछि हायेके मज्जु धयागु नं धापू दु । हारति मांया थः हे १०८ म्ह मचात दु । थुमित नके त्वंकेगुया लागि समाजय् च्वपिं मचातय् तक्क नं स्यायेत लिफः मस्वःगुलिं भगवान बुद्धं अजिमा छःया १०८ म्ह मचातय् सुचुका बिल धयागु धापू दु । थथे मचात दक्क त्वपुया ब्यगु ई धयागु गुला ला खः । मचात अजिमा छः नाप मदैगुलिं मचातय् नके मखनीगु धकाः थ्व इलय् अजिमा छःयाथाय् छाये हायेकेगु मज्जु धयागु धापू दु । लिपा भगवान बुद्धं अजिमा छःयात १०८ म्हय् खुम्ह मचात ल्ययाः का धकाः ल्ययेके बिल । उकिइ मध्यय् अजिमा छःया यःपिं खुम्ह मचा ल्ययाकाल । गुम्ह खुम्ह मचात अजिमाछःया मूर्ति नापं खनेदु । मेपिं खनेमदुपिं मचात भगवान बुद्धं अजिमा छःया न्ह्यःने च्वंगु मण्डलय् त्वपुया तल धयागु धापू नं

दु । अजिमा द्यःयात छाये हायेकेगु धयागु हे श्व अजिमा द्यःया नापं १०८ म्ह मचातयत् नकेगु कथं खः । उकिं छाये हायेकेगु धकाः लुखा न्ह्यःने अजिमा द्यःया न्ह्यःनेच्वंगु मण्डलय् बौ तयाः छाये हायेकेगु याना वयाच्वंगु दु ।

संस्कारया ज्या

दछिया दुने स्वर्गे जूपिनिगु नामय् गुलाबलय् छुं छुं पूजा यायेगु चलन दु । बौद्धमार्गीपिनि दछिया दुने सीपिनिगु नामय् स्वयम्भूइ द्यःद्यःया थासय् १०८ प्वाः देवा च्याकेगु चलन नं दु । मेमेबलय् पिमकाइगु न्यक् स्वयम्भूइ गुला ज्वःछि अजिमा द्यःया न्ह्यःने च्वंगु सतलय् ब्वयेगु याः । व हे न्यकुतिइ सीपिनिगु नामं पूजा याना बी । नापं न्यक् पुइकेगु धकाः मेय्या न्यक् पुइकेगु चलन दु । थथे न्यक् पुइबलय् भगवान् द्यः चाःहिलेगु, भगवान् द्यःया नापं अजिमा द्यः चाःहिलेगु, स्वयम्भूया शान्तिपुर तक चाःहिलेगु व स्वयम्भूया गः समेत चाःहिलेगु नं परम्परा दु । सीम्हसिगु नामं न्यक्पूजा यानाः न्यक् पुयाबिल धाःसा सीम्ह मुक्त जुयाः स्वर्गय् वनी धयागु विश्वास दु । थथे न्यक् जक मुकं पुइगु मजुसैं छम्हसिनं न्यक् पुइगु जूसा मेम्हसिनं गं थाइगु व हानं मेम्हसिनं भुस्याः थाइगु खः । थथे थाइबलय् सीम्हसिया परिवारपिं श्व बाजं नापनाप वनाः द्यः चाःहिलेगु चलन नं दु । श्व न्यक् पुइकेगु यें स्वयम्भूइ जक दुगुलिं थाय्थासं वयाः नं पुइकेगु चलन दु । थौकन्हय् न्यक् पुइपिं स्वयाः न्यक् पुइकः वइपिं यक्वः दुगुलिं न्यक् पुइगुया लागि दक्षिणा कयाः नां धलः च्वयाः तइ अले थःपिनि लाइगु इलय् न्यक् पुयाबीगु यानाच्वंगु खनेदु ।

गुला बाजं पिदनीगु

गुला वये छुं दिं न्ह्यः नासःपूजा यानाः गुला बाजं स्यनेगु जुइ । अले गुला सुरु जूगु पारूकुन्हुनिसैं गुला बाजं थानाः स्वयम्भूइ वा चैत्य चाःट्यू वनी । श्व स्वया न्हापा गुला बाजं पित यंके मज्यू धैगु चलन दु ।

गुला बाजं खालि देगः चाःहिलेत सुथय् जक मखु । गुंपुन्हि ज्वःछि ब्वइगु बहिद्यः स्वःवनेत नं न्हिनय् गुला बाजं थानाः हे बहिद्यः स्वःवनेगु याइ । अथें तुं गुला बाजं खलःपिनि स्वयम्भूइ भगवान् द्यःयात निसलाः छाः वनेगु धकाः गुंपुन्हि धुंकाः न्हिनय् छाः वनीगु चलन नं दु । थुबलय् नं न्हिनय् गुला बाजं थानावनेगु याइ । गुला सिधइगु पारूबलय् नं पारू भ्वय् वनीबलय् गुला बाजं थाना हे वनीगु याइ । गुलाबलय् जक पिदनिगु बाजं जूगुलिं हे श्व बाजंयात गुला बाजं धकाः धाइगु खः ।

गुला बाजं थःथःगु त्वाःया जात्रा व विशेष उत्सवय् नं गुला बाजं थायेगु चलन दु । गथेकि जनबाहःद्यःया जात्राबलय् जनबाहा कसातय्ग गुलाबाजं थाना जात्राःय् उपस्थित जुइगु याः ।

गुलाबलय् हनीगु नखःचखः

दछियंकां नखःचखः वइगु मध्यय् दकले अप्वः नखःचखः दुगु ला धयागु गुला खः । गुला दुने लाःगु नखःचखः थथे खनेदु ।

नखःचखःया नां	तिथि	मेला
नागपञ्चमी	गुलाश्व अष्टमी	नागदह मेला
यलपञ्चदान	गुलाश्व अष्टमी	
गुंपुन्हि	गुलाश्व पूर्णिमा	कुम्भेश्वर मेला
सापारु	गुलागाः १	
दथुसाया/मतयाः	गुलागाः २	
कृष्णाष्टमी	गुलागाः ८	
पञ्चदान	गुलागाः १२	
अबुया छ्वाः स्वयेगु	गुलागाः १५	

द्यः थायेगु

बौद्धमार्गीपिनि विशेष यानाः महायानी बौद्ध धर्मावलम्बीपिनि परिवार दुने विशेष यानाः तःधिकःपिं स्वर्गे जुल धाःसा वयागु नामय् सवालाखगः चैत्य थायेगु चलन दु । विशेष कथंया द्यः थायेगु चायात चैत्यया थासाय् थनाः उकिइ न्यागः वा छगः आखेय् तयाः द्यः थायेगु जुइ । गुंला लछिया दुने परिवारपिसं सवालाख गः चिभाः थाइगु खः । गुंलाया सुरूया दिनय् देगः थायेगु सुरू यानाः छुं हे मनसे सुथबःछि द्यः थायेगु खः । गुंला सिधःगु पारुकुन्हु दक्कः देगःया देगः थें चिनाः पूजा यानाः उकिइ दुने स्वर्गे जूम्ह लिन यानाः छ्वयेगु जुइ । द्यः थाःगु सवालाख द्यः खुसिइ चुइकेगु नं याः । गुम्ह गुम्हसिनं दक्क छथाय् तयाः चीभाः दयेकेगु नं चलन दु । गुम्हगुम्हसिनं थथे थाःगु द्यः पूजा यानाः पुलां स्पंगुया पश्चिम उत्तरपाखे च्वंगु बौद्धस्तुपय् नं प्वंकेगु याः । अथे तुं नमुरा भगवानया स्तुपय् दुने नं तयेगु याः ।

स्वयम्भूया रश्मी प्रज्वलित

गुंलाबलय् विशेष यानाः वा वःगु नं थप्प दिइमखुनि झण्डै झण्डै न्हि छझाः धया थें वा वया च्वनीगु ई खः । वर्षा ऋतु मफुगुलिं गुबलें गुबलें वा वयेगु, निभाः त्वयेगु जुयाच्चनी । गुंला ज्वःछि न्हापां न्हापां स्वयम्भू चाःह्यवनीपिं भक्तपिसं स्वयम्भूया दिव्य रश्मी प्रज्वलित जूगु खन धाइपिं दु । थथे रश्मी खने दइबलय् आकाशया सुपाँचय् स्वयम्भूया किपाः थें खने दइगु खः । स्वयम्भूइ च्वंपिसं जक खनीगु मखु, स्वयम्भू खनेदुगु छँय् छँय् च्वंपिसं नं खना धाइपिं दु । न्हापा न्हापा थथे खन धाःसा सुयातं छुं मधासैं भगवानं दर्शन बिल धकाः आत्मसन्तुष्टि काइगु खः । थौकन्हय् स्वये धकाः हे म्वःम्वः वनीपिं दये धुकल । विशेष यानाः यँया पञ्चदानया छन्हु न्ह्यः पञ्चदानया जा थुइगु इलय् थव रश्मी खने दै धैगु जनधारणा दुगुलिं थवकुन्हुया चान्हय् विशेष यानाः स्वयम्भूया रश्मी स्वयेत हे स्वयम्भूइ च्वनेगु व अन वनाः पीगु चलन दु । थवयात धर्मात्मापिसं स्वयम्भूया दिव्य रश्मी धायेगु याःसा न्हगु पिढीयापिसं स्वयम्भूइ दिगिदिगि मत च्याका तैगु जूगुलिं उकिया किपाः सुपाँचय् लानाः व हे प्रतिविम्बित जूगु खः धकाः नं धाः, तर यथार्थ छु खः ? व क्वःछी थाकु । छगू दृष्ययात हे धार्मिक मनूतय्सं

धार्मिक कथं अभिव्यक्त यायेगु याःसा नास्तिकतय्सं नास्तिक रूपं हे अभिव्यक्त यायेगु याः । धार्मिक वा नास्तिक निगू पक्षय् न्ह्यागु हे जूसा नं स्वयम्भूइ उखुन्हुया दिनय् खने दैगु खँ धाःसा सत्य खः । बरु स्वयम्भूइ मत च्यानाच्चनेमाः, अले स्वयेगु तिप्पयाये फुगु मिखा व अन पिपाः स्वयेगु धैर्य नं दयेमाः । तर यक्को ई तक्क खनेदैगु मखु क्षणिक जक खने दैगु खः ।

गुंला धर्म यँ च्वंपिं गुंला बाजं थानाः स्वयम्भू भगवान बुद्धया थाय् जक वनीगु मखु, नेवाः बस्ति दुगु न्ह्यागु थासय् नं गुंला लछि यंकं थःपिके दुगु बाजं थानाः थःगु गां देय् वा त्वालय् त्वालय् द्यः द्यःयाथाय् वनाः पूजा यानाः द्यः चाःहिलाः भक्तिभाव याइगु परम्परा दु । नेपाःया दक्कले न्हापां शासन याःपिं गोपालीपिसं नं थव गुंला ज्वःछि थःपिनि बस्ति यानाः वयाच्चंगु थाय् थासय् द्यःया थाय् ल्वहंहिति आदि थासय् बाजं थानाः चाःहिलाः, गुंला धर्म हनाच्चंगु दु । यल, ख्वप, मकवानपुर, किपू, पाङ्गा, थक्वाः आदि नेवाः बस्ति दुगु गुगु नं थासय् गुंला धर्म हनावयाच्चंगु दु । गुंला धर्म हनेगु छगू नं नेवाः जुयागु छगू कथंया म्हसिका खः । गोपाली जातिं थयंक हना वयाच्चंगु परम्परागत धर्म मजुइ धाये मफु ।

गुंला लछिया दुने वइगु गुलि नखःचखः दक्को छगू छगू नखःचखःया रूपय् न्ह्यव्वयेगु जूगुलिं थन नवमेलायात विशेष उल्लेख यायेगु आवश्यक मखंकागु खः ।

गथांमुगः चःहे

श्रावण कृष्ण १४/दिलागाः १४ कुन्हु न्यायेकीगु नखः गथांमुगः चहे खः । नेवाःतय्सं सिनाज्या क्वचायेवं दकले न्हापां हनीगु नखः धयागु गथांमुगः खः । श्व नखः वा पी धुंकाः दकले न्हापां हनीगु वा श्व नखः धुंसानिसें मेमेगु नखः स्वातु स्वास्वां वडगु नखः खः । उकिं श्व नखःयात नेवाः नखःया न्हापांगु नखः नं धाः । गुलिस्यां श्वैत काय्मचा नखः नं धायेगु याः ।

इतिहासकार भाजु शंकरमान राजवंशीया धापू कथं मनु सीबल्य् क्हासय् वाये यंकैमाः । श्व हे थाययात गणस्थान मूलगढ धायेगु यानावयाच्वंगु दु । श्व हे मूल गढया छुं आखः हिलाः गथांमुगः धकाः नां छूगु खः । गथांमुगःयात त्रिशक्ति सत्व, रज व तमया छःने स्वपलाः तयाः थनीगु त्रिपद संवर भैरव धकाः नं धायेगु याः । गथांमुगः गुबलेनिसें हन धयागु स्पष्ट सी मदुसां गोपाल वंशावलीइ गथांमुगःया सन्दर्भया खँ न्ह्यथना तःगु दु (मनवज्ज वज्जाचार्य : हाम्रा चाडपर्वहरूका विवेचनाः काठमाडौं, रत्न पुस्तक भण्डार, २०२५ पृ २-३) । थुकिं जयस्थिति मल्लया ई सिकें न्हापानिसें हना वयाच्वंगु नखः धैगु सीइ दु तर लिच्छविकालय् हंगु मखु धयागु नं यचुकु खनेदु (बज्जाचार्य, धनवज्ज व कमलप्रकाश मल्ल : द गोपाल राजवंशावली : काठमाडौं, नेपाल रिसर्च सेण्टर, १९८५, पृ ६९) गथांमुगःयात घण्टाकर्ण धायेगु नं याः । घण्टाकर्णया अर्थ न्हाय्पनय् गं घानातःम्ह खः । न्हाय्पनय् गं घानातःगु विषयलय् थीथी लोकोक्ति मदुगु मखु । छम्ह छःया नां न्यने मयःम्हस्यां छःया नां न्यने माली धकाः निपा न्हाय्पनय् नं तःतःग्वःगु गं घाना जुइगु व गरीवप्रति सहानुभूति तयाः जुइम्ह मनु खः । व हे मनु सीबल्य् जगाः कयाः सी उठय् यात । अथे जूगुलिं गथांमुगःबलय् जगाः कायेगु चलन जूगु न्यने दु । अथे तुं मेगु धापू कथं न्हापां छम्ह कर्मय् विश्वास याइम्ह मनुखं लुं वहः तिसा सिबें नैय् विश्वास याइगु जुयाच्वन । तर उम्ह मनु बुद्धि च्वन्त्याःसां जात धाःसा क्वजातम्ह लानाच्वन । व मनूया मतिना धाःसा छम्ह धनिम्ह मनूया म्हाय्मचा नाप जुयाच्वन । धनिम्ह मनुखं श्व खँ सियाः थः म्हाय्मचा क्वजातम्हनाप

इहिपा यानावन धाःसा थःगु बेइज्जत जुइ धकाः ग्यानाः व क्वजातम्हसित मिं पुकाः स्यानाबिल । त्वाःयापिं मनुतय्सं वास्तविक खँ सीवं सीम्हसित सम्मानपूर्वक सिथं यंकाः अन्त्येष्टि यानाबिल ।

अथे तुं मेगु धापूकथं स्वनिगलय् गथांमुगः धयाम्ह छम्ह राक्षसं तसकं वःख बिचाच्वंगु जुयाच्वन । छम्ह तान्त्रिक उम्ह राक्षस स्यायेया नितिं ब्याचिया रूप कयाः राक्षस वडगु लैपुड पियाच्वन । राक्षस वयेसाथं वं राक्षसयात हेबाय्चबाय् धायेगु शुरू यात । श्व खनाः राक्षसं तसकं तं पिकयाः ब्याचित स्याये धकाः सन । ब्याचा बिस्वु वन राक्षसं लिना यंकल । लिपा ब्याचा लः मुना च्वंगु पुखूया ध्वःपय वन । राक्षस नं अन हे वन । लिपा अनं तुं व सित । व हे राक्षसयात अन्त्येष्टि यायेत त्वाःयापिके जगाः कया छम्ह प्वःपाखें अन्त्येष्टि याःगु धाइगु धापू नं दु । अथे जूगुलिं हे गथांमुगःया अन्त्येष्टि समाजय् दकले क्वजातम्हपाखे याकेगु चलन दुगु खः धयागु धापु दु ।

गथांमुगःया बारे गुलि नं लोकोक्ति दु, व फुकं गथांमुगःया छुं नं छुं खँ नाप सन्दर्भ दुगु खनेदु । बाखंनाप आत्मसाथ यायेफत धाःसा गथांमुगःया छुं छुं खँ उकिइ दुने सुलाच्वंगु खने दु ।

गथांमुगःया थीथी धारणा

गथांमुगः घण्टाकर्ण छाय् धाल श्व खँ च्वय् वने धुंकल । गथांमुगःयात त्रिपद संवर भैरव नं धाः । छाय्धाःसा गथांमुगः थनीबलय् त्रिपद संवर भैरवया प्रतीक खः । श्व भैरवं त्रिशक्ति (सत्व, रज व तम)या छःने स्वपलाः तयाः थनीगु खः । गथांमुगः शिवशक्तिया प्रतीक अथवा अर्धनारेश्वर, अर्थात मिसा बछि मिजं बछि खः । उकिं गथांमुगः थनीबलय् गनं गनं छखे मा लिङ्ग मेखे बा लिङ्ग च्वयाः तिकेगु नं चलन दु । गथांमुगःयात सृष्टिया प्रतीककथं नं कायेगु याः । गुगुं गथांमुगः भैरव जूसां गुगुं गथांमुगः अजिमा खः धकाः नं धायेगु याः । क्षेत्रपालय् थनीम्ह जूसा भैरव व क्हासय् थनीम्ह जूसा अजिमा जुइ । गथांमुगः थुकथं म्हासीकेगु जूसा मेकथं गथांमुगलय् भैरव वा अजिमाया छ्वाःपाः वा राक्षस वा लसिया छ्वाःपाः च्वयातःगु तयाः क्वय् लिङ्ग नं च्वयेगु चलन दु । बाहाः तयेधुंकिं मिसामचातय् मिजंम्ह गथांमुगः भागियाके बीगु नं चलन दु । बाहाः तयेगु संस्कार हे यौन क्रियाया ज्ञानया लागि खःसा श्व धुंकाः उन्मत्त भैरव वा मिजंम्ह गथांमुगः भागि याकेगु धयागु सी मदयेक मिसातय् सृष्टि क्रियाया दुजां बीगु खः । गथांमुगःया छ्वाःपाः राक्षसया छ्वाःपाः थें धवा तयाः हिंसा यानाः म्हुतुं हिंसा वयेकाः नं च्वयेगु याः । अथे तुं गथांमुगःयात भूत धायेगु नं चलन दु । समाजय् मनु स्वयाः विचार पाःथें गथांमुगःयात स्वयेगु दृष्टि नं पाः । हिन्दूतय्सं

शिव पार्वती वा अर्धनारेश्वरकथं धायेगु या:सा बौद्धतयसं भैरव व अजिमाकथं कायेगु नं या: । नापं कलाकारतयसं नाटेश्वरकथं नं धायेगु या: । न्ह्याम्हसित नं न्ह्यागु हे धा:सा नं गथांमुग:यात मिसा व मिजं कथं हे कायेगु या: ।

गुम्हं गुम्हसिगु बिचा:कथं गथांमुग: व घण्टाकर्ण छगू हे मखु । थज्या:पिनिगु बिचा:कथं घण्टाकर्ण धाइम्ह छम्ह कट्टर शिवभक्त ख: । भगवान शिवया नां छगू त्व:ता: मेगु गुगुं नं खँ न्यने म्वा:लेमा धका: हे न्हायपनय गं धा:गु ख: । काशी क्षेत्रय घण्टाकर्ण पुखू दु । अन हे शिवलिङ्ग धारणा याना:तम्ह घण्टाकर्णया मूर्ति पलिस्था यानात:गु दु । वयागु नामं हे घण्टाकर्ण पुखू जगू ख: । श्व थाय् कर्णघण्टाया नां साप हे जा: । घण्टाकर्ण राक्षस पाशुपत धर्म माने याइम्ह कट्टर शिवभक्त जगुलिं घण्टाकर्ण मूर्ति स्थापना याना: काशीया भारतीय जनतां छम्ह दानवया रूपय मकासे ईश्वरया रूपय पूजा यानावयाच्चंगु ख: । थुकथं गथांमुग: व घण्टाकर्णयात छम्ह हे धायेगु मय:पिं नं मदुगु मखु । (गंगालाल श्रेष्ठ: गथांमुग: व घण्टाकर्ण व हे ख:ला ? सन्ध्या टाइम्स, दिल्लीगा १३, १९१७)

गथांमुग: — सिनाज्या नी ब्यकेगु

गथांमुग: च:हेयात सिनाज्या ब्यकेगु दिं नं धा: । खाइसंलुकुन्हु दुवा: दुवातयं भुत साला हया: छैय् छैय् तयातयेगु धयागु विशेष याना: सिनाज्याबलय् बांलाक ज्या याये फयेमा धका: ख: । उकिं श्वकुन्हु वुँइ वा प्यपिं वा मप्यपिं न्ह्याम्ह हे जूसा नं बुँज्या याइपिं छैय् दुहां वल धा:सा भुत नं दुहां वइ धका: सिनाज्या सपिं जूसा मसपिं जूसां सकसियां सिनाज्या नी ब्यकेगु धका: गथांमुगबलय् याइगु चलन दु । सिनाज्या ब्यकेगु धका: छैय् वं पुइगु, वं इलेगु वस: हीगु ख: । उलि जक मखु छैय् दक्क परिवारं नं म्व:लुइगु वा खौ कया: खा: सिलेगु याइ ।

वा पिइ सिध:गु न्हापा हे जूसा गथांमुग: न्ह्य: नं सिनाज्या नी ब्यके ज्यु । सिनाज्या नी ब्यके धका: वा पिइ सिधल धायेवं छैय् छुवां नीसी याना: थ:थ:गु म्ह शुद्ध धायेगु ख: । थये गथांमुग: स्वयां न्हापां सिनाज्या नी ब्यकीपि वा प्यबलय् ग्वाहालि व:पिं फुकसित स:ता: भलाकुशल याना: धन्यवाद बिया: तुच्चा वा कौला याका: छछा: जा नका छवयेगु चलन दु । यदि गथांमुग: तक्क नं वा पिइ सिमध:निसा गथांमुग: कुन्हु सिनाज्या ब्यकेगु याइमखु । सिनाज्या नी ब्यके धुकूपिसं सिनाज्या नी मब्यंकुपिन्त थी नं मखु अमिगु छैय् नं वनी मखु । छाया:धा:सा सिनाज्या ब्यंकुगु थासय् छैय् भुत पित छवये धुकुगु जुइ । सिनाज्या मब्यंकुपिं थाय् भुत पित मछवनीगु जुइ उकिं सिनाज्या नी ब्यके धुकूपिं सिनाज्या नी मब्यंकुगु छैय् वन वा मनूयात थिल धा:सा भुतं हानं पुना वइ धायेगु चलन दु ।

छैय् छैय् गथांमुग:या पूजा

नेवा: समाजय् गथांमुग:या बिस्किंगु थाय् दु । श्व नख:यात विशेष याना: सुचुकुचु याना: हनीगु जूसा नं छैय् छैय् ला, हि, छयंगु, क्वैय्, ता:तु आदि थरी थरीया कचिगु ला, क:, लाभा, छा:, बौस्वां आदि च्चकाबजि वा बजिइ बौ तया: वाये यंकेगु चलन दु । बलिइ खालि उलि जक मजुसें अय्ला: श्वै नं तयेगु यानाच्चंगु दु । बौ वाये यंकेगुलिइ गुम्हसिया सुथय् हे पूजा याना: गथांमुग:या थाय् वायेगु जूसा गुम्हसिया दुवातय् दुवातय् वा पिथय् वायेगु चलन दु । थये वाये यंकीगु बौयात पूजा याना: बौ बीगु धका: अय्ला: श्वै हायेका: पूजा यायेगु चलन नं दु । बौ वायेगु छगू हे तं जूसां थीथी कथं पूजा याइगु खनेदु । तान्त्रिक पद्धतिकथं पूजा याइपिसं सिन्ह: पूजा वा न्याग:स्वना:पूजा याना: उकिइ प्रसाद समेत छायेगु याइ । थये बौ बिया बौ वांछवये धुकल धायेवं बौ वावंम्ह छैय् दुकया लुखा लुखापतिं पूजा याना: भूत प्रेतत दुहां वये मफयेक मन्त्र दुगु महाजन्त्र लुखा च्वय् तिका: लुखाखरू पतिं स्वकिं लूगु नकिं व नैं ताना: पूजा यायेगु नं चलन दु । श्व नापं थीथी धूप विशेष याना: धूपचुं, इका, प:का, हलू तया: धूप थनेगु नं चलन दु । श्व धूपं पति, की आदि विषाक्त कीत सी धइगु मान्यता नं दु । थये पूजा याये धुनेवं पिनें निसें पूजा यायां लुखा तिना वयेगु प्रचलन नं दु । गुम्ह गुम्हसिया लुखा त्युत्युं वये धुका: छैय् हानं पुरूसं च्वना: पूजा याइपिं नं मदुगु मखु । गुम्ह गुम्हसिया बौ वाये न्ह्य: हे पूजा यायेगु चलन दु ।

श्व धुका: भवय् नयेगु चलन दु । भवय् नये न्ह्य: बौ बीबलय् बौ न्ह्य:ने तया: लाभा, छा:, पालु मल्ता, हाकु छवय्ला तया: समयबजि नयेगु नं याइ । श्व समयबजि नये न्ह्य: न्हापां बौ बिया त:गुलि छ:छाना जक नयेगु चलन दु । गथांमुग:बलय् लुखा लुखाय् जक नैया कि ताइगु मखु चि चीधिक:पिं मचात जूसा नैया कल्ली न्ह्याकेगु, त:धिकपिनि पञ्चधातु - नैं, ली, सिज:, वह: व लुं दुगु अंगू वा नया अंगू न्ह्यायेगु चलन दु । अथे तं खाइसि छव: छव: पुतुइ चिना तयेगु न चलन दु । थये खाइसि चीगु, नैया अंगू पञ्चरत्नया अंगू न्ह्यात धायेवं भुत प्रेतं थ्य वइगु जक मखु बरु त्व:ता वनी धैगु धापू दु ।

मिसामचातय् गथांमुगः हनीगु

छैय् छैय् नीसी यानाः बौ तयाः धूप थनाः पूजा यानाः समयबजि नयेगु जक मखु इहिपाः मज्जीपिं म्हायामचातयसं (खास यानाः मचा नं मखु तःधिक नं मखुनीपिं) थव नखःबलय् थःकथं हनेगु चलन दु । मिसा मचातय् म्हितिगु धयागु कतांमहि खः । सुथय् हे दुवातय् थनातःपिं गथांमुगलय् थःम्हं दयेकातयापिं अथवा गथांमुगःयात धकाः अलग्ग दयेकाः तःपिं कतांमहि खाये यंकेगु चलन दु । अले मेपिं कतांमहित बोक्सीतयसं ब्वयेका यंकी धकाः ख्युंसे च्वंथाय् सुचुकाः नं झ्यातुगुलिं ल्हाका तयेगु चलन दु । थथे छम्ह जक खाये यंकेगु जुल धाःसा मिसाम्ह कतांमहि व निम्ह जुल धाःसा मिसाम्ह छम्ह व मिजंम्ह छम्ह गथांमुगलय् खाये यंकेगु नं चलन दु । थथे याःगुया मू हुनि गथांमुगःबलय् यदि कतांमहि खाये मयंकल धाःसा कतांमहित बोक्सी जुयाः छुंचा हाःथे हाली धयागु जन विश्वास दु । इहिपाः मज्जीपिं मिसातयसं गथांमुगलय् व्हंगु ध्यबा खायेगु नं याः । खय्त ला थौकन्ह्य् ४ गः वंगु व्हंगु ध्यबाया प्रचलन मदये धुकल अथे तुं कापःया कतामहि म्हितेगु चलन नं मदये धुकल । थुलि जक मखु थव इलय् वामा नं तःमा जुइ धुंकीगु खः । मिसामचातय् खालि अंगू न्ह्यायेगु कतांमहि व ध्यबा गथांमुगलय् चीगु जक मखु ल्हातय् पतिंचाय् नं लैय्चा छ्यानाः ल्हातय् छिना बांलाकेगु चलन दु ।

गथांमुगःयात यौनजनीत प्रतीककथं कायेगु खःसा मिसामचातय् ल्हातय् लैय्चा छिनाः बांलाकेगु छगूकथं श्रृंगार यानाः श्रृंगारिक रस थनेगु खः । अथे तुं कतांमहि गथांमुगलय् चिनाः यौन कार्यय् सम्बन्ध जुइगुया प्रतीक खः ।

मिजंमचातय् हनीगु गथांमुगः

छै दुने ज्या सनेगु अप्वः यानाः छैया हामातयसं याइगु जूसां गथांमुगःबलय् पिने याइगु ज्याय् अप्वः यानाः ल्याय्म्हपिं मिजं मचातय्गु ज्या खः । सुथय् तिंया प्वाँय्यात च्वय् छम्ह यानाः स्वपुइँ यानाः धंकेगु भाजं वा भ्वंतय् गथांमुगः च्वयातःगु भ्वं तिकेगु खः । व लागा जुनाः वक्व बाय् जुक्वसिके लैय् खिपः चिनाः जगाः कायेगु नं याइ । जगाः विशेष यानाः आजु जय धकाः गथांमुगःयात सिथं यंकेगुया लागि म्हाइगु खः ।

गथांमुगः न्हिछि थनाः समाजय् सुंसां मदुम्ह हाःनाः मदुम्ह वा हालाहुलु / प्वःयात गथांमुगःया इलाका दुने छैय् छैय् ध्यबा पवंके छ्वयेगु याइ । थथे ध्यबा पवंके यंके न्ह्यः आजुजय पवं वनीम्हसित भ्वय् नकाः अनं लिपा जक आजुजय धकाः हाली वया नापनापं वनीपिं मिजंमचातयसं हा १ धकाः धाइ । आजुजय पवं वनीम्हसिनं गथांमुगः सित उकिं वयात अन्त्येष्टि यायेत दां पवंगु जूसां मचातयसं आजुजयचित् छ्याना छ्वये थें हा हा यानाः छ्याना छ्वयेगु कथं हाला वनीगु खः । थथे वनीबलय् लाछि खिचात नं नाप नापं वनाच्चवनीगु खनेदु । विशेष यानाः सुंसां मदुम्ह आजुजय पवंवनीम्हसिया लाछि खिचानाप सतिना च्वनीगु स्वाभाविक खः । विशेष यानाः नापं हे जुयाः, नापं देनाच्चवनीम्ह मनूयात यःयःथें च्वया चाःहीकय यंकिबलय् खिचात नं नापं वनीगु नं स्वाभाविक हे खः ।

आजुजय पवना वये धुकल धायेवं प्वःयात वा आजुजय पवंनावःम्हसित भ्वय् नकाः, प्यदुवातय् थनातःगु गथांमुगः क्वथयेकाः, उकिइ छःने पय्तुकाः सालायंकेगु याइ । थथे सालाः खुसिइ आजुजय नं गथांमुगःयात मि तयाः अन्त्येष्टि यायेगु चलन दु ।

गथांमुगः मिसाम्ह गथांमुगः वं मिजंम्ह गथांमुगः धकाः दुगुलिं गथांमुगः क्वःथलाः साला हैबलय् छगू गथांमुगः नं मेगु गथांमुगःयात त्ययेकाः छ्वयेगु चलन दु । गनं गनं मिजंम्ह गथांमुगः साला महःतले पिंयाः थ्यन धायेवं अन मिसाम्ह गथांमुगःयात देतना बी । अले निखलं जानाः निगुलिं सालायंकेगु चलन नं दु । वंगःया गथांमुगः खुसिइ यंकेत साला हैबलय् किलागलय् थ्यन धायेवं किलागःया गथांमुगः क्वःथलेगु जुइ अले छगू नाप मेगु देतना साला यंकी । किलागःया गथांमुगः मिसाम्ह गथांमुगः धायेगु चलन दु । अथेतुं वंगःया गथांमुगः मिजंम्ह धायेगु चलन दु । थथे गथांमुगः क्वःथलाः सालायंकीबलय् गनं गनं फोहर फोहरगु खँ हाला नं वनेगु चलन दु । न्यतमदु अजिमायाथाय् च्वंगु

गथांमुगः सालायंकीबल्य् गथांमुगःया द्यःने न्यतमदु अजिमा चवनावनीगु जूगुलिं
सालायंकीबल्य् छैय् छैय् खापा तिनाः स्वयेमज्यू धायेगु नं चलन दु । मरुया
छवासपाख्य् च्वय् थनीम्ह गथांमुगः साला हैबल्य् खापा ग्वयाः तये माः धयागु धापू
दु ।

कु विद्या स्यनाकायेगु दिं

गथांमुगःकुन्हु मिसापिसं थाय् थासय् अजिमाथाय् वनाः तान्त्रिक बलं
कुविद्या सयेका बोक्सी जुइ सयेकीगु दिं धकाः नं धायेगु चलन दु । विशेष यानाः
कंग अजिमा, न्यत अजिमा, लुमरि अजिमा, म्हय्पि अजिमा, मैती अजिमाया थाय्
वनाः पूजा यानाः कुविद्या सयेका काइ धयागु चलन दु । थ्व विद्या सयेकीबल्य्
अजिमापिन्त लसतायेकेया लागि थः भाःतयात दुगुचा यानाः बली बी अले पूर्ण जुल
धायेवं बोक्सी विद्या सइ धयागु धारणा दु ? थथे द्यः पूजा याः वनीबल्य् थःगु
चवलापतिं च्याका वनी धयागु नं जनविश्वास दु । थ्व धारणा आ म्हो जुजुं
वनाचवंगु दु । न्हापा शिक्षाया व्यापक प्रचार मजूगु इलय् थज्याःगु विश्वास जुइगु
स्वाभाविक खः । नापं मत मदुगु इलय् छैय् थाय् गनं वनेत मीप्वाः च्याका वनीगु
जूगुलिं नं वकुन्हु मत ज्वनाः सुं वंगु खनकि बोक्सी विद्या सयेकः वन धायेगु चलन
जूगु नं जुइफु ।

बाजं पिदनेगु दिं

गथांमुगःकुन्हु ज्यापुतय्सं सिनाज्याया लागि स्वथनातःगु बाजं पिने हयाः बाजं थायेगु,
पुइगु आदि यायेगु ज्या सुरू याइ । नापं थ्व धुंकाः बुँइ वा नं लये मत्यःगुलिं यानाः
अन्वः धयाः थें फुसद दइगु जूगुलिं न्हूपिं मचातय्त नासः द्यःयाथाय् पूजा यानाः बाजं
स्यनेगु नं सुरू याइ । बाजं वा प्याखं स्यनेत न्हापां नासःद्यः निं पूजा यायेमाःगु
नेवाःतयगु परम्परा जूगुलिं थुबल्य् नासःद्यः पुज्याइगु जूगुलिं गथांमुगःया नासः द्यः
नं धायेगु याःगु खः । थुकथं गथांमुगःयात थीथीकथं स्वयेबल्य् गथांमुगःया
सांस्कृतिक रूप तच्चतं महत्त्व दुगु नखः खः । सृष्टिनिसें अन्ततक्कया जीवनया
मनोविज्ञान दुगु थ्व दिं हिन्दू व बौद्ध निगू धर्मावलम्बीपिसं नं हनावयाचवंगु नखः
खः ।

गथांमुगःयात माःगु सरसामान

बौस्वां

चवकाबजि

बौपाः

हि, क्वैय्, ताःतु, स्यै, स्वै, छयंगु,

माय्

कः

अय्लाः, थ्वै

समयज्वलं - हाकुमुस्या, पालु, स्याःबजि, बजि, छवय्ला, लाभा,
छाः

नैया स्वकुंपाः, नकिं, नै वा पञ्चरत्न, अंगु

धूप-इँका, म्हय्खापायात चुंचुयानातःगु, श्रीखण्ड, हलू धूपचुं आदि
त्वाकाछ्यानाः दयेकातःगु धूप । थ्व धूपया कुँ थन धायेवं धैय्,
कुसि, पति आदि सी धयागु धापू नं दु ।

हाकु छवय्ला छुयाः छैय् ला कुँ थनेगु नं चलन दु । थुबल्य् छैय् छैय्
बौ बीगु जक मखु, भूत प्रेत आदि मखुगु मत्यःगु छैय् दुहां मवयेमा धकाः मलुखा
दुवाःया नाप नापं क्वथा क्वथाया लुखा लुखाय् नं जन्तर तिकेगु चलन दु ।

नागपञ्चमी

नेपालय् नागयात थीथीकथं कायेगु यानातःगु दु । गुम्हसिनं नागयात मनुया शत्रु कथं कायेगु यानातःसा गुम्हसिनं नागयात मित्र कथं कयातःगु दु । नागयात हे म्हिताः नागयात हे थम्हं धाःथें याकाः वा नागया जीवनचर्या जुइगु ज्यायात मनुखं थःगु इच्छाअनुसार प्रदर्शित यानाक्यनिगु जात तकं मदुगु मखु । थुमित नाग जाति धायेगु यानातःगु दु । नाग जातियात भारतं नेपाः वःपिं लिपा वनाः थुपिं नेवाःत नाप भेलेपुना वन धायेगु नं इतिहासं धयावयाच्चंगु दु । नान्यदेव नेपाः वःबलय् वं थःनाप हःगु सेनाय् नाग जातिया लिसें मेपिं थी थी नं जातित दु । लिपा तिरहुतं नेपाः गालय् वःपिं गुलि नं मनूत खः, वइपिं नं फुक्क धया थें नेवाः जुयावन । उकिइ मध्यय् नाग जाति नं दु ।

नेवाः समाजय् नागया विशेष स्थान दु । छायाःसा नेपाःगालय् वस्ती जुइ न्ह्यः लःया लखं जक जायाच्चंगु छगू दह खः । चीनं महामञ्जुश्री बिज्यानाः चोभारया डांडा छेदन यानाबिज्यानाः लः पित छवया बिज्याःबलय् नेपाः गाःया दह दुने बास यानाच्चपिं नागत नं लः नापनापं पिहां वन । तर गुम्ह गुम्ह नागतय् विभिन्न दह वा पुखू दयेकाः वासस्थान दयेका बिज्यात । उकिइ मध्येय् करकोटक नागराजा छम्हसित चोभारया तौदहलय् वास याकेबिल । अथें तुं स्वर्ग, पाताल, नर्क धाये थें तुं नागतय्सं राज्य यानाच्चंगु नागलोक दु धयागु थीथी बाखं दु । नागलोकया धापूयात छगू प्रमाण कथं बृंगछः जात्राया इलय् क्यनीगु भोटो जात्रा नं खः । छन्हु नागया जुजु कर्कोटक नागया कलाःया मिखा स्याःगु जुयाच्चन । नागलोकया वैद्यतय्सं सुनां नं लायेके मफुसेलिं कर्कोटक नागराजा मनुया भेष कयाः मनुष्यलोकः वल । अनं छम्ह वैद्ययात ज्वनाः पुखू सिथय् थ्यंकाः मिखा तिसिकाः कर्कोटक नागया दरवारय् यंकल । वैद्यं नं मनूरी नागं धाःथें मिखा तिसिनाः वन । मिखा चायेकाः स्वःबलय् हीरामोती ज्वाहारात जडे यानातःगु लुंयागु भव्य दरवार खन । वैद्य छक्क चाल । दुने यंकाः मिखा स्याकाः देनाच्चम्ह नागिनीयात क्यन । वैद्यया वासः छुं ज्वनावंगु नं मदु । नागराजां धाःसा नागरानीया मिखा स्याःगु मलंतलय् अन हे च्वनाः वासः याये माः धाल । मेगु हे लोकय् थ्यंम्ह वैद्य लिहां वये धकाः नं धाये मफुत । वासः यायेगु छुं हे वस्तु मदुसेलिं न्हाय्पं लिउने खिति तुइका नं तन्त्र यानाः वासःया रूपय् नागया रानीयात नकेगु यात । धाथें नागया रानीया मिखा स्याःगु लात । अले वैद्यया इच्छा कथं फवंगु हीरामोती ज्वाहारात थुनातःगु

भोटो छपाः बियाः पुखू सिथय् थ्यंकाबिल । व हे भोटो वैद्य फिना जुइगु यात । छन्हु वैद्यया लँय् पिथा च्वने माःगुलिं बहुमूल्यगु भोटो त्वःताः बुँइ ग्रामय् तयाः पिथा च्ववन । उगु इलय् हे छम्ह भूत वयाः उगु बहुमूल्यगु भोटो फिनावन । वैद्य पिथा च्वने सिधयेकाः वःबलय् भोटो खुयाः यंके धुंकल । छन्हु बृंगछःया जावलाख्यःया जात्रा जुयाच्चबलय् भूत नं व हे बहुमूल्यगु भोटो फिनाः जात्रा स्वः वयाच्चंगु जुयाच्चन । अथे तुं वैद्य नं अन हे जात्रा स्वः वंगु जुयाच्चन । वैद्य थःगु भोटो फिनाः जात्रा स्वः वयाच्चम्ह खन । अले वैद्य व भोटो फिना तःम्ह भूतयाके थःगु भोटो लित कायेत स्वत । भूतं लितबीत तयार मजू । अथेतुं वैद्य नं त्वःतेत तयार मजू । थःथःगु धकाः निम्हसिनं हालाः ल्वानाच्चन । तर निम्हेसिनं दसु धाःसा क्यने मफु । निम्ह ल्वाना च्वसेलि व हे बहुमूल्यगु भोटो बृंगछःयात बिल । बृंगछःयं सुयागु खः दसु ज्वनाः काःवा धकाः धया छवत । तर भूत व वैद्य निम्हसिनं दसु बी मफु । छायाकि वैद्य नागलोकय् वने मसः । उकिं थवं बिल धकाः क्यने मफु । अथे तुं भूतं ला बुँ ग्रामय् वैद्यं त्वःतातःगु लुइका काःगु खः । मेगु भोटोया बारे छुं मस्यु । उकिं वं नं दसु बी मफुत । थुकथं भोटो बृंगछःयाथाय् च्वंगु खः । व हे भोटो थौतक नास्व कथं जिंके दु स्वैंगु खःसा दसिनापं ज्वनाः काःवा धकाः भोटो क्यनेगु यानावःगु खः । व हे परम्पराकथं भोटो जात्राया जन्म जूगु खः । नेपाःया संस्कृतिइ नागयात वा वयेकीम्ह धकाः कया वयाच्चंगु दु । छन्हु शान्तिकराचार्य चर्खुतिं बर्खुतिं गुफाय् च्वनाः दक्क नागयात आसन दयेकाः तपस्या यानाच्चन । उकिया फलस्वरूप वा मवयाः हाहाकार जुल । थव खं दक्कभन प्रचार जुल । वा मवयाः हाहाकार जूगुलिं नागयात त्वःतकेया लागि यक्क उपाय यात, तर मज्यु । लिपा स्वयम्भू भगवान हे अन वर्सेलि थः गुरु बिज्याःगु सियाः प्रमाण यायेत दसेलिं नाग आसनं पिहां वल धयागु धापू दु । अथें तु शान्तिपुर दुने नागतय्गु हिं च्वयातःगु सफू दु । यदि नेपालय् वा मवयाः हाहाकार जुल धाःसा अन दुने वनाः सफू हयाः निभालय् क्यन धाःसा वा वइ धयागु विश्वास दु । छकः जुजु प्रताप मल्लया शासन कालय् वा मगानाः दुर्भिक्षया शिकार ज्वन । नापं देशय् वा मवयाः हाहाकार जुयाच्चन । याःयाः थें मजिल, वा व हे मवल । उकिं जुजु प्रताप मल्ल स्वयंमं गुरुजुपिनिगु सल्लाह कथं शान्तिपुरय् दुहां बिज्यानाः व सफू पितहयाः निभालय् पाःबलय् वा गाःगु खँ इतिहास, वंशावली आदिइ च्वयातःगु दु ।

नेपाः उपत्यका दुनेया पुलांगु देगः व थाय् मध्यय् चाँगुनारायण छगू नं खः । न्यागूगु शदिया मानदेवं चाँगुनारायणया छुं छुं जिर्णोद्धार यानाः न्हापां अभिलेख तयाः थकूगु पुलांगु थाय्यात बौद्धमार्गीपिसं हरिहरिहरिहरिबाहान लोकेश्वर कथं नं कायेगु याः । महामञ्जुश्रीनं नेपाःगाःया लः पित छवयाब्यबलय् थाय् थासय् तःपिं नाग मध्यय् तक्षक नागराजायात पुण्यतीर्थ वा गोकर्णया तीर्थय् तयाब्यगु धयागु सी दु । व हे तक्षक नागया छन्हु अष्टमीया करुणामयया व्रत च्वनाः लखं पिहां वयाः निभाः पानाच्चंगु इलय् लाक गरुडं खनाः नागयात ज्वनाः स्यानाः नयेत

स्वत । तक्षक नागराजां गुलि धाल 'जि व्रत च्वनाच्चनाम्ह जितः त्वःति धकाः' । तर गरूडं मत्वःतगुलिं नागं गरूडयात क्वातुक हिनाबिल । गरूडयात सनां सने मफयेका नागं हिनाः प्यन्हतक लख्य दुने तयाबिल । थः मुक्त जुये मफयेव स्वर्गया छःया मालिक नारायणयात पुकारयात । थः बाहान गरूडयात नागं हिनातःगु खनाः त्वःतकेत स्वत । तर नागं नारायणं धाःसां त्व हे मत्वःतसेलिं नारायणं थःगु सुदर्शन चक्रं तक्षक नागराजायात छेडन यायेत स्वत । थव खनाः तक्षक नागराजां नं थः व्रत च्वनाम्ह करूणामययात पुकारे यात । थये पुकारे यासेलिं सिंह गयाः करूणामय नं पुण्यतीर्थ/गोकर्ण तीर्थय् थ्यंकः बिज्यात । नारायणयात सुदर्शन चक्रं छेडन यायेमते धकाः नं धाल । तक्षक नागयात गरूडयात त्वःताब्यु धयाबिज्यात । करूणामय बिज्याःगु खनाः नारायणं दण्डवत यानाबिज्यात । अले फुकं छम्ह्य लीन जुया बिज्यात । थये लीन जबल्य दकले तःलय् तक्षक नागराजा अनं सिंह, सिंहया छःने गरूड, गरूडया छःने नारायण व नारायणया छःने करूणामय च्वना बिज्यात । थये लोकेश्वर/करूणामय नारायण निम्ह दुगुलिं बौद्धमार्गीतय्सं थवयात हरिहरिहरिहरिवाहान लोकेश्वर धायेगु जुल । अले मेपिन्त चाँगुइ लाःगुलिं चाँगुनारायण धायेगु जुल । थुकथं चाँगुनारायण वा हरिहरिहरिवाहन लोकेश्वर नाप नं नागनाप स्वापू दुगु जुल ।

गथे गोकर्ण तीर्थय् तक्षक नागराजाया वासस्थान कथं कयातःगु दु । गोकर्णनिसें जोभारतक्क १२ गू तीर्थ दु । उगु तीर्थय् छम्ह छम्ह नागया वासस्थानया रूपय् कयातःगु दु । थौं तक्क न उगु तीर्थ तीर्थय् पूजा याइबल्य वा सराद्ध याइबल्य अन अनयाःपिं नागतय्त् पुँइ हायाः पूजा यायेगु जक मखु पूजा याःगुया साक्षी तयेगु नं चलन दु ।

१२ गू तीर्थया नागराजापिनिगु नां

नागराजापिनिगु नां	तीर्थया नां	थायया नां
१. तक्षक नागराजा	पुण्यतीर्थ	गोकर्ण
२. सोमक्षिकि नागराजा	शान्त तीर्थ	गुह्येश्वरी
३. शंषपाल नागराजा शंषर तीर्थ	शंखम्बः	
४. स्वरूप नागराजा	राजतीर्थ	राजतीर्थ
५. कुलिक नागराजा	मनारेथ तीर्थ	तोखादुवाः
६. अपलाल नागराजा	निर्मल तीर्थ	भचाखुसि

७. नन्दउपनन्द नागराजा	निधान/लखु तीर्थ	चागः/कंग
८. वासुकि नागराजा	ज्ञान तीर्थ	कन्हःखुसि
९. बरुण नागराजा	चिंतामणि तीर्थ	तेकु दुभान
१०. पद्मधवल नागराजा	प्रमोद तीर्थ	दानगाः
११. महापद्मधवल नागराजा	सुलक्षण तीर्थ	भाजंगाः
१२. कान्ति नागराजा	जय तीर्थ	नखु

अथे तुं देव देवतापिसं नागयात गुम्हसिनं थःगु ज्वँसाया रूपय् छ्यला तःगु दु सा गुम्हसिनं आभूषण रूपय् क्वखाना तःगु दु । कुमारी छःयाके नाग आभूषणया रूपय् क्वखानातःगु दु । अथे तुं महाद्यवं ला नागयात गःपतय् क्वखानातःगु दु । गनं गनं जँय नं हिनातःगु दु । अथे तुं गनं गनं गणेशवं नं ज्वँसा व जँय हिनातयेगु यानातःगु दु । गुह्येश्वरी देगलय् नागं हे कुइका तःगु दु । कृष्ण जन्म जबलय् कंशं स्थाना छवइ धकाः चाचां कृष्णयात गोकुलय् यंकबलय् गंगा नदी पार यायेमाल । उगु इलय् तच्चवं खुसि बाः वःगुलिं गंगां नाग पिहां वयाः कृष्णयात वां दायेगुलिं बचे यानाबिल । अथे तुं भैरवयाके नं नाग आभूषणया रूपय् दु । सर्प सुर्छःया रश्मीमण्डलया प्रतीक खः । ऋग्वेदय् सुर्छः अहिया रूप खः । सर्प वैभवमय मातृत्वया प्रतीक खः । भागवत गीताय् कृष्णं स्वयम् थःत वासुकी नागराजा धकाः धयातःगु दु । कृष्णया अवतार मध्यय् छगू नाग अवतार नं खः । रामायणय् रामया किजा लक्ष्मणयात शेषनागया अवतार धकाः धाइ । शेषनागं पृथ्वी फुक्कयात थःगु बसय् तयातःगु दु । अथे तुं महाभारतय् अर्जुनं नागकन्यानाप इहिपा याःगु दु । गुम्ह गुम्हसिनं नागयात छँया भुवाः धकाः नं धायेगु याः । उकिं छँया जग स्वनीबलय् नागया प्रतिमा तयाः नं स्वनेमाः ।

अथे तुं छवपय् जुइगु बिस्काःजात्रा नाग नागिनीया जात्रा यानाः न्यायेकीगु जात्रा खः । थुकथं श्रीगु समाजय् नागया विशेष स्थान दु । अथे जूगुलिं श्रावणशुक्ल पञ्चमीकुन्हु नागयात पूजा यानाः नागपञ्चमी हनेगु यानातःगु खः । नागपञ्चमी छाय् हन थुकथं हन धयागु खँय् छपु लोकोक्ति दु व थुकथं खः । छम्ह बँज्या यानाच्च्वम्हसिनं वुं पापां वंबलय् मसिसे नागया मचात निम्ह नं पाले लात । अथे पाःगु जूगुलिं मचापिं नागत सित । सीम्ह सर्पया मापिं वयाः स्वःवःबलय् सीपिं मचातय्गु मिखाय् स्याःम्ह मनूया किपा खने दयाच्चन । व हे किपाय् स्वयाः स्याःम्हसिया छँ वनाः स्याःम्हसित व वया कलाः व निम्ह कायपिन्त नं न्यानाः स्थानाबिल । व सर्प न्याःम्ह मनूया म्थ्याय् छम्ह नं दु । तर सर्प वयाः स्याःवःगु इलय् लाक धाःसा म्थ्याय्म्ह मदु । लिपा वया म्थ्याय्म्हसित नं स्याये धकाः वंबलय् म्थ्याय्म्ह छवलाचाय् दुरु तयाः सदभावपूर्वक दुरु त्वनेगु इनाप यात । सर्प नं दुरु त्वनाः मिसामचाया व्यवहार खनाः लय्तायाः वयात मस्यायेगु जक मखु वरदान

पर्वतक नं धाल । अले सर्प धा: थें म्हायम्हं नं सीधुंकूसां जिमि मां अबु किजापिं
म्बाना वयेमा धका: पवन । वरदान कथं सी धुंकूपिं फुक्क हानं म्बानावल । थये
नागयात दुरु त्वंका: सदभाव या:गु दिन धयागु श्रावणशुक्ल पञ्चमी ख: । उकिं थ्व
दिनयात हे नागपञ्चमी धका: धायेगु जुल । थ्वकुन्हु आस्तिकया सदुपयोगं
परीक्षितया काय् जनमेजययात थम्हं यानाच्चनागु नाग यज्ञ सिधयेके माल । नाग
यज्ञयागु पूर्ण जूगु दिन श्रावणशुक्ल गुंलाथ्व पञ्चमी जूगुलिं थ्व दिनयात
नागपञ्चमी धका: धा:गु ख: । उकिं सर्प स्याडबल्य् सर्पया मिखाय् थ:गु किपा
वयाच्चनी धका: दकले न्हापां मिखा निं छुं सिड मध्येक कुचाकुचा याना बी ।
स्वनिग: दुने नाग वा सर्प विष म्दु धाइगु जनश्रुति दु । अले तराइल्य् च्वपिं सर्प
विष दुपिं ख: । उकिं तराइल्य् च्वपिं सर्पतय्सं न्याना: सीगु जूगुलिं फछिं फतलय्
सर्प खनकी स्यायेगु चलन दु । तर स्वनिग: दुने च्वपिं सर्पतय्के विष म्दुगु जूगु
जक मखु नागयात द्य:या रुपय् शुभचिंया रुपय् कायेगु या:, परिपूर्ण रुपय् कायेगु
या: । पञ्चदान याडबल्य् वा छुं त:त:धंगु पूजा याना: न्ह्याबलें पूर्ण यानातयेत
नागयात आराधना याना: पूर्णगु घलय् बास याका: तइ गुम्हसिनं बासयात धा:सा
न्ह्याबलें पूर्ण जुयाच्चनी अभाव जुडमखु धका: धाइ । उकिं हे छैय् छैय् नागया
वासस्थान दयेका बीगु नं चलन दु । पञ्चदान याडबल्य् वा जाकि दान यायां फुड
धका: वासुकी नागराजायात पूजा याना: वास याका तइ । अथे तुं छै दयेकूसा वा
चिभा: दयेकेगु याडबल्य् जक स्वनी वा न्यास स्वनीबल्य् नागयात नं तैगु चलन दु ।
अथे जूगुलिं नागयात पूजा यायेगु झोगु नेवा: परम्परा ख: । नागयात पूजायात धायेवं
दोष शान्त जुया: कल्याण जुड धयागु धापू दु ।

नागपञ्चमीकुन्हु नागगणया अधिपति वरुण, अनन्त, वासुकी, शेष,
पद्यकंबल, कर्कोटक, अश्वतर, धृतराष्ट्र, शङ्खपाल, कालिव, तक्षक व पिङ्गल आदि
नागराजातय्त पूजा यात धा:सा थ्वया प्रभावं नागया दोष शान्त जुया: देश कल्याण
जुड ।

नाग वा सर्प स्वयम् थ:पिसं न्याडगु मखु, सर्प न्याडगु मन्याडगु धयागु
द्य:या ज्या ख: । मनूतय्त दु:ख बीगु सुख बीगु धयागु ज्या द्य:या बाहेक मेपिं सुयां
ज्या मखु । उकिं सर्प धयाम्ह द्य:या शक्ति ख: धका: धायेगु या: । उकिं सर्पयाके नं
द्य:या अदृश्य शक्ति दुगुलिं वयात नं द्य: धका: माने याना: पूजा यायेगु चलन दु ।
धाथेंयाम्ह सर्प ज्वनाहया: पूजा यायेगु ग्यानापुगु व थाकूगु ज्या याये मफडगु जूगुलिं
भ्वंया व ती, वह:, सिज:या नाग दयेका वा कपाय् पुईपुई चिंका: नाग दयेका: पूजा
यायेगु नं चलन दुगु ख: ।

नागपञ्चमीकुन्हु नागया पूजा याडबल्य् नं थ:थ: पुरोहित वा छैया
मिजंम्ह हामा छैय् मूलुखाय् भ्वैतय् च्वयात:गु नाग वा नागराजायात गोबर तया:
तिका: सितु, सादुरु, घ्य:, कस्ति आदि पञ्चामृत तया: नागयात पूजा याड । दकले
न्हापां मूलुखाय् नाग तया: पूजा याना: मेमेगु लुखाय् नं चीचीपा:गु भ्वंया नाग तिका:

पूजा याड । गुम्हगुम्हसिया मूलुखा छथाय् जक नाग तिका: पूजा यायेगु चलन दु ।
स्वनिग: दुने दक्क जातिं नागपञ्चमीकुन्हु नाग तिका: पूजा याडगु चलन धा:सा ।
गुम्ह गुम्हसिया नागपञ्चमीकुन्हु नाग पूजा याये म्वा:पिं नं दु । गथेकि बज्जाचार्य,
शाक्य, ज्यापु आदि नेवा: जातिया नागपञ्चमीकुन्हु नाग पूजा यायेगु चलन म्दु ।
बौद्धमार्गीपिसं स्वया: अप्व: याना: हिन्दूमार्गीपिसं नागपञ्चमीकुन्हु नाग तिका: पूजा
यायेगु चलन दु । नाग पूजा धार्मिक स्वया: मनौवैज्ञानिक पक्ष अप्व: पूजा यायेगुलिड
न्याय्यानाच्चंगु खनेदु । धाय्धा:सा नाग चाहे विषालु जुडमा: चाहे विषालु मजुडमा
छैय् दुहां वल धा:सा अन अनावश्यक तनाव कथं गनं वनी न्याड ला न्याड ला धका:
धन्वा जुड । उकिं छैय् थुवा: जुडमा वा द्य:या अवतार जुडमा नागयात सहज
मानसिकतां स्वीकार याये मफु । उकिं छम्ह नाग दुथाय् मेम्ह नाग दुहाँ वड मखु
धका: नागयात पूजा याडगु ख: । नाग शान्त जुडमा धका: ख: । तांन्व:गुलिं प्वालं
प्वालं नाग पिहां वया: दुख बी धका: धायेगु पाय्छि मखु । छाय्धा:सा श्रावण
महिना आषाढ सिध:गु ख: । वा वडगु ई ख: । नाग प्वालं उबलय् पिहां वडगु ई ख:
गुबलय् ल: नापं क्वानावड उकिं तां न्व:बलय् सर्प यक्क खने दै । तांन्व:गु थासय्
सर्प यक्क दै, तर चिकुगु थासय् सर्प उलि दैमखु गुलि तां न्व:थाय् दैगु ख: ।
न्याजिलायण्डय् नाग धयाम्ह हे म्दुगु देश ख: । श्रावणशुक्ल पञ्चमी उलि तांन्व:गु
ई मखु असारं वा वया बँ ख्वाउँसे च्वनेधुकीगु ई ख: । उकिं पिहां वया: नं दुहां
वड नागयात स्थिर रूपं च्वै धका: पूजा या:गु जुडमा: न कि तां न्वया: पिहां वडम्ह
नाग दु:ख मबीमा धका: मखु ।

नागदहया मेला

नागपञ्चमीकुन्हु नागदहल्य् मेला जुड । थ्व नागदहया नामाकरण
महामञ्जुश्रीनं चोभार छेडन या:बलय् अन दुपिं नागराजपिं फुक्क ल: नापं तुं पिहां
वनेत्यन । उकिं नागराजपिन्त छगू छगू दह दयेका: अन तुं तयाबिल । शेषनाग च्वंगु
थासय् त्यंदनिपिं फुक्क नाग च्वने धका: धा:गुलिं अन हे तयाबिल । व हे शेषनाग
च्वनीगु थाय्यात नागदह धायेगु यात । नागदहल्य् स्वंगू दह दु चीचीधंगु निगू दहयात
नागया मिखा व त:धंगु छगू दह दु, उकियात नागया म्ह धका: धायेगु या: । थन
मेला नं लगे जू । मेलाया इलय् थ:गु बुँड स:गु तरकारी, अन्न फलफुल छायेगु नं
चलन दु ।

यल पञ्चदान

गुलाश्व अष्टमी अर्थात् श्रावणशुक्ल अष्टमीकुन्हु यल्य च्वपिनि यल पञ्चदान धकाः न्यायेकीगु खः । यैय् च्वपिनि जुगःचःहे धकाः भाद्रश्व १३ बलय् पञ्चदान याइ थें पञ्चदान बी । छन्हु न्त्यः बज्जाचार्य, शाक्य, तुलाधर आदि पञ्चदान याइपिनिगु छैय् सुचिनिचि यानाः छः ब्वयेगु याइ । कन्हय्कुन्हु छः पूजा यानाः पञ्चदान काःवःपिं धाक्वसित ब्वयातःम्ह छः नापनापं पूजा यानाः पञ्चदान बीगु धकाः वा जाकि बुबः आदि दान यायेगु याइ । न्यादैय् छक्कः इहलनय् (नागबहालय्) छःब्वयेत यलया थाय्थासं बहीछः, समय्छः हयाः तयेहइ । अले भक्तजनपिसं समय्छःयात पञ्चदान बीगु चलन दु । थुबले सुथय् बहनिइ पूजा यायेगु याइ । पूजा सिधल धायेवं समय्छः बहीछःपिं थः थः थासय् यंकेगु याइ ।

यल पञ्चदानया बारेय् नेपाल वर्ष क्रिया नांया सफुतिइ थथे च्वयातःगु दु- श्रावणशुक्ल अष्टमी दिं तःच्वतं तःधंगु पर्व खः । परापूर्वकालय् श्वकुन्हु दक्कसिबे न्हापां श्री ब्रम्हां थःगु मूलगु छ्यं महाद्यवं ध्यंकाः श्री दीपंकर बुद्ध भगवानयात दान यानाःबिज्यागु जुयाच्चन । वयां लिपा श्वकुन्हु हे यल देशय् दीपावती नगर (गयितहरे) याम्ह बुद्धिमान जुजु श्री सर्वानन्द दानशाला दयेकाः श्री दीपंकर बुद्ध भगवान व वसपोलया संघयात वा, जाकि, वसः, दक्षिणा व मेमेगु नं वस्तु लुंया पिण्डपात्रय् तयाः दानयाना बिज्याःगु खः । हानं श्वकुन्हु हे यलयाम्ह छम्ह इहिपा मज्जनिम्ह म्हायाम्चां श्री दीपंकर बुद्ध भगवानयात पिण्डपात्र दान याःगु खः । थज्याःम्ह दानीम्ह म्हायाम्चां छ्यःगु छुं छुं वस्तुत सायाःबलय् गुइत बहालय् क्यनेगु यानावयाच्चंगु दु ।

गुंपुन्हि

गुलाश्व पुन्हिकुन्हुया दियात नेवाः समाजं गुंपुन्हि धकाः हनावयाच्चंगु दु । श्रावणशुक्ल पूर्णिमाया दिंकुन्हु हनीगु श्व नखः नेवाः समाजय् गुन्हु यंक हनीगु खः । गुलाश्व पुन्हि अर्थात् श्रावणशुक्ल पूर्णिमां निसें गुलागाः अष्टमी अर्थात् भाद्रकृष्ण अष्टमीकुन्हुतक कूल गुन्हु यंक हनीगु नखः जूगुलिं श्व नखःयात गुंपुन्हि याःगु खः । नेवाःतय्सं हनेगु याना वयाच्चंगु तःतःहाकगु नखः मध्यय् श्व छगू नखः नं खः । विशेष यानाः धार्मिक व व्यगात्मक कथं हनाः वयाच्चंगु श्व नखः मानोरञ्जनात्मक नखः नं खः ।

बुँज्या याइपिनि बुँइ वा पी धुंकाः वा लये मत्यःनीगु इलय् दथुइ लाक लाःगु श्व नखः लिमलाः फमलाः म्हाया म्हा मजुइक सिनाज्या यानाः सिधयेकाः हनीगु श्व नखः छगू कथं ज्यां झासु फिनाः न्ह्याइपुक नं हनेगु याः । श्व नखःयात जनै पूर्णिमा नं धायेगु याः । श्व पुन्हिकुन्हु म्हाय् जनै ची माःपिसं दछियंक चिनातःगु जनै हिलिगु दिं खः । गुरुपिसं मन्त्र साधना यानाः भय पाखें रक्षा जुइकथं म्हासुगु कोखा क्वखायेका बीगु खः । थथे म्हासुगु काय् मन्त्र साधना यानाः जनै दयेकीपिं गुरुपिं व जनै क्वखाइपिसं सैं खानाः म्वःलुह्याः सुचिनिचि यानाः जनै धारणा याइगु खः । अथे तुं ब्रम्हतय्सं म्हासुगु काय् रक्षा मन्त्र दुथ्याका मिजपिन्त जूसा जवगु ल्हातय् मिसापिन्त जूसा देय्पागु ल्हातय् जनै नं श्व हे दिनय् चिकाबीगु खः । थथे जनै चीगु दिन जूगुलिं हे श्व दियात जनै पूर्णिमा धकाः धायेगु याःगु खः । थथे जनै पूर्णिमाकुन्हु च्यूगु जनै लक्ष्मीपुजाकुन्हु त्वःताः साया न्हिपनय् चित धाःसा थः सीइबलय् थःगु आत्मायात वैतरणी खुसि छिनाः अःपुक स्वर्ग थ्यंकः वने फैं धैगु परम्परागत धारणा दु । गुंपुन्हि अर्थात् श्व दियात ऋषितर्पणी धकाः नं धायेगु याः । छायाःसा श्व दिंकुन्हु तागाधारीपिसं सप्त ऋषिपिनिगु नामय् तर्पण बीगु जूगुलिं श्व दियात ऋषितर्पणी धकाः धायेगु याःगु खः । तर्पण बीत तागाधारीपिसं छन्हु न्ह्यः हे सैं चानाः लुसि ध्यनाः पञ्चगव्य कयाः शुद्ध यानाः वैदिक विधि कथं ऋषितय्त तर्पण बिद्याः अनं लिपा वैदिक मन्त्र ब्वनाः पवित्रगु जनै न्हापां ब्रम्हयात चिकाः अनं लिपा थःम्हं चीगु चलन दु ।

नेवा: समाजय् गुंगूयात विशेष महत्व ब्युगु खनेदु । गथेकि नवग्रह, नवरत्न धाये थें तुं गुता बीबः, गुता बूबः धका: नं धायेगु प्रचलन दु । गुंपुन्हि नं थज्या:गु हे महत्वं जा:गु नख: ख: । श्व नख:कुन्हु विशेष याना: गुता बूब:या क्वाति दायेका: छुचुमहि छुना: छ:पिन्त पुज्याना: परिवार मुना: गुता बूब:या क्वाति दायेका: त्वनेगु चलन दु । गुम्ह गुम्हसियां गुता बूबल्य् मम:चा क्वाति क्वफाना: ग्वाराचा नयेगु, गुम्हसिया गुता बूबल्य् छुचुमहि चिचिपाक दयेका: क्वफाना: गुता बूबल्य् ग्वाराचा दयेका: नयेगु चलन दु । विशेष याना: श्वकुन्हु नयेगु गुता बूबः, चुछुमहि, लैचा घाँय तरकारी ख: ।

श्व नख:कुन्हु खालि गुता बूबः क्वाति जक त्वनीगु मखु । श्व न्हिछिया दुने गुजु वस: पुना:, गुक्व: पिहां वना: गुंगु थासय् बहिद्य: स्वयेगु, गुक्व: तक नयेगु नं चलन दु । गुक्व:तक नयेबल्य् गुताजि नसा हे नयेगु चलन दु । थथे जूगुलि हे गुताजि बूब:या क्वाति हे छथासं तया: क्वाति दायेका: नयेगु प्रचलनय् व:गु जुइमा: ।

गुता बूबः धायेबल्य् खास याना:

१. माय्
२. मुस्या
३. तग्व: कय्गु
४. चिग्व: कय्गु
५. चाना
६. मू
७. भुति
८. प:माय्
९. सिम्पु

बूबल्य् श्व हे धका: ला मदु अथे जूसा नं गुता थरिया बूब: तया: दयेकीगु चलन दु । गुम्हं गुम्हंसिनं मस्यां, बकुला:, थीथीया सिम्पु, चानाय् नं तग्व:गु चाना, चिग्व:गु चाना, तुयुगु चाना, आदि याना: गुता खाकेगु चलन नं दु । क्वाति विशेष याना: ला नं तया: दायेका: त्वनेगु चलन दु । गुता बूब:यात ल्वाकछ्याना: गुंपुन्हि प्यन्हु न्ह्य: मा:फवयाबी । मा:बुल धायेवं क्वातियात ल:स्वयंका: धकिइ तयाबी । उकिइ फोहर वनी धका: त्वपुया: वयात प्यन्हु लिपा गुंपुन्हिकुन्हु बूब:ल्य् चुलि नापं वये धुंकूगु जुइ । थथे चुलि ह्व:गु क्वातियात गुंपुन्हि ज:छि हे क्वाति दयेका: नयेगु याइपिं नं दु ।

छुचुया परिकार

गुंपुन्हिकुन्हु मेगु मुख्यगु नसा धयागु छुचुमहि ख: । छुचुयात सुखामहि, पुरी, मम:चा, ग्वाराचा, थुक्पा आदिया परिकार दयेका: नयेगु चलन दु । जा नयेबल्य् गथे जा कें निगुलिं मजिमगा:गु ख:, अथे तुं छुचुं व गुता बूब:या क्वाति नं ख: ।

लैचा घाँय

श्व इलय् विशेष याना: खने दैगु लैचा घाँय ख: । श्वकुन्हु लैचा घाँय तरकारी नयेगु चलन दु ।

ब्यांचा व क्व:या जंकु

नेवा: जाति खालि थ:गु जीवन नाप प्रत्यक्ष अप्रत्यक्ष रूपं भिं याइपिनिगु भियात लुमंका: पूजा यायेगु चलन दु । अथे लुमंका: पूजा यायेगुलिइ गुंपुन्हिबल्य् ब्यां व क्व:या मचातय् जंकु यायेगु धका: धायेगु नं चलन दु । सिनाज्या नकतिनि नकतिनि सिध:गु जूगुलिं बुँइ ल: मुनाच्चंगु थासय् वा-ब्वय् व:पिं ब्यांचा त्वारात्वारा हालाच्चनी । ब्यांचिगु सलय् वा-ब्वय् व:पिं की झंग:तय् छ्याना छुचुमहि ग्वाहालि जूसा ब्यांचिया आहारा धयागु की ख: उकिं की नया: नं बाली सुरक्षा यानाबी धयागु धारणा दु । ब्यांचात जा नकेगुलिं गथांमुग: नाप स्वापू दुगु खँ ख: । गथांमुग: धुंका: वइगु श्व नख: ब्यां नं मा:गु भिंगु ज्यायात लुमंका: यायेगु ख: । न्हापा न्हापा स्वनिगलय् गथांमुग: धयाम्ह छम्ह राक्षसं मनूयात स्याना: तच्चवंत वःख बियाच्चंगु जुयाच्चन । छम्ह तान्त्रिकं उम्ह दुख बियाच्चंम्ह राक्षसयात स्यायेगुया लागि ब्यांचिया रूप कया: लैय् च्वना: राक्षसयात हेबाय् चबाय् या:गुलिं राक्षसं

ब्याचित स्यायेत स्वत । ब्यांचा नं हेबाय् चबाय् यानाः थः ल्यू ल्यू राक्षसयात तयाः लः मुनाच्चंगु थासय् वनाबिल । राक्षसं ब्याचित स्याये धकाः लखय् कुहां वन । ब्यांचा वंगु थाय् खालि लः जक मुनाच्चंगु मजुसैं धवप जुयाच्चन । राक्षस धवपय् दुदुं वनाः अनतुं सित । थुकथं छम्ह चिकिचाधिकम्ह यांचाया रूप कयाः तान्त्रिकं राक्षसया आतंकं रक्षा यानाः ब्यागुलिं ब्याचित हनेगु कथं श्वकुन्हु ब्यायात जा नकेगु धकाः धयाः वयाच्चंगु खः । ब्यायात समाजया रक्षक स्वयाः नं वा पियातःगु थासय् हानिकारक कीपाखें रक्षा यानाः बुँइ वा बांलाक सयेकाः बाली दुकाये फयेमा धकाः ज्यापु अर्थात् बुँज्या याइपिसं थःथःपिनि वा पिनातयातःगु थासय् ब्यायात जा नकः वनेगु धकाः बुँइ ब्यायात भोग तयाः तिनि छैय् वयाः थःथःपिनि नयेगु चलन नं दु । थथे ब्यायात जा तःवम्ह छैय् लिहां मवःतलय् छैय् च्वपिसं नयेगु चलन मदु । थथे ब्यायात बुँइ जा तयाः लिहां वयाः ज्यापुत प्यन्हु तक्क बुँ वनीमखु । थुकथं पुरा हे ब्यायात भरोसा यानाः त्वःता तयेगु चलन खः ।

बांलाःगु/बांमलाःगु न्ह्यागु नं खँया सूचकया रूपय् क्वःयात कयाः वयाच्चंगु समाजं गुंपुन्हिबलय् ताल्लाय् क्वखं मचा श्वयेकाः त्वाः ह्याउँसैं ह्याउँसैं च्वपिं नकतिनि नकतिनि पपूचा चुलि जायावःपिं क्वःचातय् ब्वयेका हैगु खः । श्व गुंपुन्हिकुन्हु अथे मचा मचापिं क्वःतय् ब्वयेकाः नसा माःवइगु जूगुलिं अमिगु लागि नं छगू भाग नसा क्वःचित जंकु यायेगु धकाः छँया जःपिसं नये न्ह्यः तयाबीगु चलन दु ।

धार्मिक रूपं गुंपुन्हि

भगवान बुद्धया जीवनी च्वयातःगु ललितविस्तरय् बौद्ध वचन धकाः न्ह्यथना तःगुलिइ श्व पुन्हियात श्री गौतम बुद्ध भगवान काममारयात त्याकाः सम्यक जुया बिज्याःगु दिं धकाः उल्लेख यानातःगु दु ।

श्वकुन्हु हे यमराजं यमलोकय् च्वपिं धर्मात्मापित षडक्षरी लोकेश्वरया रूप दर्शन बिद्याः धर्मोपदेश याना बिज्याःगु खः । श्व हे खं यानाः गुंपुन्हि ज्वःछि च्यान्हुतक बहालय्, बहिलय्, बहिद्यः, पौभाः व मेमेपिं छःपिं ब्वयातयेगु व बाजं थानाः, पाठ यानाः नं धर्मया ज्या यानाः चाःट्यु जूइगु थिति दुगु खः । अथे जूगुलिं गुंपुन्हिकुन्हु गुक्वः नयाः गुजु पुनाः गुथाय् बहिद्यः स्वःवनेगु परम्परा दु । श्व पुन्हिकुन्हुनिसैं गुंपुन्हि ज्वःछि बाहाः बहिलय् बहिद्यः ब्वइगु जूगुलिं गुंला बाजं थानाः बाहाः बहिलय् बहिद्यः स्वःवनेगु धकाः वनेगु चलन दु । गुंपुन्हिकुन्हु क्वाति मनाः बाइ दायेकाः छुचुंमहि नापं तयाः छःछःपिन्त पूजा यानाः, छायेगु परम्परा दु । छःयात छानाः जक छैय् च्वपिसं नयेगु चलन दु ।

जात्रा/मेला

गुंपुन्हिकुन्हु क्वाति त्वनेगु, जनै चीगु, जनै फेरे यायेगु जक मजुसैं श्व दिनकुन्हु थीथी कुण्डया मेला नं जुइगु खः । पौराणिक ग्रन्थअनुसार देवगण व असुरगण जानाः समुद्र मन्थन याःबलय् समुद्रं थीथी वस्तुत पिहां वल । अनं पिहां वक्व गुगुं दैत्यतय्सं कायेगु याःसा गुगुं देवतापिसं कायेगु यात । गुबलय् कालकुट विष समुद्रं पिहां वल देवगण व दैत्यगण सुनां नं कायेगु इच्छा मयाः । लिपा महादेवं थःम्हं कयाः नुना छवत । श्व नुना छवःगुया कारणं विषं पुनाः दाहा जुसेलिं महाद्यः सिलु तीर्थय् वनाः म्वःल्ह्याः विषया पीडायात शान्त यात । अज्याःगु कालकुट विषं छटपटय् जूगु हे क्वलाके फूगु जूगुलिं उगु तीर्थ शान्त स्वच्छ दुखं मुक्त जुइगु धाःगु खः । उगु तीर्थय् मेला विशेष यानाः गुंलाबलय् मनूत वनाः म्वःल्हइगु खः । गुंला मध्यय् नं मूख्यगु दिं धयागु गुंपुन्हि कुन्हु खः ।

श्व हे सिलुया लः वयाच्चंगु धयातःगु यलया बगलामुखी छःया न्ह्यःने च्वंगु कुम्भेश्वर महाद्यःया थाय् नं श्वकुन्हु हे मेला जुइगु खः । सिलुतिर्थया लः हे श्व थासय् वयाच्चंगु धयागु जनधारणा दु । छम्ह मनूया सिलुइ वनाः म्वःल्ह वंबलय् लःथल छवः सिलुतिर्थय् कुतुं वन । लिपा व हे लःथल यल कुम्भेश्वर तीर्थय् खने दत । श्व खनाः सिलुया लः थन वयाच्चंगु धयागु विश्वास जुल अले कुम्भेश्वर म्वःल्हइगु सिलुइ ल्हइगु ति ग्यं धकाः अनं नं मेला लगे जुल । अथे तं बनेपा वडा नं ११ बुडोलया श्री चण्डेश्वरीया रक्तचन्दन वनया दक्षिणपाखे छगू सिलुतिर्थ नाप स्वापू दुगु थाय् दु । उगु थासय् नं दँय् दँसं गुंपुन्हिकुन्हु मेला जुइ । श्वया बारे छगू धारणा दु उबलय् बनेपा दुने च्वम्ह छम्ह मनूया म्हगसय् समुद्र मन्थन याःबलय् पिहां वःगु कालकुट विष नुने धुंकाः महादेवं सिलुइ वनाः शान्त यायेत वंबलय् बनेपाया थौकन्हय् वडा ११ चन्देश्वरीया रक्तचन्दन वनय् छम्हाः दीगु जुयाच्चन । व हे थासय् शिवया मूर्ति तयाः मेला हनेगु महाद्यः नं म्हगसय् धाःथें अन मेला लगे जूगु धाइ । उगु थासय् छगू पुखू नं दु । बनेपाया बासिन्दातय्सं उगु थाय्यात सिलुतिर्थ धकाः नं धायेगु याः । बनेपाया बासिन्दा नापनापं मेमेगु थासय् च्वपिसं सिलुतिर्थ धकाः गुंपुन्हिकुन्हु वनेगु नं याः । सिद्धार्थ गौतमया रूपय् जन्म जुइ न्ह्यः थीथी जन्म कयाः तिनि सिद्धार्थ राजकुमार जुयाः जन्म जूगु बौद्धमार्गीपिनि विश्वास दु । लिपा भगवान बुद्ध जूम्ह व हे गौतम बुद्ध न्हापांगु जुनि मणिचूड राजकुमारया रूपय् नं जन्म जूगु खः । श्व खं बौद्ध जातक बाखनय् नं उल्लेख यानातःगु दु । मणिचूड राजकुमारया रूपय् जन्म कयाः बिज्याःबलय् भगवान बुद्ध थःगु छ्यं फायाः थःगु

मणिदान का:व:म्ह मन्थात दान बिया थ:गु दानप्रतिया उदार क्यना: बिज्या:गु ख: ।
 थ:गु छ्यं फाया: मणि दान ब्यगु थाय् धयागु सक्वया मणिचूडय् ख: । श्व हे
 मणिचूड थासय् दैय् दैसं गुपुन्हिकुन्ह मेला जुइ । मणिचूड राजकुमारया छ्यं फाया:
 मणि लिका:गु थाय् व मणि लिकाये धुंका: मणि स्यूगु थाय् धका: निगू थाय् दु ।
 मणि लिका:गु थासय् छगू बुंगा: दु । अले मणि स्यूगु धा:गु थासय् ल: वयाच्चंगु
 खुसिचा दु । थौतक नं उगु थासय् गुपुन्हिकुन्ह मेला लगे जू । भक्तजनपिं मणिदह
 (मणि लिका:गु थासय्) व मणिचूड खुसि (मणि स्यूगु खुसि) म्व:लुइगु, छ्वा:
 सिलीगु याना: मणिचूड राजकुमार थें दानपारमिता लायेमा: धका: कामना याना:
 पुण्य प्राप्त याइगु थाय् ख: ।

थुकथं गुपुन्हिया थीथी महिमा दु ।

सापारु / साया:

तिथि कथं गुलाश्व पारु अर्थात भाद्रकृष्णपक्ष पारुकुन्हुया दियात
 सापारु अथवा साया: कथं हनावयाच्चंगु दिं ख: । गुपुन्हिया कन्हय् कुन्हुया दिं साया:
 जात्रा जुइगुलिं सापारु धका: नामाकरण यानात:गु ख: ।

सापारु थुकथं हनेगु :- साया: वा सापारु गुबलेंनिसे सुरू जुल धयागु
 खँ ला निश्चित मजू । अथे जूसां नं नेवा: समाज दुने दैय्दसं छगू पर्वकथं हना
 वयाच्चंगु दिं ख: । धार्मिक भावना कथं श्व दिं सीम्ह मन्था हंस स्वर्गय् छवयेगु दिं
 कथं हना वयाच्चंगु ख: । श्व दिंकुन्ह नेवा: समाजय् गुभा:जु, बरे व उराय् बाहेक
 मेगु फुक्क जातिपिनि दछिया दुने सीपिं छँज:या नामय् सा छवयेगु चलन दु । श्व
 कुन्ह यमराज स्वर्गया लुखा चायेकीगु जूगुलिं श्व दिनय् सा छवत धा:सा सीपिनिगु
 आत्मा स्वर्गय् थ्यना: तरेजुइ धैगु धारणा दु । छाया:सा यमराजां दछिया दुने
 श्वकुन्ह छुन्ह स्वर्गया लुखा छपां बांलाक चायेकीगु ख: । थथे लुखा चायेकीबलय्
 दछिया दुने सीपिं दक्को व लुखां दुहां वनी धैगु धापू ख: । यमलोकय् थ्यंकेया लागि
 वैतरणी खुसि छीमा:गु जूगुलिं सीम्हसिगु आत्मा सानाप छित: धा:सा वं बांलाक
 अ:पुक खुसि छिना: वैतरणी तरेजुइ । अले यमराजया लुखा चाला मच्चंसां वा लुखा
 फुकं मचा:निसा साया न्यकुतिं थिना: लुखा चायेका: मृतात्मायात यमलोकय् थ्यंकाबी
 धयागु धारणा सीम्हसिगु नामं सा छवयेगु ख: ।

नेपा:या इतिहासय् नांजा:पिं जुजुपिलय् दुथ्या:म्ह छम्ह जुजु जयप्रताप
 मल्ल नं ख: । आपा: रानीपिं द:सां म्हो हे जक सन्तान दुम्ह प्रताप मल्लया थ: जुजु
 जुयाच्चंगु इलय् हे काय् चक्रवर्तेन्द्र मल्लया स्वर्गे जुल । काय् सिना: जुजुयात स्वया:
 नं मांम्ह रानीयात त:धंगु दु:खया मलखं कल । काय्या मृत्युइ मांम्ह महारानीं
 आपालं बिलाप या:गु जूगुलिं प्रताप मल्ल रानीया मन शान्त यायेत आ:पालं कुत:
 यात । तर रानीया मन काय् सिना: गुकथं बेचैन जुयाच्चंगु ख:, व शान्त मजुल ।
 अले जुजु या:या:थें मजिया: रानीयात सान्त्वना बीत थीथी तीर्थया ल: हया: न्हूपुखू
 दयेका बिल । अथें तं रानीयात सान्त्वना बीगुया लागि रानीया जक काय् सीगु मखु
 आपालं आपा: जनताया नं काय्मस्त सीगु दु श्व दैवया लीला जक ख: । सीगु
 म्वाइगु धैगु छगू सृष्टिया प्रक्रिया जक ख: । गुम्हं न्हापां सिइ गुम्हं ता: आयु स्वाना:
 सी धका: दैय् गुलित मनूत सीगु ख: उपिं फुकं हनुमानध्वाखाया लाय्कुलिइ वये मा:
 धका: जुजुया उजं जुल । श्व हे उजं कथं सापारुया दिनय् राज्य दुने गुलित सीपिं दु
 उमिगु नामय् साया: रूपय् वा सा छवयेगु प्रचलन जुल । अले रानी थ: काय्मचा

जक सीगु मखु राज्य दुने आपालं मनूतय नं थःथिति सीगु दु धैगु वा चायेकल । सायात प्रदर्शनी यायेगु खँय मेगु छगू नं धापू दु । थःथः छँया जःपि मृत्यु जूगु म्वानाच्चवंपिं छँजःया हेरविन्नार मगानाः मखु । बिरामी जुयाच्चंगु इलय तागत दुगु साया दुरु त्वंकाः लहिनागु खः । अथे जूसां बिरामी मम्बाः । बिरामीयात साया दुरु त्वंकाः लहिनागुया दसु कथं सायात जात्रा याना हःगु खः धयागु धापू नं दु ।

थुबलय सुथय सा छवयेगु जूसा न्हिनय छ्यालः वयेगु खँय नं जुजु प्रताप मल्लं थः रानी विरह वेदना जीवनय दुबिना च्वंगुलिं सुनानं रानीयात न्हीका मन बहलय यायेफु, वैत सिरपाः बी धकाः उजं व्यंगुलिं यानाः रानीयात न्हिकेत दछियंक जूगु समसामयिक घटनाया नापनापं राजनैतिक, आर्थिक आदि घटनायात विषयवस्तु दयेकाः व्यङ्ग यायेगु जूगु खः । मूलतया विरहलय दुनाच्चंम्ह रानीयात न्हीकेगुया लागि न्ह्याःगु परम्परा धकाः धायेगु नं चलन दु । बौद्धमार्गी विशेष यानाः गुभाःजु बरे उराय जातिया सापाख्या इलय सा छवयेगु चलन मदु । छायाःधाःसा थथे सा जुयाः थीथी रूप कयाः छ्यालः वडगु धयागु सिद्धार्थ गौतम बुद्धत्व प्राप्त यायेगुया लागि तपस्या च्वनाच्चंगु इलय तपस्या भंग यायेगुया लागि विभिन्न रूप कयाः मार वःपिं धकाः सायाः जक मछवयेगु मखु, सायाः व छ्यालःवःपिं तक्क हे स्वयेगु मयाः । थौकन्ह्य पुलां पुलांपिसं थव खँयात मान्यता व्यूसां न्हून्पिसं माने यायेगु मयाः । बरु स्वयेगु नं याः । तर परम्परा मदुगु जूगुलिं सा छवयेगु चलन धाःसा आःतक जूगु खनेमदु ।

सा छवयेगु

सायाःया सुरु न्ह्याबलें जूगु जूसां न्ह्यागु उद्देश्य ज्वनाः न्ह्याकूगु जूसां सायाः नेवाः समाज दुने मृत्यु संस्कार दुने दुथ्यानाच्चंगु दु । सीम्हसिगु नामं घःसू लत्याःखुला दकिला याये थें भाद्रकृष्ण पारुया दिनय सीम्हसित यमलोकय वा स्वर्गय थत वछ्याः मुक्त यायेगु ज्या म्वानाच्चवंपिसं याइगु क्रिया खः ।

न्हापा न्हापा सीम्हसिगु नामय धात्थे याःम्ह सायात हे छवःगु जुइमाः । लिपा सायात वछयेगु समस्या जूया साया सत्ताय सायाः रूप धारणा याकाः छँजःपिं विशेषयानाः कयतापुजा मयाःनीपिं मिजं मचातयत् सा याना छवयेगु यानाहःगु जुइमाः । सायाःबलय सा याना छवयेत साया छ्वाःपाः, साया नेक् च्वयातःगु रंगीन भ्वं अले पिरुङ्गीइ भ्वंया भण्डा दुगु कथि बजारय प्यन्हु न्यान्हु न्ह्यःनिसें मियातइ । सुयात सा छवयेगु खः व मचायात तुयुगु लें सुरुवाः फिकाः जवं खवं तुयुगु

कापः भ्यालल लुइका छवइ । भ्यालल लुया वनेगु धयागु मनूया निपा तुति जूगुलिं तुयुगु निखे निगू च्वःया लुया यंकेगु धयागु साया प्यपा तुति धाये थें मनूया निपा व कापःयागु निपा यानाः प्यपा तुति यानातःगु खः । सापारुकुन्हु सुथय सा यानाः यंकीम्ह मचायात म्वःल्हकाः पचंगव्य बियाः शुद्ध याये धुंकाः मचाया मिखाय अजः उइकाः म्हुतुसिइ लाली, ग्वाय म्दुनिम्ह मचायात ग्वाय तयेकाः छ्वालय पाउडर क्रिम बुकाः साधारण मचा स्वयां छ्वाः पाक समाः याकाः बीगु खः । तुयुगु लं गुम्हसिया कमिज, गुम्हसिया भोत लं, क्वय गुम्हसिया जामा, गुम्हसिया सुरुवाः गुम्हसिया तासया लं, तासया जामा, छ्यनय साया छ्वाःपा तिकातःगु जवंखवं रङ्गीचङ्गीया झण्डा नाप वछालिया न्यक् छुपु छुपु नं जवं खवं छुकाः पिरङ्गी पुइका बीगु जुइ । पिरङ्गी खनेमदयेक न्ह्यःने साया छ्वाःपाः जूसा लिउने न पिरङ्गी खनेमदयेक रुमालं त्वपुङ्गु यानातःगु जुइ । छायापेगुया लागि स्वानं छुकेगु यानातःगु खनेदु । वसः न्ह्यागु हे जूसा नं साया छ्वाःपाः पुनातैपिं सा वडपिनि तुयुगु जनी छुपु चिनाः जनीच्चः भ्यालल लुयायंकेगु यानातःगु खनेदु । थथे सायाः वनीपिं गुम्ह गुम्हसिया साया भेषय वनेगु मजुसे सन्यासिया भेषय नं वनेगु याः । थथे सन्यासिया भेषय सायाः वनीपिनि म्हुय पिताम्बरया धोती चिनाः चिम्ता कमण्डलु, पलेस्वां ज्वनाः नं वनेगु याः । सा जुयाः वनेगु धयागु मृतात्मायात यमलोकय दुत वछयेगुया लागि जूसाः सन्यासि जुयाः सायाः वनेगु धयागु जहानया मृत्युं विरक्त जुया सन्यासि रूप कयाः वनेगु खः । छ्वा छँय छम्ह व छम्ह स्वयां अक्वःसिगु मृत्यु जुल धाःसा, ग्वःम्हसिगु मृत्यु जूगु खः वःम्हसिगु नामं छम्ह छम्ह दरं सा वछयेगु प्रचलन दु । मनूयात साया रूप मब्यूसे सायात हे मृत्यु जूम्हसिया नामय सा वछयेगु नं यानाच्चंगु खनेदु । संस्कृतिविदपिनिगु धापू कथं न्हापा न्हापा मृत्यु जूम्हसिया नामय धाथेयाम्ह सा हे वछयेगु चलन दुगु खः । लिपा गुलिं मृत्यु जूगु खः उलि साया बन्दोवस्त याये मफुत वा थःपिनि सा मदुगुया कारणं यानाः, साया थासय साया रूप धारण याकाः मनू छवयेगु याना हल । मृत्यु जूम्हसिया नामय सा छवइगु कारण संसारय थी थी जंजालय लानाच्चंम्हसिया आत्मा शान्ति जुइमा, थव संसारपाखें मुक्त जुयाः यमलोकय वनेमा धैगु कामना कथं छवइगु खः । सुं नं मनू प्राण त्वःते न्ह्यः वैतरनी तरेयाना वनेफयेमा धकाः सा दान यानाबीपिं नं दु । अथे तुं तच्चः जुयाः प्राण वने मफुत धाःसा सा दान यानाबिल धाःसा प्राण त्वःता वनी धकाः धाडपिं नं दु । सिनाः तप्यंक यमलोकय वने फयेमा धकाः थः फू-बलय हे सर्यादान बियाः सा तर्क दान बिया वनीपिं दु । सा दान यायेगु धयागु यमलोकय वनीबलय वैतरनी तरे याये फयेमाः धकाः खः । नापं यमलोकय तिनातःगु खापा साया न्यकुलिं चायेकाः मृतात्मायात दुत वछ्याबी धकाः धाडगु जनधारणा दु । उकिं मृतात्मानाप साया तःधंगु स्वापू दु । थुकथं सायाःबलय सा वछयेगु धयागु वास्तविक सा हे खः । तर सा वछयेबलय सा छम्हांसित जक वछये मजिल साजवाः वनेमाल सा यंकेबलय सां लैय फोहर याइगु सायात माःगु नसा नं ज्वनावनेगु, सा छम्ह पशु जूगुलिं कजय

यायेत अःपुड मखु । सौन्दर्यया दृष्टि न मन्यात सा यानाः जात्रा यायेबल्य गुलि
 भःभः धाडगु खः उलि भः भः न मधाः । उकिं न श्व जात्राय मन्यात पशुया
 रुप्य सा यानाहडगु जात्रा खः । न्हापा न्हापा सा हे यक्को वडगु जुडमाः । थौकन्ह्य
 सा स्वयां मन्यात हे सा यानाः वडगु यक्को दु । थथे सायाः छवडबल्य मृत्यु
 जम्हसिया नाम्य दछिया ३६५ न्हि दैगुलि न्हि छगूया दरं नसाः विशेष यानाः मरि
 व फलफूल सायाः वःपिं मन्त व सायात दान बीगु याः । थथे दान यात धायेवं मृत्यु
 जम्हसिया नये खनी वा दान ब्यूगु नसा सुया नाम्य दान ब्यूगु खः वं हे न्हि छगूया
 दरं नये खनी धयागु आत्माविश्वास याइपिनिगु धापू खः । थथे सा वडपिन्त मरि व
 फलफूल जक मखु दुरु लः नं त्वंकेगु याः । धात्थें धायेगु खःसा थथे फलफूल मरि
 सायाः वःपिन्त नकेगु धयागु बांलाःगु खः । छायाःसा सायाः वःपिं मचातय साया
 परिक्रमा याइबल्य लः त्वने पित्याडगु, नये पित्याडगु जगुलिं लैय लैय थथे नयेगु
 नसा त्वनेगु दुरु दान याइगुलिं त्यानु मचाडगु खः । नाप सीम्हसिगु दुख्य जुडगु श्व
 जात्राय करुण रसं जायाः म्हाडपुडगुलिं नये लैय नसा नकेगु लः दुरु त्वंकीगु वने
 माःसा तच्चवतं म्हाडपुडगु जुड । म्हाडपुया त्यानुडगु जुड । थथे जुल धायेवं जात्राय गुगु
 भव्य चहक दुगु खः उलि दैमखु ।

जात्राया लैपु

सायाःया लैपु विशेष यानाः मल्लकाल्य शहर दुनेया लैपु जक खः ।
 यैया विशेष यानाः कुमारीया रथ सालाः जात्रा याइगु थाय् हे जक श्व जात्राया लैपु
 खः । थःथःगु छँ श्व लैपु दुने मलाः थःगु छँनं दकले सतिगु श्व शहरया लैपु लाक
 वड अले मन थम्हं सुरु यानागु गन खः अन अन्त याइ । यैया लागि श्व लैपु धयागु
 भिद्यः त्वालं सुरु याःसा भिद्यः त्वालं मरुड सिंहसतः न्ह्यःने मरुसतः जुयाः गणेद्यः
 चाःहिलाः यतखा वनी लैपु थथे खः ।

भिद्यः मरु, यतखा, न्यतः, न्ह्यःखा, न्हाय्कत्वाः, प्ययंगःथां, असं,
 बालकुमारी, जनमाद्यः, वंगः, हनुमानधवाखा, मरु, चिकमू, ज्याबाहाः, लगं,
 ब्रम्हत्वाः, क्वहिति, व भिद्यः श्व थाय्या लैपुड लाःपिं द्यः व द्यःत चाःहिला वनी ।
 मरुड निक्वः लाइगुलिइ छक्वः चिकमू वनीबल्य मरु सतःया पूर्वपाखे लाइ लिपा
 भिद्यःयाथाय् थासं थाहां वडबल्य मरु सतःया पश्चिम पाखे लानाः गणेद्यः चाःहिलाः
 यतखाय् लाकः वनी ।

सायाः वनीगु तरिका

सायाः वनीबल्य छ्वा छँ छम्ह जक सा यानाः छ्वयेगु जुड । गुम्ह
 गुम्हसिया सायाः वडबल्य धिमेय् थाकाः नं यंकेगु चलन दु । थथे धिमेय् थानाः
 यंकीबल्य विशेष यानाः सा जुयाः वःम्ह मचायात छत्रं कुडकाः छायेपाः यानाहयेगु
 चलन दु । थथे छत्रं कुडका सायाः हःसा गुम्हसिया छम्ह, गुम्हसिया स्वम्ह, गुम्हसिया
 न्याम्ह, गुम्ह गुम्हसिया न्ह्यम्ह तक्क नं सा यानाः जात्रा यायेगु चलन दु । थथे छम्ह
 जक मन्या नामं नं हयेगु वा छगू जःया दुने निम्ह स्वम्ह सीत धाःसा अपिं फुक्कसिगु
 नाम्य थथे पुचः पुचः खाका जात्रा यायेगु याः । थथे जात्रा याइबल्य जात्रा बांलाइगु
 व भव्यता खने दडगु खः । धिमेय् बाजं थानाः छत्रं कुडका हल धाःसा छम्ह स्वयां
 अप्वः विजोड मचातयत सा यानाः वड्या हयेगु चलन दु ।

थथे सा जुयावःम्हसित च्वय न्ह्यथनागु लैपु सायाः यंकेगुयात दै
 चाहिकेगु धकाः धाड । सा जुया दे चाःहिला वःम्ह मचायात पिखालखुड तयाः
 म्हायामचा वा मिसापिसं लै धूछि लुयाहःगु कापः सायाः तुतिया रुप्य कयाः क्वलाय्
 चायेगु याः । अले लसकुस यानाः छँ दुत यंकेगु याइ । थथे लुखाय तयाः दुकायेगुयात
 वेतरणी चाःहिला स्वंगंय दुकायेगु धकाः धाडपिं न दु । यदि श्वयात वैधानिक धंग
 स्वयेगु खःसा दे चाःहिला वःम्हसिनं छु छु न्ह्यावल जुड । फोहरय न्ह्या वल वा
 फोहर पुंका हल जुड धकाः सफा यायेगुया लागि सफा याना दुकायेगु खः । सायाः
 जक मखु सा वना वःम्हसित ल्हाः तुति नं सिकेगु चलन दु । सा वनावःम्ह मन् लिहां
 वल धायेवं तिनि छँया हामाया नयेगु याइ । अथे तुं पिखालखुड दुकाइम्हसिया नं सा
 वनावम्ह मचायात दुकाये धुंकाःतिनि नयेगु याइ । तर सा जुया वम्ह मचायात धाःसा
 टालाका यंके म्वाः । लैय लैय हे सीपिनिगु नाम्य दान बियाच्चंगु मरि फलफूल
 कयाः नयेगु नं याइ नापनापं लैय नकेमाःधकाः नयेगु व त्वनेगु नं ज्वनावनी । अभ्र
 छँ हे नका वडगु नं याः । तर सीगु छँ सा छक्वः वड्ये धुंकल धायेवं सिधल ।

हिन्दूमार्गीतयसं गुण्णिकुन्हु सा वड्येबल्य रामायण दयेकाः भजन याकाः
 नं वड्येगु चलन दु । रामायण धकाः राम लक्ष्मण व सीतापिनि छँ नापनापं मृत्यु
 जम्ह मन्या भिंगु विशेष गुण नं प्रस्तुत यानाः भजनया टोली वड्येगु चलन दु ।
 भजन टोली गुम्हसिया मोटर, गुम्हसिनं रिक्साय् गुम्हसिया मन् हे बाजं क्वबुया हयेगु
 चलन । थथे रामायण हडपिं पुचःयात विशेष कथं छायेपा हयेगु चलन दु । रामायण
 हःपिनि थाय् थासय् त्वाः त्वाल्य दिनाः दिनाः रामायण हाला क्यनेगु याइ ।
 रामायण विशेष यानाः करुणरस प्रधानगु निर्गुण भजन जगुलिं नं दर्शकतयत नुगः
 मछिका बीगु कथया जू । रामायण सुथय् पिदसा नं न्हिनय् बहनी तक नं हालाः

यंके ज्यू । नेवाः वस्ति दुगु थाय् थासय् सायाः न्यायेका च्वंगु खनेदु । यल, ख्वप, बनेपा, पोखरा बागलुङ आदि थाय् थासय् सायाः जू । सोपिनिगु नामय् याइगु जूगुलि दक्को थासय् च्वपिं नेवाःतय् सीपिं थःथिति फुकं स्वर्गय् बनेमाः धकाः खः । सापारु नेवाःतय् हनेमाःगु नखः जूसा नं दक्व थासय् छगु हे कथं मज् । यलय् ख्वपय्, किपू आदि थासय् पाः । यलय् सापारुकुन्हु सा व्छये माःपिं दक्को नेवाःतय्सं थःथःगु छँया स्वर्गे जूपिं जःपिनिगु नामय् सा व्छयेगुया लागि गुम्हसिया यँय् थें छयनय् पिरङ्गीड साया ख्वाःपाः पुङकाः व्छालिया न्यक्, ध्वाँय् तियाः जामां फिनाः तुयु कापः भ्याँलल लुङका वनीपिं गुम्हं जोगी जुइपिं गुम्हं सन्यासी जुइपिं आदि थी थी भेषय् कृष्ण मन्दिरया न्ह्यःने मूं वइ । थुकथं निश्चित थासय् मूं वइ । दक्व मुन धायेवं सा वनेगु धकाः शहर परिक्रमा याइ । यँ सायाः थः याकः याकः जूसा नं सुथ बहँछि वइगुलिं अप्वः यानाय् सुथसिया ७:३० बजे निसें १० बजे तक अप्वः सायाः वनीपिं मुं वइ । यलय् सायाः वनीपिं मुनेगु छगु ई बी । व हे ई कथं उपस्थित जूवइ अले सायाः जात्रा जुइ । सा व्छइबलय् ततःग्वःगु डम, खालीगु ताकिचा घः आदि ततःसकं थानाः आवाज वयेकाः परिक्रमा यायेगु नं चलन दु । थये ततःसकं आवाज बीगु धयागु सीपिनिगु आत्मा छँया जःपिनिगु माया हानं छँ न्याहां मवयेमा धकाः ख्यानाः स्वर्गय् व्छःगु धकाः धाइ । सा वनीपिं नाप राम व सीता जुइपिं मचात दै, अमित थाय् थासय् पूजा याइ । थन सा हे नं व्छयेगु चलन दु । सापारुकुन्हु ख्वपय् दछिया दुने स्वर्गे जूपिं छँया जःया नामय् सा व्छयेगु चलन दु । तर थन सा व्छइगु यँ व यलय् सा व्छइगु स्वयाः पाः । ख्वपय् सा छ्वइपिनि पिरङ्गीड छखे सायाः ख्वाःपाः मेखे तयाः सा व्छइगु ।

गणेशःया ख्वाःपाः च्वय्लाक व्छालिया न्यक् निपु छुनाः न्ह्यःने छुइपिं नं दु । गुम्हसिया व हे पिरङ्गीड भ्वंयात कापतं हिनाः ताहा सा जात्रा यायेगु चलन नं दु । उकिं ख्वपय् ताहासायाः जात्रा धकाः धाइगु खः । साया ख्वाःपाः व हे छपु पँथय्, मेमेपिसनं थःथःगु छँय् मृत्यु जूपिनिगु नामय् पिरङ्गीड साया ख्वाःपाः, गणेशःया ख्वाःपालय् कापः हिनाः छगुलिइतुं नं तयेगु याः । थये व्यक्तिगत ताहाः सा जुइफु, छगू कवःया छपु नं जुइफु छगू त्वाःया नं जुइफु । जात्रा याये न्ह्यः पुरोहित वा गुरुजं सायात पूजा याये धुंकाः तिनि शहर परिक्रमा यायेगु जुइ ।

पांगाय् सापारुकुन्हु थःथः छँया जःपिनि नामय् सा छ्वयेगु प्रथा यँ यल ख्वपय् स्वयां पाः । सा जुयाः वनीपिन्त रंगीङ्चंगीया परसि गुजिगुजिं कायेकाः जामा थें हिना बी । लं नं मिसालं फिकाः ख्वापालय् ग्वाय् तयेगु, अजः उइगु आदि ज्या याइ । सा व्छयेगु जूगुलिं छयनय् साया ख्वाःपाः, न्यक् आदि नं तयेगु याइ । गुपुन्हि ज्वःछियात ख्यालःया नखः धकाः नं धायेगु याः । समाजय् दछिया दुने चर्चा जूगु राजनैतिक, आर्थिक, सामाजिक आदि घटनायात ख्यालःया विषयवस्तु दयेकाः ख्यालः पिथनेगु याइ । थज्याःगु ख्यालः विशेषयानाः गुपुन्हिकुन्हु हे पिथनेगु नं जू ।

सापारुकुन्हु विशेष यानाः ख्यालः पिथनेगु याइ । सापारुबलय् निगू कथंया ख्यालः पिदनीगु खनेदु । न्हापांगु ख्यालः सायाः नापनापं हे वइपिं मन्तय्गु ख्यालः गुपिसं ख्वालय् हाकुक् रङ्गीचङ्गी पानाः वसः नं भांग्रा, छखे लंच्व दुगु सा मेखे लंच्व मदुगु अथे तुं सुरुवाः नं छखे बागः सुरुवाः दुगु छखे पुरा हे दुगु, अथे तुं चस्मा हे तये म्बाःसां हाकुगु चस्मा तयाः, तुतां चुयाः, आगंसा खनेदुगु तपुलि पुयाः वा तपुलि आगंसा पिकयाः आदि स्वजक स्वयेबलय् हे न्हिले मास्तिवइगु कथंया भेसभूषा पुनाः ख्यालः वइपिं दु । थये ख्यालः वइपिं मन्तय् वसः, छाय्पा खनेसाथं न्हिले वइगु कथंया मन्त सापारुकुन्हु सायाः नापनापं सायाः चाःहिलीगु थाय् दक्व चाःहिलेगु याइ । थये वःपि ख्यालःतय् स्वर्गे जूपिनिगु नामं दान याइगु नसा नं दान बीगु याः । थज्याःपिं अप्वः यानाः छम्ह छम्ह अलग अलग वयेगु याइ । यदि छुं छुं खं व्यङ्ग्य यानाः बने माल धाःसा खल्हाबल्हा यायेगुया लागि निम्ह वा स्वम्हत्क नं वयेगु याः । थज्याःपिं विशेष यानाः ख्वाः खन धायेवं नं न्हिले वइगु कथं छाय्पा यानाः ख्वाःयात ल्वयेक हे वसःनं पुनावइ । सापारुकुन्हु ख्यालः छाय् वल धाइगु खँय् जुजु जयप्रताप मल्लया काय् चक्रवर्तेन्द्र मल्लया मृत्युं विरह जुयाच्वंम्ह रानीयात विरहलं मुक्त यानाः न्हीकेया लागि जनतातय् आह्वान याःगुलिं जनतातय्सं रानीया विरह तकेया लागि सापारुया सा हयाः विरह यानाच्वंम्ह रानीया काय् छम्ह जक मृत्यु जूगु मखु धकाः क्यनेगु कोशिस याःगु खः । उकिं ख्यालः हयाः विरह जुयाच्वंम्ह रानीयात न्हीके व्यूगु खः धायेगु नं याः ।

मेगु ख्यालः बान्हिनिसें हयेगु जुइ । थज्याःगु ख्यालः गुपुन्हिया छुं दिं न्ह्यःनिसें स्यनाः नासःद्यः पूजा यानाः पिदनीगु जुइ । दछिया दुने जूगु खँया लुमनीगु विशेष यानाः सामाजिक, राजनैतिक, आर्थिक खँ, दैवी प्रकोप आदिया खँयात कयाः व्यङ्ग्य बियाः प्रस्तुत याइ । नेपाःया इतिहासय् धाःथें ख्यालः धयागु गुबलेनिसें प्रस्तुत जुल धयागु सी मदुसा नं यलया सिद्धिनरसिंह मल्लं पिकाःगु काति प्याखनय् यलय् बाथः प्याखं न्हापांगु ख्यालःया प्रस्तुती धकाः धया वयाच्वंगु दु । सिद्धिनरसिंह काति प्याखं पिकाःगु जूसां श्रीनिवास मल्लं बाथः प्याखं नं दुथ्याकूगु जुल । तर श्व बाथः प्याखं ख्यालि प्याखं जूसा गुपुन्हि इलय् क्यनेगु मज्जसे कार्तिकं क्यनीगु काति प्याखं नामं दुथ्याकातःगु दु ।

यँया ३२ गू त्वाःया ज्यापुतय् ज्यापु समाजय् मचातय् धिमेय् बाजं थाये सयेकेया नापं धुँन्या बुँन्या चाःहिके सयेके बियाः न्हपिं ज्यापुतय् थःगु प्रतिभा प्रदर्शित याये कथं वसं वनेगु चलन दु । थये वसं वनेगु चलन यँया थःने च्वपिं ज्याथा कुमाः व क्वःनेया धौभ्यगः कुमाः निगू थाय्पा कुमाःतय् मदुगु जूगुलिं थःने च्वपिं ज्याथा कुमाःतय् कथः वनेगु व क्वःनेया धौभ्यगः कुमाःतय् बाथः वनेगु धकाः दु । १२ दँय् छक्कः छक्कः पिकाइगु श्व बाथ प्याखं व कथः वनेगु निगुलि गुपुन्हिबलय् पिदनीगु ख्यालः खः । भिनिदँय् छक्कः पिकाइगु जूसां नं श्व निगुलिं खुदँ खुदँ जक पाः । बाथः प्याखं पिकयाः खुदँलिपा कथः वनेगु ख्यालः पिकाइगु खः । श्व बाथः व

कथः निगुलिं प्याखनय् चरित्र बांमलाःपिं मिसात, थीथी पेशाय् न्ह्यानाच्चवंपिं नेवाः जाति, चरित्र मदुपिं मिजंतयत ब्यङ्ग यांनाः प्रदर्शित याइगु प्याखं खः । ज्यापु जातिया विशेष यांनाः सिनाज्याबल्य् वा पीधुंकाः सुमुक च्वनेगु इलय् न्ह्याइपुङ्केत गुंपुन्हिबलय् ज्यापु प्याखं पिकयाः त्वाल्य् क्यनेगु नं जू । विभिन्न राजकुमार राजकुमारीया बाखंया नापनापं धार्मिक बाखंया आधारय् ज्यापु प्याखं बुंज्या याइपिसं थःगु विचारं फुथें चाःथें स्यनाः पिकाइगु खः । प्याखं दयेकूसां नं चैन सिपाइ घिन्तामुनि धकाः प्याखं हुकेगु चलन दु । थज्याःगु

गुंपुन्हि ज्वःछि क्यनाः सिमधल धाःसा येंयाः ज्वःछि नं क्यनेगु याइ । थुकथं गुंपुन्हि ऐतिहासिक सांस्कृतिक, साहित्यिक रुपं महत्वपूर्णगु नखः खः । सिनाज्या यांनाः यक्व ज्या याःपिं ज्यापुतय् सिनाज्या यांनाः त्यानु लंकाः न्ह्याइपुक हनीगु नखः खः ।

मतयाः / न्यक् जात्रा / श्रृंगभेरी जात्रा

गुंपुन्ही जःछि न्याइगु जात्रा नखः मध्यय् भाद्रकृष्ण द्वितीया (गुंलागाः द्वितीया) कुन्हु यलय् (यलदे) छथाय् जक जुइगु जात्रा खः मतयाः वा नेक् जात्रा (श्रृंगभेरी जात्रा) । दछिया दुने थःथःगु छैय् मदुपिं छैय्या जहानपिं सुखावति भुवन (स्वर्गय्) वनेमा धकाः नेवाःतय्सं हनावयाच्चवंगु सायाः थें तुं यलय् दछिया दुने मदुपिं थः छैय्या जःया नामय् यल दे दुने दुगु भगवान बुद्धया गुलिः नं चैत्य, देगः, मूल मूल द्यःपिन्त मत बीगु कथं न्ह्याइगु मतःयाः खः । यें दुने भाद्रशुल्क द्वादसीकुन्हु परिवारया दुने मदुपिं जहानपिनिगुया नामय् मतः बियाः दे चाहिलीगु थें तुं यलय् मतयाः वनीगु खः धाइपिं नं दु ।

गुंलां बौद्धमार्गी परिवारया मदुपिं दुजःतय् नाम पूजा पाठ यांनाः दिवंगत आत्मा शान्तिं बास काये फयेमा धकाः कामना यांना च्वनी । थव हे अनुरूप येंय् उपाकु वनेगु चलन दु थें यलय् नं अथे हे मदये धुंकूपिं थःपिनि पूर्वज आदि नाता कुतुम्बतय्सं सुखावति भुवनसं बास लायेमा धकाः कामना यांनाः भाद्रकृष्ण दुतिया दिक्कुन्हु न्हिछियंके मतयाः वनी । मतयाः यल दे दुने नगरीइ विराजमान जुया बिज्यानाच्चवंपिं बुद्ध बोधिसत्व तथागतपिं व चैत्य आदि अनेक रुप पूजा यांना जुइगु छगू ऐतिहासिक नखः खः । (बिक्रम शाक्य, सन्ध्या टाइम्स दे १ ल्याः ३०२ शुक्रवार)

यल देशय् जुइगु मतयाः जात्राय् छैय् जःपिं स्वर्गय् वा सुखावति भुवनय् लायेमा धकाः जक मखु छैय् परिवार दुने थःपिनि सुख समृद्धि, शान्ति जुइमा धकाः नं यल दे दुने च्वंगु चैत्य, बहाः, बही देगः, आदि चाःहिलीगु जूगुलिं मतयालय् ब्वति काइपिं भक्तजनपिं आपालं आपाः दैगु खः ।

मूख्य रुपं बौद्ध चैत्य बहाः बही देगः आदि चाःहिलीगु जूगुलिं बौद्ध धर्मावलम्बीपिसं जक हनीगु जात्रा थें खः । अथे जूसां हिन्दु, शैव आदिमार्गया भक्तजनपिसं थव जात्राय् ब्वति काइगु जूगुलिं संख्यात्मक दृष्टि आपालं आपाः भक्तजनपिं उपस्थित जुइगु जात्रा खः । भक्तजनपिनि मनया शान्तिया नापनापं परिवारया शान्तिया कामना नं याइगु खः । थव जात्रा बौद्धमार्गीपिसं जक हनीगु जात्रा जूगुलिं थव जात्राय् बौद्ध चैत्य देगः बहाः बही

विशेष रूपं चाःहिलीगु जूसां मेमेगु धर्माबलम्बीपिसं नं ब्वति कयाः नेवाःया संस्कृतिनाप आबद्ध जूगु धर्मया धार्मिक सहिष्णुता रूप्य प्रस्तुत जुइगु जात्रा नं खः ।

मतयाःबलय् विशेष यानाः बुद्धया मूर्ति, देगः, बहाः बहिल्य मतः च्याकाः मतः छाइगु जूगुलिं नं मतयाः धकाः धाःगु खः ।

जात्राया उत्पत्ति

थौ स्वयाः भिंगुसः दँ न्हापा सिद्धार्थ गौतमं बोधिज्ञान प्राप्तया लागि तच्चतं तःधंगु, थाकुक्क तपस्या यानाबिज्यात । उगु तपस्या यायां बोधिज्ञान प्राप्त जुइन धकाः सियाः सिद्धार्थ गौतमं बोधिज्ञान प्राप्त याइगु मयःपिसं तपस्या भंग यायेगुया लागि तान्त्रिक पद्धतिं मनूयात बांलाःपिं सुन्दरीपिं, प्याखं हुइपिं प्याखं म्वः, तरवार भाला ज्वनाः स्याये धकाःवःपिं राक्षसतय्त् ल्यायेत विभिन्न भंगः पशुपछिया रूप धारणा यानाः, तपस्या यानाःच्वम्ह सिद्धार्थ गौतमयाथाय् मारत वयेगु यात । थःथःपिनिगु बलं तपस्या भंग याकेत सुन्दरी जुयावःपिसं प्याखं ल्हुयाः भंग यायेगु कुतः यात सा, तरवार भाला ज्वनावःपिसं पाला स्यायेगु स्वःसा, थी थी भंग पशुपछिया रूप धारणा याना वःपिसं थी थी सः पिकयाः तपस्या भंग यायेगु कुतः यात । तर सिद्धार्थ गौतमया तपस्या भंग मजुस्य भन एकचित्त मनं तपस्या याना बिज्यानाः मारगण फुकसित त्यांकाः बोधिज्ञान प्राप्त याना फुक्क मारपाखे विजय जुयाः भगवान जुया बिज्यात । थ्व हे बोधित्व प्राप्त याना बिज्याःगुया उपलक्ष्य दश दिग लोकपालपिं बिज्यानाः भगवान बुद्धया बिजय उत्सव कथं मतः च्याकावःगु दिं जूगुलिं यलयया थ्व जात्रायात मतयाः धकाः धाःगु खः ।

अथे तुं भाजु ध्रुवकृष्ण दीपया धापू कथं सिद्धार्थ गौतमया बुद्धत्व प्राप्त यायेगुया लागि तच्चतं थाःकुक्क तपस्या च्वनाबिज्यात । बुद्धत्व प्राप्त याइन धकाः इर्ष्या जूपिसं थःपिं ग्यानापुपिं राक्षस, मिच्वाःलाखेय् आदि ग्यानापुगु भेष कयाः सिद्धार्थ गौतमयात बुद्धत्व प्राप्त याके मबीगु कुतः यात । सिद्धार्थ गौतमं थथे इर्ष्यावशं राक्षस जुयाः मार वःपिन्त छुं हे वास्ता मयास्य तपस्या यानाः बोधिज्ञान प्राप्त यानाः भगवान बुद्ध जुया बिज्यात । मार वःपिन्त हे ज्ञानगुण खँ धाये उपदेश बिया लित व्छया बिज्यात । लिपा व हे मार वःपिसं हे भगवान बुद्धयात तःधंम्ह

ज्ञानि गुणिम्ह धकाः हनेगु यात थ्व हे मारः वःपिन्त बिजय याना बोधिज्ञान प्राप्त याःगु दियात हे मतयाःया दिं कथं हनेगु जुल । (Deep , Mataya: The Buddhist Festival of Lights"- 29)

भाजु ध्रुवकृष्ण दीपया धापू कथं मतयाः धयागु हे बौद्धमार्गीपिनि मतयाः नखः खः । बुद्धया बोधिज्ञान मत थें च्याना देशय् जः व्हल धयागु धारणाय् थ्व नखः खः । धाथें धायेगु खःसा भगवान बुद्धयात एशीयाया जः धकाः विश्व धाल । थौकन्ह्य् एशीया जक मजुसे विश्वया हे जः जुल ।

मतयाःयात नेकू जात्रा धकाः नं धाः । नेकू जात्रा धायेगुलि नं बुद्धधर्मनाप हे स्वापू दुगु जुयाच्वन । मतयाःबलय् मेय्या नेकू पुयाः चैत्य, देगः बाहाः बही चाःहिलेगु परम्परा दु । नेकू पुयाः जात्रा याइगु जूगुलिं थ्व जात्रायात न्यक् जात्रा धकाः नं धाःगु खः । थ्व जात्रायात श्रृंगभेरी जात्रा नं धाः । नेकू जात्रा छाये धाल गथे जुयाः नेकू जात्रा जुल धयागु खँय् थन संस्कृतिविद् भाजु सत्यमोहन जोशीया धापूयात प्रस्तुत यायेत्यना । वय्कःया धापू कथं "नेवाःतय्गु" जीवन शैली जातीय संस्कृति जक मखु, आध्यात्मिक संस्कृति (Spritual Culture) नं ब्वल्हंकूगु जुल । थुजाःगु हे प्रसङ्ग्य विचित्र द्वाविंशतिकावदान अन्तर्गत सिंहकेतुराजाया बाखंया लिधसाय् नीस्वनाताःगु नेकूजात्रा यलदेशय् थौतक नं थःगु परम्परा मत्वःतुसे जीवन्त जुयाच्वंगु जुल । बाजायागु विकासक्रम माला वनेवल्य नेकू बाजा ति पुलांगु मेगु बाजा ल्वीके थाकु । नेकू धयागु अर्थ खः मेय्यागु नेकू । आः थ्व नेकू गथे यानाः प्वीगु बाजा जूवल थुकियागु संक्षिप्त बाखं छपु दु गुगु थथे खः ।

शशिप्रभा (शशिपट्टन) धइगु छगू नगरस सिंहकेतु धइम्ह जुजु छम्ह दु । व जुजुया साप हे पतिव्रताम्ह कलाः छम्ह दु । वयागु नां खः सुलक्षणा । जुजु इलय् ब्यलय् शिकार वनेमाःम्ह जुयाच्वन । थथे शिकार वनाः निर्दोषपिं पशुतय्त् स्याना ह्येमत धकाः कलाःम्ह भातम्हसित तःक्कःमछि न्वातं नं, थुज्वःगु खँय् भाःतम्ह छतिं च्युता मतःगु जुल । छन्हु थःगु भोग सिधेवं जुजु सित । लिपा जुजुया कलाः सुरक्षणा नं सित ।

इपिं निम्हेसियागु नं जन्म छम्ह ब्रम्हया छँय् जुल । जुजु सिंहकेतु मेय् जुयाः ब्रम्हया छँय् मेगलय् च्वनेमाःम्ह जुल । सुरक्षणा ब्रम्हया रूपवति धइम्ह म्हायाम्चा जुयाः जन्म जुयाः इहिपा मयासे च्वना च्वन । पूर्वानुस्मृतिया शक्तिं व लक्षणा ज्ञानं रूपवतिं मेय्यात पूर्वजन्मयाम्ह थः भाःत धकाः म्हासिकाः मेय्यात फयांफछि सेवा याना जुल ।

छन्हु दैवसंयोग, व मेय् भेसलूगु थासं कुतुंवनाः परमधाम जुल । रूपवतिं तच्चतं नुगः मछिकल । अले वं फिसःयागु छगः चैत्य दयेकाः उकिया गर्भय् पूर्वजन्मया भाःत मेय्या क्वेय् मुनाः हयाः स्वथन उगु चैत्यय् गज्जु थें यानाः मेय्या छपू न्यक् धस्वाकल । ल्यंदनीगु मेगु नेकुतिइ च्वय् प्वाःखनाः प्वीगु बाजा दयेकल ।

अले वहे नेक् पुयाः लछियंक चैत्य प्रदक्षिणा यानाजूबल्य वया न्ह्यःने वया न्हापायाम्ह भात सिंहकेतु "धर्मशील" या नामं प्रकट जूवल । श्व खनाः रुपवति अतिकं लयताल । लिपा धर्मशीलं थःगु नां भद्रभृङ्गी धकाः तल । (जोशी, सत्यमोहन, यलदेया नेकूजात्रा व स्वपू म्ये पृ १३)

बाखं छगू हे जूसां भाजु मदनसेन वज्राचार्य न्ह्यःव्यातःगु कथं मे सिङ्गु खँय सत्यमोहन जोशीजुं प्रस्तुत यानादीगु स्वया पाः । भाजु वज्राचार्यया कथं रुपवति मेय् ज्वःवंबल्य छन्हु जंगली पशुपक्षितयसं स्थानाः नसेलि विरह यानाः छ्वयाच्चम्हसित सुपारंग बोधिसत्त्व व मेय् छिमि पूर्वजन्मया भाःत खः । श्वया उद्धार यायेत क्वयं दक्क चैत्य दुने तयाः छपु नेकुति लः हायेकाः मेगु नेक् पुयाः नीछन्हु तक्क सेवाः या धाःथे यासेलि उगु पुयाच्चंगु नेकुति जुजुया न्हगु जन्म जुल । श्व हे कारणं यानाः गुंलाज्वःछि चैत्ययात परिक्रमा यानाः नेकूया नापं अनेक बाजं थायेगु परम्परा न्ह्याःना च्वंगु खः । (वज्राचार्य, "गुंलाधर्म गुंला बाजं" पृ ११)

गुंलाज्वःछि नेक् पुङ्गु परम्परा यलय् जक मखु स्वयम्भूङ्गु गुंला लछि नेक् पूजा यायेगु व छँजःपिन्त स्वर्ग्य् छयेगु कथं स्वयम्भूङ्गु नेक् पुङ्गु परम्परा नं थौं तक्क न्ह्याना च्वंगु दनी । न्हापा न्हापा नेक् छपू जक पुङ्गु जुसा आः श्व नेक् नाप नापं मेमेगु बाजं नं थायेगु याः । आ थौंकन्ह्य नेक् जक मथाःसे धाः बाजं धकाःनं धायेगु याः ।

मतयाःया ऐतिहासिकता

मतयाः नेकूजात्राया प्राचीनता थुबल्य हे धकाः सी मदु । भाजु मोदनाथ प्रश्रितया धापू कथं श्व जात्रा लिच्छवि कालं निसैं न्ह्याना वयाच्चंगु जात्रा खः । (प्रश्रित मोदनाथ, शुभकामना पृ ३) यलय् परापूर्वकालं निसैं हनावयाच्चंगु नखःचखः जात्रा मध्यय नेक् जात्रा मतयाः छगू नं खः । (वैद्य, जनकलाल शुभकामना पृ ७)

यलया बालार्चनदेव संस्कारित जेष्ठवर्ण महाविहार निर्माण जूगु लसताय जुजु बालार्चनदेवं थनिं भिंखुसः दै न्ह्यः श्व परम्परा स्वनाः वंगु खः धयागु धापू भाजु पं. हेमराज शाक्ययागु दु । भाजु करुणाकर बैद्यजुं नं श्व जात्रा परापूर्वकालनिसैं न्ह्याना वयाच्चंगु जात्रा खः धया दीगु दु । अथे जूसां वय्कःया धापू कथं लिपा छक्वः श्व जात्रा दिना वंगुलिं ठकुरी जुजु गुणकामदेवं हाकनं चले यानावंगु खः ।

यलदेया प्रख्यातम्ह जुजु सिद्धिनरसिंह मल्लया पालय् ने.सं. ७५८ पाखे भयानक ल्वचं कयाः अत्याख धनजनया नास जुल । थुगु महामारी याःगु नास संयम यायेत जुजु सिद्धिनरसिंह मल्ल यल देशय् पलिस्था यानातःपिं सकल बुद्ध

बोधिसत्त्वपिनिगु थासय् मोय्या नेक् पुयाः अनेक कुतः यानाः लिपा लिपा गुबलें नं थुकथं महामारी ल्वय् मवयेमा धकाः कामना यासैं थुकियात संरक्षण बिइत गुथि नापं स्वनाब्यगु खः । यल दे दुने च्वंगु बौद्ध मन्दिर देगः, बाहाः बही चाहिलेगु ज्या सिद्धिनरसिंह जुजु स्वयम थः याकःचां जक यानाबिज्याःगु मखु । सिद्धिनरसिंह मल्लया राज्यकालय् जूगु उगु महामारी शान्त यायेत जुजु राजगुरु, वज्राचार्यपिनाप च्वनाः सहलह ब्याकाः नेक् जात्रायात समावेश यानाः यल दे दुनेया १० त्वाःया भद्रभलादमीतय् हःपाः बियाः हानं नी याकूगु खः, अर्थात पुनर्जागरण याकूगु खः । थुकिं यानाः यल देशय् महामारी शान्त जुल धयागु ज्याथाज्याथिपिनिगु धापू दु ।

थौतक्क नं यल देया भिंगू त्वाःयापिं भद्रभलादमिपिं धर्मय् मन क्वसापिसं पालपाः न्ह्याका वयाच्चंगु मतयाः जात्रा खः । श्व भिंगू त्वाःया नां थथे खः ।

क) मंगः बजाः	ख) चक्रबही	ग) इखाछें
घ) बूबाहाः	ङ) हौगः	च) बकुबहाः
छ) इखालखु	ज) क्वबहाः	झ) सौगः
ञ) नकबही		

च्वय् न्ह्यः थनागु १० गू त्वालं छसिकथं पालपाः हनेगु जूगुलिं छगू त्वालय् १० दैय् छक्व पाः लाइ ।

मतयाः न्ह्याङ्गु प्रक्रिया

भाद्रकृष्ण द्वितीयाकुन्हु यलया भिंगू त्वाः मध्यय गुगु त्वालं मतयाः न्ह्याङ्गु खः उगु थासय् मतयाः वनीपिं भक्तजन मुनेगु याइ । मतयाः वनीपिं भक्तजन गुम्ह थःथःपिनिगु छैय्या जः मदुपिनिगु नामय् मत तयेगुया लागि वनी । गुम्हं थःगु इच्छां कथं वा छैय् जःया नापनापं थःत शान्ति जुइमा शुभ जुइमा धयागु कामना यासे मतयाः वनेगु याइ । मदुपिनि नामय् मतयाः वनीपिं व स्वःइच्छां वनीपिं भक्तजन गुगु थासं वनीगु अन मुनाः गुरुजुपिसं सुरुया बुद्धया मूर्ति वा मन्दिर वा देगल्य् पूजा यानाः प्रत्येक बुद्धया चिभाः, देगःयात पूजा यायां न्ह्याना वनी । थुपिं नाप नापं हे मतयाः वनीपिं बुद्धया देगः, चिभाःयात पूजा यायां न्ह्याना वनी । छैय्या जः मदया मतयाः वनीपिसं प्रत्येक देगः वा चिभाः वा बुद्धया मुर्तिइ देवाः इताः, धुं, कपू, धुपाँय्, नैबैद्य, चौमरि, सिन्हः, वा, जाकि, स्वाँ, हलः, अम्बः, आदि पूजाया सामग्री छायेगु याइ । स्वःइच्छां वा न्ह्याङ्गुकेया लागि वा

लसतां मतयाल्य् ब्वति काइपिसं थःपिन्त मसला, भ्वय्ब्व छाणाः वड् । पूजा सामान वा भ्वय्ज्वलं छाइपिसं थःथः मिले जुयाः म्हतिं छगू छगू छायेगु धकाः क्वछिना वड् । थथे मतयाः वड्पिं गुम्हं भक्तजनपिसं म्हतुइ लः छपुति हे मत्वसे छांलाना वड्पिं नं दु । गुम्ह गुम्ह भक्तजनपिं म्हदुछि दाना दण्डवत् याना वड्पि नं दु । मतयाल्य् वड्पिं गुम्ह गुम्ह ज्वरां लं फिनाः ल्हातय् सुकुन्दा च्याकाः वड्सा, गुम्हसियां ल्हातय् लीकलः ज्वनाः, गुम्हसिया ल्हातय् प्लास्टीकया तोकरी आदिइ थःम्हं छायेगु पूजासामान तयाहड्पिं दु । मसला छाइपिं वा भ्वय्ज्वलं छाइपिं वा लसतां छुं छाइपिं त्वाःया जःपिं वा पासापिं मुना वड्बल्य् गुम्हसिया ल ज्वरां ज्वरां फिना वयेगु नं चलन दु ।

शीप ब्वज्या

न्हापा न्हापा थथे मतयाः वड्बल्य् थःथःगु त्वाः त्वाः म्हसीकथं फयां फक्व बांलाक कापः थानाः लं सुयाः छापियाः वयेगु नं याः । थथे वड्पिं मिसापिनि दु मिजपिं नं दु । थथे ज्वरां वसः पुनाः वड्गु धयागु छगू त्वाःया थाज्याय् गुलि च्वन्त्याः धकाः थःगु शीप ब्वज्याः यायेगु नं खः । थौया ई कथं धायेगु खःसा छगू कथं फेशन ब्वज्या थं खः । थथे थःगु शीप ब्वज्याय् खालि वसः जक मखु । थःपिसं छायेत वस्तु तयाः हैगु धकि, बास्केट, कलः, दाला आदि त्वपुया हैगु रुमालनं थःथःपिसं ज्वरां थानाः त्वपुइत छ्यला वयाच्चंगु नं खनेदु । गुम्ह गुम्हसिया ज्वरां दाला, धकि थाना नं थ्व इलय् क्यनेगु जुया वयाच्चंगु दु ।

ज्वरां वसः पुनेगु खँ थौकन्ह्य् कापः थानाः ज्वरां वसः पुनेगु उलि प्रचलन मदुसां नं कमिज, इस्टकोटः तपुलि, आदि ज्वरां ज्वरां सुयाः पुना वयेगु चलन दु ।

ख्याल

मतयाः धयागु हे सिद्धार्थ गौतमं बोधिज्ञान प्राप्त यायेगुया लागि यानाच्चंगु तपस्या भंग यायेत मारगणापिं थी थी रूप कयाः वःगु खः धयागु प्रतीक कथं ख्वालय् थी थी रङ्ग पानाः थी थी ख्वाःपा पुनाः, अनर्थ कथं वसःपुनाः वड्पिं नं दु । थथे ख्यालः वड्पिं गुम्ह गुम्हस्यांछुं हे खँ मयासे खालि सुमुक जक वनीपिं जूसा गुम्हसिनं दर्शकवर्गपिन्त न्हीकेत ख्याः खँ ल्हानाः वनीपिं नं दु । जमतयाः ल्य् वड्पिं

पञ्चदान / पजरां

नेवाः जातिं हना वयाच्चंगु नखःचखःया थःगु हे विशेषता दु । दछियंकं हनीगु नखःचखः मध्यय् थःके दुगु नसात्वंसा पुसा आदियागु दान याना न्यायेकीगु नखः खः पञ्चदान । पञ्चदान खँवःया अपभ्रंस खँवः पजरां खः । नेवाःत मध्यय् न्मुख्य यानाः गुभाःजु बरे (बज्राचार्य व शाक्य) जातिं विशेष यानाः हना वयाच्चंगु नखः खः, पञ्चदान । गुभाःजु व बरे धायेबल्य् विशेष यानाः बज्राचार्य, बुद्धाचार्य, सिद्धि व शाक्य जात दुथ्याः । थ्व नखःयात तुलाधर व ज्यापु जातिं नं थःगु कथं हे हनेगु याः । बज्राचार्य, बुद्धाचार्य, सिद्धि, शाक्य व तुलाधर जाति थ्वयात नखः कथं हे हनेगु याः, नेवाः जातिया मेमेगु नेवाः जातं थ्वयात चखः कथं हनेगु याः ।

बज्राचार्य, शाक्यपिनिगु वस्ति दुगु थासय् थ्व नखः विशेष यानाः हनेगु याः । यलय् पञ्चदान नखः श्रावणशुल्क अष्टमीकुन्हु हनेगु जूसा मेमेथाय् फुक्कसियां भाद्रकृष्ण १३ (त्रयोदशी) कुन्हु माने यायेगु याः ।

पञ्चदानया उत्पत्ति

पञ्चदानया उत्पत्ति बारे भाजु पुण्यरत्न बज्राचार्य थुकथं न्ह्य
ब्वया बिज्याःगु दु । “श्रावणशुक्ल अष्टमी तच्चतं तःधंगु पर्वया दिं खः ।
परापूर्वकालस थ्व दकसिबे न्हापा श्री ब्रम्हां थःगु मुलगु छ्यं महाद्यवं ध्यंकाः श्री
दीपंकर बुद्ध भगवानयात दान यानाःबिज्याःगु जुयाच्चन । वयां लिपा थ्वकुन्हु हे
यल देशय् दीपावली नगर (गयित देशयाम्ह बुद्धिमान जुजु श्री सर्वानन्द दानशाला
दयेकाः श्री दीपंकर बुद्ध भगवान व वसपोलया संघयात वा जाकि वसः, दक्षिणा
व मेमेगु नं वस्तु, लुंयागु पिण्डपात्रय् तयाः दान यानाःबिज्याःगु जुयाच्चन । हानं
थ्वकुन्हु हे यलयाम्ह छम्ह कन्याम्ह म्हायाम्चा छम्हसिनं दीपंकर बुद्ध भगवानयात
पिण्डपात्र दान याःगु जुयाच्चन । उम्ह म्हायाम्चां छ्यला वंगु छुं छुं वस्तु व मूर्ति
थौं कन्हय् तकं गुपुन्हि ज्वःछि गुइत बहिलिइ ब्वयाः क्यनेगु यानाः वयाच्चंगु दु ।
उकिं हे यलया श्रावणशुक्ल अष्टमीकुन्हु पञ्चदान नखः हनेगु यानाःवया च्वंगु
खः ।

अथें तुं यैय् भाद्रकृष्ण त्रयोदशीकुन्हु हनेगु बारे वज्र महाकाल तन्त्रय्
वज्रसत्त्व वचन व पिण्डपात्र अवदानय वाचन धकाः थुकथं न्ह्य ब्वयातःगु दु ।
भाद्रकृष्ण त्रयोदशीकुन्हु सत्य त्रेता, व्दापर व कली प्यंगू युगया छगू हे दिं लाःगु
दिन खः । थ्वकुन्हु यानाम्गु दानया, फल असंख्य दु धयागु खँ सिइकाः मन्तयसं
चूडाकर्म याये धुंको फुक्क बज्राचार्य व शाक्य भिक्षुपितं पिण्डपात्र व अन्न आदि
वस्तु दान यात धाःसा मनं तातुनागु फल दइ । हानं गंगु कय्गु मुस्या आदि तयाः
क्वाति त्वनेगु यायेगु ज्यां यानाः अनेगु ल्वय् व व्याधि नाश जुइ ।

सिद्धार्थ गौतमं महाभिनिष्क्रमण धुंकाः थःम्हं तपस्या यानाः
बोधिज्ञान प्राप्त याये धुंकाः थःगु ज्ञान थः नापं थः भिक्षुगणपिं ब्वनाः थःगु हे
दरवारय् व दरवार नापनापंया छैय् छैय् भिक्षाटन यानाः बिज्याःगु दिं नं खः ।
थ्वकुन्हु हे भगवान बुद्ध भिक्षाटन याथें बज्राचार्य, शाक्य, बुद्धाचार्य आदि चूडाकर्म
याये धुंकीपिं नं थःगु छैया नापनापं थाय् थासय् वनाः भिक्षाटन यानाः वयाच्चंगु दिं
पञ्चदान खः ।

चूडाकर्म याये धुंकीपिं काय्मचा / मिजंतय्त थी थी वस्तु नसा
दान बीगु पञ्चदान, नरां व सम्यक दान खः । यैय् १२ दैय् छक्कः यल, ख्वप यें

बनेपा आदि स्वनिगःया द्यःद्यःपिं नापनापं बहीद्यः पञ्चदानद्यः स्वयम्भूया भुइख्यलय्
तयाः बीगु सम्यक दान खः । स्वयम्भूया भुइख्यलय् यंके न्ह्यः यैया लाय्क्
दरवारय् दर्ता याये माःगु जूगलिं सम्यक छन्हु न्ह्यः हनुमानध्वाखाय् तयेगु चलन
दु । अनं लिपा द्यःद्यःपिं जुजु व बरे छुइधुंकीपिं बज्राचार्य, शाक्यपिं इवःहे छुना,
सम्यक याइगु दिं माघ १ गते खः । यलय् सम्यक ५दैय् छक्क न्याइगु जूसा माघ १
गते हे ध्यःचाकु सल्हकुन्हु ख्वपया भुइख्यलय् दैय्दसं पञ्चदान जुइगु खः । यलय्
श्रावण शुक्ल अष्टमीकुन्हु नागबहालय् जुइगु खः ।

दैय् दैसं हनिगु पञ्चदान

पंजरां भाद्रकृष्ण त्रयोदशी यल बाहेक मेमेगु थासय् जुइ । पञ्चदान
नखः हनिगु छैय् विशेष यानाः पञ्चदान दिंया छन्हुन्ह्यः छँ छखां सुचुपिचुया नापं
नीसी यानाः सम्यकबलय् ब्वयेत यंकीपिं द्यःपिं, भगवान बुद्ध, करुणामय,
बसुन्धरा आदि द्यःद्यःपिं ब्वयेगु याइ । बज्राचार्य, शाक्यपिसं थःथःपिसं छैया
थकालिं द्यःयात पूजा याकाः द्यः ब्वयेगु याइ । गुम्ह गुम्हसियां थःगु छैय् द्यः ब्वयेगु
मया से मेपिनि द्यः ब्वयातःगु थासय् पञ्चदान बीगु वस्तु नं ब्वयेगु याइ ।

अथे तुं कन्हय् कुन्हु दकले न्हापां थःम्ह मुख्यम्ह गुरुपाखें पूजा
याकाः थःगुरुज्यात पञ्चदान बीगु याइ । गुरुजुं द्यः ब्वयातःम्ह द्यःयात पूजा याःसा
पञ्चदान बीपिसं पञ्चदान काःवःपिं फुकसित द्यः ब्वयातःगु थासय् द्यः नापं तयाः
द्यः पूजा यानाः द्यः नापनापं पञ्चदान काःवःपिन्त नं सकसितं नीलः बियाः जाकिं
पूजा याना, सिन्हः तिकाः जजंका ल्हातय् न्ह्याकाः, स्वां छानाः पञ्चदान बीत
तयातःगु पञ्चदान ज्वलं बीगु याइ । पञ्चदान बी धुंकाः शाहाकारी कथं भोजन
याकाः बिदा बियाळयेगु याइ । पञ्चदान धकाः न्यागु थरीया दान बीगु खः । अन्न
ज्वलं, ज्ञानया ज्वलं, फल ज्वलं, त्वनेगु ज्वलं व सम्पति ज्वलं खः । विशेष यानाः
पञ्चदान बीगु ज्वलं थथे खः जाकि, वा ठू बूबः (कय्गु, भुति चना, सिम्पु
आदि) । सलां सिलोट थौकन्हय्, कापि कलम खिपः तुफि हलःग्वलः साखःति चिकं
कापः, चि, मुलु सुकां व नसां ज्वलय् मरिचरि बजि पालु फलफूल तयाः निसलाः
दक्षिणा आदि बीगु नं याइ । दान बीगु ज्वलंयात दुवाला स्वयेगु खःसा जीवन
निवांहलागि माःगु सकतां सरसामान दुगु खनेदु । पञ्चदान धकाः बीगु सरसामान
फुकं गृहस्थी जीवनय् माःगु सकतां सामग्री खः । दैय्दैसं न्यायेकीगु पञ्चदानय् भाव
हे जक केन्द्रित जुया वंगु खने दु । तर पञ्चदान न्यायेकेगु धकाः न्यायेकीपिसं
पञ्चदान काःवःपिं फुकसितं बी मफुसा नं दकले न्हापां लाःम्ह छम्ह गुरुज्यात बीगु
सरसामान फुकं गृहस्थी जीवन न्ह्याकेत माःगु सामान खः । थ्व खँयात क्वय्

प्रस्तुत यायेगु जुड । दैयदसं नखःचखःकथं हनीपिसं धायेंगु पञ्चदान यांनाः साध्य मज्जु अथे जूगुलिं भावनात्मक कथं पञ्चदान बीगु यांनाः वयाच्चंगु दु । फुपिसं चव्य न्ह्यब्वयागु सामानत पञ्चदानबल्य दान यायेगु जुड । मफुपिसं वा समाजया परम्परा अनुसार बीगु जुड । गुम्ह गुम्हसिनं पञ्चदान ज्वलं मूलम्ह गुरुजु खलः छखलःयात जक बीपिं नं दु । साधारणतया वा जाकि थः थाय् छैय् दुगु वस्तु जक पञ्चदान बीगु धकाः बीगु जुया वनाच्चंगु दु । थौकन्ह्य् अन्न नं वा, जाकि छगू हे जक अन्नया रुपय् दान यायेगु जुयाच्चंगु खनेदु ।

पञ्चदान काःवःपिं गुरुजुपिं वा शाक्यपिन्त छःयाथाय् ब्वयातःगु जाकि वा गुलुपातय् तयाः स्वक्वः स्वक्वः बीगु याइ । छक्वःगु बुद्धया नामय् निक्वःगु धर्मया नामय् व स्वक्वःगु संघया नामय् धकाः बीगु दान खः । कापः दानया सट्टा गुरुपिं वा शाक्यपिन्त छःपूजा यांनाः जजंकां न्हातय् न्ह्याकाः कापः दानया प्रतीक यांनाः वयाच्चंगु खः । छः पूजा यांनाः जजंकां क्वखायेकीगु धयागु नं न्हगु कापः छायेगु सरह हे खः । सम्पतिया नामं दां दक्षिणा बीगु खः । पञ्चदान धकाः न्यागू कथंया दान जूसां थौकन्ह्य् स्वंगू जक दान बीगु जुयाच्चंगु दु । न्हापां अन्न, निगूगु जजंकां वा कापः स्वंगूगु दां दक्षिणा बिया वयाच्चंगु दु ।

शाक्य बज्जाचार्यपिनि चूडाकर्म यांनाः गृहस्थी, प्रवेश जुइन्ह्यः थः थिति त्वाःत्वाः यांनाः म्हो निं न्ह्यखा छैय् भिक्षा पव्वनेमाः व धुंकाः जक गृहस्थी प्रवेश जुइगु प्रचलन दु । निसें अज्याःम्ह वज्जाचार्य वा शाक्यतय् अबलय् पञ्चदान, नरां सम्यक न्ह्यागु थासय् नं पञ्चदान कायेज्यगु अधिकार प्राप्त खः । खयेत ला अथे जूसां नं पञ्चदानकुन्हु पञ्चदान काःवःपिं गुरुजुपिंनाप चूडाकर्म मयाःपिं मचात व इहि मयाःनिपिं मिसा मचातय् नं पञ्चदान काये ज्यगु सामाजिक मान्यता दु । छगू ला इहि मयाःनीपिं मिसामचातय् पञ्चदान बीगु धयागु संस्कारतगत रुपं तःधिकः मज्जुतलय् मिसामचा व मिजंमचा समान धकाः भूगु नेवाः समाजं क्यंगु खः मेकथं धायेगु खःसा कुमारी खः ।

थये पञ्चदानकुन्हु सुथनिसें बहनीतक गुलिसिनं काःवल अपिं फुक्कसितं न्ह्यागु इलय् काःवःसां उकथं हे पूजा यांनाः गुलुपातय् अन्न तयाः दान बियाः भोजन वा चिपं थीका व्छयेमाः । पञ्चदानया कन्ह्यकुन्हु अर्थात भाद्रकृष्ण चःहे अर्थात जुगःचःहे कुन्हु ब्वया तयातम्ह छःयात छैया थाकुलि वा थः थः गुरुजुपिसं पूजा यांनाः छः क्वकायेगु धकाः छः स्थापना यांनातःगु थासं लिकाइ । छः ब्वइबलय् हे छःयात छु तक्क दान बीगु खः गुलुपातय् गुलुपातय् तयाः छायेगु याइ । हानं छम्ह छम्ह तक्क पञ्चदान काःवःपिं गुरुजु वा शाक्यपिं फुक्कसित नं छःयातनिसं छसीकथं पूजा याकाः पञ्चदान बीगु जूगुलिं छः ब्वयातःगु थासय् पञ्चदान बीगु ज्वलं छानातःगु आपाः दइ । व फुकं छः क्वकाइबलय् क्वकायेगु याइ । बज्जाचार्य वा शाक्यपिनि छःयात छःगु ज्वलं दक्को कन्ह्यकुन्हु स्वयम्भूया मूलम्ह भगवानयात छाये यंकेंगु चलन दु । छायाःसा पञ्चदानया लागि छैय् छैय्

न्ह्याम्ह छः ब्वःसां मुख्यम्ह छः स्वयम्भू भगवान खः । सम्यक याःसां नरां याःसां वा पञ्चदान याःसां स्वयम्भू भगवान छः हयाःतिनि पञ्चदानया ज्या न्ह्याकीगु खः । अथे तुं सम्यक, नरां, पञ्चदान याये सिधयेकाः स्वयम्भू हःम्ह छः हानं स्वयम्भू हे लित तये यंकेंमाः अथे तुं पञ्चदान याइबलय् नं छः ब्वइबलय् स्वयम्भू भगवानयात आराधना यांनाः छः ब्वयेगु याइ । स्वयम्भू भगवानया नामय् वा जाकि बाताय् तयाः स्वनी । पञ्चदान सिधयेकाः छः सयेके थें छैय् छैय् च्वंगु गुलुपा स्वयम्भू मुख्यम्ह छःयाथाय् छाये यंकेंगु याइ ।

थुकथं स्वयेबलय् सम्यक नरां पञ्चदान थें श्व दैयदसं हनीगु पञ्चदाननं थुकथं हे महत्व दुगु पुण्यगु ज्या खः । चिकिचाधंगु अथवा चिसकं सिधयेकेगु पञ्चदान खः ।

पञ्चदान गुथि

बज्जाचार्य शाक्यपिनि पञ्चदान नखः कथं हनेगु जूसा ज्यापु तुलाधरपिनि आदि पञ्चदान गुथि धकाः थाय् थासय् पञ्चदान बीगु गुथि न्ह्याका वयाच्चंगु नं दु । थज्याःगु गुथि बाहाः, बही, स्वयम्भू मरुइ आदि थाय् थासय् खनेदु । थज्याःथाय् पञ्चदान बीगुया लागि दानशाला दयेकाः दान बीगु यांनाच्चंगु खनेदु । दानशालाय् पञ्चदान बीगुया लागि बाहाः, बही त्वाःत्वालय् थी थी बुद्धमार्गीपिं जानाः गुथि हे स्वना तयातःगु खः । थज्याःगु दानशाला मध्यय् मरुया सिंहसतः न्ह्यःने सिंयागु दानशालाय् पञ्चदान बीगु खः । न्हापायागु थासय् हे सिंयागु दबू दुगुलिं सिं लंका दानशाला दयेकाः दान बीगु यांनाच्चंगु खः । थौकन्ह्य् सिंयागु दानशाला धकाः प्यंगः सिंया च्वः प्वः त्वाकाः दथुइ खालि यांनाः अन हे वा व पञ्चदान जा तयाः पञ्चदान काःवःपिं सकसितं बीगु यांना वयाच्चंगु खः । छुं दै न्ह्यः तक्क पञ्चदानया लागि वा व जा बीगु यांनाच्चंगु थौकन्ह्य् पञ्चदानया जा धाःसा बीगु यांनाच्चंगु खनेमदये धुंकल । मरु सिंहसतः न्ह्यःने दानशाला ग्वयाः पञ्चदान बीगु विषयया वंशावली थुकथं न्ह्यःथनातःगु दु ।

जुजु श्रीविक्रमसेनं दक्षिण देय्याम्ह षटशास्त्री महेश्वर ठाकुर धयाम्ह छम्ह तच्चतं विद्वानम्ह (सःस्यम्ह) मनूयात नेपाः देशय् सःता वयागु हे साहित्य कथं कलिगत संवत् २९७३ स बौद्ध मार्गीतय्सं श्रावण शुदि प्रतिपदानिसं भाद्र वढी ३० तक बौद्धयात्रा व भाद्र वढी १३ कुन्हु अन्नदान यायेत मरुत्वालय् सिंयागु धलिं लायाः दबू दयेकाः उकिया छःने च्वनाः अन्न दान यायेगु थिति दयेका ब्यगु खः । उबलेंनिसं हे यँया मरुत्वालय् सिंहसतः न्ह्यःने सिंयागु धलिं लायाः दबू दयेकाः

उकिया दान बिड़पिं व दानकाइपिं बज्जाचार्य व शाक्य भिक्षुपिं च्वना भाद्र वढी १३ कुन्हु दान कायेगु व दान बिड़गु थिति दुगु खः । (बज्जाचार्य, भीगु नखः चखः १३-१४०)

थथे गुथि पाखें दानशाला दयेकाः पञ्चदान बीथाय् न्हिछितक गुलिसिं पञ्चदान काःवल अपिं फुकसित बीगु याइगु खः । दकले लिपा फूबरे धकाः पञ्चदान काःवइ अले दानशालाय् पञ्चदान बीत गुलित बाकि दनिगु अन्न खः, व फुकं पञ्चदान क्वचाल धकाः पूजा याकाः कयायंकी । फूबरेयात पञ्चदान बी धुंकाः उगु थासय् मेपिसं पञ्चदान काइ नं मखुत बी नं मखुत । थथे फूबरे धकाः मरुनिसें क्वःने तक लगबाहाःया बज्जाचार्यपिं छलसिं कायेगु जूसा थने पाखे थथे दानशाला फूबरे जुड़पिं प्यंगःथामय् नारांछःयाथाय् बरे चूडाकर्म याना फू बरे जूपिं ज्यापु जाति कायेगु याना तःगु खः ।

स्वयम्भू पञ्चदान

भाद्रशुक्ल त्रयोदशीकुन्हु सत्य, त्रेता, द्वापर व कलियुग प्यंगू युग छन्हु हे जूगु दिं खः । उकिं थव दिनकुन्हु दान धर्मयात धाःसा तःधगु पुण्य लाइगु जूगुलिं थवकुन्हु दान धर्म यायेत थाय्थासं मनूत यैया स्वयम्भू भगवान् दर्शन यानाः पुण्य लाकेत वनीगु खः । भदालु भक्तजनपिसं स्वयम्भू भगवानयात गुलुपाः छायेगु व पञ्चदानया ज्वलं छायेगु याइ । स्वयम्भू भगवान् जक मखु स्वयम्भू दक्क दःदःपिन्त पञ्चदान बीगु जूगुलिं सुथय् स्वयम्भू दर्शनया लागि वन धाःसा प्रत्येक दःदःपिन्त पञ्चदान छायेत अःपुक इवःछुका तइ । पञ्चदान ब्यूगु ज्वलं तयेत गनं कलः गनं धकि गनं दाला स्वयम्भूयां प्रत्येक दःदःया न्ह्यःने तयातःगु दै । थव दःदःपिं नापनापं बज्जाचार्य शाक्य, स्वयम्भूया बुद्धाचार्यपिं नं पञ्चदान कायेगुया लागि इवःछुना च्वनी ।

स्वयम्भू पञ्चदान गुथि दुपिनि छन्हु न्ह्यः बहनी पञ्चदान जा (पजरां जा) थुइगु जुइ । कन्हय्कुन्हु पञ्चदान दःदःपिं फुकसित पूजा यानाः पञ्चदान बीगु व पञ्चदानं जा छायेगु छाइ । नापं पञ्चदान काःवःपिन्त न बी । छुं दै न्ह्यःनिसें पञ्चदानं जा थुइगु स्वयेगु धकाः शहरपाखें स्वयम्भू भगवानयाथाय् वनाः गुम्ह चा च्वनेगु याइ । गुम्हसिं स्वयम्भू भगवानया रश्मी स्वये धकाः पियाच्वनेगु नं जुयाच्वंगु दु । खयत ला न्हापांसिं स्वच्छ मनं धर्मय् चित्त दुपिं गुंला ज्वःछि यंक स्वयम्भू भगवानया दर्शन याःवनीपिं भक्तजन वा स्वयम्भू दर्शन याःवनीपिं भक्तजनपिसं स्वयम्भू भगवानया रश्मी खन धकाः धाःगु न्यने दु । तर अथे खंगु खें सुयातं मधासे च्वनाच्वनी । थःथम्हं संयम जुयाः आनन्द कयाच्वनी ।

थौकन्हय् विशेष यानाः पञ्चदानयाकुन्हु वा पञ्चदानया जा थुइ कुन्हु बहनी स्वयम्भू वनी । अन वा वःसां पिया रश्मी स्वयेत च्वनी । थव रश्मी गन वइ धकाः धाये मफु । गन छम्हसिं खनी अले दक्कसिं अन हे स्वइ ।

थव छगू काल्पनिक खें थें च्वसां वास्तवय् थव खने धुंक्पिसं खःहे खः धाइ । गुंलां वा वइच्वनीबलय् आकाशय् सुपांय वयाच्वनीगु स्वाभाविक खः । स्वयम्भू गुंला धर्म हनेत वइपिं मनूतय् धकाः मत नं च्याका तइ । वा वइगुलिं थन वइपिं मनूतय् अःपुकेत धकाः मत नं च्याकातइ । सुपांचय् वा वःगु लखय् व मतया जलं छु किरा लुइगु खः, सर्गतय् स्वयम्भूया किचः खनेदैगु खः । थव हे किचलय् थी थी रङ्ग नं खने दयाच्वनीगु खः । विशेष यानाः पञ्चदानकुन्हु यक्व भक्तजन अन च्वनाः देवा च्याकेगु पूजा यायेगु मि च्याकाः पञ्चदान जा थुइगु जूगुलिं थवकुन्हु बहनीनिसें सुथसिया पहरा दुने स्वयम्भूया किचः आकाशय् सुपांचय् गनं खनेदया च्वनीगु स्वभाविक खः । थवयात हे स्वयम्भूया रश्मी धकाः धायेगु याः । थज्याःगु रश्मी स्वयेत मनूत म्वः म्वः स्वयम्भू वनेगु नं जुयाच्वं ।

बज्जाचार्य व शाक्य जातिया छँय् दः ब्वयाः पञ्चदान यायेगु जूसा मेमेगु जातिया दः ब्वयाः पञ्चदान बीम्वाः । थथे दः ब्वये म्वाःपिं जातिया नेवाःतय्सं दःब्वयातःपिं बज्जाचार्य व शाक्यपिनिगु छँ किपु तःवनेगु धकाः वा जाकि वळ कय्गु (चाना भुति आदि) चि व दक्षिणा तयाः तयेयंकेगु चलन दु । तुलाधर ज्यापु मानन्धर आदि जातिं थः छँय् हे दः ब्वया पञ्चदान बीगु जूसां थः गुरुजु (पुरोहित) पिनिगु छँय् छँय् किपु तःवनेगु चलन दु ।

नेवाः जाति दुने तुलाधर जातिया नं थःपिसं करपिनिगु छँ पञ्चदान काःवनेगु चलन मदु । अथे जूसां पञ्चदानया छन्हु न्ह्यः दः ब्वयाः पञ्चदान कुन्हु पञ्चदान बीगु चलन दु । थथे पञ्चदान बीगु थासय् बज्जाचार्य व शाक्यपिं वना पञ्चदान काः वनेगु चलन दु । पञ्चदान याये धुंक्पिं न्ह्यागु नं जाति पञ्चदान दः दयेकाः दैय्दसं पञ्चदानबलय् दः ब्वया पञ्चदान बीमाः ।

पञ्चदानया नसा

नेवाःतय् छगू छगू नखःया छगू छगू नसा नयाः नखः हनेगु चलन दु । ईकथं कृषि उत्पादनया आधारय् नसा नयेगु याइगु खः । पञ्चदानकुन्हु बज्जाचार्य शाक्यपिनिगु परिवारया विशेष यानाः, खीर पाउँगु अचार विशेष यानाः फकं सनाः, स्वारी, मापां विशेष नसा खः । विशेष यानाः शाहाकारी नसा नयेगु जूसां पञ्चदान काःवःपिन्त स्वारी मापां खीर अचारया नापनापं अय्लाः त्वकाः वछयेगु नं चलन दु ।

खिर नयेगु मयाइपिनि गंक्वाति धकाः गुता बूबःया क्वाति दायेकाः त्वनेगु याइगु
खः । गुंपुन्हिबल्य गुता बूबःयात पवयाः चुलि वयेकाः क्वाति दायेकाः त्वनेगु चलन
दु । गुंपुन्हिबल्य क्वाति त्वनाः म्हायात शक्ति व बल बीगु जूसा प्वाः सफा यायेगुया
लागि थें खः । ला मदयेक नखः महनीगु नेवाः जाति थ्व नखः हनेत ला माः धयागु
मदु । भगवान बुद्धयात पूजा यायेबल्य ला तयाः पूजा याइमखु । अथें तुं भगवान
बुद्धयात विशेष रुपं पूजा यानाः याइगु थ्व नखः ला मछ्यसे हे नखः हनेगु खः । थ्व
नखःया सिकाब्व तयेमाःपिसं मदुपिनिगु नामय् तैगु सिकाब्व नं ला हे मतसे तै ।

पञ्चदान न्यायेकेगु

वज्राचार्य व शाक्य तुलाधरपिनि जक मखु न्ह्यागु जातया नं पञ्चदान न्यायेकाः
पञ्चदानपति छः ब्वयाः पञ्चदान बी ज्यू । थथे पञ्चदान याइपिनि दकले न्हापां
पञ्चदानकुन्हु हे पञ्चदान न्यायेके माः, दकले न्हापां पञ्चदान न्यायेकीपिनि स्वयम्भू
पञ्चदान यायेत ग्वय्दां तइ, ग्वय्दां तयेधुकाः पञ्चदान छुन्हु न्ह्यः स्वयम्भूइ वनाः
पञ्चदान छः ज्वना पञ्चदान न्यायीगु छँ हयाः छः ब्वइ । कन्ह्यकुन्हु छःपूजा
यानाः दकले न्हापा पञ्चदान काइम्ह व्यक्तियात छँ बूँ छँ दुने माःगु दक्व ज्वलं लुँ
वहःया नापनापं जाकि वा तुफि चि चिकं हलः ग्वलः, वसः साखःति चप्पा
अँय्थ्यामरि कलम कापी (ग्वरः सलां) खिपः मुलु सुका आदि सामान दान बी ।
पञ्चदान बीबल्य थथे दक्को बीगु खः । उकिं दक्वसितं उलि हे बी मफैगु जूगुलिं
लिपायापिन्त थःगु यथा श्रद्धाकथं वा जाकि दक्षिणा थम्हं फुथें जक बी । थथे
पञ्चदान बीबल्य न्हिच्छया दुने गुलिसिनं काःवइ अपिं फुक्कसित बीमाः । अबलय्
पञ्चदानया अन्तय् फुबरे वयाः काःवइ धायेवं तयातःगु जाकि वा फुकं बियाळइ ।
थथे पञ्चदान न्यायेकीबलय् पञ्चदानया कन्ह्यकुन्हु छः ब्वयेत हःम्ह भगवान बुद्धया
मूर्तियात हानं स्वयम्भूइ लित तये यंकेमाः । थथे पञ्चदान याइबलय् थःथाय् छँ नं
पञ्चदान छः नं दयेकेमाः अले लिपायागु दैनिसें पञ्चदानकुन्हु छः ब्वयाः पञ्चदान
बीगु यायेमाः ।

थथे पञ्चदान यानाः दछि लिपा पञ्चदानया दरु धकाः न्हूम्ह
पञ्चदान छः ब्वयाः दकले न्हापां पञ्चदान विशेष यानाः दरु याःगु छँय् दानशाला
ग्वया तःथाय् पञ्चदान काः वनेमाः धयागु चलन दु । थथे दरु याइबलय् दानशाला
ग्वयाः पञ्चदान याःथें भव्यकथं याये म्वाः अथेसां साधारण पञ्चदान स्वयां

तःजिकथं हनेमाः । थ्वया लिपाया दैनिसें दरुबलय् मूलम्ह भगवान छःथें यानाः
ब्वःम्ह छः ब्वयाः पञ्चदानकुन्हु पञ्चदान याये धुकाःनिसें दैय्दसं छः ब्वयाः
पञ्चदान बीगु याइ । थथे पञ्चदान छः दयेके धुकल धायेवं यँया १२ दैय् छक्वः
भुइछ्यलय् जुइगु सम्यकय् ब्वति कायेगुया लागि अन यंकेमाः । थथे पञ्चदान
न्यायेकाः छँ, बूँ, वसः थी थी सामानत म्हो यानाः जक दान यायेगु चलन जुइ
धुकल ।

अबुया ख्वाः स्वयेगु

गुलागाः औंसी अर्थात् भाद्रकृष्ण औंसीकुन्हु नेवाः जातिया नापनापं मेमेगु जातिं नं थःत जन्म ब्यूम्ह अबुया दीर्घायु कामना यासे, अबुपाखे भिं जीवनया लागि सुवाः फयेगु दिं खः । बैशाखकृष्ण औंसीकुन्हु थःत जन्मयाःम्ह मांया ख्वाः स्वये थें भाद्रकृष्ण औंसीकुन्हु अबुया ख्वाः स्वयेगु दिं खः ।

अबुया ख्वाः स्वयेगु औंसीयात कुशेऔंसी धकाः नं धाः । छायाधाःसा थवकुन्हु सराद यायेत माःगु पवित्रगु कुश गुरु पुरोहितपाखें पवित्रगु मन्त्रं साधना यानाः कुश लयाः दँछि यंक पूजा यायेत माःगु उगु कुश छँय् छँय् दुत हयेगु दिं जूगुलिं कुशेऔंसी धकाः नं धाःगु खः । थुबल्य् कुश छँय् दुतहल धायेवं भिं जुइ धकाः नं धायेगु याः । अबुया ख्वाः स्वयेगु औंसीया दिंयात गोकर्णऔंसी नं धाः । खुसि बागमति खुसिया संगम जूगु तीर्थयात गोकर्ण दोभान्य् अबु स्वर्गे जुइधुंकूपिं काय् म्हायापिसं म्वःल्ह्याः अबुया नाम्य् सिधा निसलाः व सराद याइगु जूगुलिं थव दिंयात गोकर्णऔंसी धकाः धाःगु खः । विशेष यानाः गोकर्णऔंसीकुन्हु थव गोकर्णया दोभान्य् मेला जुइ । थव मेलाय् विशेष यानाः अबु मदुपिं जक वनी ।

बौद्धमार्गीपिनि स्वर्गे जुइ धुंकाः लय् लय्पतिं सराद याइगु तीर्थ मध्यय् दकले न्हापां थव तीर्थय् वनाः सराद यायेगु चलन दु । उकिं मृत्यु जूम्ह तरे यायेगुया लागि भिंनिगु तीर्थय् सराद याइगुलिइ थव गोकर्णया तीर्थय् नं सराद यायेमाः । बौद्धतय् भिंनिगु तीर्थ मध्यय् छगू तीर्थ कथं कयातःगु तीर्थ खः । अबुया ख्वाः स्वयेकुन्हु अबु मदुपिसं थव तीर्थय् स्वत धाःसा थः अबुया ख्वाः हे खनी धयागु धापू दु । अबु मदये धुंकाः अबुया नाम्य् दँय्दसं सराद यायेगुया लागि दकले न्हापां गोकर्णय् थव हे थासय् वनाः सराद यायेमाः । अले जक दँय्दसं सराद याइबलय् मदुम्ह अबुयात वनी धकाः धायेगु चलन दु ।

गोकर्णया तीर्थय् अबुया ख्वाः खनीगु छपु बाखं हिमवत खण्डय् उल्लेख यानातःगु दु । छगू इलय् म्ह व्यापार यानाः जीविका यानाःच्वम्ह छम्ह मिसाया गर्भधारण जुल । गर्भधारण याःम्ह मिसा स्वयम् गुम्ह मिज्या संसर्ग गर्भधारण जुल धयागु मस्य् । यक्व मिजंत नाप संसर्गय् वइम्ह मिसा जूसां मातृत्वया भावना दयावयाः थःगु गर्भय् दुम्ह मचायात नं जन्म हे यात । वयागु नां दन्तुर धकाः नामाकरण यात । मचा तःधिकः जुसँलि थः मांयात थः अबु सु धकाः न्यन । स्वयम् मिसां मस्य् उकिं लिसः बी मफुत । अबु थाःगाः मदुम्ह दन्तुर तःधिकः जुसँलि थःमांयात नं त्वःताः थः अबु सु धकाः मामां वन । थः अबु माले मफुगुलिं पुलह धयाम्ह ऋषियाथाय् वनाः थःगु वेदना प्वंकल । पुलह ऋषिं गोकर्णेश्वर महाद्यःयात पूजा यानाः भक्ति भाव यात धायेवं छिमि अबु सु धयागु म्हसी धकाः धाःगुलि दन्तुरं नं गोकर्णेश्वर महाद्यःयात पूजा यानाः भक्तिभाव यात । नापनापं थः अबुया नाम्य् गोकर्णया तीर्थय् नसा तयेगु नं याना वयाच्वन । छन्हु थये थः अबुया नाम्य् नयेगु नसा गोकर्णया तीर्थय् तये त्यंबलय् तीर्थय् आपालं मनूया ख्वाःपाः खन । ख्वाःपाः फुकं मृत्यु जुइ धुंकूपिं जूगुलिं दन्तुरं अबुया नाम्य् ब्यूगु नसा मृत्यु जूपिं ख्वाःपाः फुकसिनं जि हे छिमि अबु खः धकाः धयाच्वन । धाथेंयाम्ह थः अबु सु खः धकाः दन्तुर अलमल जुयाच्वंगु ध्यान्य् च्वनाः च्वम्ह विश्रवा ऋषिं खन । व हे ऋषिं थःगु साधनां सृष्टिकर्ता ब्रम्हायात दन्तुरया अबु म्हसिके ब्यू धकाः धासेलि ब्रम्हा वयाः धाथेंम्ह अबु थव धकाः म्हसीका बिल । ब्रम्हा क्यम्हसित हे थः अबु धकाः म्हसिकाः कुश, हाम्बः लः तयाः पिण्ड तयाबिल । थः अबु म्हसीकाः पिण्ड तःगु दिं धयागु भाद्रकृष्ण औंसीकुन्हु खः । थव खनिसं यानाः भाद्रकृष्ण औंसीकुन्हु अबु मदुपिसं गोकर्णेश्वर महादेवयात पूजा यानाः अबुया नाम्य् गोकर्णय् पिण्ड तयेगु, श्राद्ध यायेगु, निसलाः तयेगु, सिधा तयेगु जूगु खः । अबुया नाम्य् सराद याइपिसं थव हे गोकर्णेश्वर महादेवयात पूजा यानाः पिण्ड तयाः गोकर्ण तीर्थया दोभान्य् चुइका व्छइगु खः ।

अबु मदुपिसं गोकर्णेश्वर महादेवयात पूजा यानाः मदुम्ह अबुया नाम्य् गोकर्णय् तीर्थय् थःगु इच्छा अनुसार भक्तिभावं नसा वा पिण्ड तःगु जूगुलिं गोकर्णेश्वर महादेवया प्रादुर्भाव गथे जुयाः जुल धयागु नं खँ न्ह्यःथने माःथें च्वं । उकिं गोकर्णेश्वर महादेवया प्रादुर्भाव गथे जुयाः जुल धयागु खँ थथें खः ।

किरातकालय् मनुतय्गु जीवनचर्या गथेच्वं धकाः स्वयेत स्वर्ग महाद्यः मनूया रुप कयाः पशुपतिया श्लेषमान्तक जःखः छम्ह द्यःपालाःया भेषय् जुइगु जुयाच्वन । लिपा अर्जुन महाद्यःयात मामां वःबलय् श्लेषमान्तक वन्य् मनूया रुपय् नाप लात । तर मनु रुपी महादेवं थःहे महाद्यः धकाः मधाः । अर्जुन किराती जुजुयात ब्वःब्यूगुलिं महाद्यः व अर्जुनया दथुइ ल्वापु जुल । ल्वापु जुजुं लिपा द्यः बी थें च्वंबलय् अर्जुन थः महाद्यःया उपासनाय् च्वनाः ल्वापु दिका च्वंगुलिं महाद्यःनिं पूजा याये धकाः पूजा याःबलय् पूजा याक्व महाद्यः रुपी मनूयात वन । थव खनाः

अर्जुन यःनाप त्वानावम्ह मनु हे महाद्यः धकाः सीकल । लिपा वहे महाद्यः किरातेश्वर महाद्यः धकाः जुयावन ।

अथे तुं स्वर्ग्य च्वनाच्चम्ह महाद्यः सुयातं मधाःसे पृथ्वीलोक्य वयाः गोकर्ण जंगलय छपु जक न्यक् दुम्ह लैया चल्ताया रुप कया जंगलया जनावरत नापनाप जुयाच्चन । स्वर्ग्य महाद्यः मद्गुलिं पार्वती महाद्यः गन जुइ धकाः पृथ्वीइ वयाः हिमवत् खण्डया बागमति सिथय महाद्यः गन जुइ धकाः तपस्या च्वन । स्वर्ग्य महाद्यः पार्वती निम्हं मद्गुलिं देवगण फुकसिनं ब्रम्हा विष्णु व इन्द्रयात महाद्यः पावती मालाहयेगु जिम्मा बिल । ब्रम्हा, विष्णु व इन्द्र स्वम्हं हिमवतखण्डय वयाः महाद्यः पावतीयात माःवल । गोकर्णया वनय चल्तातयगु पुचलय छपु जक न्यक् दुम्ह लैयाम्ह चल्ता खँसेलि थव हे महाद्यःया रूप खः धकाः स्वम्हं जानाः लैया चल्ता रुपी महाद्यःयात ज्वनेत स्वत । अमिगु ल्हातिइ न्यक् जक लात । न्यक् नं स्वक् टुक्रा जुयाः ब्रम्हायाके छक्, विष्णुयाके छक् व इन्द्रयाके छक् । चल्तारुपी महाद्यः अन्तरध्यान जुयाः आकाशवाणिं महादेवं स्वक् टुक्रा जूगु न्यक् छिपिं स्वम्हसिनं स्वर्गलोक पाताललोक व पृथ्वीलोक्य छथाय छथाय स्थापना यानाबिल धाःसा थव स्वंगू लोकयूरक्षा जुइ धकाः धाल । अनलि तपस्या च्वनाच्चम्ह पार्वतीयात थःगु दर्शन बियाः निम्हं स्वर्ग्य वन ।

महादेवं अथे धाःगुलिं विष्णुं थःगु ल्हातिइ लाःगु न्यकूया छक् कुचा पातलय तयाबिल । इन्द्रया ल्हातय लाःगु न्यक् स्वर्ग्य तयाबिल । ब्रम्हाया ल्हातय लाःगु न्यक् चन्द्रभागा खुसि व वागमती खुसिया दोभान दुगु थाय्या सिथय तया पृथ्वीइ च्वपिन्त उदारया यायेत तयाबिल । व हे थासं शिवलिङ्गया उत्पति जुल । व हे शिवलिङ्गयात गोकर्णेश्वर महादेव धकाः नामाकरण यात ।

लंकाया भिग्वः छ्यं दुम्ह रावण जुजु हे नं गोकर्णय वयाः स्वंगू लोकय दकले शक्तिशाली व बलाःम्ह जुइमा धकाः महाद्यःया आराधना यानाः तच्चतं थाक्क तपस्या याःगु खः । रावणं तच्चतं थाक्क तपस्या च्वंगु खनाः महादेव प्रसन्न जुयाः रावणयात शिवया ल्वाभः व दकले बलाःम्ह धकाः बरदान ब्यूगु खः । (Anderson The Festival of Nepal 1988 P 141) । व हे शक्तिं यानाः रावणया १० ग्वः छ्यं छक्वलं मपायेकं सी मखुगु खः ।

गोकर्णऔसीया बारे छपु बाखं धकाः भाजु पुण्यरत्न बज्राचार्य थःगु सफू हाम्रो चाड पर्वय थुकथं न्ह्यथनातःगु दु । प्राचीन इलय पांचाल नांया छगू देशय वृषकर्ण नांया छम्ह जुजु दु । वया गोकर्ण नांया छम्ह काय दु । थुपिं अबुकाय निम्हं छम्ह मेम्हनाप मिलय मज् न्ह्यावलें ल्वापु । निम्हसिनं निम्हेसित सीमा यमलोकय लायेमा धकाः सराः बीगु जुयावन । धाथें छन्हु कायम्ह गोकर्ण अबु स्वयां न्हापा सित । लिपा अबुम्ह नं सित । अबु स्वयां काय न्हापा सीगु जूगुलिं सीम्ह अबुयात जलदान पिण्डदान यानाः काजक्रिया याइपिं सुं मद्गु । अबुया सरालं यानाः कायम्ह न्हापा सीसा नं यमपुरी हे लानाच्चन । अबुम्ह सिनाः नं काजक्रिया

याइपिं मद्गु जूगुलिं यमपुरीइ हे लात । छन्हु गोकर्ण यमपुरी चाःहिला च्वबलय अन छम्हसिया छ्यनय चक्र चाःहिलाच्चम्ह पापी खनाः ग्यानाः बिस्मं वन । लिपा गोकर्ण गगनगञ्ज वोधिसत्वया आज्ञा कथं गोकर्णय वनाः थः अबु वृषकर्णया नामं जलदान पिण्डदान आदि यानाःवल । गोकर्ण थथे याःगुलिं अगति जुयाच्चम्ह वृषकर्ण मुक्त जुयाः काय्या जय जुइमा धकाः आशिर्वाद बिल । अबुयागु थज्याःगु आशिर्वाद गोकर्ण नं नरकं मुक्त जुल । गोकर्ण गन अबुया नामं जलदान पिण्डदान याःगु खः, अन हे च्वनाः तपस्या यायां तरे जुल (पुण्यरत्न हाम्रो चाडपर्व ६७) । वहे गोकर्णया नामं उगु थाय्या नां गोकर्ण जुल । अननिसें गोकर्ण तीर्थय च्वनाः अबुया नामं जलदान पिण्डदान यात धाःसा मद्गुम्ह अबु तरे जुयाः स्वर्गवास जुइगु व वया सन्तानतय भिं जुइगु जुल । थथे गोकर्ण अबुयात तरेयागु दिं भाद्रकृष्ण औसीया दिनय लाःगु ख ।

च्वय न्ह्यथनागु बाखं बौद्ध धर्मावलम्बीपिसं गोकर्ण तीर्थय वनाः सराद याइगु धयागु मद्गुम्ह थः अबुया नामं दान याःगु सरादया खँ खः । उकिं हे अबु मद्गुपिं चाहे शैवधर्मावलम्बी जुइमा वा बौद्धधर्मावलम्बी जुइमा वा हिन्दू धर्मावलम्बी जुइमा अपिं फुकसिया मद्गुम्ह थः अबुया नामं गोकर्ण तीर्थय वनाः सराद पिण्ड दान धर्म याः वनेगु याइगु खः ।

अबु मद्गुपिं गोकर्ण थ्यंकाः वने मफुपिं काय म्हाय्यपिसं थव हे गोकर्ण औसी वा अबुया छ्वाः स्वयेकुन्हु थः थः अबुयात लुमंकाः अबुया यःगु नसा त्वँसा तयाः सिधा व निसलाः बियाः मद्गुम्ह अबुया आत्म शान्त याइगु खः । मद्गुम्ह अबुया नामं गुरुयात अबु भाःपाः अबुया यःगु नसा त्वँसा दान जक याइगु मखु नापं नका नं व्छइगु खः । थथे दँछिया छक्वः अबुयात लुमंकाः दान धर्म यानाः काय म्हाय्यपिनि थःगु मन नं शान्त याइगु खः । अबु मद्गु दिनय सराद यायेमफुपिं कायपिनि थवकुन्हु सराद नं याइपिं दु । गुम्हसिया गोकर्णय वनाः हे सराद याइगु जूसा गुम्हसिया थःगु हे छँ वा थःत सतिक पायक परेजूगु खुसिइ वनाः नं सराद यायेगु याः । मद्गु दिनय हे सराद याइपिं काय म्हाय्यपिसं धाःसा अबुया नामय बजि मरि केरा फलफूल घ्यः, पालु चि आदि तयाः निसलाः बीगु याइ । गुम्हसिया निसलाःया नाप नाप जाकि माय तरकारी ध्यः चिकं चि पालु आदि जा नयेगु ज्वलंया नसा तयाः सिधा आदि गुरु वा पुरोहितयात दान बीगु नं याः ।

गुम्हं गुम्हसिया थव गोकर्णऔसीकुन्हु मद्गुम्ह अबुया नामय निसलाः तयाः करुणामययात छायाः नं अबुया छ्वाः स्वयेगु याः । थथे करुणामययात छायेगु धयागु करुणामययात गुरु भाःपियाः निसलाः सिधा छायेगु खः । मांअबु मद्गुपिं काय म्हाय्यपिसं मनसें थः अबुया नामय निसलाः सिधा वा सराद याइ । खय्त ला महायानी बौद्धमार्गीपिनि चापुजा वा बहनी पूजा याइगु बाहेक मेगु न्ह्यागु नं पूजा मनसे सुथय हे याइगु खः । पूजाया बिचय दिनाः नये माःसां पूजाया थालनी मनसे याइगु खः थें तं मांअबु मद्गुपिसं नं सिधा निसलाः मनसे हे बिइगु खः ।

अबु मदुपिनि अबुया नाम निसलाः वा सिधा दान यायेत सुचि- निचि यानाः गोकर्णं वा तीर्थं वनाः दान याः वपिनि जूसा तीर्थं स्वः लुइगु याइसा छँ वा करुणामययाथाय निसलाः वा सिधा बीपिनि सिधा बी न्ह्यः स्वः लुयाः नीगु वसः पुनाः बीगु चलन दु ।

अबु दुपिनि अबुया ख्वाः स्वयेगु

अबु दुपिनि अबुया ख्वाः स्वयेगु धकाः श्वकुन्हु दिनय स्वः मल्लुसे न्ह्यथुकुन्हु स्वः लुइ । छायाः सा अबु मदुपिनि जक उकुन्हु वा अबुया ख्वाः स्वये छुन्हु न्ह्यः स्वः लुइगु याइ । अबु दुपिनि गुम्हसिया सुथय मनसे अबुया ख्वाः स्वयाः अबुया सुस्वास्थ्य दीर्घायु कामना यासे थः अबुया छु नसा नये यः गु खः वहे नसा दयेकाः वा न्यानाः खँय सगं बियाः नकेगु चलन दु । अबुया जक सुस्वास्थ्य दीर्घायु व मगलमय कामना याइगु मखु अबुम्हसिनं थः काय् म्हायपिनि भिं जुइमा जीवन बाबांलाक न्ह्याना वने फयेमा, माःगु ज्या सफल जुइमाः धकाः जीवनया दक्व पक्षय भिं जुइमा धकाः सुवाः बीगु चलन दु ।

अबु व अबुया ख्वाः स्वइपिं काय् म्हायपिं छ्वा हे छँ जूसा सुथय दनाः सुयात नमवासे अबुयाथाय वनाः अबुया तुति भागि यानाः, अबुया भिया कामना यायेगु नं याः । अबु छना हे च्वसां अबुया भिं कामना याइगु खः । अबुया भिं कामना यायेगु धयागु हे, थः भिया कामना खः । लिपा अबु दनेधुंकाः अबुया नित्य कर्म याये धुंकाः जक नसा त्वँसा पुँसाया नापं सगं लः लहाना अबुया ख्वाः स्वयेगु याइगु खः । थथे अबुयात लः लहाना नसा प्रसाद थें अबुया प्रसाद थः काय् म्हायपिन्ति इना नं बीगु याः । थुकिया अर्थ काय् म्हायपिसं थःत याःगु भिं कामना काय् म्हायपिसं हानं इनाबीगु खः । यदि काय् म्हायपिं अबुनाप नापं छँ च्वना मच्चंसा श्वकुन्हु बियाछ्वये धुंकूपिं म्हायमचात अबुया ख्वाः स्वः वये धकाः अबुया यःगु नसा त्वँसा ज्वना अबु च्वनाच्वंगु छँ वयाः ख्वाः स्वः वइ । थुकथं अबुया ख्वाः स्वयाः अबुपाखें सुवाः कायेगु याना वयाच्वंगु दु ।

बियाछ्वये धुंकूपिं म्हायमचातय अबुया ख्वाः स्वयेगु

इहिपाः याये धुंकूम्ह म्हायमचा भाःतपिनिगु छँय च्वनेगु चलन सामाजिक परम्परा जक मखु नेपाःया कानूनं ब्यूगु भाःतया छँय च्वनेगु अधिकार खः । इहिपाः याःगु दँय म्हायमचां अबुया छँय अबुया ख्वाः स्वः वइबलय् न्हूगु कु धकाः तःजिक हयेगु चलन दु । विशेष यानाः अबुयात जक ख्वाः स्वयेगु जूसां नं अबुया छँय च्वपिं सकल जहानपिन्ति नयेगु नसा भव्य थें ज्वरे याना हयेमाःगु जूगुलिं न्हूगु कु हयेगु धकाः हइगु खः । थरीथरीया मरिचरि मेमेगु इलय् स्वयां अप्वः छायाः अबुया ख्वाः स्वः वइगु खः । न्हापा न्हापा अबुया ख्वाः स्वयेगु धकाः न्हूगु कु हइबलय् ज्यापुयात खः मुलिइ क्वबुइकाः वइ ।

दछि लिपानिसें अबुया ख्वाः स्वः वइम्ह म्हायमचा कु ज्वना वयेगु सटा ब्यकुं जक ज्वनाः वयेगु याइ । थथे अबुया ख्वाः स्वः वइगुलिइ खालि अबु छम्हसित जक मजुसे मां दनिसा अबुयात छता छुं अप्वः तयाः मेगु मांअबु निम्हसित ज्वरां हे मरिचरि नयेगु नसा ज्वना वइ । अले मांअबु निम्ह नापं तयाः अबुयात न्हापां खँय सगं बियाः अय्लाः वा थ्वँ वा दुरु न्ह्यागुसां लः लहानाः नयेगु ब्व ज्वलं अबुया भित्तुसे न्ह्यच्याका बी । मांअबु निम्हसित सगं बीगु याइ । थथे अबुया ख्वाः स्वः वःम्ह म्हाययात अबु सुवाः बीगु याइ । ज्यापु जातिपिनि अबुया ख्वाः स्वः वइबलय् अबुयात छँय भाःतपिनिगु छँय हे देमाय् भव्यब्व तयाः हयेगु चलन दु । अले थःछँ वयाः सुकुन्दा च्याकाः अबुयात खँय सगं बी । अबुयात भागि याइ अनं अबुयात थःम्ह ज्वना वःगु ब्व न्ह्यच्याका बी । मेमेपिन्ति उलि हयेमाः धयागु दस्तुर मदु । अबुया ख्वाः स्वः वःम्ह म्हाययात थःगु छँय ज्वरे जू थें नका छ्वयेगु याइ । मां अबुया ख्वाः स्वयेबलय् विशेष यानाः म्हायम्हसिया नं मरि तयाः ख्वाः स्वयेगु जूगुलिं थुबलय् विशेष यानाः दक्व हलुवाइ मरिपसः जायेक मरि दयाच्वनी । उलिजक मखु थःके दुगु मरि दक्व पसः पिने पिकया ब्वयेगु यानातइ । थौकन्ह्य् हलुवाइ मरिया नापनापं थीथीया केक मेमेगु मरि तयाः अबुया ख्वाः स्वयेगु चलन दु । न्हापा न्हापा मां अबुया ख्वाः स्वयेबलय् फलफूल तया स्वयेगु उलि चलन मदु । थौकन्ह्य् न्हापायागु विधि व्यवहार स्वयाः अप्वः जुया वयाच्वंगुलिं मरिया नापनापं फलफूल जक मखु बजारय् खनेदुगु थी थी नसा त्वँसा आदि नं तयाः हयेगु याना वयाच्वंगु दु ।

पितृसत्तात्मक

मायागु ख्वाः स्वयेगु परम्परा मातृसत्तात्मकया प्रतीक धाये थें
अबुया ख्वाः स्वयेगु परम्परा नं पितृसत्तात्मकया प्रतीक धाइपिं दु । प्रत्येकया छँय
अबुयात दकले अप्वः हनेमाः छायाः सां आमदानीया श्रोत हे अबु खः मिंजत खः ।
अथे जूगुलिं अबुयात हनेगु कथं अबुया ख्वाः स्वयेगु यानातः गु खः धकाः धाइपिं
दु ।

अबुया ख्वाः स्वयेगु धयागु पितृसत्तात्मक धायेगु स्वयां काय्
मृत्याययात जन्म बियाः हुकें यानाः पालन पोषण यायेगुया कारणं खः । वंश
नृत्याका यंकेंगुलिइ थःत जन्म याःम्ह धकाः सन्मान सत्कार आदर यानाः हनेगुया
लागि खः ।

चथाः

नेवाःत थज्याःगु जाति खः, गुगु जातिं ल्वहंया मूर्तियात छः धकाः
हनेगु स्वयां न्हापां प्रकृतियात हे छः कथं हना वयाच्चंगु जाति खः । धर्तिमाता
धकाः पृथ्वी हे दकले तःधंम्ह छः भाःपीपिं जाति खः । लः पिहां वडगु लःया
मुहान, बुंगाः, तुं, नाग, ब्यांचा, क्वः, खिचा, सा, दाजुकिजा, कुमार, कुमारीपिन्त
समेत पूजा यानाः नेवाः संस्कृति नृत्याका वयाच्चंगु दु । थःपिन्त भिं याइपिं जुइमाः
वा मभिं याइपिं जुइमाः सकसित छः धकाः पूजा यानाः वयाच्चंगु नेवाः समाज
खः । थाय् वा पशु प्राणीयात छः धकाः पूजा यायेगुलिइ छुं छुं कारण दु, महिमा
दु । जीवन उपयोगी दर्शन दुथ्यानाः च्वंगु दु । आकाश, पृथ्वी सूर्य चन्द्रमायात जक
छः पूजा याइपिं मखु, सिमा जंगल पहाडयात समेत छः भाःपाः पूजा यानाः श्रद्धा
तयाः जुइपिं नेवाः जाति खः । प्रकृतियात छः धकाः माने यायेगु हनेचने यायेगु
आदिवासीतय्गु जातिया विशेषता खः । प्रकृतिया गुणयात जीवन उपयोगी महत्व
थुइकाः पूजा याइपिं नेवाः जातिं ब्यां, क्वः, खिचा, सा, नागःयात जक पूजा याइगु
मखु, दाजुकिजाया नापनापं थः थम्हं थःत समेत पूजा यानाः जीवन नृत्याका
वयाच्चपिं नेवाः जाति खः । नेवाः जाति खुंयात समेत पूजा याइपिं खः । बांलाःगु
बांमलाःगु निगुलिं जीवनया पक्ष खः । मनूया जीवन वा समाजयात भिं याइपिन्त
जक पूजा यानाः समाज नृत्याकीगु जाति नेवाः जाति मखु । जीवनय् बांलाःगु नं
वड, बांमलाःगु नं वड, भिंगु नं वड, मभिंगु नं वड । निगुलिंयात नं समान रुपं,
सहज रुपं कया जीवन नृत्याका वनेमाः । समाज नृत्याका वनेमाः धयागु ज्वलन्त
उदाहरण खुँछःयात पूजा यानाः नखः हनाः समाज नृत्याकाच्चपिं नेवाः जाति खः ।
नेवाः जातिं हनाः वयाच्चंगु नखःचखः मध्यय् भाद्र शुक्ल चतुर्थी अर्थात गुंलाथ्व
चतुर्थीकुन्हु चथाः धकाः हना वयाच्चंगु दु । चथाः गुबलेनिसें हनाः वयाच्चन धयागु
खँय् भाजु पुण्यरत्न बज्राचार्यया धापू कथं नखःचखः परापूर्व कालं नसें हना
वयाच्चंगु खः । जुइफु नेपाःगाःया दकले न्हापांया आदिवासी नेवाः जातिं नखःचखः
हने संबलयनिसें हनावःगु जुइमाः । लिपा वनाः थी थी पुराण व धर्मावलम्बीपिसं
थः थः कथं थवयात परिभाषित यानाः थवया उत्पतिया बारे खँ नृत्यथंगु जुइमाः ।

उत्पत्ति

चथाः चतुर्थीयात धाडगु खः । थुकियात चौथी न धायेगु याः गथेकि मंगल चौथी । चौथी खँवः आपालं चलन चल्लीया खँवः खः । चौथी खँवः लिपा वनाः चथालय् हिल । थौकन्ह्य चथाः धायेगु जुल । चथाःयात गणेश चौथी धकाः न धायेगु याः । पार्वती थःगु रक्षाया लागि गणेशःया सृष्टियात । थ्व हे पार्वती गणेशः सृष्टि याःगु दिं हे भाद्रशुल्क चौथी खः । उकिं चथाःयात गणेशया बुदिं धकाः न धायेगु याः । चौथी तिथि गणेशःया तिथि खः, अले वार कथं मंगलवार न गणेशया हे वार खः । उकिं मंगलवार चौथी लात धायेवं गणेशः पूजा यायेगु भिं धकाः पूजा याइपिं यक्व यक्व दु । थुकथं चथाः कुन्हु गणेशः पूजा याइपिं न दु ।

चथा धकाः गणेशः जक पूजा याइगु मजुसे थ्वकुन्हु नखः धकाः हनीपिसं चन्द्रमा पूजा यायेगु न याः । भाद्रशुल्क चौथी अर्थात् जालाशुल्क चतुर्दशी कुन्हु चथाःद्यः धकाः चन्द्रमायात पूजा याइगु खः । चथाःद्यःयात नेवाः समाजय् भिम्ह द्यः धकाः कायेगु मयाः । खँद्यः धकाः माने यानाः वयाच्चंगु खः । चथाःद्यः धकाः हनीगु द्यः चन्द्रमायात छाया खँद्यः धकाः धाल धयागु खँ ब्रम्हपुराणय् ब्रम्ह वचन धकाः थथे च्वयातःगु दु ।

छन्हु विष्णु भगवानया थाय् देवसभा जुयाच्चन । थ्व इलय् चन्द्रमां पार्वतीया काय् गणेशःयात नाना कथं हिस्यानाः च्वन । दक्व द्यःपिनि बांबालाःगु रुप गणेशःया धाःसा किसिया छ्यं धकाः हिस्यात । थुकथं चन्द्रमां गणेशःयात हिस्याःगुलिं गणेशःवं न चन्द्रमा खनाः तंचाया छंगु छ्वाः स्वक्व खँ जुइमा धकाः सराः बिल । थथे सराः ब्युसेलि स्वर्गय् च्वपिं द्यःपिसं नापं खँ जुइ धकाः चन्द्रमायागु छ्वाः स्वयेगु मयात । सुनानं छ्वाः मस्वःगुलिं चन्द्रमायात तच्चवं लाज जुल । थथे चन्द्रमा मछाःगु सियाः महाद्यः व मेमेपिं द्यःपिसं गणेशया लड्डु, दुरु, लैं, सितु छाना तिमिलायात क्षमा यानाः बीमाल धकाः जोड यात । द्यःपिं नाप महाद्यःवं समेत क्षमा यानाः बीमाल धकाः धाःगुलिं थम्हं बियागु सराः भाद्रशुक्ल चौथीकुन्हु छन्हु लगे जुइ, मेबलय् जुइमखु धकाः थःम्ह ब्युगु सराः छन्हु जक यानाः लित कयाबिल । थननिसें थ्वकुन्हु अर्थात् भाद्रशुक्ल चौथी जलाश्व चतुर्थीकुन्हु चन्द्रमा स्वत धाःसा खुया मकाःसां खँ पाः याकेमाली धकाः चन्द्रमायात मस्वइपिं न दु । थ्व हे कथं जलाश्व चतुर्थीकुन्हुया चन्द्रमायात खँद्यः धकाः धायेगु याःगु खः ।

खँद्यः चन्द्रमायात पूजा

च्वय् न्ह्यथनागु खं थ्व स्पष्ट याःगु दुकि जलाश्व चतुर्थीकुन्हु चन्द्रमायात स्वक्को खँ जुइ । गणेशःवं चन्द्रमायात ब्युगु सराः न यानाः मन्तय्सं थः खँ जुइ वा खँ पाः याइ धकाः ग्यानाः जाला शुल्क (भाद्रशुल्क) चतुर्थीकुन्हु गणेशः पूजा यानाः, अवसं च्वनाः, चन्द्रमा मस्वसे सुला च्वनीपिं न दु । उलि जक मखु तिमिला खने मदुनबलय्निसें सुथ न्हापां हे थःगु म्हाय् खाइसि मल्ता घानाः चिनाः थःत खँ पाः याःवइ धकाः ग्याःइपिं दु । थज्याःपिनि द्यःबित धायेवं पिनेनिसें खापाखिपा ग्वयाः गणेशःयात पूजा याइ ।

चन्द्रमा बांलाःम्ह, शितलता बीम्ह व छ्युसे च्वथाय् जः बीम्हसित नापं म्वाःम्वायेकं खँ धकाः बांमलाक दोषारोपण याकेमाः धाःसा, मन्या जीवनय् सीक मसीक खँया ज्या जुल जुइ वा मजुसां खँज्या जुइफु । उकिं दछिया छक्वः जक जसां न खँ ज्या सम्मानीत कथं जुइमाः । वयात स्वाभाविक कथं कायेमाः धकाः खँद्यःयात पूजा याःगु खः । चन्द्रमायात खँद्यः धकाः पूजा याये माःपिं न दु । चन्द्रमायात खँद्यः धकाः पूजा याये म्वाःपिं न दु । खँद्यः धकाः ग्यानाः पुमज्याइपिनि, ग्यानाः जसा चन्द्रमायात खँद्यः धकाः पूजा याइपिनि खँ हे मखुसां खँ धकाः पोलय् यानाःहःसा व असत्य खँ प्रमाणित याये मफयेमा धकाः खः । अथे तं मन्या जीवन गुबले छु जुइ सुनां धायेफु ? थन छु त्वः फ्युगु दै । उकिं खँ ज्या जसा न स्वाभाविक धकाः खः । भगवान बुद्ध थःम्हं हे धया बिज्याःगु दु कि जीन्दगीभरी खुया मकाःपिं, मखुगु खँ गुबलें मल्हाःपिं, मज्युगु ज्या गुबलें मयाःपिं दैमखु धकाः । थ्व खँ यथार्थ खः, सत्य खः ।

चन्द्रमायात पूजा यायेगु धकाः न्ह्याबलें याइमखु । थ्व जलाश्व चतुर्थी अथवा भाद्रशुल्क चतुर्थी कुन्हु द्यः खिउँसे च्वन धायेवं चन्द्रमा लुथावइ । सामाजिक धारणा कथं सर्गतय् खने दया वयाच्चंगु चन्द्रमायात खँद्यः दुबीत धायेवं लाछिं खिचातय्सं उइ । त्वाः त्वाल्य् खँ वयाः खू वल धाःसा गुकथं लाछिं खिचां उइ उकथं हे व कुन्हु चन्द्रमा खने दयेक वयेवं लाछिंखिचां उइ । चन्द्रमा दुबित धायेवं खिचातय्सं उइगु याइमखु । थथे खिचातय्सं सुचं बिल धायेवं फुकसिया कःसिइ वा चन्द्रमा खने दुथाय् च्वनाः चन्द्रमायात पूजा यायेगु याइ । चन्द्रमा लुसानिसें द्यः तुय् मजुतले थथे पूजा यायेगु याइमखु । खिचां उयाच्चवंतले जक पूजा यायेगु जुइ । थुकिं त्वाः त्वाल्य् छक्वलं हे पूजा यायेगु जुइ छाया धाःसा खिचां उल धायेगु पूजा याइगु खः । छायाधाःसां खिचां उतलय् जक पूजा जुइगु खः । गुम्हं

गुम्हं तान्त्रिकतयसं चन्द्रमा लुङ्गु इलय् खुँछः दुबी धकाः स्यु । थज्याःपिसं खिचा उड न्ह्यः हे छः पूजाया लागि सुरु यायेगु याइ । छः पूजा यानाः च्वच्चं हे खिचां उयाहयेगु सुरु जुइ । नेवाःतय् न्हिन्हिं पूजा याइपिं छःपिं मध्यय् सुर्छः व चन्द्रमा नं खः । सुर्छःयात सुथय् पूजा याइगु जूसा चन्द्रमायात सन्ध्या इलय् यायेगु धकाः जाकिं पूजा यानाः मत बीगु याइ । न्हिन्हिं जाकिं जक पूजा यानाः मत बीगु याःसां थ्वकुन्हु स्वां सिन्हः तयाः विशेष रुपं पूजा याइ । न्ह्यागु नखःचखः हंसा नं छैय् छ्छां नीसी जुइमाःपिं नेवाःतय् थ्वकुन्हु नं नीसी यानाः म्वःल्ह्या शुद्ध याइ । थ्वबलय् चन्द्रमा खनेदुथाय् विशेष यानाः कःसिइ पूजा याइ । पूजा यायेगु थासय् बै थिलाः शुद्ध याइ । थथे चन्द्रमा पूजा याइबलय् सुर्छःया ल्वहंया मूर्ति तया चन्द्रमाया नापं सुर्छः नं तया पूजा यायेगु चलन दु । ल्वहंया सुर्छः अप्वः यानाः नेवाःतय्गु छैय् छैय् कःसिइ तयातःगु दइ । चन्द्रमा नापं सुर्छः तयाः पूजा याःगुली चन्द्रमा थें मलिन कथं तेज जः व्हलाः मखु सुर्छः थें तेज व्हलाः जीवन न्ह्यायेमा धकाः नं जुइफु । जीवनया जः गुबलें सुर्छःया तेजःथें तच्चवं थी गुबलें चन्द्रमाया थें नाइसे च्वनाः सिचुका न्ह्याइपुका बी थें खः ।

चन्द्रमायात पूजा याइबलय् उगु इलय् खनेदुगु फलफूल विशेष यानाः तुसि, पासि, केरा, आमाःसि, स्याउ, धालेय् आदि छःयात छाइ । थ्व इलय् कःनि, मुस्या आदि सुकुगने धुकुगु थी थी बुबः नं सियाः छःयात छायेगु याइ । गथेकि कःनि मुस्या, खत्याः, बरां, कय्गु, चना, वू, बकुलाः, सिम्पु व माय् आदि सियाः छःयात छाइ । थ्व नापनापं थ्व नखः स्वयाः छुं ला न्ह्यः विशेष यानाः आषाढ श्रावणबलय् खनेदुगु फलफूल मध्ये छगू बःसि खः । थुबलय् विशेष यानाः बःसिया पु तछ्यानाः उकिइ दुने वंगु खायुगु सि बसपतिपु नं छःयात छायेगु चलन दु । बसपतिपु छायेगु छाय् जुल धयागुलिइ सिनाज्या यानाःच्वनीगु थ्व इलय् नेवाःतय नखः हनेगु उलि मदुगु जूगुलिं बःसि छःयात छाये थें यानाः उकिया पु बसपतिपु छायेगु यानाः वयाच्चंगु खः । मेकथं धायेगु खःसा नेवाःतय्गु विशेषता फछिं फतले छुं वां मछ्वयेगु व फछिं फतले छ्यलेगु खः । जइफु बसपतिपुइ कःनि मुस्या छुस्या आदि सियागु नसायात पचय् यायेगु शक्ति दुगु जुइमाः । बसपतिपु खायुगु सवाः खः । उकिं कःनि मुस्या आदि थें ज्याःगु छाःगु नसा पचय् जुयाः प्वाथय् च्वंगु विकार नाश जुइमा धकाः नं जुइफु ।

चन्द्रमायात पूजा यानाः छाइगुलिइ फलफूल व बुबः सियाः जक मखु तुमा व पालुमा नं छायेगु याइगु खः । छायेधःसां चथाःयात नेवाःतय्सं मोहनिया व्छ्यालाभू वा मोहनिया समय कथं नं कायेगु याः । मोहनिबलय् आगमय् भुयुफसि नापनापं तुमा व पालुमा नं स्वनेगु याइ । चालंकुन्हु भुयुफसि नापनापं तुमा व पालुमा निगुलिं पालेगु नं याइ । मोहनि तःजिगु नखः खःसा चथाः चीधंगु चखः जुगुलिं पालुमा व तुमा स्वनेमाःगु खः । चथाःयात पुण्यरत्न बज्राचार्य चखः धकाः धयादीगु दु । तर गुम्ह गुम्हसिया थ्व नखः धयागु हे मोहनि नखःया सुरुवात जूगुलिं

थ्व नखः मोहनि नखःथें तःजिक हनेगु नं याइपिं दु । छायेधःसां थ्व नखः बांलाक हन धाःसा मोहनि तःजिक हने दै । नापं छःपूजा यानाः छःयात भव्य छायेगु चलन दु । छैया दक्को परिवार च्वना पुजायाइगु चथाः छःपूजा याये सिधल धायेवं छःयात छानातःगु लाना प्रसाद धकाः छै जः फुकसिया मुस्या फलफूल आदिया नापं समय नयाः लिपा तःजिक भव्य नयेगु याइ । छैया जःपिं नं थ्वबलय् बायाच्चन धायेवं मोहनिबलय् नं बायाच्चने माली धकाः थुबलय् पिने च्वनाः च्वंसा छै वयाः परिवार नापं नखः हनेगु याइ ।

थ्व नखःबलय् मदये धुंकापिनि नामय् सिब्वः नं तयेगु याइ । नापं बियाव्छये धुंकुपिं म्हेयाय्मचा भिमचापिन्त नखत्या सःताः नकेगु नं याइ । उकिं थ्व नखःयात नं चखः कथं मखु, नखः कथं हनीपिं नं दु ।

थ्व नखःबलय् कृषि उत्पादन कथं सामाज्या सिधयाः वा दुकायेगु मजूसां कःनि, मुस्या, वू, बकुलाः, चना, कय्गु, आदि बुबः सयेकाः दुकाये धुकुगु जूगुलिं कःनि मुस्या सियाः नकेगु याइगु खः । थ्व इलं नसें विस्तार विस्तारं नेपाः गालय् हावापानी नं भचाभचा ख्वाउँया वइ । खसु सालुक वयेगु सुरु जुइगुलिं चिकुचिकु धायेगु सुरु जुइ । उकिं थःगु म्ह क्वाकेगु कथं कःनि, मुस्या, बूबः सिया नयाः म्ह क्वाकेगु व सामःज्यायात बल दयेकेत तयारी यायेगु खः । बूबःयात भी नेवाःतय्सं नखः कथं थी थी परिकार दयेकाः नयेगु चलन मध्यय् थ्व नखःबलय् भाजनय् तयाः बुबः सियाः नयेगु नं खः । गुपुन्हि बलय् व हे बुबः पवयाः चुलि जायेकाः क्वाति दयेकाः नयेगु याइ । पञ्चदानकुन्हु व हे बूबःयात मफ्वसे अथे तं कैं खुने थें क्वाति दयेकाः गंक्वाति धकाः नयेगु चलन दु । व हे बूबःयात चथाःबलय् सियाः नयेगु याइ । थ्वबलय् बूबः नापनापं कःनि, खत्या, बरां बसपति नापं तयाः सियानयेगु याइ ।

चथाः हनेगु ई धयागु जंलाबलय् खः । थुबलय् ज्यापुत नसंचा इलय् बयपुयाः पीठपिठय् चाःहिलाः जंला सेवा धकाः धर्म यायेगु याइ । न्हिनय् न्हिनय् बचा धिकःपिं मिसामचात थःथःगु लागाया थाय्या पिठपिठय् जंला सेवा वनेगु धकाः वनेगु याइ । सुथय् जंला सेवा वनीपिसं कःनिमुस्या कचिकं हे छायेगु याःसा न्हिनय जंला सेवा वनपिं मचातय् कःनि मुस्या तयाः पूजा वनाः जंला सेवा वनेगु याइ ।

गुलाबलय् गुलाधर्म हनेगुया लागि गुलाबाजं थानाः स्वइम्भू वा चिभाः चाःट्य वनीपिं थौकन्हय् थें बयपुयाः नसंचा हुलिपिं ज्यापुतय्गु बय् न्यने उलि मखने धुकल । अथेंतुं जंलासेवा वनीपिं मिसामचात नं उलि खनेमदु ।

यैया: (इन्द्रजात्रा)

इन्द्रजात्रा, यैयाः, यैयाः पुन्ही यैयापुन्ही कथं प्रचलितगु जात्रा यंलाश्व द्वादशी निसैं यंलागाः चर्तुदशीकुन्हु तक हनिगु यैया जात्रा मध्यय् छगू तःधंगु जात्रा, उत्सव, नखः वा चखेः कथं परंपरागत रूपं हना वयाच्चंगु खः । इन्द्रजात्रा यैयाः धार्मिक आध्यामिक, मनोरञ्जनात्मक उत्सवया जात्रा खः । स्वर्गय् च्वनिम्ह इन्द्र, छः नसैं मनु, राक्षस, जनावर तकया जात्रा खः इन्द्रजात्रा । दछिया दुने स्वर्गे जूपिं स्वर्गय् वनेमा, स्वर्गे जूपिनि आत्मशान्त जुइमाः धकाः मत तयाः उपाकु वनेगु, चलन नं दु । नापं दागियां नापनापं स्वर्गय् जूपिसं स्वर्गे वनेगु, खनेमा धकाः, बौमत च्याकाः वनेगु चलन नं दु । देय्यात रक्षा याइपिं कुमारी, गणेश व भैरवपिन्त रथय् तयाः जात्रा यायेगु थाय् थासय् भैरवया ख्वाःपाः दुगु क्वँचा थ्वँ तयाः हाथु हायेकेगु हाकु क्छ्याला मुस्या पालु स्याःबजि आदि तयाः समय् नयेगु, समय् इनेगु, थाय् थासं प्याखं पिकयाः प्याखं हुइकेगु इन्द्रजात्रा वा यैयाःधयागु दागिनापनापं स्वर्गय् वने मावपिन्त मतः क्यना हानं स्वर्गे क्छयेगु खः ।

यैयाःया उत्पत्ति

इन्द्रजात्रा वा यैयाः गुबलयनिसैं सुरु जुल वा सुया पालनिसैं न्ह्यात धयागु खँय् वंशावली कथं गुणकामदेव निम्हम्हसिया पालनिसैं न्ह्यात धयागु बिचाः दु । भरतया नाट्यशास्त्र कथं भरत नाट्यशास्त्र च्वये सिधयेकाः ब्रम्हायात समाज्य् प्रदर्शित यायेत आज्ञां पवंबलय् ब्रम्हां बांलाःगु ई इन्द्रजात्राया उत्सवय् प्रदर्शित यायेत वचन ब्य कथं इन्द्रध्वज महोत्सवय् नाट्यशास्त्र प्रदर्शित याःगु खः । भरतमुनिया नाट्यशास्त्र ब्रम्हां सृजना याःगु वेद मध्यय् न्यागु वेद नाट्यवेद खः । उकिं भरतमुनिया नाट्यशास्त्र वैदिककालया खः धायेगु विद्वान्तय् धारणा दु सा गुम्हसिनं ८ गू शताब्दी पाखें भरतमुनि नाट्यशास्त्र च्वत धयागु नं धारणा दु । यदि भरतमुनिया नाट्यशास्त्रय् उल्लेख जूगु इन्द्रध्वज महोत्सव इन्द्रजात्रा हे जूसां नेपाःया पुलांगु जात्रा मध्यय् परम्परा कथं न्ह्यानाः वयाच्चंगु जात्रा छगू इन्द्रजात्रा खः ।

मेगु धापू कथं न्हापा न्हापा द्वापर युगय् यें देशय् महाद्यःया अंश जुयाः च्वम्ह यलम्बर धयाम्ह वीर किराती जुजुं राज्य यानाःच्वंगु जुयाच्चन । उकिं वं थःगु हे नां क्वकयाः थ्व देय्या नां नं यें धकाः छुनातःगु जुयाच्चन । व हे किराती जुजुं द्वापरयुगया अन्त्यस कुरुक्षेत्रय् कौरव व पञ्चपाण्डवपिनि लडाई जूबलय लडाई स्वःवनेत प्यंगू अक्षौणी सेना ज्वनावन । तर श्रीकृष्ण वय्क वःगु सिया नापलाना बिज्याबलय् वय्कलं श्रीकृष्णायात जि प्यंगू अक्षौणी सेना ज्वनाः पाण्डवं व कौरवयागु महाभारत लडाई स्वयेत वयागु खः । अले कौरव व पाण्डव मध्ये गुम्ह बुइ वपाखे लिनाः लडाई यायेगु बिचाः नं यानागु दु धाल । वय्कलं धाःगु खँ न्यनाः श्रीकृष्ण कौरवत लडाईलय् बुइगु लक्षण खनाः बिज्यानाः उम्ह यलम्बर जुजु कौरवपाखें लित धायेवं लडाई गुबलें क्वचाइ मखु धकाः धया बिज्यात । श्रीकृष्ण यलम्बर महाद्यःया अंश दुम्ह जूगुलिं वयात लडाईलय् बुके नं फइमखु धयागु बिचाः यानाः छल यानाः यलम्बरया छ्यं त्वाःन्हाना बिज्यात । अथे जूसां श्रीकृष्ण यलम्बरयात महाभारत जुयाः च्वंतलय् आकाशय् च्वना लडाई स्वयाःच्वन । लडाई सिधयेवं थःगु हे राज्य यें लिहां वल । व हे यलम्बरया छ्यं आकाश भैरवया नामं थौतक नं वंगलय् दनि । यें देया जनतां यलम्बरयागु वीरताया कदर यानाः यैयाः अर्थात यलम्बरयागु यात्रा धकाः छ्यं जकया मूर्तियात स्थापना यानाः दच्छिइ छक्वः भाद्रशुक्ल द्वादशीकुन्हुनिसैं आश्विनकृष्ण चौथी तक वंगः त्वालय ब्वयाः पूजा यायेगु थिति दयेकूगु खः । धार्मिक धापुलिइ विश्वास

यादपिनि बिचाः कथं यैयाः अर्थ इन्द्र अले यैयाःया अर्थ इन्द्रजात्रा खः । भविष्य पुराणाय ब्रम्ह वचन धकाः थुकथं धयातःगु दु । भाद्रशुक्ल द्वादशीकुन्हु यःसिं थनाः, यैयाः धकाः उत्सव यानाः, वया छन्हु न्ह्यः जाग्राम च्वनाः, चतुर्दशीकुन्हु इन्द्रयात मत बिया, श्री गणेश श्री भैरव व श्री कुमारीया पूजा व जात्रा यानाः, समयबजि इनेगु, धारणी स्तोत्र पाठ यानाः देय् चाहिलेगु, दागिनाप देय् चाःहिलेगु आदि ज्यायात धाःसा रोजेश्वर स्थिर जुइ । नापं सीपिं मनूत नं तरे जुइ । उकिं येयाः यायेगु थिति दुगु खः ।

मेगु खँ स्वर्गया जुजु इन्द्रया मांया जंलागा ४ कुन्हु वसुन्धरा द्यःया तिलाव्रतया अबसं च्वनेत काय् इन्द्रयात स्वर्गय् मदुगु यँ जक दुगु पालिजाःस्वां कायेक हेःगु खः । इन्द्र यँ वयाः पालिजाःस्वां काःवःमहसित यँ च्वपिसं पालिजाःस्वां खुल धकाः लाय्कूया मूलगु दुवातय् निपा ल्हाःनं ब्वयेकाः चिनाः जात्रा याःगु जूगुलिं इन्द्रजात्रा धकाः नामाकरण जूगु खः धकाः धायेगु चलन नं दु । इन्द्रयात चिनाः जात्रा यानाः, बेइज्जत यानाः स्वर्गया द्यः इन्द्र मर्त्यलोकय् दु धकाः क्यनेगुया लागि यःसिं थनेगु याःगु खः ।

मेगु धाःपुकथं छगू इलय् इन्द्र व असुरतय् दथुइ ल्वापु जुइगु जुया च्वन । इन्द्र छक्कः ल्वापुइ विष्णुया वचन कयाः यःसिं थनाः असुरत नाप ल्वानाः त्याकुसानिसं यैयाःबलय् यःसिं थनेगु थिति दुगु खः धाडपिं नं दु ।

चव्य न्ह्यःब्वयागु धारणा फुकं यैयाःया सुरु गथे जुया । जुल धयागु खँ खः । श्व फुकं खँयात कयाः चिन्तन यानाः स्वयेबलय् यैयाः लाय्कू व मरुइ दुने विशेष जुइगु ज्यायात यैयाःया खँय् उगु इलय् च्वपिं मनूतय्सं मखुगु खँय् सुयात नं बाकि मतः । स्वर्गय् जुजु जुयाच्वम्ह इन्द्र तक मखुगु ज्याःयात धाःसा वयागु ज्याया सजाय् बीपिं यैयाः जनतात खः । मखुगु ज्याखँय् सुयातं बाकि मतेपिं जाति खः धयागु क्यनेगु याः । इन्द्र थज्याःमहसित लाय्कूया म् थासय् व नं फुकसिनं खनेदयेक थां थनाः उकिइ द्यःने खः ग्वयाः सकसिनं हुकननिसं खनेदयेक चिना ब्वया व्यूगु खः ।

इन्द्रयात जात्रा यानाः न्ह्याकिगु येयाः छगू चखः व जात्रा रुपय् हना वयाच्वंगु खः । अधिराज्य दुने नं विशेष यानाः येयाः लाय्कू दुने जुइगु जात्रा जूसां नेवाःतय्सं विशेष यानाः यला शुक्ल पूर्णिमाकुन्हु येयाःपुन्हि धकाः विशेष रुपं समयबजि ज्वरे यानाः सीपिनि नामय् समयबजि छानाः द्यःद्यःपिन्त ह्वलाः त्वाः त्वाल्य च्वपिं मचातयत् समयबजि इनाः थःपिनि नं नइगु चखः खः ।

श्व नखः च्यान्हुतक अर्थात जंला द्वादशीनिसं जंलागाः ४ तक न्ह्याइपुक दछिया दुने सीपिं आत्मायात तरे यायेगु, दु नि द्यःद्यःपिन्त रथय् तयाः सालाः जात्रा यानाः तच्चतं हर्ष उल्लास कथं हनिगु खः ।

यःसिं थनेगु

यैयाः वा इन्द्रजात्राया सुरु यःसिं थनाःनिसं सुरु जूसा यःसिं क्वथया क्वचायेकीगु खः । प्रजातन्त्र स्वयां न्ह्यः यैयाः सुरु जुइ च्यान्हु न्ह्यःनिसं सरकारी जंगी कर्मचारी नायः महानायः रकमी गुथियारत सरकारी पुरोहितपिं सकलें जानाः यैयाः पूर्वपाखे अवस्थित नाला गांयाथाय् च्वंगु यःसिं धाःथाय् यःसिं काः वनेगु याइ । अन जंगलय् च्वंगु सिमात मध्यय् तप्यंगु सल्ला सिमा छमा ल्यया उकिइ विधिगत रुपं वनकालीया नामय् दुगुचा बलि बियाः पूजा यानाः सिमा पालाः क्वथयेगु याइ । व हे पाःगु सल्लाया सिमायात यःसिं थें थिकचा जुइक पालाः जात्रा यानाः ख्वपय् तये हयेगु याइ । ख्वपय् छन्हु निन्हु तयाः अर्थात सिमा पाला हःगु सिंग्वं यःसिं भचा न्हंगंकालि थिमिइच्वपिं मनूतय्सं ख्वपनिसं जात्रा यानाः यैया भोताहितिइ हया तये हयेगु याइ । थिमिइच्वपिसं तयावना छन्हु लिपा यैयापिं वनाः हे भोताहितिनिसं जात्रा यानाः जंलाथ्व शुक्ल अष्टमी अर्थात कायाअष्टमी कुन्हु यैया हनुमानधवाखाया कालभैरवया न्ह्यःने तये हयागु याइ । अन प्यन्हु तये धुनेवं यःसिं गनेनं धुंकीगु जुइ अले भाद्र जंलाथ्व एकादशीकुन्हु अर्थात हरिकोलडी एकादशीकुन्हु मनूत जाग्राम च्वनाः वामन द्वादसीकुन्हु अर्थात न्हें जंलाथ्व द्वादशीकुन्हु साइतय् यःसियात पूजा यानाः कालभैरवया न्ह्यःने यैया सायमितय्सं वयाः थनेगु याइ । यःसिं क्वय् किसि गयाच्वम्ह लुंयागु इन्द्रया मूर्तिं तयेगु याइ ।

न्हापा न्हापा यःसिं थने छन्हु न्ह्यः अर्थात जंलाथ्व एकादशीकुन्हु नेपाःगाःया सकल जागीरदारत जाग्राम च्वनाः भारती प्याखं स्वइगु जुयाच्वन । थौकन्ह्य् श्व भारती प्याखं धयागु नं खनेमदु । अले सरकारी कर्मचारीत जाग्राम च्वनेगु धयागु मन्त । खालि सम्बन्धीत मनूत जक च्वनाः यःसिं थनेगु जुइ धुकल । यःसिं थनेगुया नापनापं मरु गःकू न्ह्यःने वा मरुसतः व सिंहसतःया दथुइ च्वंगु तःकूगु चकंगु दुवातय् लाक्क इन्द्रयात नं खः दयेकाः व हे खतय् ल्हाः निपां ब्वयेकाः चिनाः जात्रा यायेगु याइ । श्व दिनय् हे सुथय् त्वाः त्वाल्य इन्द्राद्यः ब्वयेमाःपिनि इन्द्राद्यः ब्वयेगु याइ । क्वचाय् ल्वाःपाः च्वयातःगु हाथुद्यः नं ब्वयेगु याइ । नापं व श्व अय्ला हायेकी । श्वकुन्हु हे यैयाःया द्यःपिं ब्वये माःपिनि हाथु द्यःया नापनापं द्यःद्यःपिं ब्वयेगु याइ । मरुइ माजु देगः व जोशी देगःया दथुइ इयाःमत तया यैयाः ज्वःछि बहनी बहनी इयाः मतः च्याकेगु नं याइ । इन्द्राद्यः ब्वयेगुलिइ वंगः, यतखा, थायमरु, ब्रम्हत्वाः, न्ह्यःखाः आदि थाय् थासय् थौकन्ह्य् अप्वः थासय् इन्द्राद्यः ब्वयेगु मयाये धुकल । मरुयाम्ह इन्द्राद्यः हे चलन दु । मुख्यम्ह जूगुलिं गुथि न्यायेका वयाच्वंगु दु ।

यैया: क्वचाल धायेवं जालागा: चौथीकुन्ह साइत स्वया: हे य:सिं
क्वथलेगु ज्या जुइ । थव नापनापं ब्वयात:पिं इन्द्राद्यः, हाथुद्यः ब्वयात:पिं गुलित नं
द्य:या मूर्ति दु, अपिं फुक्कं दुकायेगु ज्या याइ ।

उपाक् वनेगु

जालाथव द्वादशी कुन्ह हे अर्थात भाद्रशुक्ल द्वादशी कुन्ह दछिया दुने
मृत्यु जूपिनि नामय् थाय् थासय् द्य:द्य:पिन्त मतः तया: उपाक् वनेगु धका: वनेगु
याई । थुबलय् विशेष याना: यैया शहरया लै मजुसे उबलय् या लागां पिनेया लैपु
लैपुजक जुया: मतः ब्यू वनीगु खः । थव लै फुकं चित्रांकित याना: स्वन धा:सा
चैत्यया आकारया लैपु यचुक खनेदु । विशेष याना: थव उपाक् बौद्धमार्गीपिं जक
वनेगु याइगु खः । थौकन्हय् हिन्दू मार्गीयापिं नं ल्हातय् धुंच्याका: चाहिनेगु याना:
वयाचवंगु खनेदु । हिन्दूमार्गीपिनि थ:गु सामाजिक रितिथिति कथं मखुसां थ:गु स्वः
विवेकं सीपिनिगु नामं मतः ब्यू वनीगु खः ।

बौद्धमार्गीपिनि थ: परिवारपिं स्वर्गे जुल धायेवं मदुम्हसिगु नाम
द्य:द्य:पिनि थाय् वना देवा च्याक: वनेगु धका: पूजा याना: मत च्याकेगु याइगु
खः । मदुम्ह मन् लुमंका: म्हाइपुका च्वनेगुया थासय् मदुम्ह मन्यात लुमंका: द्य:
पूजा याना: मत च्याका: मनय् दुने च्वंगु विरहयात विस्तार विस्तारं न्हंका: स्वस्थ
जुइगु ज्यायात धार्मिक प्रक्रियां लंका यंकेगु खः । थथे मत बीगु नामं येंदेया
उबलय् वस्ती फुकं चा:हिला सीपिनिगु नामय् मत तया: तरे यायेगु ज्याय् ३६५
प्वा: पाल्चा सीपिनिगु नामय् न्हि छप्वा: छप्वा: दरं मत तइगु खः । मदुम्हसित
दछियंक छ्यसे मच्चनेमा न्ह्याथाय् नं ज: दयेमा धका: आशा याना: मदुम्हसिगु
नामय् मत तयेगु याइगु खः । थथे मत त:वनीबलय् धुं धुपाय् च्याका: नं वनेगु
याइ । गुम्ह गुम्हसिनं मदुम्ह मन् सुखावति भुवनय् वास लायेमा धका: लं दुछिं
धारणि तुत: पाठ याका नं यंकेगु चलन दु । गुम्ह गुम्हसिया थथे वनेबलय् बाजं
थाका नं यंकेगु चलन दु ।

यैया उपाक् वनेगुया लैपु

मरु छ्य:क्यब, चसाद्व, कंगः, सुइकागल्ली, न्यतः, थैहिति, छुस्या
बाहाः, मुस्या बाहाः, ज्याथा, कमलादी, भोताहिति, महाबौद्ध, दुगंबही, तेबाहा:पिने
लुंहिति, धरहरा, बागदरवार, गणवहाः, ता:हा:गल्ली, नाय्पच्चं त:ननि, ब्रम्हुत्वाः,
जैशीदेवल, क्वाहिति, भिद्यः, मरु छ्य:क्यब अर्थात गनं सुरु जूगु खः अनं हे
क्वचायेकेगु जुइ । उपाक् वनेगु प्रक्रिया खालि यैया दुने च्वपिं बौद्धमार्गी नेवा:तय्
जक खः ।

रथ सालेगु जात्रा:

यँया:बलय् जुइगु थी थी उत्सव मध्यय् बसन्तपुरया कुमारी छँय् च्वम्ह श्री कुमारी श्री गणेश व श्री भैरव जुयाच्चपिं शाक्य जातया मचातयत् रथय् तया: साला: जात्रा यायेगु परम्परा दु । यँया:बलय् जुइगु फुक्क जात्रा उलि हे न्ह्याइपुगु व उगु कथं हे महत्वपूर्णगु व दुग्यं महत्वं जा:गु ख: । उकिइ मध्यय् श्री कुमारी, श्री भैरव व श्री गणेशयात रथय् तया: रथ साला: जात्रा यायेगु परम्परा यँया:या छगू मुख्यगु पक्ष ख: । थथे श्री कुमारी, श्री गणेश व श्री भैरवया रथ जात्रा जूसां नं थव जात्रायात कुमारीया रथ जात्रा धका: धायेगु या: । नेवा: संस्कृति दुने कुमारीया या: त:धंगु थाय् दु । कुमारीयात रक्षकया रूप्य कया: त:गु जगुलिं छँय् छँय् त्वा: त्वालय् लाग्ना लागाय् कुमारीया स्थापना याना: त:गु दु । लाय्कूया कुमारीयात नेपा:या राज्यया हे संरक्षकया रूप्य कयात:गु दु । कुमारी जात्राया बारे वंशावलीइ थुकथं उल्लेख यानात:गु दु ।

न्हापा न्हापा छ: भक्तपिं मनूतय्सं छ: छ:पिं नाप मनूत नाप थें तुं खँल्हाबल्हा याये फुगु जुयाच्चन । व हे खँ कथं जुजु त्रैलोक्य मल्लं थ:त म्हागसय् छक्क: देव धा:कथं शास्त्रोक्त विधिपूर्वक मिसातय्सं स्वये मज्जिक दयेकात:गु हिरायागु जन्त्रया शक्तिं श्री तलेजु माजुनाप पासा म्हितेगु व जुजुयात जगू समस्यायात कया: खँल्हाबल्हा जुइगु जुयाच्चन । तलेजु माजुं नं जुजुयात मा:गु सरसल्लाह बीगु जुयाच्चन । छम्ह जुजुया म्हायामयजु हिराया जन्त्र स्वया व्यगुलिं तलेजु भवानी वया: जुजुनापं पासा म्हित: वयेगु त्व:तगुलिं याना: राज्य सम्बन्धी खँल्हाबल्हा नं जुइ मखनं । थव हे खँया विलाप याना जगुलिं छन्हु म्हागसय् तलेजु भवानी जुजुयात राज्य दुने च्वपिं शाक्यया मचांम्ह म्हायाम् मचायात कुमारी स्थापना यानाबिल । अले व हे शाक्य मिसामचायाकें तलेजु भवानी दुबिना बी । धका: धा:गुलिं शाक्य जातया म्हायामचायात कुमारी याना: वयात हे तलेजु भवानी धका: माने यायेगु जुल । थौं तक्क नं यँया कुमारीयात तलेजु भवानीया प्रतीक धका: पूजा यायेगु व माने यायेगु परम्परा न्ह्यानाच्चंगु दनी । थथे शाक्य कूलया मचांम्ह म्हायाम् मचायात कुमारी याना: स्थापना यायेगु वयाके दुबिनाच्चंम्ह तलेजु भवानीनाप खँल्हाबल्हा यायेगु परम्परा यँया दकले लिपायाम्ह जुजु जयप्रकाश मल्ल समेत यानावल ।

यँया जुजु जयप्रकाश मल्लयात छन्हु म्हागसय् कुमारी छं जुजु जुइगु ई फुइन । यदि छं ताहाकय्क राज्य यायेगु इच्छा दुसा कुमारीया लागि न्ह्याबलें च्वनेगु छगू थाय्या व्यवस्था यानाब्यु धका: धा:गुलिं जयप्रकाश मल्ल थ:गु राजदरवार हनुमान ढोकाया नापसं ने.सं. ८७६ या फागुन महिनाय् जग तया: खुलाया दुने कुमारी च्वनिगु छँ तयार याना बिल । उगु छँया नां हे कुमारीछँ धका: जुल । कुमारीछँ दयेका: कुमारीयात विराजमान याकूगु दिं धयागु भाद्र शुल्क चौथी ख: । थौं तक्क नं थवकुन्हु गज बसाधं धका: दँय् छक्क: यायेमा: । (शाक्य, कुमारी रथ यात्रा पृ ४) जयप्रकाश मल्लं कुमारी छँ दयेका: कुमारी च्वनेगु स्थायी वसोवासया व्यवस्था या:गु जक मखु श्री कुमारी, श्री भैरव व श्री गणेशपिनिगु यँया:बलय् भाद्र शुक्ल चौथीकुन्हु व:नेया: धका: कुमारीछँ अथवा लाय्कू क्षेत्रया वय्याला:गु क्षेत्रय् रथ जात्रा यायेगु या:गु ख: । भाद्रशुक्ल पूर्णिमा कुन्हु अर्थात यँया: यायेगु पुन्हिकुन्हु कुमारीछँ वा लाय्कू क्षेत्रया च्वयेच्चंगु क्षेय् थ:ने या: धका: रथ साला: जात्रा याइगु ख: । थथे कुमारी स्थायीरूपं च्वनेगु छँ व श्री कुमारी, श्री भैरव व श्री गणेशया रथ जात्रा परम्परा न्ह्याकूसेलिं तलेजु भवानी दुबिना: च्वंम्ह कुमारी जयप्रकाश मल्लया राज्यकाल मेगु १२ ला तक्क बांलाक राज्य याइगु जुल धका: धाल धायेगु जनधारणा दु । थथे कुमारी माजुं धया बिज्या:गुलिं जयप्रकाश मल्लं कुमारी रथ यात्रा" जुइबलय् थ: नापनापं भाइ भारदारपिं श्री कुमारी, श्री भैरव व श्री गणेशया रथ यात्रा जुइगुलिइ उपस्थित जुया: रथयात्रायात भव्यता बीगु परम्परा न्ह्यात । ((दुर्गा शाक्यं कुमारी रथ यात्रा ह्युमत: टोल बत्ती बाल्ने नाउँको आधारमा रहन गएको हो । मधुपर्क वर्ष ३० अंक ८ र पृस २०५४ पृ ४९) ।

कुमारी सालीबलय्या रथ यात्राय् जुजु जयप्रकाश मल्लं न्ह्याकूगु परम्परा पृथ्वीनारायण शाहनं राज्य याये धुंका: जक मखु, राणा कालय् समेत थव परम्परा न्ह्याना वयाच्चंगु ख: । राणाकाल लिपा बिस्तार बिस्तारं सरकारी कर्मचारी व भाइभारदारपिं कुमारीया रथ यात्राय् ल्य ल्य वयेगु अनिवार्य मजुल । अथे जूसां इन्द्रजात्राया पर्यावाची शब्द कुमारीया रथ यात्राबलय् उपत्यका दुने श्री ५ या सरकारया अड्डा कार्यालय बिदा दु । थुकिया मतलब इन्द्रजात्राय् अर्थात कुमारी सालीबलय् उपस्थित जुइत ख: । श्री ५ या सरकारया कर्मचारी उपस्थित जुया: रथ नापनापं चा: हिलेगु मजूसं नं श्री ५ महाराजाधिराज व प्रधानमन्त्री गद्दी बैठकय् उपस्थित जुया: श्री कुमारी, श्री गणेश व श्री भैरवया रथ दर्शन याना: दक्षिणा छायेगु चलन थौं तक्क नं न्ह्यानाच्चंगु दनि, नापं यँया: ज्व:छि पिदनीगु लाखे प्याखं, सव:भक्कु प्याखं व तानाकिसि प्याखंघात नं दक्षिणा बीगु यानाच्चंगु दु । जुजु उपस्थित जुइगु परम्परा जुजु जयस्थिति मल्लं निसें न्ह्याकाह:गु परम्परा थौं तक्क नं न्ह्याना हे च्वनातिनि । श्री ५ या सरकारया

कर्मचारी उपस्थित जुड़म्बा:सां गद्दी बैठकय् थी थी राष्ट्रया राजदूत व जुजु नापं उपस्थित जुड़गु दु ।

श्री कुमारीयात नेपा:गा:या रक्षक धका: भा:पिया त:गु दु । उकिं देंय् छक्व: कुमारी रथय् च्वना: नेपा:देया थाय् थासय्या स्थिति या निरक्षण या: बिज्या:गु ख: । थथे थ:नेया:गु धका: छन्हु थ:नेया: नेपा:या क्षेत्र व छन्हु क्व:नेया: धका: नेपा: हे दुनेया क्षेत्रयात निरक्षण या ना बिज्याना: धका: नेपा: हे दुनेया क्षेत्रयात निरक्षण या ना बिज्याना: नानिचा या:बलय् अर्थात् यँया:या दकले लिपायागु दिनय् श्री कुमारी, श्री गणेश व श्री भैरवया पाखें सिन्ह: फया: राज्य रक्षाया कामना याइगु ख: । राज्य यायेगु ईयात नवीनकरण याइगु ख:, धाइगु सांस्कृतिक मान्यता ख: । श्री कुमारी राज्यया रक्षक जुड़गुलिं या ना: हे न्हूम्ह जुजु जुया: न्हूगु दां पिकाल धायेवं दकले न्हापां श्री कुमारीयात छायेगु याइगु ख: ।

कुमारी सालेगुया लागि भाद्र शुक्ल एकादशीकुन्हु कुमारी, गणेश व भैरवया छावा:या इन्द्रजात्रा (यँया:या लागि पञ्चबुद्धया मुख्यम्ह गुरुजुं श्री कुमारीयात बौद्ध परम्परा कथं सगं बिया: श्रृंगारया सामान व वस: बिया: पूजा या ना: निमन्त्रणा बीगु ज्या जुड़ । अथेतुं पञ्चबुद्धया मेपिं गुरुजुपिसं श्री गणेश व श्री भैरवया वासस्थानय् वना: हे पूजा या ना: निमन्त्रणा बीगु जुड़ थथे निमन्त्रणा बी धुंका: थनेया: क्व:नेया: धका: रथ सालेगु जुड़ ।

क्व:ने या:

भाद्र शुक्ल चतुर्दशीकुन्हु लाय्क्या क्व:ने च्वंगु त्वा: त्वालय् श्री कुमारी, श्री गणेश व श्री भैरवया रथ साला: जात्रा यायेगु याइ । थ्वकुन्हु कुमारीयागु आगं क्वथाय् पञ्चबुद्ध जुड़पिं गुरुजुपिपाखें अति गोप्य पूजा यायेगु याइ । थ्व पूजा सिधल धायेवं श्री भैरव व श्री गणेशयात थ:थ:पिनिगु छँ कुमारी छँ हयेगु याइ । कुमारीया रथ सालेगुया लागि श्री कुमारी माजुयात बासा लाना: न्यासिका: कुमारी छँया नापसं च्वंगु सिकंम्ह बाहा:पाखें पित हया: रथय् तयेगु याइ । रथय् बिराजमान याके धुंका: गुरुजुपाखें बलिपूजा या ना: कुमारी रथया घ:मालय् नेपा: फैंचा बलि बीगु याइ । रथ लुइबलय् गनं मनू वा पशु क्यला: हिंसा मजुइमा धका: न्हापा हे बलि बिया: जनता दुर्घटनाय् लाना: घा:पा: मजुइमा धका: ख: । अथे तुं श्री भैरव व श्री गणेशया रथय् नं छम्ह छम्ह बलि बीगु याइ । थुलि धुंका: जुजुं पूजाया प्रसाद कया: दक्षिणा छाना: रथ सालेगु सुरु याइ ।

थथे कुमारीया रथ सालीबलय् सैनिक बाजं, प्रहरीतय्गु बाजं गुरुजुया पल्टन, पञ्चबाजा नापं श्री गणेशया रथ अनं श्री भैरवया रथ थ्व धुंका:

पञ्चबुद्ध न्त्य: न्त्य: तया: श्री कुमारीया रथ सालेगु जुड़ । थथे पञ्चबुद्ध न्त्य:ने तया कुमारीया रथ वयेगु धयागु महान् विद्वानपिं ज्ञानीपिं न्याम्ह व्यक्तित्वपिं तया: नगरया निरक्षण यायेगु ख: । कुमारीया रथ धुंका: दकले लिपा शार्दूलजङ्गया पल्टन व बाजं वयेगु जुड़ । क्व:नेया:बलय् बसन्तपुरं सुरु जुया:, मरु, चिकंम्ह, लगं ब्रम्हत्वा: ह्यूमत:, क्वहिति भिद्य: मरु जुया: बसन्तपुर वया: क्वचाइ । थथे रथं साला है च्वनीबलय् ल्हूध: न्त्य:ने च्वंगु दबुलिइ दी प्याखं हुइका । कुमारी न्त्य:ने थ्यंगु इलय् दी प्याखनय् च्वंम्ह कुमारी दैत्ययात वध याइगु दृष्य प्रस्तुत जुड़गु परम्परा दु । थुकिया अर्थ असत्य मभिपिन्त अन्याना: कुमारी रक्षा या नाच्वंगु धयागु क्यंगु ख: । अथे तुं थासय् दुगु हाथुद्य:यात हाथु हायेका: समयबजि व्हेलेगु इनेगु व कुमारी, गणेश व भैरवयात समय छायेगु नं जुड़ ।

दागिं

भाद्रशुक्ल चतुर्दशीकुन्हु श्री कुमारी छ:, भैरव छ: व गणेश छ: जुयाच्वपिं मिसा मचा व मिजंमचात दुगु रथ साला क्व:नेया: सिधल धायेवं ग:क्या ताम्राकार जातिं ज्यापु छम्हसित तयुगु वस: पुंका: तयुगु हे छावा:पा: पुइका: दागिं धका: दलखुफल्चां पिकायेगु याइ । दागिं पिकाये धुंका: कुमारीया रथ गन गन सालीगु ख: अन अन दागिं चा:हिलेगु याइ । थथे दागिं चा:हिलीबलय् कुमारीया रथ सालीगु क्व:ने या:या इलाका नापनापं थने या: इलाका नं चा:हिलेगु याइ । दागिं जूम्ह नापनापं नेवा:तय् विशेष या ना: यँ देशय् च्वपिं दछिया दुने स्वर्गे जूपिनि परिवारया ज:पिं दागिं ल्यूल्यु वा जाकि दुगु सतबिज लँ दुच्छि व्हेलाच्वनी थथे क्व:ने दक्व दागिं चा:हीके धुन धायेवं हानं लखुफल्चाय् हे हया: दागियात मिसापिं नकिंतय्सं लसकुस या ना: दुकायेगु याइ । दागिंनापं सतबिज व्हेलाच्वपिं फुक्क मरुहितिइ वना: पूर्व स्वयाच्वंगु हितिइ छावा: सिला: छँ छँ वनी । गुम्हं गुम्हं दागिं नापं सतबिज व्हेले धुन धायेवं थानकोतया यकिंदहलय् वना: छावा:सिला: छँ छँ वया: पालं याइ ।

थथे दागिं नापनापं स्वर्गे जूपिनि परिवारया ज:पिं ल्यूल्यु वनीगु धयागु दागिं धयाम्ह इन्द्रया मां ख: । इन्द्रया मांया वसुन्धराया गातिलाया वसुन्धराय् अबुसं च्वनेत नेपा:गा: दुने जक दुगु पालिजा: स्वां मा:गुलिं इन्द्रयात कायेकेह:गु तर यँ देशय् च्वपिसं इन्द्रयात पालिजा: स्वां खूव:म्ह खू धका: ज्वना: मू लँपुइ चिना: जात्रा या नात:गुलिं इन्द्रया मां दागिया भेषय् यँदेय् चा:हिला: काय्

मा:व:गु ख: । काय्मह चिनात:गु खना: येंदेश्य च्वपिं मन्तयत वा पाके यायेत
मा:गु खसु फछि व पु फछि बिया: काय्यात लितब्बना यंकल धयागु पुलांगु
जनस्तुति दु । अथे जूगुलिं यैया: धुका: खसु वया: वा सया: चिकुया वइगु ख:
धयागु जन विश्वास दु । येंदेश्य च्वपिन्त उलि बिया: दागिं याकिदह वना: अन
म्ब: ल्हुया: स्वर्ग्य थाहां वनीगु जूगुलिं वनापं स्वर्ग वनेमा: धका: थ:थ: तँय्या
छँज:पिं नापं दागिं वनीगु ख: । दागिंनं यंकी दहल्य वना: म्ब: ल्हुइगु जूगुलिं दागिं
नापं वनीपिं नं यंकिदहल्य वना: म्ब: ल्ह वनीगु ख: । यंकिदह तक्क वने मफुपिं
यंकिदहया ल: वयाच्वंगु धका: धाइगु मरुहितिया पूर्व स्वया: हायाच्वंगु ल्हं हितिइ
म्ब: ल्हुया: वा ख्वा: सिला: थ:थ:गु छँ वनेगु याइ । दागिं नाप वनीपिं मन्तय
दागिंनाप चा:हिले सिधयेका: तिनि नयेगु याइगु ख: ।

दागिं पिदने सिधल धायेवं भुतिसलं साय्मि जातिपिसं व्छालिया
ताहा दयेका ताहा:या म्ह जायेक पाल्चा तया बौमत धका: हयेगु याइ । थथे दागिं
हयेधुंका: बौमत हयेगु खँयात कया: भाजु पुप्रयरत्न वज्राचार्य या धापू थुकथं
खनेदु ।

परापूर्वकालय् छक्क: खिमिलाया चाबलय् श्री इन्द्रं थ: मांया नितिं
वसुन्धरा व्रत च्वनेत (बौद्ध धर्मावलम्बीत वाहेक मेमेपिनिगु धापू कथं चथा:या
अपसं च्वनेत) पालिजा:स्वां व फकं खुइत थव मर्त्यलोकय् वल तर मन्तयसं खंका:
दसि प्रमाण नापं ज्वना: इन्द्रयात प्यपुंक खिपतं चिना: इन्द्रयागु जात्रा यायेगु धका:
यैया:बलय् फुक्कसिनं खंक तयातल । थव खँ इन्द्रया मामं सिइका: थव मर्त्यलोकय्
वया: मन्तयत् व्छ व वा पाके यायेत ज्याया ल्याख्य ग्य:गु वस्तु खसु प:छि व पु
प:छि बं पुला: मेगु रुप कया: श्री इन्द्रयात त्व:तका यंकल । तर स्वर्ग व:म्ह इन्द्रया
मांनापं थव मर्त्यलोकयापिं मन्त नं थ:थ: सीधुंकूपिं मन्त नापला: वने धका: वयागु
हे जँ ज्वना वन । लिहां वबलय् लँ मट्टयेक वये फयेमा धका: सतबीज व्ह व्ह वन ।
इन्द्रया मां यंकीदहंस म्ब: ल्हुया: स्वर्गपाखे वन । मन्त जुक्क दथुइ त्व:फिना स्वर्ग्य
वने मफुत । उकिं नागया म्हय तयात:गु मतया प्रमाण कथं ताहा:क:गु पंथय्
तयात:गु मतया ज: विया: कुतु व:पिं मन्त माला छँ व्वना हल । (वज्राचार्य, १११०,
८४ पृ ३१) यैया क्व:नेया:कुन्हु कुमारीमाजु, श्री गणेश व श्री भैरवयात रथय् तये
धुनेवं तुलाधर, मानन्धर व धोबि जातयापिनि स्वर्गं जूपिनिगु नामय् कुमारी
चा:हिकीगु थासय् पाल्चा तयेगु याइ । विशेष याना: उराय् जातितय् पाल्चा तयेगु
द्य: छुंका जुइ मतत:व:पिं नाप छम्हसित विशेष रुपं छाया:पा: व्वया हयेगु चलन
दु । थव नं छगूकथं कुमारीया हे जात्रा ख: ।

यैया:पुन्हि

भाद्र शुक्ल पूर्णिमाकुन्हु “यैया: पुन्हि” कथं हनेगु परम्परा दु ।
थवकुन्हु कुमारी माजु, भैरव व गणेशया रथ थ:ने या: धका: वसन्तपुरं रथ
साला: यतखा, नरदेवी न्ह्य:खा:, थायमदु न्हायकं त्वा:, असं बालकुमारी वंग:,
हनुमानढोका जुका: बसन्तपुर थयंका: साला हैगु ख: । थुबलय् छँ छँ समय् ज्वलं
दयेका: इन्द्रद्य:यात नापंनापं द्य:द्य:पिन्त समय् छायेगु याइ । यैया: न्हापांगु दिं
भाद्रशुक्ल द्वादशी कुन्हु नेवा:तय् थ:थ:गु छँ झ्यालं पिने स्वर्गं जूपिं पुर्खापिनिगु
नामय् दलू पितव्वयेगु याइ । दलू पित व्वसानिसं बहनी न्हिन्हिं मत तयेगु याइसा
यैया:पुन्हिकुन्हु दलू पूजा याना: समय्बजि छायेगु याइ । त्वा: त्वाल्य् समय्बजि
इना: समय् नयेगु याइ । कुमारी माजुया रथ सालीगु थाय् थासय् रथ यात्रा
जुयाच्वनीबलय् हाथुनापं हाथु हायेकेगु व समय् इना: बीगु याइ । थुबलय् आजु
द्य:या थाय् समय् वँ तया: कुमारीपिनिगु रथ थ्यन धायेवं समय् द्रँय् च्वंगु समय्
द्य:यात छाना: दर्शकपिन्त इनेगु नं याइ ।

थुबलय् किलागलं पिकाइगु दि प्याखं छुं ई मदुया दबुलिइ
कुमारी माजुपिनिगु रथ थ्यनीगु इलय् तक्क प्याखं ल्हुइकेगु जूसा थाय्मदु रथ
सालायंकेगु सिधल धायेवं वहे दि प्याखं वंगलय् हया: प्याखं हुइकीगु याइ । क्व:ने
या:बलय् गुलि बाजं दुगु ख: उलि हे तं बाजं खल:त उपस्थित जुया जात्रा न्ह्याकेगु
जुइ ।

यैया:बलय् समय् बजि नयेगु व इनेगु याइगुलिइ विशेष याना: थव
इलय् खनेदुगु कृषी उत्पादनया तरकारी फलफूल तया: समय्बजि नयेगु याइगु
ख: । थव यामय् विशेष याना: यैया नसाया उत्पादन धयागु ।

भ्वाथ: छँ तुकं चुलिपालु आलु, आमसि, पासि, केरा आदि ख: ।
उकिं समय् बजिनं स्या बजि नापं हाकु व्छय्ला वा मनाव्छय्ला तया: तुकं आलु
भुति चुलिपालु म्वा:का:छे या नापंनापं फलफूलय् आमा:सि, केरा तुसि पासि आदि
फलफूल तया: व थ्वं तया समय् बजिनं नं नयेगु याइ । थुबलय् हनुमान ध्वाकाय्
च्वंगु लँया ख्वा:पा दुगु हाथुद्य:यात कुमारी माजुपिनि रथ हनुमान ध्वाकाय् थ्यन
धायेवं हाथु हायेकेगु याइ ।

गातिला

यंला कृष्ण तृतीया कुन्हु गातिला: धका: बसुन्धरा देवीया नामय अपसं च्वनेगु याइ । श्वकुन्हु विशेष याना: बसुन्धरा द्य:यात पूजा याइगु ख: । बसुन्धरा पूजा याइबलय् पूजा याइगु अक्षता स्वां मरि नाप नाप पूजा याइम्हसिनं समेत म्हासुगु वस: पुना: पूजा याइगु चलन नं दु । इन्द्रया मामंनिसं श्व दिनय् बसुन्धराया नामय् पूजा व्रत याइगु ख: । विशेष याना: छैय् धन धान्य सम्पूर्ण जुइमा धका: श्व पूजा याइगु ख: ।

नानिचा या

यैया:या दकले लिपाया दिनय् कुमारी माजुया रथ यात्रा नानिचा या: धका: बसन्तपुरं रथ सालायंका यतखा, नरदेवी, किलाग: वंग:, हनुमान ध्वाखा जुका: बसन्तपुरय् लित हयेगु याइ । श्व विशेष याना: किलागलय् च्वपिं जनतातयगुया लागि जुइगु जात्रा ख: । जनधारणां कथं जंगबहादुरया किलागलय् छम्ह नानि दु । उकिं उम्ह नानियात क्यनेत जूगु जात्रा जूगुलिं श्व जात्रायात नानिचा या: धका: धायेगु नं या: । थुबलय् नं रथ वंगलं हनुमान ध्वाखाय् थ्यन धायेवं आजु द्य:व हनुमान ध्वाखाया हाथु द्यवं हाथु हायेकेगु याइ । नापं समय इनेगु याइ । श्री गणेश, श्री भैरव व श्री कुमारी माजुया रथ बसन्तपुरय् थ्यंका: स्वम्हं द्य:पिन्त कुमारी छैय् दुत यंका: आगमय् आसनय् तयेगु याइ । द्य:पिं कुमारी छै थ्यन धायेवं श्री ५ महाराजाधिराज वना: श्री कुमारी माजु, श्री भैरव व श्री गणेश पाखें प्रसाद ग्रहण याना: दक्षिणा छाना बिज्याइ । थये कुमारी माजुपिं दर्शन यायेगु धयागु देश भ्रमण याना: बिज्या:म्ह कुमारी माजुं श्री ५ महाराजाधिराजयात देशया स्थितिया बोध याना: हानं राज्य यायेगु अधिकारया नवीनकरण याना: बिज्या:गु ख: ।

नानिचा या: सिधयेका: जुजुं कुमारी माजु, श्री गणेश व श्री भैरवपाखें प्रसाद ग्रहण काये सिधल धायेवं साइत स्वया: हनुमान ध्वाखाय् थनात:गु य:सिं विधिगत रुपं क्व:थयेगु याइ । नापं थाय्थासय् ब्वयात:गु इन्द्रय: दलू हाथुद्य: थी थी प्याखं नं दुकायेगु याइ ।

हाथुद्य:

य:सिं थंसांनिसं अर्थात भाद्रशुक्ल द्वादशीकुन्हुनिसं यैया थाय् थासय त्वा: त्वालय् हाथु द्य: धका: छयं जक दुपिं भैरव द्य:पिं ब्वयेगु याइ । वंशावली कथं शाक्य संवत् १७१६ स स्थापना याना: त:म्ह धका: धयात:म्ह अर्थात हनुमान ध्वाखाया लायकु छैया लुंयाम्ह छयं जक दुम्ह भैरव नं ब्वयेगु याइ । उकुन्हु निसं वंगलय् च्वंम्ह आकाश भैरव आजु द्य: नामं प्रख्यातम्ह, द्वापर युगया नेपालय् राज्य यानाच्चम्ह किराती जुजु यलम्बरया छयं धका: धयात:म्ह भैरवया छयं जक दुगु मूर्ति नं सुपौ चिना: दयेका: ख: पूजा याना: तयेगु याइ ।

यैया:या प्याखं पिथना

यैया बलय इन्द्रयात प्यपुंक चिना: जात्रा जक याइगु मखु । यैं च्वपिं वासिन्दातय् न्त्याइपुक उत्सव हने कथं थी थी प्याखं नं पिदना प्रदर्शित याइगु जात्रा ख: । अथें तुं दबू प्याखं पिदना त्वा: त्वालय् वा थाय् थासय् दबू ग्वया: दबू प्याखं क्यनीगु उत्सव नं यैया: इलय ख: । भारतया नाटयशास्त्र कथंनं भारत नाटयशास्त्र च्वये सिधयेका दकले न्हापां प्याखं प्रदर्शित या:गु नं इन्द्रध्वजारोहणया लसताय् हे ख: । य:सिं थनीगु धयागु हे इन्द्रया ध्वाय् ब्वयेकगु धायेगु नं या: । उकिं येया:या प्याखं प्रदर्शित यायेगु परम्परा भरतमुनिया भारत नाटय नं गुलि पुलां उलि हे पुलांगु ख: ।

यैया:या थीथी पक्षत मध्यय् छगू पक्ष धयागु न्त्याइपुक मनोरञ्जन यायेगु उत्सव नं ख: । यैया:बलय् पिदनीगु प्याखंयात भीसं धार्मिकया नापनापं मनोरञ्जनात्मक पक्ष धका: नं धायेफु । यैया:बलय् प्याखं पिदनीगु मध्यय् परम्परागत कथं पिदनीगु प्याखं थये ख: ।

मजिपा:या लाखे प्याखं

हल्चोया सवभकु प्याखं

किलाग:या तानाकिसि प्याखं

किलाग:या देवी द्य: प्याखं

ख्वपया महाकाली प्याखं

लाय्कूया दशअवतार प्याखं आदि

मजिपा:लाखे प्याखं

भाषावंशावली कथं मजिपा:लाखे प्याखंया परम्परा ठकुरी वंशया गुणकामद देवया पालयनिसें वःगु खः धयागु सी दु (अधिकाःरी, २०३१, २९) । तर गुम्ह गुम्हसिनं मजिपा: लाखेयात इस्वी भिछगू शताद्वीनिसें वःगु खः धाइपिं दुसा गुम्हसिनं हरिसिंहदेवं तलेजु भवानी हःबलय् नापं हःगु खः धाइपिं नं दु । मजिपा:लाखेया नां मजिपा: धयागु त्वा:या नामं मजिपा: लाखें धकाः जूगु खः । मजिपा: धयागु मनूत च्वनीगु छगू त्वा:या नां खः । मनूत बस्ति दुगु त्वाल्य् लाखे गुकथं थ्यन वयागु छगू जनश्रुति दु ।

न्हापा न्हापा मजिपातय् ज्यापु परिवार छगू दु । उगु ज्यापु परिवारया म्हाय् छम्ह दु । ज्यापुतय् न्हिछिं बूँ ज्या याः वनीगु स्वाभाविक खः । गुबलें गुबलें ज्यापुया म्हाय्मचा याकःचा नं बूँज्या याः वनीगु जुयाच्चन । थये ज्यापुया म्हाय्मचा याकःचा बूँज्या याः वनीबलय् लाखे छम्ह ज्यापुया भेष्य वयाः ग्वाहालि याःवइगु जुयाच्चन । ज्यापु भेषया लाखे व ज्यापुया म्हाय्मचाया दथुइ यःत्यः जुयावन । लिपा जुजुं चान्ह्य् चान्ह्य् ज्यापुया म्हाय्मचाया थाय् वयाः नं छं वइगु जुयाच्चन । बिस्तार बिस्तारं लाखे नं उगु त्वा:या मचात ज्वनाः स्यानाः नयेगु यानाःहल । थ्व खँ त्वा:यापिं मनूतय्सं सीकल । ज्यापुया म्हाय्मचायाथाय् लाखे वयाः छं वइगु जक मखु, त्वा:यापिं मचात नं स्यानाः नैगु धकाः अबुम्ह ज्यापुयात धाः वर्न । छन्हु स्वःवंबलय धाथें लाखे हे थः म्हाय् नाप छँनाच्चंगु खंकल । लाखेयात ज्यापुं ब्वःबिल । 'ज्यापुया म्हाय्मचायात लाखेनं त्वते मफुगु बरु ज्यापुं धाःथे यानाः अन हे च्वने न्ह्यागु धाःसां खं न्यने धकाः धाःगुलिं अन हे तयेगु जुल । अथे जूसेलिं त्वा:यापिं मनूत मुनाः यदि लाखेनं ज्यापुया म्हाय्मचा मत्वतुसे अन हे च्वनेगु खःसा त्वा:या रेखदेख यायेमाः, मचात स्यानाः नये मदु, अन त्वाल्य् महामारी वयेके बी मखु धयागु खःसा तयेगु, मखुसा तयेमखु धकाः धाःसे लि त्वा:यापिंनिगु खँ न्यनाः त्वा:या रक्षा यानाःच्वने धकाः धाःसेलिं मजिपाः त्वाल्य हे च्वनेगु यात । थुकथं बूँइ च्वंम्ह लाखे मनू च्वनीगु त्वाल्य लात । मजिपाः त्वा:यात लाखे नं रक्षा यानाःतःगुलिं ज्यापुतय्सं दैय्दंस यँयाःबलय् लाखेयात पितयंकाः देश चाःहिकेगु जुल । न्हापा न्हापा ज्यापुतय्सं हुइकीगु लाखे प्याखं लिपा मजिपातय् हे च्वपिं रञ्जितकारपिसं हुइकीगु जुल । थौतक नं मजिपाः लाखे पिदनीबलय् लाखे जूम्ह मनूयात वसः पुंका छ्वाःपाः पुइकीबलय् पूजा यानाः लाखेया शक्ति थनीगु ज्या ज्यापु जातिं हे यानाः वयाच्चंगु दनी ।

यँया दकले लिपायाम्ह मल्ल जुजु जयप्रकाश मल्लं येयाःबलय् कुमारी गणेश भैरवया रथ सालेगु परम्परा न्ह्याकावंगु खः । व हे रथ जात्राय मजिपाः लाखे दकले न्हापा न्ह्यः न्ह्यः वनाः रथयात लँ क्यं वनेगु परम्परा नं उगु इलय् दुगु खः । थौकन्ह्य् थ्व परम्परा तनावने धुंकूगु खनेदु ।

सवःभकु प्याखं

यँयाःबलय् पिदनीगु प्याखं मध्यय् सवःभकुया छगू प्याखं नं खः । थ्व प्याखं पिदंगुया बारे वंशावलीइ थुकथं उल्लेख यानाःतःगु दु । कलिगताब्द ३८२२ स उबलय्या नेपाःयाम्ह जुजु गुणकामदेवं थःत श्री महालक्ष्मी म्हासय् आज्ञा जूकथं बंगलय् कान्तिश्वर महाद्यः स्थापना यानाः न्हापा वंगः तक जक जुयाच्चंगु यँदैय् तःधंकाः कान्तिपुर धकाः नां छुइ धुनेवं कान्तिपुरयात थाय्थासय् रक्षा यायेत देवदेवीपिं स्थापना यानाःबिल । हलच्चय् १२ म्हा गण दुम्ह भैरवयात स्थापना यात । वयांलिपा जुजु अमर मल्लं व हे हलच्चया भैरवया प्याखं दयेकेगु यात । उकिइ मध्यय् यँयाः पतिकं च्यान्हुतक सवःभकु निम्हगण नापं आकाश रंगयाम्ह भैरवया प्याखं हुइकेगु यात । भिनिदैय् छक्कः फूक्क गण नापं भैरवया प्याखं हुइकेगु थिति दयेकेगु जुल । उकिं यँयाःबलय् प्याखं पिदनीगु मध्यय् सवः छम्ह भकु छम्ह व भैरव छम्ह दैगु सवःभकुया प्याखं हल्चोया दुँइतय्सं पिथनीगु याःगु खः । सवभकु प्याखंयात भिनिदैय् छक्कः हनुमानध्वाखाय् वा लाय्कुलिइ मेय् बीगु धकाः म्वाःम्ह मेय् बियाः सवःभकु भैरवपिं स्वम्ह च्वनाः म्वाःम्ह मेय्यात स्यानाः थःपिन्त काइ । सवःभकु यात मेय् बीगु इलय् हनुमान ध्वाखाय् तःधंगु जात्रा थें मनूत मुनाः स्वइ । सवःभकुयात भोगबीम्ह मेय्यात फछिंफतले हारांयानाः तयेगु चलन दु । सवःभकुया द्यःपिन्त लँय् लँय् भक्तजनपिसं पूजा नं यायेगु चलन दु ।

किलागःया द्यःप्याखं

यँयाः बलय् किलागलं मेगु तानाकिसिया प्याखं पिदनीगु चलन दु । न्हापांगु भैरवया रथ यात्राबलय् क्वःने याःबलय् कुमारी साला हुइबलय् जैसी देगःया न्ह्यः किलागःया द्यःप्याखं मेगु तानाकिसिया प्याखं खः । किलागःया द्यःप्याखं न्याद्वःत्या दँ पुलां धायेगु चलन दु । किलागःया द्यः प्याखं यःसिं थनीबलय् लाय्कुलिइ हइ ।

नापनापं यैया: ज्वःछि हनुमानध्वाखाय हाजीर याये हयेमा:सा कुमारी, गणेश, ने अर्थात ल्ह घ:या दबुलिइ प्याखं हुइकेगु याइ । कुमारी, गणेश व भैरवया रथ थ:ने या: जुइबल्य् रथ थाय्मरुपाखे सालाहइबल्य् थाय्मरुया दबुलिइ हुकेगु या:सा कुमारीया रथ बंग:पाखें सालाहइगु इलय् बंगलय् प्याखं हुइकेगु याइ । नानिचा या:बल्य् रथ किलागलय् सालिगु जूगुलिं किलाग:या दबुलिइ हे छ: प्याखं ल्हइकेगु याइ । यैया था मेगु इलय् न्हिन्हिं छ: प्याखं पिथना: हनुमान ध्वाखाय् प्याखं हुइके यंकेमा: ।

किलागलं पिदनीगु मेगु प्याखं तानाकिसिया ख: । तानाकिसि व मजिपा:या बारे तयात:गु अभिलेख कथं तानकिसि व मजिपा: लाखेयागु प्याखं नापनापं हे पिदंगु जुइमा: । किसिया त:पा:गु ख्वा: किसिया म्ह्य तया: उकिइ दुने मनू च्वना: चिलाख च्याका: बाजंया धुन्य् प्याखं ल्हइम्ह तानाकिसि स्वर्ग्य च्वम्ह इन्द्रया एरावत किसि नं धायेगु या: । इन्द्रया मांया अवसं च्वनेत यें वया: पालिजा: स्वां का:वम्ह इन्द्र इलय् हे लित मथ्यनेवं इन्द्रया मामं इन्द्रयात मायेकेत यें व्छ्याह:म्ह ख: । एरावत किसि येंय् वया: इन्द्रयात उखे थुखे मालेत व:गु ख: । धयागु धापू नं दु ।

लायकूया दशावतार प्याखं

यैया:बल्य् पिदनीगु प्याखं मध्यय् हनुमानध्वाखाया लायकू छैया न्ह्य:ने च्वंगु देगलय् अर्थात कुमारी छैया क्वसं च्वंगु देगलय् यैया: ज्वःछि न्हिं न्हिं दशावतार प्याखं क्यनेगु चलन दु । विष्णु भगवानया १० गू अवतार का:गु गथेकि मत्स्य कक्ष, वराह वामन, आदिया अवतार क्यनेगु चलन नं दु । यैया:बल्य् यें नं पिदनीगु प्याखं मध्यय् ज्याथाय् च्वपिं कुमा:तय्सं पिथनीगु प्याखं मध्यय् सुरासुर प्याखं व त्रिपुराश्वर प्याखं ख: । ख्वपया त्रिपुरासुन्दरीया प्याखं नें.सं. ३६३य् पिदंगु ख:सा दैयदेसं हुइकेगु प्रचलन लिपा ख्वपया सुवर्ण मल्लं यात । श्व हे प्याखं यैया:बल्य् ज्याथाया कुम्हा: तय्सं हुइकेगु याना:च्वंगु ख: । त्रिपुरासुन्दरीया प्याखं नं न्हापा ख्वपय् च्वपिसं हे ल्हइकीगु जुइमा: । लिपा वना: ज्याथाया कुमा:तय्सं ल्हइकीगु जुइमा: । ख्वपया प्याखं येंय् च्वपिसं गथे याना: ल्हइकल जुइ धयागु खं न्हापा न्हापा यैया:बल्य् प्याखं क्यनेत ख्वपं येंय् वया यैया: ज्वःछि त्वा: त्वालय् बासं कया: च्वनीगु ख: । अथें तु त्रिपुरासुन्दरीया प्याखं व सुरासुरया प्याखं हुइकीपिं कलाकारपिं यैया ज्याथाया कुमा: तयगु छैय् बासं च्वनीगु जुइमा । लिपा प्याखं पिदनीपिं ख्वप:या कलाकारपिं मव:से लि ज्याथाका कुमा:तय्सं पिदनेगु यात जुइमा: । तर थौकन्ह्य् श्व निगुलिं प्याखं यैया:बल्य् पिमदनेगु याये धुंकागु दु ।

ख्वपं पिदनीगु प्याखं

येंय् यैया: जुइबल्य् यें च्वपिसं जक प्याखं पिथना मनोरञ्जन याना: उत्सव माने याइगुमखु । ख्वपया थी थी थासं महाकाली प्याखं व रामचन्द्रया प्याखं वा हनुमान प्याखं पिथना येंय् हया: क्यने हयेगु चलन दु । न्हापा न्हापा यें व ख्वपय् बसया सेवा मदुनिबल्य् यैया: ज्वःछि ख्वपया थी थी प्याखंया प्याखंम्ब:त यैया थी थी त्वा:बाहा: बर्हिलइ यैया: ज्वःछि बालं कया: हनुमानध्वाखा व कुमार, गणेश, भैरवया छें क्वय् प्याखं ब हुइके यंकीगु जक मखु । सर्वसाधारण जनतां स:ता: ध्यबा व किपु बिया प्याखं हुइकेगु नं या: । यैया:या य:सिं क्व:थले धुंकल धायेवं थुपिं नं ख्वपय् लिहां वनेगु याइ । ख्वपया प्याखं विशेष याना: महाकाली प्याखं व रामचन्द्र वा हनुमानया प्याखं ख: । महाकाली प्याखं छगू हे जूसां यैया: बल्य् ख्वपया थी थी थासं अलग अलग महाकाली प्याखं पिथना: हुइकेगु चलन दु । यैया:बल्य् ख्वपया थी थी थासं पिदनीगु महाकाली प्याखं क्वय् बियातयागु थाय् थासं पिदनेगु या: ।

महाकाली प्याखं

"

"

"

"

"

"

"

"

"

"

"

"

"

"

"

"

"

"

"

"

"

ख्वपया त्वा:या नां

तल्मरि, ख्वप

सुकुल ध्वाका

लासुकूध्वाका

खौमा

वाचामरि

भोतेवहाल

लालाछै ख्वप आदि

महाकाली प्याखं छगू हे जूसां प्रत्येक महाकाली प्याखं दुने च्वपि पात्रत व छ:छ:पिनि थ:गु हे विशेषता दु ।

महाकाली प्याखं यैया:बल्य् पिदने मा:गुया कारण दैत्यत व इन्द्रया ल्वापु याकूम्ह इन्द्रयात दैत्यतय्सं त्याकी । छम्हसित आपालं जाना: बुकीगु अस्वाभाविक मखु , पराजीत इन्द्र महाकाली,, महालक्ष्मी, कुमारीया आराधना याना: अमित दैत्यतनाप ल्वाके व्छइ । दैत्यतय्त देवीपिसं बुकाबी । श्व हे त्या:गुया उत्सवय् हनेगु ल्याखं यैया पुन्हिकुन्ह च्यान्ह तक महालक्ष्मी महाकालीया प्याखं पिदनीगु ख: धयागु लोकक्ति दु ।

रामचन्द्र वा हनुमान प्याखं धकाः ख्वपया प्रख्यातगु लुसि ल्वाकेगु प्याखं नाप ज्वःलाःगु प्याखं खः । लुसि ल्वाकिगु प्याखनय् कलाकारतय्सं लुसि ल्वाकुल्वाकुं प्याखं हुयेगु याइ तर रामचन्द्रया प्याखनय् बःचा बःचाधिकःपिं मचातय्सं कथि ल्वाकाः हुइगु प्याखं खः । रामचन्द्रया श्व कथि ल्वाकिगु प्याखंयात हनुमान प्याखं धकाः नं धायेगु याः ।

यँयाःबलय् थथे पिदनीगु प्याखंयात श्री ५ या सरकारं आर्थिक सहयोगया रूप्य् छुं दां नं बीगु यानातःगु दु । श्री ५ या सरकारया सहयोग दुसां तबि प्याखं पिदनाः च्यान्हु यंके हुइकेगुया लागि ग्वाहालि गाः मजू । श्री ५ या सरकारनाप बांलाःगु सम्बन्ध तयेफुपिन्त आर्थिक सहयोग अप्पोयेका बीगु व सम्बन्ध क्वातुक तयेमफुत धाःसा अमित म्हो जक नं आर्थिक सहयोग यायेगु जुयाच्चंगु दु ।

सोन्ह सराद

यंला शुक्ल पुन्हि (यँयाः पुन्हि निसैं यंलागाः औंसि तक्क भिंखुन्हुया दिया दुने यायेगु सरादयात सोन्ह सराद धकाः धायेगु चलन दु । मृत्यु लिपा आत्मायात विश्वास याइपिनिगु बिचाः कथं सराद धयागु मदयेधुंकूपिनिगु आत्मायात पूजायानाः नकेगु खः । उकिं सराद याइबलय् मदये धुंकूम्हसिगु नामय् पिण्ड ग्वारा दयेकाः उकियात स्वां, सिन्हः जाकिं पूजा यानाः, सुचिनिचि यानाः दयेकातःगु घासा दुगु भव्य तर्क छायेगु याः । थथे यानाः सराद यात धायेवं मृत्यु जुइधुंकूपिनिगु आत्मा वयाः नःवइ धयागु परंपरागत धारणा दु । सराद यायेगुयात प्यंथयेगु धकाः नं धाः ।

दिवंगत जूम्ह मनूया सराद यायेगु धकाः दकले न्हापां सीम्हयात सिथं यंकाः मसानय् सिँपँया छःने तयाः वहे सीम्हसिगु तुति क्वय् च्वनाः मि तइम्हसिनं सराद याइगु चलन नं दु । अनं लिपा मितःम्ह नापं मेपिं नं क्रिया च्वन धाःसा, न्हिं न्हिं खुसिइ वनाः सराद याइ । श्व धुंकाः सीम्हसिगु नामय् दुखं च्वपिनि दुब्यंका घःसू यानाः सराद यायेगु याइ । श्व धुंकाः दिवंगत जूगु दिनया तिथिइ छक्वः छक्वः प्यं थयेगु याइ । श्वयात 'लय् प्यं' थयेगु धकाः धाइ । लत्या वा स्वला, खुला दकिला व निर्दया तिथि धकाः दिवंगत जूगु तिथिइ सराद यायेगु याइ । निर्दया तिथि सिधल धायेवं दँय् दँसं दिवंगत जूगु तिथिइ सराद यायेगु याइ । सोन्ह सराद याइ बलय् निर्दया तिथि सिधःपिनिगु नामय् जक पिण्ड तयेगु पिण्डया ग्वारायात प्यंग्वारा धकाःनं धाः ।

सराद याइबलय् सरादयानाः पिण्ड तैम्ह अर्थात् पूजा याइम्हं च्वययाः न्यागु पुस्ता अय् धयागु थःगु छगू पुस्ता लिसैं मेगु प्यंगू पुस्ताया नामं पिण्ड तयाः सराद यायेगु चलन दु । सरादया न्यागू पुस्ता थुकथं दु ।

सराद याइम्ह व्यक्ति छगू पुस्ता
सराद याइम्हसिया अबु । मां निगू पुस्ता
सराद याइम्हसिया बाज्या । अजि स्वंगू पुस्ता
सराद याइम्हसिया तापाय् बाज्या । अजि प्यंगू पुस्ता
सराद याइम्हसिया पायबाज्या । अजि न्यागू पुस्ता

सराद याइम्ह व्यक्तिया अबुया नामय सराद या:गु ख:सा अबुया अबु बाज्या तापाय बाज्या व पाय बाज्या तक्कया नामय पिण्ड तया: पूजा याना: सराद यायेगु याइ । यदि मांया नामय या:गु जूसा अजि तापाय अजि व पाय अजि याना न्याग पुस्ताया नामय सराद यायेगु याइ ।

मां/अबु मदुपिसं मां/अबु दिवंगत जूगुदिं कुन्हुया तिथि सराद याइपिनि सोन्ह सराद याना च्वनेमा:गु मदु । मां अबु मदुगु तिथि मसिया: वा उगु दिं कुन्हु सराद याये मफूगु इलय सोन्ह सरादया भिंकुन्हुया दिं दुने यायेगु नं या: । अथेतुं मां/अबु दिवंगत जूगु दिं कुन्हु सराद याये मफूत धा:सा सोन्ह सरादया ई दुने दिवंगत जूगु तिथि कुन्हु सराद नं याना: सोन्ह सराद नं यायेगु चलन दु ।

सोन्ह सराद याइबलय न्याग पुस्ताया पुर्वजपिन्त जक पिण्ड तयेगु मयासं सराद याइपिनिगु वंश दुने दिवंगत जूपिं थ: थिति, थ: अबुया छै खलया दिवंगत जूपिं, पाजुपिनिगु पाखे दिवंगत जूपिं दिवंगत सम्मिध खल:पिं थ:थिति, इष्टमित्र, जुजु, गुरुजु आदिपिनिगु नां कया: पिण्ड तयेगु चलन दु । सोन्ह सरादबलय मदयेधुंकूपिनिगु नां काये फक्कसिगु नां कया: पिण्ड तयेगु चलन दु ।

सोन्ह सराद यायेगु धयागु मां/अबुपिन्त जक पिण्ड तया: सराद यायेगु मजुस्ये दिवंगत जूपिं थ: थिति म्हस्यूपिं सकसिगुं प्रित आत्मायात आह्वान याना: नकेगु ख: । गुम्ह गुम्हसिनं सोन्ह सराद धयागु मोहनि नख: न्हय: याइगु धयागु नेवा:तय मोहनि नख: त:धंगु नख: जूगुलिं नख: हने न्हय: दिवंगत जूपिनिगु आत्मा शान्त याये कथं सराद याना: नकेगु ख: । नेवा:तय छुं नं तत:धंगु भव्य वा उत्सव याये न्हय: दकले न्हापां दिवंगत जूपित नकेगु धका: सराद याना: तिनि भव्य वा उत्सव यायेगु चलन दु । प्रेत आत्मा शान्त मजुल धा:सा बिघ्न बाधा वयेफु धका: न्हापां सराद याना: तिनि भिंंगु क्रिया कर्मकाण्ड यायेगु चलन दु । बौद्ध मार्गीपिनि सराद निगु कथं यायेगु चलन दु ।

(क) तिथि सराद

(ख) तळ चुंया पिण्ड दयेका: याइगु सराद

तिथि सराद याइबलय जा थुया: क्वलाय जा: मायकें तरकारी घासा आदि तया: जाया पिण्ड दयेका दिवंगत जूपिं मां/अबुया नामय सराद यायेगु याइ । थ्वयात जा प्यं थयेगु धका: नं धा: । जाया पिण्ड ग्वारा दयेका: दिवंगत जूम्ह मनूया नामय तैगु जूगुलिं जाप्यं, धका: धा:गु ख: । जाप्यं थइबलय अबुया सराद याइगु जूसा अबु बाज्या तापायबाज्या तक्क जक पिण्ड तइगु ख: । अथेतुं मांया जूसा मां, अजि, तापाय अजि जकया नामय पिण्ड तइगु ख: । मांया नामय जूसा मिसापिं जक, अबुया नामय जूसा मिजपिनिगु नामय जक, पिण्ड तयेगु याइगु ख:

तिथि याना: सराद याइबलय न्याग: स्वना: पूजा याना: पिण्ड तयाच्वनीबलय चचा हाला आत्मायात सन्तुष्ट यायेगु चलन दु ।

तळचुंया पिण्ड दयेका सराद याइगु जुल धा:सा न्याग पुस्ताया तिपू तिपुपिनिगु नामय पिण्ड दयेका तयेगु याई । गथे पाय बाज्या, व पाय बाज्याया ग्वम्ह कला:पिं दुगु ख: अपिं फुकसिगु नामय पिण्ड तयेगु याइगु ख: । पाय बाज्या धुंका: तापा बाज्या, तापा अजि, बाज्या नापं बजे, अबु मां अथे याना: तयेधुंका: पुर्खापिनि सन्तानपिनिगुया नाप नापं दिवंगत जुइधुंकूपिं थ:थितिया नामं पिण्ड तयेगु याइगु ख: । तळचुंया पिण्ड दयेका सरादयात धायेवं दिवंगत जूपिं म्हसिक्व ताक्कसिया नामय पिण्ड तयेगु याइगु ख: । थथे सराद याइबलय थ: पुर्खापिं नापनापं दिवंगत जूपिं म्हसिक्व ताक्कसिगु नां कया: पिण्ड तया: सराद याइपिनि धा:सा सोन्ह सराद याना च्वने मा: धयागु मदु ।

सराद याइबलय बिशेष याना: त:धिक:म्ह काय नं अबु व चिधिक:म्ह काय नं मांयागु सराद यायेगु चलन दु । सराद याना: नं सोन्ह सराद यायेमाल धा:सा त:धिक:म्ह काय नं यायेगु चलन दु । सोन्ह सराद न्ह्याम्ह काय नं या:सां ज्यू । सराद व सोन्ह सराद याइबलय कायपिनि लिसं म्ह्याय बाय बिया वळये धुंकूम्ह म्ह्यायपिनि उलिहे महत्वपूर्णगु ज्या दु । सराद यायेगुया लागि व भव्य ज्वलं ज्वरे याइम्ह मां अबु मदुम्ह न्ह्याम्ह जूसां नं सरादयाम्हसित जा वा तळ चुं दुगु क्वल्ला ल:ल्हायेगु ज्या धा:सा दिवंगत जूम्ह सिया म्ह्यायपिं हे जुइमा: । विशेष याना: त:धिक:म्ह म्ह्याय नं अबुया सरादबलय सराद याइम्हसित ल: ल्हाना बी । अथेतुं मां मदुगु ख:सा सराद यानाच्वम्ह कान्छाम्ह काययात कान्छीम्ह म्ह्याय नं क्वल्ला ल: ल्हाना बीगु याइ । अथेतुं पिण्ड दयेका तये सिधल धायेवं पिण्डय पूजा यायेगु ज्या क्वचाल धायेवं क्वल्ला भव्य व म्ह्यायमचां हे तयाबी । अले जक भव्य पिण्डय छायेगु याइगु ख: ।

सराद वा सोन्ह सराद याइबलय बौद्धमार्गीपिनि जूसा प्यकुं लाक फि लाना: मन्द: दयेका: उकिइ गुकू कोथा खुइगु याइ । फुक्क कोथा दुने स्वस्तिक चिं च्वयेगु याइ । व धर्म धातु मण्डल ख: । अले थुगु मण्डलया च्वसं फिया स्वंग: ग्वारा तयेगु धयागु बुद्ध, धर्म व संघया प्रतीक ख: । फिया चीभा: तयेगु धयागु दुर्गति परिशोधन फिया छ:ने मत तयेगु धयागु अग्नि देवताया रुपय ख: । सराद याइम्ह मनूया न्हय:ने छ ग्वारा फिया ग्वारा धयागु सुखावती लोकेश्वर धका: ख: । सराद याइबलय बिक: धका: नं पिण्ड ग्वारा छग्वारा अलग तयेमा: । बिक: तयेगुया मूलअर्थ दिवंगत जूसां संस्कारगत ज्या याये म्वा:पिं, गा: मचाजुया: सिपिं, मचा कुहँवया: सीपिनिगु नामय तयेगु ख: । अले सराद याइबलय बिक:यात न्ह्यागु छा:सां पुज्या:सां देपा ल्हातं जक याइ । चैत्य दयेका छगु मानाय जायेक जाकि तया: उकिइ छ:ने चिकं पाल्चा छप्वा: सराद सिमध:तल्ले च्याकेगु याइ ।

वयात मतचिक धाड । न्हापां चैत्य मत पूजायानालि तिनि फिलानातःगु थायया
 छःने कुसालप्ते लायेगु याड । सराद याडम्हसिगु न्ह्यःने फि लानाः उकिइ देःपा
 पाखे अर्घ खुगः ब्वयेगु याड । सिजः धयागु पवित्रगु धातुकथं कयातःगु लिं क्वल्ला,
 अर्घ फुकं हे सिजःयागु जुइ । अर्घय् सादुरु, मेय्दुरु, अयला, श्वे, ह्याउँ श्वे,
 घ्यःकस्ति, धउ व लः आदि तयेगु याड । पिण्डया नापं छवः बिकः धकाः सराद
 याःम्हसिगु जवय् पाखे अलग तयेगु याडगु खः । सराद याडबल्य् विशेष यानाः
 भिनिता जातिया स्वां तयेमाः धयागु चलन दु । स्वां मध्यय् तहः प्यंस्वां, चिहःप्यं
 स्वां, धवःस्वां, कपुसिन्हा आदि माः । पूजा याये न्ह्यः पिण्डय् गुलिसिनं कीगः
 तिनिगु खः अपिं फुकसितं पञ्चगव्य कया शुद्ध जुइ । पिण्ड तयाः पूजा यानाः
 भव्य छाये धुंकाः पञ्चगव्य कयाः पिण्डय् कीगलं तिकेगु (जाकिं पूजा यायेगु)
 याड । भव्य छाये धुंकाः अर्गय् च्वंगु अयला, श्वे, सादुरु, मेदुरु, घ्यःकस्ति नापं
 गैडामेय्या ला छायेगु याड । अनं लिपा सलिख्य् मि तयाः नस्वाःया कुं थनेगु
 याड । नापं दक्कसिनं पिण्डयात थियाः भागि याड । थये याये धुन धायेवं
 कुसालप्ते समेत ल्हनाः क्वल्लाय् तयेगु याड । पिण्ड दक्कं तये सिधल धायेवं
 उकिइ छःने चैत्य तयेगु याड । नापं नस्वाः थनातःगु सली छःने तयाबी । अनं लिपा
 अकाय् माः धकाः ह्याउँगु मदुगु स्वां तयाः माः हनातःगु स्वांमाः तयाः बी । व
 फुकं खुसिइ यंकाः वाये यंकेगु याड । खुसिइ प्यंय् थयेत दयेकातःगु ग्वलाःगु ल्वहंया
 फलय् चैत्य तयेगु याड । प्ययंग्वारा दक्कं लः बाहाः वयाच्वंगु थासय् चुइका बी ।
 थये चुइकुगु प्यं खुसि च्वनाच्वपिं प्वःतयसं जालय् प्यनाः लाना कायेगु याड । अथे
 याःपिन्त प्ययंचुइकः वंम्हसिनं दक्षिणा नं बीगु चलन दु ।

यदि तिथि यानाः सराद यात धाःसा जाप्यंया पिण्ड खुसिइ वाः वनेगु
 मयासे बहालय् बहालय् प्यंगाः धकाः दयेकातःगु दु । अने हे वायेगु याड ।
 सोःहसरद वा सरादयानाः म्हाय्य् मचा भिनामचापिन्त प्रसाद बीमाःगु जूगुलिं हे
 थुबलय् म्हाय्य्मचा भिनामचा सःते 'माःगु खः । सोःहसरद यायेगु धयागु दछिया
 छवः मदयेधुंकुपिन्त लुमंकाः छःभाःपाः पूजा यानाः भव्य नकेगु खः । उकि प्रसाद
 बीगु धका म्हाय्य्मचा भिनामचापिन्त सःताः मदुपिन्त लुमंकाः अमित प्रसाद बीगु
 खः ।

मोहनि

नेवाःतयसं हनिगु ततःधंगु नखः मध्यय् छगू नखः मोहनि नं खः ।
 मोहनि नखः हनेगुया लागि तापालय् वनाच्वपिं दाजुकिजा ततातःकेहपिं नापं च्वनाः
 हनेमाः धकाः तापालनिसें थःथःगु छैय् वयेगु याड । हिन्दुमार्गी, बौद्धमार्गी व
 शैवमार्गी दक्कोसिनं तःजिक हनिगु नखः मोहनि खः । श्व नखः हनेगुया लागि
 श्री ५ या सरकार, नापं जःलाखःला देय् भारतय् नं ताःहाकय्क बिदा याडगुलिं हे
 सी दु श्व नखःया महत्व आपाः दु । परिवार जःछि च्वनाः साक्क नयाः भुतमालि
 ब्वयेकाः न्ह्याइपुकाः, छःछःपिन्त पूजा यानाः शक्तिया उपासना यायेत हनिगु नखः
 खः मोहनि । असत्ययात सत्यं बिजय याडगु दर्शनं पूर्णगु मोहनि नखः खः । अर्थात
 सत्यं न्ह्याबलं त्याकाच्वनी धैगु दर्शनं जाःगु मोहनि नखः खः । श्व नखः खालि
 नेवाःतयसं जक हनिगु मजुसे नेवाः मखुपिसं नं हनिगु खः । राष्ट्रिय नखः कथं हनिगु
 जूगुलिं हे श्व नखःबलय् ताःहाकय्क बिदा बियाः तयातःगु खः । ताःहाकः हनिगु
 नखः जूगुलिं आखः ब्वनेगुया लागि नेपाःया थी थी थासय् वनाच्वपिं विद्यार्थी,
 अध्यापन याःवना च्वपिं शिक्षकपिं ताःहाकः बिदा दुगुलिं नं नखः हनेगुया लागि छैय्
 छैय् वयेगु याः ।

बुज्या याडपिनि श्व यामय् बुँइ बुँइ वा सयाच्वंगु जुइ तर छथाय्
 निथाय् लः फय् बांलाःथाय् वा लयेगु नं क्वचाइगु खः । कःनि बाली दुकाये धुंकुगु
 जुइ । अथे तं माय्, कय्गु, मुस्या आदि बबः धाःसा बुं बुं छैय् छैय् दुकाये धुंकुगु
 जुइ । उकिं श्व नखः विशेष यानाः धुक्क जुइक हनिगु खः ।

आश्विन शुक्ल प्रतिपदानिसें आश्विन शुक्ल पूर्णिमा तक्क १५ न्ह
 यंकं हनिगु श्व नखः खः । शिक्षण संस्था १५ न्ह हे विदा जूसां श्री ५ या सरकारं
 आश्विन शुक्ल सप्तमी अर्थात फुलपातीनिसें पूर्णिमा तक्क जक बिदा बीगु याना
 वयाच्वंगु दु । श्व नखःयात “बडादशै” दशै, विजया दशमी आदि धायेगु नं याः ।
 नेवाःतयसं श्व नखःयात खालि मोहनि हे जक धायेगु याः । अनेवाःतयगु प्रभाव
 मोहनियात बडादशै धकाः नं धायेगु याना हयेधुंकुगु दु । भाजु पुण्यरत्न वज्राचार्यया
 धापू कथं दशै छाय् धाल धयागु खँय् आश्विन शुक्ल प्रतिपदाकुन्हनिसें आश्विन
 शुक्ल दशमीकुन्ह तक्क मेमेबलय् स्वयां भः भः धायेक हनिगु दिं जूगुलिं दशै

धकाः धाःगु खः । दशै धकाः नां तःगु छाये धालसा श्व नखःबल्य यायेमाःगु भिगु संयम खः । उगु संयम अपभ्रंस जुयाः दशै जूगु जुइमाः धकाः धाः । (वज्राचार्य १०८४ पृ ४४)

श्व नखःयात बिजया दशमी धकाः धाइपिं नं दु । बिजया दशमी धकाः बिजय जूगु दशमी जूगुलि धाःगु खः । श्व नखःया उत्पत्तिया बारे थी थी धारणा दु । बिजया दशमी धयागु खैय् रामायणया मूर्खनाप स्वापू दुगु खनेदु । रामायण कथं सुपर्णा धयाम्ह छम्ह पात्रं रामायणया मू पात्र रामनाप इहिपा यायेगु इच्छा व्यक्त यात धकाः रामं नकरात्मक लिसः जक ब्यूगु मखु, इहिपा याये धूकुम्ह मिजंनप इहिपाया प्रस्ताव तःवल धकाः न्हाय् हे ध्यनाः लित व्छयाः ब्यूगु खः । थःत न्हाय् ध्यना बिल धकाः लंकाया जुजु रावणयाथाय् वनाः कं वन । रावणया नं तं वयेका रामनाप बनवास वयाच्चंवम्ह रामया कलाः सीतानाप विवाह यायेत छल यानाः थःगु राज्यय् हल । रावणं सीतायाके विवाहया स्वीकृत कायेत स्वत । तर पतिव्रता सीतां राम बाहेक सुनापं इहिपाया यायेगु इच्छा मयागुलिं रावणं स्वीकृत काये मखन । रामं थः कलाः सीतायात रावणं यंकातःगु सीकाः हनुमानपिं नाप जानाः रावणनाप ल्वानाः त्याकूगु दिं जूगुलिं श्व दिं बिजया धकाः नां जूगु धाइपिं नं दु । रामं रावणयात स्याःगु दिं धयागु आश्विन शुक्ल दशमी जूगुलिं उगु दशमीयात बिजया दशमी धकाः धायेगु नं परम्परा दु ।

मेगु शिव पुराण कथं देवगण व राक्षसगण दथुइ घमासान ल्वापु जुल । मैषासुर दैत्य छम्हसित सुनानं स्याये मफुसैलि पार्वती दुर्गाया रुप कयाः मैषासुरयात बध यानाः दैत्यतय्सं याना वयाच्चंवगु बिध्वंस, अन्याः, अत्याः, फुकं अन्त यानाविल । उकिं अन्याः अत्याःया प्रतीक राक्षसगणयात अन्त यानाः श्री दुर्गा भवानी बिजय याःगु जूगुलिं बिजया दशमी धकाः धायेगु याःगु खः धयागु नं धापू दु । अथे जूगुलिं स्त्री शक्तिया उपासना यानाः मोहनि हनिगु खः । मेगु बाखंकथं स्वंगु लोक बिजय याये, दक्क थःगु याये, प्रभुत्व जमय् याये धकाः भस्मासुरं शिवशक्ति प्राप्त यायेत दुःख सियाः तःधंगु तपस्या यात । महाद्यः नं प्रशन्न जुयाबिज्यानाः भस्मासुर दैत्ययात बरदान बियाबिज्यात । व वरदानकथं दक्कसित भस्मयाइम्ह भस्मासुर तच्चतं अहंकारी जुयाः ध्वदुक नापलाक्कःसित भष्म यानाः आतंक मचय् यानाजुल । लिपा जुजुं महाद्यःयात हे भष्म यायेगु धकाः महाद्यःयात लितुलिना जूगु खनाः पार्वती भगवतीया रुप कयाः भस्मासुर नाप ल्वानाः वयात हत्या यानाः तीन त्रिलोकया रक्षा यानाः बिज्यात । भस्मासुरयात बध यानाः बिजय याःगु जूगुलिं हे बिजया दशमी धकाः धाःगु खः धकाः नं धाइ ।

श्व जुल हिन्दू धर्माबलम्बीपिसं मोहनि नखः हना वयाच्चंवगुया खँ । तर बौद्धमार्गीपिसं नं मोहनि नखः हनेगु याना वयाच्चंवगु दु । तर बौद्धमार्गीपिसं मोहनि नखः हनावयाच्चंवगु धयागु भस्मासुरयात बध यानाः बिजय प्राप्त याःगुलिं खः धायेगु उलि पाय्छि मजू । नेपाः छगू थज्याःगु राष्ट्र, गन हिन्दू धर्म व बौद्धधर्म

नाप नापं न्ह्यानाः धार्मिक सहिष्णुता कथं हनावयाः च्वंगु दु । छगू धर्म मेगु धर्मयात आदर यानाः छम्ह हे द्यःयात नं छगू धर्माबलम्बी छगू कथं स्वयेगु याःसा मेगु धर्माबलम्बीपिसं मेगु कथं स्वयेगु याः । गथेकि चांगुइ च्वम्ह नारायणयात हिन्दूतय्सं चांगुनारायण कथं माने यायेगु याःसा बौद्धतय्सं हरिहरहरिहर बाहान लोकेश्वर धकाः मानेयानाः भक्ति भाव यानाः वयाच्चंवगु दु । अथे तुं मोहनि नखःयात नं बौद्धमार्गीपिसं हिन्दूतय्सं स्वयां अलग कथं हनावयाच्चंवगु दु ।

बौद्ध तान्त्रिकतय्सं हाकुमुस्या छवःयात हे हाकुम्ह थुमेय् माय् छवःयात हाकुम्ह निखुरम्ह दुगु यानाः भूतप्रेतया आहरा पुरे याये फुपिनि मोहनि धयागु तान्त्रिक धर्म नाप स्वापू दुगु नखः खः । बौद्धमार्गीपिनि थःथःगु जीवन निर्वाह यायेगुया लागि ज्या सनीगु हलंज्वलंयात द्यः भाःपाः पूजा यानाः उगु ज्याय् थःथःपिं निपुण जुइमा, सफल जुइमा, जीवनय् सफल जुइमा धकाः नं कामना यानाः पूजा याइगु नखः खः मोहनि । मोहनिबल्य शक्तिया उपासना यायेगु याइ । छायेधाःसा बिजय शक्ति नाप सम्बन्धित खः । उकिं हिन्दूतय्सं दुर्गा भवानी व भगवतीपाखें जन्म जूपिं अनेक मिसापिं द्यःपिन्त आराधना याना पूजा यायेगु याइ । अथेतुं बौद्धधर्माबलम्बीपिसं नं स्त्री शक्तिया उपासना यायेगु कथं योगिनी वा जोगिनीपिनिगु आराधना याइ । मोहनिबल्य माने याइपिं द्यःपिं मध्यय् छम्ह तलेजु भवानी नं खः । तलेजु भवानीयात मोहनिबल्य जुजुनिसं हिन्दू धर्म व बौद्ध धर्म माने याइपिं निखलःसिनं मानेयायेगु याः । तलेजु भवानीया मूर्ति मदु पूर्ण कलश जक खः । पूर्ण कलशय् त्रिकोण दु । त्रिकोण धयागु हे स्त्री शक्तिया यथार्थ रुप खः, प्रकृति खः । उकिं शक्ति साधना धयागु हे श्वपाखें जुइगु जूगुलिं मोहनिबल्य विशेष यानाः स्त्री शक्तिया पूजा यायेगु खः । स्त्री शक्तिपाखें शक्तिया उपासना यानाः विजय जुइगु खः मोहनि । उकिं हे मोहनिबल्य दुर्गा भवानी, योगिनीपिनिगु शक्तिया भावयात आराधना यायेगु भीगु परम्परा खः ।

मोहनि धयागु हे थः थःगु शक्तिया पूजा यानाः बिजयया कामना याइगु खः । उकिं हे हातहतियार ज्वनाः ल्वानाः थःगु जीविका चले याइपिसं खड्ग स्वनाः शक्तिप्राप्त याइगु खःसा, बाजं थाइपिसं बाजं, सफू ब्वनीपिसं सफू, कलाकारपिसं थःथःगु ज्याभः स्वनाः पूजायानाः शक्ति दयेकेगु याइगु खः । ज्याभः स्वनाः शक्ति दयेकाः उकीपाखें थःगु जीवन बांलाक न्ह्याकेगु विजय यायेगु कामना यानाः पूजा याइगु खः । मोहनिबल्य भौतिक व आध्यात्मिक निगुलिं कथंया भक्तिभाव यानाः शक्तिया उपासना यायेगु याइ ।

थुकथं मोहनिबल्य थःथःगु जीवनया सफलताया लागि शक्तिया उपासना याइगु खः । मोहनियात लुमंकीगु दिं धयागु चथाः खः । चथाः धयागु मोहनि भवय्या समय् खः । उकिं मोहनि बांलाके माः धकाः चथाःयात फछिं फतले बांलाक हनेगु स्वइ । मोहनियात लुमंकीगु मेगु दिं धयागु कायाअष्टमी खः । श्वकुन्हू यैयाःया लागि यःसिं थनेत हःगु यःसिं भोताहितिं हनुमानधवाखाय् थ्यंके हइगु दिं

खः । श्वकुन्हुनिसैं मोहनिबलय् हालीगु मालश्रीया धुनय् म्ये हालेगु सुरु याइ ।
कुमारी दैत्ययात स्यानाः दैत्यं दुःख बियाः तःपिन्त सुख शान्तिं म्वाके बी धकाः
विजय याःगु दिं खः ।

नःला स्वनेगु

मोहनि नखःया प्रारम्भ नःला स्वनाः जुइ । आश्विन शुक्ल
प्रतिपदाकुन्हु मोहनि नखः न्याकेगुया लागि प्रत्येक छैय् छैय् नःला स्वनेगु,
सुचिनिचि यानाः खुसिं फि कयाहयाः, नीलः कयाहयाः, पैचा व फि ल्वाकछ्यानाः
गुम्हसिया बैय् तुं गुम्हसिया भ्यगतय्, गुम्हसिया सली सलिखय् फि ल्वाकज्यांगु पैचा
जायेकाः उकिइ वा, तच्छ, कःनि लख सिलाः पीगु याइ । श्व नःला स्वनेगु विशेष
यानाः आगमय् वा पूजाकुथिइ यायेगु याइ । नापं शक्ति उपासनाया लागि कलश
छग्वः नं स्वनेगु याइ । थुबलय् विशेष यानाः छःछःपिनिगु मूर्ति सफा यानाः
गुम्हसिया छःछःपिन्त ल्यं पुल्यं नं छायेगु याइ । थथे नःला स्वने धुनेवं मोहनि सुरु
जुल ।

यंला सेवा वनाच्चपिनि यंला सेवा धुंकाः पारु भव्य वनेगु याइ ।
गुलाबलय् बौद्ध स्थान गथे यैय् जूसा गुला बाजं थानाः स्वयम्भुइ वनेगु याइगु खः ।
यंला सेवाः धकाः थःथःगु क्षेत्र दुने पीथय् पूजा याइगु खः । तःधिकःपिं विशेष
यानाः सुथय् नसंचा हुलेगु याइ । ज्यापुत बैय् पुयाः वनेगु याइ । तर थौंकन्ह्य थथे
बैय् पुयाः वनेगु चलन मदये धुंकल । मिसामचात धाःसा न्हिनय् थःथःगु पीथय् पूजा
याः वनेगु याइगु खः । नःला स्वनेगु पारुकुन्हु यंला सेवावंपिनि पारु भव्य वनाः
सिधयेकेगु याइगु खः ।

नवरात्री

मोहनिबलय् छःछःपिं पूजा यानाः हिंसा यानाः जक हनिगु नखः
मखु । थःथःगु म्ह नी बाय् पवित्र यायेगुया लागि नःलास्वां प्यूसानिसैं सर्गतय् नगु
दनीबलय् सुथ न्हापां थीथी सामग्री गुगु तीर्थय् म्वः ल्हुयाः तीर्थपतिं थी थी वस्तुया
दान यानाः पीठ दर्शन यानाः छैय् छैय् लिहाँ वयाः मोहनि नखः हनेगु चलन दु ।
मोहनि नखःबलय् विशेष यानाः छःछःपिनि शक्ति दुबिना च्वनी धयागु परम्परागत
धारणा दु । मोहनिबलय् उकिसं पीठ वा भवानी वा जोगिनीपाखें विशेष यानाः
मिसापिं छःपाखें शक्ति उपासना यानाः दछियंकयात शक्ति सञ्चय यायेगु परम्परा
खः मोहनि नखः । शक्ति उपासनाया लागि तीर्थ तीर्थय् वनाः म्वःल्हुयाः योगिनी वा

दि	म्वःल्हुइगु वस्तु	म्वःल्हुइगु थाय्या नां	तीर्थय् दान याइगु	नागया नां	दर्शन यायेगु पीठया नां	थाय्या नां
प्रतिपदा	लव जिफवःस्वां	शंष तीर्थ	चन्द्रमा	शंषपाल नागराजा	श्रीचामुन्दादेवी	शंषमूल
द्वितीया	कन्ह्यो स्वां	निर्मल तीर्थ	पञ्चवृह, पञ्चरत्न	अपलाल नागराज	लुतिअजिमा	शोभाभगवती
तृतीया	दाफवःस्वां	पुण्यतीर्थ	सजःया लःथल	तक्षक नागराजा	रुद्रायणी	मोकर्ण
चौथी	ताय् आखे, दाफवःस्वां	कालमोचन	छत्र	भद्रपाल नागराजा	दुला अजिमा	कालमोचन
पञ्चमी	कन्होःस्वां	पञ्चनाली पचली	निसलाः	सुन्दर नागराजा	पचली भैरव	पचली
षष्ठमी	नस्वाः	मनोरथतीर्थ	चीवर, गुल्पाः	वरुणपाल नागराजा	इन्द्रायणी	तोखादुवा
सप्तमी	दाफवःस्वां	आयताराघात	सफू	वासुकी नागराजा	बछलादेवी	देउपातन
अष्टमी	पञ्चसुगन्ध	चित्तमणितीर्थ	आत्मविभु	वरुण नागराजा	वरुणदेवी	तेकुदवान
नवमी	नःलास्वां	भवानीतीर्थ	सिन्हादान	नन्दउपनन्दनागराजा	तलेजुभवानी	दोकाधः
दशमी	धालेपति स्वां	शान्तितीर्थ	नवरत्न	सोमसिकिनागराजा	गुहेश्वरीदेवी	गुह्येश्वरी

पीठ दर्शन याइगु खः । थुबलय् यैय् च्वपिं मनूतय् थाय् थासय् च्वपिं योगिनी वा पीठयात दर्शन याइगु खः ।

नवरात्री सुथ न्हापां छ्यैसे च्वबलय् हे वने माःगु जूगुलिं थाय् थासं नवरात्रि वनेगु धकाः मनूत मुंकाः बाजं थाकाः ध्वैय् ज्वंकाः तीर्थ तीर्थय् म्वः ल्हुइकीगु खः । तीर्थ तीर्थय् थी थी सामग्री म्वः ल्हुयाः तीर्थपतिं पूजा यानाः तीर्थपतिं हे विशेष कथं वस्तु नं दान यायेगु चलन दु । खपदेय्यात छ्चाःख्यलं नवदुर्गा चाःहुला च्वंगुलिं यानाः नवरात्री ज्वःछिं तीर्थ तीर्थय् म्वः ल्हुयाः नवदुर्गा मध्यय् छम्ह छम्ह यानाः छसिकथं दर्शन यायेगु चलन दु । नवदुर्गा भवानी दर्शन याये न्ह्यः गुंगू तीर्थय् म्वः ल्हुइगु नं चलन दु ।

तिथि	म्वःल्हुइगु तिर्थया नां	दर्शन याइपिं भवानीया नां
पारु	ब्रम्हायणीघात	श्री ब्रम्हायणीदेवी
द्वितीया	महेश्वरीघात	श्री महेश्वरीदेवी
तृतीया	पासिखेलघात	श्रीकुमारीदेवी
चौथी	चुपिंघात	श्रीभद्रकाली देवी
पंचमी	मंगलतिर्थ	श्री बाराही देवी
षष्ठी	सिद्ध पोखरी	श्री इन्द्रायणी देवी
सप्तमी	खासांखुसुं खुसि	श्री महाकाली देवी
अष्टमी	कमल पुखू	श्री महालक्ष्मी देवी
नवमी	हनुमानघात	श्री त्रिपुरासुन्दरी देवी
दशमी	ब्रम्हायणीघात	श्री नवदुर्गा भवानी

यै च्वपिनि नवरात्री वनीबलय् विशेष यानाः खुसिइ जक वनीगु मजुसे खुसि खुसिया दोभानय् अर्थात लः न्ह्यानाः वयाच्चंगु निगू खुसिचिया दथुइ लः ल्वाःगु तिर्थय् वनाः म्वः ल्हुइगु चलन दु । यै छगू त्वालं वा छथासं जक नवरात्री मुंकीगु मजुसे निगू स्वंगू थासं नं मुंकेगु चलन दु । थथे मुंकीबलय् मुंकीपिसं नवरात्री वनेगुया प्रबन्ध याना बी । मुंकीपिसं पूजा यायेगु तिर्थय् छायेगु मुथं नं यायेफु, थःथः नं यायेगु चलन दु । तीर्थ थ्यंके अःपुका बीगुया लागि व्यवस्था जक यानाबीगु खः ।

यैय् नवरात्री वनीपिनि न्हापां तीर्थय् म्वःल्हुइ, थथे म्वःल्हुइबलय् तीर्थपतिं थी थी सामग्री तयाः म्वः ल्हुइगु चलन दु । अले तीर्थ पतिं तीर्थया विशेषता कथं दान यानाः अनं लिपा तिनि पीठ दर्शन याइगु खः । थौकन्ह्य् खुसिइ न्ह्याइगु लः फोहर जूगुलिं फोहरगु लः वइगु तीर्थय् वनाः अन च्वंगु हितिं वःगु

लःयात हे तीर्थया लः भाःपाः छाः सिलाः वा म्वःलुयाः नवरात्री नृत्याका वयाच्वंगु दु । नापं थाय् थासय्या नागराजापिन्त पुँइ हायाः लखय् चुइका वृथेगु चलन दु ।

नृत्यव्वयागु नवरात्री धलखय् गुंगू तीर्थ व गुंगू तीर्थ सम्बन्धी जक खँ नृत्यव्वया तयेमाःगुलिइ भिगू तीर्थया नां भिगू हे पीठया नां, अथे तं दान यायेगु, नागराजाया नां आदि नं भिम्ह हे खः । नवरात्री वनीगु थाय् भिन्हु हे खः । अथेजसां भिगू तीर्थय् भिन्हु तक्क नवरात्री कथं वनीगु धयागु छगू तीर्थ, छगू पीठ, छम्ह नाग, छगू दान आदि फुकं नवरात्री धुंकेगुया लागि खः । यँ च्वपिनि नवरात्री वनाः स्याकुत्याक् अर्थात नवमीकुन्हु भवानी तीर्थय् वनाः म्वःलुयाः तलेजु भवानी दर्शन याः कन्ट्यु तं नवरात्री धुंकाः भव्य यायेगु चलन दु । गुंला सेवा वनाः नं यंला शुक्ल पारुकुन्हु पारु भव्य वनाः गुंलाधर्म सिधयेकेगु चलन दु । अथे तं यंला सेवा वनीपिनि नं लछियंक यंलाथ्व प्रतिपदानिसँ सुरु याः कौलाथ्व पारु अर्थात नःलास्वां पीगु पारुकुन्हु यंला सेवा वनाः भव्य नयाः यंला सेवा धुंकेगु चलन दु । अथेतुं नवरात्री वना नं दशमीकुन्हु शान्त तीर्थय् धालेपति स्वानं म्वःलुयाः नवरत्न दान याः, सोमसिकि नागराजायात पूजा याः, अनं लिपा गुहेश्वरी पूजा व दर्शन याः नवरात्री क्वचायेकेगु याइ । नवरात्री वनीपिनि भव्य यायेगु गन अःपु अन नवरात्री धुंकाः भव्य याः धुंकेगु चलन दु । नवरात्रीया ज्या सुथय् न्हापां महानवमी कुन्हु हे सिधइगु जगुलिं उकुन्हु हे नवरात्री धुंकाः तलेजु भवानी पूजा याः धुंकाःया भव्य यायेगु चलन दु ।

प्रत्येक तीर्थया महात्म्य थी थी दु । अथेतुं थाय् थासय् थी थी दानया नं अलग अलग पुण्य दु धायेगु परम्परागत चलन दु । पीठ पीठया नं महिमा अगल अलग दु । थुकथं नवरात्री वनाः थी थी तीर्थय् थी थी वस्तु नं म्वः लुयाः शक्ति सम्पन्न पीथय् शक्तिया संचय याः दछियंकयात बांलाक बलाक्क जीवन नृत्याकेत मोहनिबल्य शक्ति सञ्चय यायेगु याइ ।

थौया दृष्टि स्वयेगु खःसा च्वय् नृत्यव्वयागु धार्मिक भावना खः । नवरात्री आकाशय् नगु दनीबल्य तीर्थय् वनेमाः धकाः छँय् छँय् मोहनि नखः हनेगुया लागि पूजा यायेगु व ज्या यायेत इलँई हे छँय् थ्यंकाःलि छँया ज्या नं कुसलतां नृत्याके फँगु स्वभाविक खः । सुथ न्हापां लःफय् निगुलिं स्वच्छ जुइगुलिं स्वास्थ्ययात नं थज्याःगुलिं बां हे लाकाबी । म्हय् फूर्ति पिदना बी । छगू कथं प्रदुषन मुक्तगु लः फसय् न्यासि वनेगु व्यायाम नं खः । स्वास्थ्य दुने सफा फय् दुबीका हृष्टपुष्ट याःनाबी, थ्व हे नं शक्ति सञ्चय खः । धाथे नवरात्री वनीपिनि म्हय् शक्ति सञ्चय याकाः हृष्टपुष्ट जुयावनीगु खः ।

भुतुमालि ब्वयेकेगु

मोहनि नखःया नृत्याइपुगु पक्ष धयागु च्वय् आकाशय् मिजं मचातय्सं भुतुमालि ब्वयेकेगु छगू नं खः । भुतुमालि ब्वयेकेगु कासा नेपालय् जक मखु मेमेगु देशय् नं दु । तर नेपालय् थें भुतुमालि थुबलय् हे ब्वयेके माः धयागु मदु । भीथाय् भुतुमालि थुबलयनिसँ थुबलय् तक्क ब्वयेकेमाः धयागु दु । नापं भुतुमालि ब्वयेकेगु व दिक्केगुलिइ धार्मिक रुपं हे सम्बन्ध तयाः धयातःगु दु । मोहनिबलय् विशेष याः वा वःगु दी धुंकाः जुइ । मोहनिया लः फय्या स्थिति फयां फक्क फय् नं वइमखुनिगु ई खः ।

भुतुमालि ब्वयेकेगु सुरु कृष्णाष्टमीकुन्हुनिसँ जुइगु खः । थ्व स्वयां न्हापां वा वयातुं च्वनी अक्क थ्वबलय् तक्क नं वा वयातुं च्वनी । थ्वबलय् बुँज्या याइपिनि बुँइ वा पी सिधःगु जुइ । वा नं भचा भचा गोडा जाया वयेगु स्थिति जुइगु खः । वा माय् जाकि दयेधुंकाः वा पाके जुल धायेवं वा वल धायेवं वामाय सयाच्वंगु वा हाया वनी । उकिं गुपुन्हि लिपा वा पाकय् जुइगु सुरु जुयावइ । कतिपुन्ही धुंका भुतुमालि ब्वयेकेगु जुइ ।

मालश्री

नेवाः परम्पराय् लः फय् निभाः बुँज्या अनुसार म्ये हालेगु चलन दु । मोहनि नखःबलय् म्ये हालीगु मालश्री म्ये खः । मालश्री म्येया धुनय् बय् पुइगु नं याइ । मोहनिया लसताय् हालीगु मालश्री म्ये वा धुन यंलाथ्व अष्टमी अर्थात कागेश्वर अष्टमीकुन्हुनिसँ मोहनिया वातावरण वयेक, मालश्री धुनय् बाजं थायेगु, म्ये हालेगु सुरु जुइगु खः ।

पचिमन्हः

आश्विन शुक्ल पञ्चमी पचिमन्हः खः । थ्व पचिमन्हः यँया विशेष याःनाः क्वःने च्वपिनि पचली भैरवयात पूजा याःनाः भव्य नयाः मृत्याय्मचा भिनामचातयत् नखत्या सःता, हनेमाःगु खः । पचली भैरव गन च्वम्ह धयागु छपु म्ये दु । गुगुलिइ थुकथं न्हयःब्वयाःतगु दु ।

आकाश इलापुलु सूचिभूमि थासं रसनं बिज्याक नेपालस टेकुरी म्ये छपु मन्त ।

श्व पचलि भैरवया म्ये कथं सूचिभूमि स्वर्ग आकाश इलापुलु यानाः न्ह्याइपुक नेपाःया टेकुइ च्वबिज्यात धयागु दु । पचलि भैरवया बाखं कथं फम्पिया जुजु न्ह्याबलें काशीइ म्वःल्ह्याः जगन्नाथय जा नयाः यैय वयाः विवाह मजुनीम्ह छम्ह नैया थाय् ज्यापुया भेष्य् दं वडगु जुयाच्चन । श्व खँ सियाः नैया त्वाल्य् च्वपिस, पचलि भैरवया परिचय काल । तर पचली भैरव थःगु परिचय मब्बू नैनं तक्क नं मस्य् । छन्हू नैनं थःगु छैय् पसिं पानातःगु जुयाच्चन । पसिं गाइ धकाः पचली भैरव छैय् दुने दुहां वने मफुत । थुबल्य् हे नैनं छ सु ? धकाः न्यानाः केरकार याःसेलिं “का जिं छन्त थःगु रुप क्यने” छ जिगु रुप स्वयाः जाकिं पूजा यातकिं जिं हानं आःयागु हे रुपय् वड धकाः पचली भैरव थःगु अजंगंगु रुप क्यना बिज्यात । थःथाय् दं वडम्ह मिज्या अजंगया रुप खंबल्य् नै ग्यानाः जाकिं कयेकेगु ल्वःमनाः गन गन बिस्सुं वन । व नाप नापं पचली भैरव नं ल्य् ल्य् वन । नैया ल्य् ल्य् ववं सुथय् जुल । द्यः तुयुया वल । मन्तयसं थःगु रुप खनी धकाः थौकन्ह्य् पचलि धाइगु थासय् कंबव्य सुलाबिल थः सू वंगु थाय् दीप लात । व हे दीपय् च्वंगु पुलुं फाया सुला च्वंबल्य् पचलि भैरवया प्यं छगः जक खने दुगु जुया च्वन । अथे जूगुलिं पचिमन्हःबल्य् पचलि भैरवया जात्रा जुइबल्य् पचलि भैरवया प्यं धकाः द्यः गमय् तयेकुन्हू द्यःपाःलाःतय्सं द्यःनापं गमय् तयेयंकेगु यानाः वयाच्चंगु दनि । गगु थाय्यात थौकन्ह्य् पचली धायेगु याः । यै भैरवया जात्रा याइबल्य् इलां नं पुलु तयाः द्यःया लिउने, जवं खवं नं पुलु तयेगु याइ ।

कंभाःपातय् गथे जुयाः लात धयागु खँय् मेगु छगू बाखं दु । व बाखंकथं इहिपा मजुनिम्ह नै मिसानाप दनाः सनाजुगुलिं यानाः, नैया दाजुकिजापिसं लुतुलुयाः पचलि भैरवयात कंबव्य वां व्छयाब्बूगुलिं कं ब्वय् लाःगु खः धैगु धारणा दु । इहिपा जुइ धुंकूम्ह पचलि भैरव थथे नै कलाः तयाः जूगुलिं काय्या तं पिहांवयाः अबुयात सेख्य् यायेमाल धकाः पाःचाय् पियाच्चन । थः अबु नैनाप ल्य् ल्य् जुयाच्चंगु खनाः न्हिले वल । उकिं अथे न्हिलाच्चंम्ह जूगुलिं उम्ह पचली भैरवया काय्या नां मुसुकाःम्ह गणेद्यः धकाः धायेगु जुल । थौकन्ह्य् श्व मुसुकाःम्ह गणेद्यःयात मुस्याकाला गणेद्यः धायेगु याः । गणेद्यःया अबु पचलि भैरवयात पचलि पञ्चलिङ्ग महाद्यः धकाः धायेगु नं याः । तर पचलि भैरव जूगुलिं बलि नं बीगु जूगुलिं पचलि भैरव महाद्यः खः धायेमछिं । श्व छगू परिकल्पना जक खः । तर थौकन्ह्य् महाद्यः धकाः धाये धुंकूगु दु । मुसुकाल गणेद्यः टेकुइ नेशनल ट्रेनिङ्ग न्ह्यःने दु । पचलि भैरवयात नायतय्सं नाय जात्रा धायेगु यानावयाच्चंगु दु । थौकन्ह्य् पचलि भैरवया रुप धयागु नं नै कलाःयात गथे क्यंगु खः अथे छुं खः । छायाःसा नैनं पचलि भैरवया रुप खनाः ग्यानाः जाकिं पूजा याये तक नं मफु । उकिं पचलि भैरवया रुप धयागु तग्वःगु सिजः तेपय् । (थौकन्ह्य् त्यप लुंसिया तःगु दु) बेताः आसन तयाः मन्थ्या छय्या माः, नागमाः, गःपतय् क्वखायातःम्ह व जैय् धुँछयंगू हिनातःम्ह किसिया छयं छुनाः ग्यानापुक तं पिकयाः ख्वाः ज्यानाच्चंम्ह,

ढाल तरवार, पात्र, त्रिशुल, डमरु, मन्थ्या छयं व नागपास ज्वनाच्चंम्ह खः । श्व पचलि भैरवया त्यपय् अयलाः श्वं खँय् वः स्याःबजि पौबजि, ला, आदि सम्य ज्वलं तयेगु याइ । उकिं हे क्वःने च्वपिनि पचिमन्हःयात धकाः क्वंचाय् श्वं थुइमा धयागु धारणा दु । श्वंया क्वंचायात पचलि भैरव धकाः धायेगु नं चलन दु । पचलि भैरवया मूल रुप धयागु प्यंया रुप हे खः । द्यः गमय् तैबल्य् नं श्वयात त्वपुया हे तयेगु याइ । पचलि भैरवया खँ न्ह्यागु हे दुसां नं श्व द्यःया स्थापना जुजु गुणकामदेवं (कलिगत सं ३८२५ ई. सं. ७२४) येंदेया निर्माण याःबल्य् दक्षिण भेगया क्षेत्रपालया रुपय् स्थापना याःगु वंशावलीइ उलेख यानाःतःगु दु ।

पचलि भैरवया जात्रा ज्यापुतय्सं न्ह्याका वयाच्चंगु खः । थथे न्ह्याका वःगुया मुख्य कारण छु धाःसा कंबव्य सुला च्वंम्ह पचलि भैरवयात बुँज्या वंपिं ज्यापुतय्सं खनाः थःथाय् छैय् हयातल । उकिं पचलि भैरवया थःगु अलगगु छैय् मदु । पचलि भैरव लुइका हःपिं ज्यापुतय्गु अर्थात जात्रा याइपिं ज्यापुतय्गु छैय् हे पालंपाः तयेगु याना वयाच्चंगु खः ।

पचलि भैरव फम्पिया जुजुया नापनापं थक् जुजुया पूर्वा खः धकाः कमप्रकाश मल्लं “पूर्वज लुमंका” धयागु सफुतिइ उलेख यानादीगु दु । उकिं हे पचलि भैरवया जात्रा वा छुं यायेमाल धायेवं थक् जुजु खलःयाके न्यनाःलिं जक यायेगु चलन तक नं दनि । पचलि भैरवया जात्रा न्यायेकाच्चपिं ज्यापुतय् धापू कथं पचलि भैरव धयाम्ह ज्यापुतय् द्यः खः, थक् जुजुयाथाय् यंकेगु धयागु जुजु जूगुलिं जक खः । उकिं जात्राबल्य् थक् जुजुयाथाय् यंकाः पूजा फयेमाःगु खः । मेगु छगू धापू कथं पचलि भैरव थक् जुजुपिंथाय् सू वःगु खः । जुजुं ह्ययेका व्छ्येत गुलि स्वत माने मजुसेलि जुजु थःहे पिहां वनाबिल । उकिं हे पचलि भैरव द्यः गमय् तयेत न्हापां थक् जुजुपिंथाय् निं तयातइ, गमय् तये यंकेत जुजु मदुबल्य् वा जुजु हे दुसा नं द्यःखुया हे श्वबल्य् बाजं मथासे तीजक द्यः हइगु खः । जुइ फु पचलि भैरव नै नापलाः जूबल्य् जुजुया भेष्य् मजुसे ज्यापुया भेष्य् जूगुलिं ज्यापु जातिं थःपिनि द्यः धाःगु जुइमाः । पचलि भैरव थक् जुजुपिंथाय् सू वःगु धयागु जुजु जुयाः जुजुया थाय् हे वनेगु जुइमाः ।

वंशावली कथं किराति जुजु यलम्बरं (आजु द्यः) येंदेय् बिस्तार याये धुंकाः नं यलम्बरया काय् पविं राज्य याःबल्य् अबुं स्वया काय् नं राज्य तक यानाः थकल । थथे यें देय् तक याना थक्म्ह पवि हे पचलि भैरव खः ।

फम्पिया जुजु भैरव जूगुलिं फम्पिं पितिना ह्याः थन थ्यंगु खः । धाइपिं नं दु । नेवाः समाजय् थीं त्यः मत्यः धयागु परम्परा जयस्थिति मल्लं जातिय व्यवस्था याये धुंकाः जक जूगु खः । उकिं श्व लोक बाखं नैनाप जूम्ह फम्पिया जुजु धकाः धायेगु धयागु परिकल्पना जक खः । जातिय प्रथा हे मदुनिबलय्याम्ह पचलि भैरव खः । उकिं पचलि भैरवयात ज्यापुतय्सं मल्लपिसं नं थःगु पूर्वा धकाः नाला कया वयाच्चंगु खः ।

पचलि भैरव फम्पिया जुजु खः धयागु छुं छुं प्रमाण थौकन्ह्य मोहनबल्य अन त्यपया जात्रा यायेगु चलन दु । तर तेपय यैयाः पचलि भैरव थें मूर्ति मद्दु । तेपया गःपतय भैरवया जन्तर थें जक दु ।

पचिमन्हःकुन्हु पचलि भैरव जात्रा याये न्ह्यः आशिवन प्रतिपदाकुन्हु छःपाःलाःतयसं छःपाःलाःया छैय् नं पुंया छैय् तये यंकी । पुनं पचलि भैरवयात लंपुलिं छायेगु याइ । लंपुलिं छाये धुंकाः थकू जुजुया छैय् तये यंकी । भिंछःत्वाःया थकू जुजुं पचलि भैरवयात छःपूजा यानाः तिसा वसः पुंकाः अय्लाः श्वै, न्या, खैय् ला, बजि, स्याःबजि, वः आदि तयाः पचलि भैरवया त्यप जायेकाः पूजा याइ । थुलि याये धुन धायेवं थकू जुजु अट्कोनारायण छःयाथाय् वनी । लैय् हे च्वनाः खासि पूजा यानाः उकिइ कंभाः तयाः चिकंमुगः, भिंछः, मरु, भुतिसलय् स्वचाः चाःहिकाः पचलिइ यंकेगु याइ । थकू जुजु छैय् मद्दुगु ताकाय् पचलि भैरव थकू जुजुया छैय् यंकाः पचलि गमय् तयेगु याइ । कंभाः दुगु खसि पूजा यानाः पचलिइ यंकाः पचलि भैरवयाथाय् वांछ्या बी । श्वयात खासि ब्वयेकेगु धकाः धाइ । थथे वांछःगु खासि कयाः ज्यापुतयसं पचलि भैरवयाथाय् च्वंगु बेताःया थाय् भपुका बिड । अनं पचलि भैरवयात पूजा यानाः जात्रा यायेगु याइ । पचली भैरवयात गमय् तयाः पूजा याइबलय् न्हापां गल्पय् थनातःगु लिक्क्याः न्हूगु गल्पय् थनेगु याइ । थथे गल्पय् थनीबलय् दकले न्हापां थकू जुजुं हे थनेगु याइ । अनं लिपा तिनि मेमेपिसं गल्पय् थनेगु याइगु खः । पचलि भैरवया क्वंचा गल्पय् थनेबलय् श्रद्धा भाव थनेमाः । छक्कः जुजु शिवसिंह मल्लं पचली भैरवया क्वंचाय् गल्प थंबलय् अज्याःगु क्वंचा छवः नं थनेगु खःला धकाः चीधं खंकाः गल्पय् थंबलय् गल्प जायेकां जायेके मफयाः यल देय्या दक्को अय्लाः श्वै हयाः थनाः नं जायेके मफू जुजुं क्षमा फ्वनाः पूजा यासेलिं गल्प जाल धायेगु याः । अथे जूगुलिं हे त्यपय् अय्लाः श्वै तयातइबलय् पचली भैरवया जल तयाः साइत यानाः तयेगु नं चलन दु । पचली भैरव पूर्णतया प्रतीक नं खः । अथे जूगुलिं शिवसिंह मल्लं ने.सं. ७०५ य पचली भैरवया रथ जात्रा यायेगु चलन न्ह्याकूगु खः ।

पचलिइ पचलि भैरव न्हिछि तयाः पूजा सिधल धायेवं बहनिइ जात्रा यायेगु याइ । पचलि भैरव जात्रा याइबलय् पुलु छपाः प्यपु पैंथय् इलां तयाः जात्रा यायेगु चलन दु । थौकन्ह्य श्व इलां प्यनेगु मयाये धुंकल । पचलि भैरवया जात्रा पचलिं हयाः नेशनल ट्रेडिङ्ग ग्वफः, लगं, न्हूघः, मरु, हनुमानधवाका, अनं हानं वहे लैपुं लिता हयाः छःपाःलाःया छैय् पचलि भैरव छः बिज्याकेगु याइ । थथे पचली भैरवया जात्रा याइबलय् लैय् हाथुछः ब्वयेगु नं याइ । पचली भैरव जात्रा यानाः हइबलय् लैय् लैय् ब्वयातःपि हाथुछःयात हाथु हायेकेगु समय् इनेगु नं याइ । गुम्ह गुम्हसिया हाथु हायेकेगु गुथि नं दु । थौकन्ह्य हाथुछः ब्वयेगु आपाःसिनं मयाये धुंकल । पचलि भैरवया जात्रा याइबलय् गुथियारया जिलाजं भाजु वा भिंचा भाजुपिसं, नै अजिमाया प्रतिक कथं पात्र ज्वना नं जात्रा यानाः यंकेमाः । श्व

जात्राय् स्वम्ह छःया जात्रा याइ । छम्ह ब्यलय् च्वम्ह मेम्ह मेगु दैय् पाः काइम्हसियाय् जुवाःछःया गंछि व त्यप आजु छम्ह जात्रा याइगु खः । गंछि छः ब्यलय् ब्वये यंके माःसा गंछिपाखें छम्ह हे जक जात्रा याइगु खः ।

श्व जात्राया याये न्ह्यः नःला स्वने चःहेकुन्हु छःपाःलाः याथाय् च्वम्ह पचलि भैरवयात पूजा यानाः फछि फछि बजिया भव्यब्व तयाः भव्य नयेगु यायेमाः । पचलि भैरवया जात्रा याइबलय् परम्परा कथं फकंसनां, पचली भैरवया गल्पं लिकाःगु अय्लाः श्वै व पचलि भैरवयात तइगु कं इना बीगु चलन दु । श्वफुकं विकारया वासः स्याःगुया वासः धकाःनं कायेगु याः ।

वःलाः तयेगु

ज्यापु जातिया काय्मचा ज्यापु समाजय् दुथ्याकेगुया लागि वःलाः तयेमाःगु परम्परा दु । पचलि भैरवयात गमय् तइकुन्हुनिसं गमय् तयाः तै कुन्हु वःलाः तयातःपि मिजमचात पचलि भैरवया स्तुति वःलाः हाला छः चाःहिला च्वनेगु नं याः । वःलाः च्वपिं मचातयसं वःलाः हालिइबलय् पचलि भैरवयात आजु आजु आजु धकाः नं सम्बोधन याना च्वनिगु नं खनेदु । पचिमन्हःबलय् क्वःने च्वपिं ज्यापुत फुकं पचलि भैरवयाथाय् वःलाः तयेगु याइ ।

पचलिभैरव व लुंमन्हि अजिमा प्याखं

भिनिदैय् छक्कः गथुतयसं पचलि भैरवया प्याखं पिथनेगु यानाः मोहनिया चालं वा बिजया दशमिकुन्हु पचलि भैरवलिसे जुजुपिसं भुतिसलय् च्वनाः खड्ग हिलेगु परम्परां थौतक नं न्ह्यानाः वयाच्चंगु दनि । भिनिदैय् छक्कः जुजुयात खड्गसिद्धि बीगु कथं खः । जुजुनापं खड्ग हिले धुनेवं प्याखं पिदनेगु याइ अले दबू दबुलिइ प्याखं ल्हुइकेगु नं याइ ।

कूछि भव्य

मोहनिया सुरु छैय् छैय् नःला स्वां पिनाः सुरु जूसा कूछिभवजनिसं मोहनि नखःया भव्य सुरु जुइगु खः । कूछिभव्य कौलाश्व अष्टमी अर्थात आशिवन शुक्ल अष्टमीकुन्हु नइगु भव्य खः । नेवाःतय् श्व भव्य गुम्हसिया मोहनिया भव्य

धकाः सुथनिसैं हे छः छःपिं, पीठ पीठ पूजा यानाः नयेगु याःसा गुम्ह गुम्हसिया छःछः छुं हे पूजा मयासे बहनी जक भव्य नयेगु याइ । गुम्ह गुम्हसिया छःछः पीठ, पीठ, पूजा यानाः दुगु, हँयखँय आदि हिंसा यानाः सुथय भव्य नयाः बहनी छँय जःछि च्वनाः सुथय छःछःपिंथाय बलि ब्यूगु दाजुकिजापि च्वनाः सिकाःभू यायेगु चलन दु । साधारणतया पशुपक्षियात अथें हिंसा स्वयं छःछःपिन्त बलि बियाः प्राणिपिन्त मुक्ति यानाः हर्ष उलासं सी कायेगु याइगु हिंसा याःम्ह खः अर्थात प्राणीयात मोक्ष बियाः उकिया प्रसाद ग्रहण याःगु खः । अथें पशुपक्षियात स्यात धाःसा पाप लाइगु, छःछःपिन्त बलि बिल धाःसा हिंसाया पुण्य लाइ धकाः हिंसा यानाः सी कायेगु याइपिनिगु मानसिकता दु ।

कूछिभव्य कुन्हुनिसैं मोहनि नखःया भव्य सुरं जुइगु जक मखु, छँय थः च्वनागु थाय् थासय मोहनिबल्य सर सफाइ यायेगु चलन दु । उकिं मोहनि विशेष यानाः नःलास्वां पीकुन्हु नःलास्वां पीगु थाय् छथाय सुचुपिचु नीसी यानाः नःलास्वां पीगु याःसा मोहनि नखः हनेबल्य विशेष यानाः कूछिभव्यकुन्हु सर सफाइया नापनापं नीसी यानाः छँय वा थाय्बाय्यात पवित्र याये धुंकाः भव्य ज्वलं ज्वरे यानाः भव्य नयेगु याइ ।

मोहनि नखःया न्हापां भव्य नयेगु दिं कूछि भव्य खः । कूछि भव्यकुन्हु सुथनिसैं भव्य नये माःपिनि फूलपातिकुन्हु बहनीनिसैं भव्य नयेगु परम्परा दुसा फूलपाति माने याये म्वाःपिनि धाःसा कूछिभव्यकुन्हु निसैं मोहनिया भव्य नयेगु परम्परा दु । अप्वः धया थें नेवाःतय फूलपातिकुन्हु विशेष छुं ज्या यायेम्वाः । यायेगु हे जुल धाःसा छँय सुचिनिचि यानाः बँ थिलाः वसः हियाः मोहनि नखःया लागि छँय नी यायेगु याइ । गुम्ह गुम्ह नेवाःजातितय जक थव कुन्हु बहनी भव्य नयेगु याइ । फूलपातिकुन्हु भव्य नये माःपिं नेवाः विशेष यानाः न्हापा हनुमान ध्वाकाय् हैगु फुलपाटीइ ब्वति काये माःपिं खः । राणातयगु इलय् थौंकन्हय् स्वयां फूलपाटीकुन्हु विशेष उत्सव यानाः हनिगु जूगुलिं यानाः दरवारय् दुने दुथ्याःपिं भाइभारदारपिनि सरकारी कार्यालय वा सरकारी रुपं फुलपाटी कयाः भव्यतां हनेगु जक मखु छँय छँय नं भव्य नयेगु नं याइ । राणा सरकारया इलय् यानातःगु बाध्यता थौं तक्क न्ह्याकाः च्वंगु जुइफु । हनुमान ध्वाकाय् फूलपाटी हयाः शाहतय पूजा यानाः बधाई याइगु थासय श्री ५ या सरकारया उच्च पदाधिकारीपिं थौं तक्क नं उगु फुलपाटीया लागि हनुमान ध्वाकाय् उपस्थित जुइमाः । थवकुन्हुनिसैं कोजाग्रत पूर्णिमा तक्क सरकारी कार्यालय फुकं बिदा जुइ ।

हनुमान ध्वाकाय् दैय् दसं हनीगु फुलपाटी ज्याइवःनाप नेवाःतय सांस्कृतिक रुपं छुं सम्बन्ध मदु । उकिं फुलपातिकुन्हु छुं नं उत्सव हनाः नेवातयसं भव्य नयेगु चलन मदु । थव छगू कथं नेवाःतयगु परम्परा खः । यदि सुयां गुगुकथं थवकुन्हु भव्य यायेगु याःसा अपिं पृथ्वीनारायण शाह नाप यँय दुहां वःपिं नेवाःत जुइमाः ।

नेवाः जातिया भव्यबल्य इलयबल्य थी थी लप्ते छ्यलाः भव्य नयेगु चलन दु । सीपिन्त सराद याइबल्य पिण्ड कुसालप्तेय तयेगु याःसा म्वाःपिनि इलय ब्यलय थी थी लप्ते छ्यलाः भव्य वा नसा नयेगु याः । पञ्चदान बलय पलालप्ते छ्यलेगु व मोहनिया कूछिभव्य नयेगुया लागि केरालप्ते छ्यलेगु याइ । केरा जक मखु केरामा, केरालप्तेयात भिंगु पवित्रगु कथं कायेगु याः । उकिं कूछि भव्यया लागि केरालप्ते छपाः छपातं छ्यलेगु याइ । कूछि बजि तयाः उकियात ल्वयेक मांसाहारी घासाता तयाः नयेगु तःजिगु भव्य खः कूछिभव्य ।

कूछिभव्य धकाः कूछि मानाय् दानाः छँय जःछि परिवारपिन्त भव्य तयाः थजि कथं भव्यःछुनाः नइगु भव्य खः । भव्यया नां हे कूछिभव्य जूगुलिं छँया जःया दकले तःधिकःम्ह छम्ह निम्हसित धाथें हे कूछि बजि कूछि मानां हे दानाः भव्य तयेगु धाःसा मेपिन्त निम्नागु कुलय् दुने कापःग्वारा तयाः उकिइ छःने जक बजि तयाः भव्य तयेगु याइ । थव भव्य कूछि बजि तयाः भव्य नइपिं छँया जःपिन्त जक मखु छँ जःपिसं छ्यला वयाच्वंगु बस्तु, जीवन निर्वाहया लागि आय आर्जनया सरसमान, परिवाय् मदयें धुकूपिनि नामय् सिक्कब्व नं तयेगु याइ । थथे कूछिभव्य छःछःपिं नापनापं, हासा, तुफि, ल्वहंमा, उगः लुसि प्वाकः त्यप, घः भुत, सेफ आदि सरसमानयात मोहनिया कूछिभव्य छायेगु चलन दु । कूछि भव्य धकाः वास्तव्य परिवार जःछि जक च्वनाः नइगु भव्य खः । नेवाः जातिं थथे छः, सीपिं व छँय व्यवहारया लागि छ्यलीगु बस्तु फुकसितं छँया जःहे भाःपाः भव्य नकेगु वा छायेगु यानाः वयाच्वंगु खः ।

फुकसितं केरालप्तेय हे तयाः भव्य छायेगु याइ । तर कूछि भव्य जूसा छः वा छँया थी थी सामग्री छाइगु भवजय् कूछिया भाकां छःब्वये थें चीचीकूक केरा लप्ते चानाः उकिइ भव्यब्व तया छायेगु खः ।

खयेत ला कूछि कूछि बजिया भव्य न्हापा पूर्खापिसं लुदंक नयेगुया लागि कूछि बजिया भव्य नयेगु यानाः वःगु जुइमा वा छँ दक्को जःछि फुकं नापं च्वनाः लिपा छुं कायेम्वायेक नयेगु जूगुलिं थथे कूछि भव्य नयेगु परम्परा न्ह्याःगु जुइमाः । शारीरिक रुपं ज्या सनाजुइपिं, बल यक्व दुपिसं कूछि बजिया भव्य नये मफइ धयागु मदु । नये फुपिसं नयाः, नये मफुपिसं थःत अप्वःगु बजि निसैं न्ह्यागु नं लिक्काः नयाः थःत माछि जक नं कयाः नयेज्यूगु थव भव्य खः । कूछिबजिया भव्य लुधंक नयेगु भव्य जुइमाः ।

नेपालय् च्वपिं नेवाःतय कूछिभव्यकुन्हु फुकसिया थें तुं थजिनिसैं इवःलाक कूछि कूछि बजि तयाः भव्य इवःछुइ । थुबलय् छँया हामां बुद्धधर्म माने याइपिं जूसा पञ्चबुद्ध व हिन्दूधर्म मानेयाइःपिं जूसा पञ्चदेवी व गणेशः पूजायानाः छँया परिवारपिन्त सगं बीगु याइपिं नं दु । यँ थथे भव्यबल्य छसीनिसैं च्वनाः छँया नकिनं थवै वः अयलाः लाय् बिइगु धकाः अयलाः वा थव जाःगु ख्वला सकसितं ल्हातय् लःल्हाये धुंकाः छःछानाः भव्य नयेगु सुरु याइगु खः । तर बनेपाय्

३	स्वक्व (स्वम्ह थाकुलि)यात	जवगु न्हाय्प
४	प्यक्व थाकुलि	खवगु न्हाय्प
५	न्याक्व थाकुलि	म्ये
६	खुक्व थाकुलि	जवगु न्हकु
७	न्हय्यक्व थाकुलि	खवगु न्हकु

चालं

अथेतुं खा वा हँय् जूसा थुकथं सी भाग तयेगु याइ ।

जेठाम्ह	नायःयात	छ्य
माहिला	न्वक्वयात	जवगु पपू
साहिला	स्वक्वयात	खवगु पपू
काइला	प्यक्वयात	जवगु तुति
थाइला	न्याक्वयात	खवगु तुति
६	खुक्वयात	
७	न्हय्यक्वयात	

थुकथं सिकाय्भू यायेगु याइ । यदि सिकाय्भू ब्वति स्वयां सिकाय्भू नइपिं आपाः दत धाःसा ला छक् सीया रुपय् बीगु याइ ।

महाअष्टमी व महानवमीया दथुया वा कालरात्री धकाः यँ यल, ख्वप, बनेपा आदि थाय् थासय् लाय्कूया तलेजु दुने तान्त्रिक धंगं पूजायानाः मेय् दुगु, हँय्, खा आदि बलि बीगु याइ । ख्वपय् तलेजु भवानीया थाय् ८४ प्रकारया मरिया फः, पौ, व गज्जु समेत तयाः देगः दयेकेगु परम्परा दु । बिजया दशमीकुन्हु थ्व हे मरि लिक्काः प्रसाद कथं इनाबीगु खः । यँ, यल, ख्वपय् तलेजु भवानीया थाय् बीगु पञ्चबलि श्री ५ या सरकार पाखें पूजा याइगु खः । थ्वकुन्हु न्हिछि हनुमान ढोकाया तलेजुया लुखा चायेकाः भक्तजनपिन्त दर्शन याकेबी । पूजा सिधल धायेवं तलेजु भवानीया जात्रा याइ । मोहनि नखःया दकले तःधंगु दिन कथं महानवमीयात कयातःगु खः । थ्वकुन्हु भगवती अजिमा, पीठ, गणेश, योगिनी, भिंछः आदि देवदेवीपिन्थाय् नःलि स्वां तयाः पूजा बनी । बलि माःपिनि छःछःपिन्त बलि बियाः पूजा यायेगु नं याइ । विशेष यानाः समय तयाः पूजा यायेगु याइ । ला मनःपिं छःछःपिन्त छ्यःकस्ति तयाः पूजा यायेगु याइ । कालरात्री कुन्हु हे मू चुकया आगमय् कुमारी तयाः पूजा यायेगु याइ । लाय्कूया कुमारी हिले माल धाःसा नं छम्ह कुमारी मेम्ह कुमारी हिलेत निम्ह तयाः पूजा याइ । कुमारी हिलेम्ह मचायात मेय् छ्यं दुगु थासय् तयाः पूजा याइ । यदि मचा याकःचा तयाः पूजा याइबलय् मग्याःम्ह मचायात कुमारी धकाः पलिस्थाय् यायेगु याइगु खः ।

आश्विन शुक्ल दशमी अर्थात कौलाश्व दशमीयात बिजया दशमी धकाः धाइ । थ्व दिंयात नेवाःतय्सं “चालं” धकाः नं धायेगु याः । थ्वकुन्हु नं महानवमीकुन्हु आगमय् स्वनातःगु थी थी पूजा सामान क्वकायेगु जूगुलिं थ्वयात “चालं क्वकायेगु” धकाः धाइ । नःलास्वां पिनातःगु नलाःस्वां छःछःपिन्त स्याक्व त्याक्वकुन्हु पूजा यानाः छ्यायेगु याःसा प्रसाद कथं छँय्या जहानपिसं नःलास्वां थ्वकुन्हु पूजायानाः सिन्हः नापं प्रसादया रुपय् ग्रहण यायेगु याइ ।

“स्याक्वत्याक्व” कुन्हु पूजा यानाः स्वनातःगु थी थी सामग्री क्वकयाः हामानिसें थजिया आधारय् छगू छगू यानाबीगु जुइ । थथे ब्यूगु प्रत्येक बस्तु छःछःपिं आराधना यानाः पूजा यानाः शक्ति सम्पन्न जूगु शक्ति परिवारया जःपिंके दुबीना सफल जुइ धयागु कथं बिजया दशमी धकाः धाःगु खः । स्वनातःगु क्वकाये न्हयः दकले न्हापां भुयुफसियात स्वस्तिक चिं च्वयातःगु थासय् दिकाः तःधिकः निसें पालेगु याइ । अथेतुं तुमा पालुमायात नं स्वनातःगु हे खड्गं पालाः वछइ । थथे भुयुफसि, तुमा, पालुमा पालेगु धयागु मनूया बांमलाःगु चि, असत्य, अन्याः, अत्याःया अन्त यानाः स्वयम सफल जुइगु कथं खः । गुम्ह गुम्हसिया धारणा कथं छः व दैत्यया दथुइ त्वापु जूगु इलय् देवगणतय्सं दैत्यगणया संहार याःगु धकाः नं धायेगु याः । गुम्ह गुम्हसिया भुयुफसियात रावणया रूप धकाः रामं रावणयात स्यानाः विजय याःगु थें थःपिं राम थें सत्यनिष्ठ जुयाः रावण थें ज्याःम्ह निरगुण करपिन्त दुःख बीपिन्त अन्त याःगु खः धकाः धाइपिं दु । भुयुफसियात रावण वा दैत्य न्ह्यागु हे धायेगु याःसां दैत्य, धयापिं अन्यायी, अत्याचारी, व्यभिचारी, मभिंंगु ज्या याइपिनिगु प्रतीक खः । उकिं भुयुफसि नं बांमलाःगुया प्रतिक जूगुलिं भुयुफसि पालाः अन्त यानाः बांलाःगु लँपुइ जीवन न्ह्याका यंकेगु धारणा खः । अथेतुं तुमा पालुमायात नं मेय्, दुगु आदिया प्रतिकया रुपय् हिंसा याइगु खः । थ्वकुन्हु हिंसा याये स्वाःपिनि नं छःकुथिइ भुयुफसि, तुमा, पालुमायात क्वकयाः स्वनातःगु खड्गं पालाः अन्त याइगु खः । धाथें प्राणीया हिंसा मखु, बांमलाःगुया अन्तया प्रतिक कथं कयातःगु जक खः ।

महानवमीकुन्हु कुश पुजा यानाःतःपिनि उकुन्हु आन्ही जक कयाः सिधयेका तःसां चालंकुन्हु पूजा सिधयेकाः कुश पुजाया थापिं क्वकयाः चाहिकेगु नं याइ नापं चाया धालाचा व पतिंचा स्वनातःगु नं लिक्का परिवारया निम्हतिपूयात छज्वः व विवाह मजूपिन्त छज्वः छज्वः इनाबीगु याइ । थ्व धुंकाः भुयुफसि पालेगु

याइ । पालातःगु भुयुफसि न्ह्यःने तयाः मुखः गं, बज्र, डबडब, ताः आदि
क्वकयाः, मुखः पुयाः गं थायेगु नापं बज्र चाहिकेगु डबडब ताः थायेगु याइ ।
गुरुजुपिनिगु सफू क्वकया भागि यायेगु याइ । अथे तुं मिसापिनि वा पाथी जाकि
पाथी लः ल्हाना कायेगु याइ । भुयुफसि तुमा पालुमा न्ह्यःने तयाः थःगु पेशागत
सामग्री लः ल्हाना कायेगु धयागु मखुगु अन्याय अन्त जुल उकिं थःथःगु पेशागत
ज्याय् सफल जुल त्यात धकाः खः । अर्थात् मखुगु मज्युगु बिनास यानाः खःगु
स्वीकार यायेगु खः ।

गुम्ह गुम्हसिया द्यःद्यःपिनिगु प्रसाद कथं सिन्हः जक तीगु मखु थः
स्वयां तःधिक पिनिगु ल्हातिं सिन्हः तिनाः दछियंक याःगु ज्या बांलायेमा भिनेमा
धकाः सुवा फयेगु नं याइ । तःधिकःपिसं चीधिकःपिन्त सुवाः बीगु नं याइ । दकले
न्हापां थःगु छैय् च्वम्ह थजिपिपाखें सिन्हः तिकाः सुवाः फयाकाये धुकल धायेवं
तिनि मेमेपिनिगु छैय् वनाः थःस्वयां थजिपिनिगु ल्हातिं सिन्हः फयाः सुवाः कायेगु
याइ । छगू कथं थथे सिन्हः त्यु वनेगु धयागु थःस्वयां थजिपिन्त हनेगु नं खः । थः
स्वयां हनेमाःपिपाखें सुवाः फयेगु ज्या चालनिसें कौलाथ्व पुन्हि तक्क याइगु जूगुलिं
नं श्री ५ या सरकारं नं पुन्हि तक्क बिदा यानातःगु खः ।

पायाः

पायाःयात “खड्ग जात्रा” धकाः नं धायेगु याः । पायाः धयागु
पालेगु जात्रा खः । पालेगु जात्रा वा पालेगु यात्रायात चिहाकलं पायाः धकाः धायेगु
याःगु खः । खड्ग धयागु सिद्धिया प्रतीक खः । “खड्ग जात्रा” सिद्धिया जात्रा
खः । वास्तव्य असत्ययात सत्यं त्याकाः याःगुया जात्रा खः ।

पायाः छाया धयागु खैय् जनधारणा थथे दु । दैत्यतयसं शक्तिशाली
जुइगुया लागि तपस्या च्वनाः द्यःपिके वरदान फ्वन देवं नं दैत्यतयसं तच्चतं थाकुक्
तपस्या याःगु खनाः लयतायाः वरदान बिल । शक्तिसम्पन्न यायेगु सुरु जुल । थुलि
तक्क कि थःत वरदान ब्युपिं द्यःपिन्त अन्त यायेत स्वःसेलिं महालक्ष्मी,
महासरस्वती, व महाभगवतीपिसं दैत्य छम्ह छम्ह मालाः हत्या यानाः जुल । थथे
दैत्य दक्कसित मालाः मालाः हत्या यानाः जूगुलिं दैत्य नं खैय् हँय्, दुगु मेय्या दुने
दुब्यु वनाः सू वन । थथे सूर्वापिं नं मालाः मालाः स्यायेगुया लागि द्यःद्यःपिं खड्ग
ज्वनाः पिहाँ वयाः माः जूगु हे “खड्ग जात्रा वा पायाः” वःगु खः । थथे पायाः
वयाः मातुमाला स्यायेगु याइगु खः । अथे जूगुलिं पायाःलय् थी थी द्यःपिनि
प्रतीकया रूप्य वयाः दुवातय् वा द्यःद्यःपिनिगु न्ह्यःने भुयुफसि तु पालेगु याइगु
खः । थुकथं भीथाय् नं चालंकुन्हु यँया थी थी थासं पायाः पिहाँवयेगु याः ।

- १) तेबाहाः पायाः
- २) किलागः पायाः । वनेमा पायाः
- ३) कंग पायाः
- ४) क्वहिति पायाः
- ५) मरु पायाः
- ६) महाबौद्ध, वंतु पायाः
- ७) असं पायाः
- ८) थमेल बाय् थँहिति पायाः

असं पायाः छगू बाहेक फुकं बिजया दशमी वा चालंबलय् पिहां
वड्गु खः । असनय् च्वंपिनि चालं कौलागाः एकादशीकुन्हु क्वकायेगु याइ अले
पायाःनं उकुन्हु हे तिनि वाइगु खः । असनय् च्वंपिनि आगमय् स्वनेगु स्याक्व त्याक्व
कुन्हु हे यायेगु याःसां मेपिनि स्वयं छुन्हु अप्वः स्वनाः कौलागाः एकादशीकुन्हु चालं
क्वकायेगु याइगु जूगुलिं पायाःनं थुबलय् पिहां वयाः असंमरु गणेद्यःया न्ह्यःने
भुयुफसि तयाः पालेगु याइगु खः ।

पायाः वःपिसं हे गुम्हसिनं बाजं थाना वःसा, गुम्हसिनं भुयुफसि पूजा
ज्वलं खड्ग, ज्वनावयेगु याइगु खः । अले निश्चित थासय् तयाः भुयुफसि पालाः
लिहाँवनेगु याइ ।

गथेकि कंग अजिमाया पायाः धकाः यतखा त्वालय् कंगः अजिमाया
छैय् दु । स्याक्वत्याक्वकुन्हु कंग अजिमाया छैय् पूजा यानाः स्वनातःगु चालंकुन्हु
पूजा यानाः पायाः पिहाँ वयेगु याइ । छपु धुँज्याबुँज्या हिकाः ज्यापु बाजं थानाः,
तुयुगु म्हासुगु, वँचुगु, ट्याँउगु, सन्तलासि आदि रङ्गया कापःया जामा फिन्ः खड्ग
ज्वना, भुतया छ्वाःपाः दुगु बौ ज्वना, यतखाया कंगअजिमाया छैय् पायाः पिहांवयाः
न्यतं कुहां वनाः कंग अजिमा चाःहिलाः यतखाय्च्वंगु कुमारीया न्ह्यःने भुयुफसि
तयाः छम्ह छम्हसिनं पालंपाः पालावनी । भुत छ्वाःपाःदुगु बौ नं अन हे तुं वां कछ्या
वनी । थुकथं कुमारीया न्ह्यःने दैत्यतयत् प्रहार, यानाः वनीगु खः ।

थी थी रङ्गया वसः पुना वडपिलय् म्हासुम्ह वसुन्धरा, ह्याँउगु
कुमारी सुन्तलारङ्गम्ह अजिमा वँचुगु भैरव आदि द्यःद्यःपिनिगु प्रतीकया रूप्य
पिहांवयाः दैत्य संहार यानाः वनीगु खः । पायाः वडपिं खालि जामो सिनातःपिं जक
मखु, साधारण वसः पुनाः नं वयेगु याः । पायाः वडपिं प्रत्येक पात्रतयसं छपु छपु
खड्ग ज्वनावड । म्हासुगु वसः पुनातःम्ह वसुन्धरा द्यःला हिंसा मयाइम्ह द्यःखः ।
छगू कथं अन्याय अत्याचराया न्ह्यःने थज्याःगु अन्त यायेगुया लागि खड्ग ज्वनाः
वयाः भुयुफसि पालाः असत्यया अन्त याःगु खनेदु ।

पायाः पिहां वये न्ह्यः कुमारी पूजा यानाः शक्ति सञ्चय यायेगु
चलन दु । दैत्यया अन्त कुमारीया न्ह्यःने यायेगु कंग पायाः जक मखु व पायाःया

वा किलागः पायाः नं किलागः या कुमारी तयातः गु थासय् न्ह्यः ने हे भुयुफसि तयाः पालेगु याइगु खः ।

मरु गणेद्यः या जात्राः

यैया लाय्कू गणेद्यः वा मूल गणेद्यः धकाः मरुइ दु । गुम्ह गणेद्यः यात मरु गणेद्यः धकाः नं धा । गजू मदुम्ह मरु गणेद्यः या जात्रा कंग पायाः जात्रा सिधल धायेवं कौलाश्व दशमी अर्थात् चालंकुन्हु चान्ह्य गमय् तयाः कौलाश्व एकादशीकुन्हु खतय् गणेद्यः तयाः जात्रा यायेगु याइ । श्व द्यः यात राजदरवारनिसें मरुया वरिपरी त्वाः त्वाल्य गल्ली गल्ली जात्रा यायेगु याइ । मरु गणेद्यः स्थान गणेश कथं हनीपिनि गणेद्यः जात्रा यानाः हडबल्य मेय्, हँय्, खा, खँय् आदि वलि पूजा बिया यायेगु चलन दु । मरुया जःखः या त्वाल्य सुथय् छकः व बहनी द्यः छँय् दुतयंकेत छक्वः निक्वः द्यःखः छँय् छँय् वनाः पूजा फःवनेगु चलन दु ।

नखत्या

नेवाः तय् थःगु हे पहलं तःजिक हनिगु मोहनि नखः या म्हाय्मचा भिनामचापिन्त नखत्या सःता मोहनिबल्य पूजा याःगु मोहनि सिन्हः व जाकि सिन्हः तिकाः नःलास्वां प्रसाद बीमाःगु परम्परा दु । थुबल्य थः सतीपिं म्हाय्मचा भिनामचात जक मजुसे तापाःपिं म्हाय्मचा भिनामचातय्त नं नखत्या सःतेमाः । नापं म्हाय्मचा भिनामचां यानाः नाता क्यपिं जिलाजपिन्त नं श्व नखः या नखत्या सःतेमाः । श्व नखः तःजिगु नखः जूगुलिं हे तापाल्य वनाच्चपिं काय्मचा म्हाय्मचा मोहनि नखः हनेगु थः थितिनाप लायेगुया लागि थःथःगु छँय् वयेगु याइगु खः । छगू तःधंगु उत्सव जूगुलिं यानाः छँय् जःछिया न्हूगु वसः सुया द्यःयाथाय् पूजा याःवनेत् व नखत्या वनेत पुना वनेगु चलन दु । म्हाय्मचा भौमचापिन्त जःछियात परिवारं हे दछिया छजु वसः तयाबीगु धकाः मोहनिबल्य न्हूगु वसः पुनेगु चलन दु ।

मोहनि नखः नःलास्वां प्युसानिसें न्ह्यानाः कतिपुन्हिबल्य क्वचाइगु जुइ । श्वकुन्हु हे द्यःकुथिइ पिनातःगु नःलास्वां पिखालखुइ वानाः मोहनि सिधल धकाः क्यनेगु जुइ ।

स्वन्ति

नेवाः तय्सं नखः चखः हनेगुलि मोहनी नखः धुंकाः छुं दि लिपा हनेगु याना वयाच्चंगु नखः धयागु स्वन्ति खः । क्वःपुजा खिचापुजा लक्ष्मीपुजा म्हपुजा व किजापुजा धकाः थी थी कथं न्यागु पुजा याइगुलिं श्व नखः यात संस्कृत भाषां यमपञ्चक धकाः नं धायेगु याः । श्व न्यागु मध्यय् नं लक्ष्मीपुजा म्हपुजा व किजापुजा स्वंगु विशेष महत्व बियाः हनेगु नखः जूगुलिं स्वन्ति धकाः नं धायेगु याःगु खः धकाः धाइपिं नं दु । भाजु पुण्यरत्न बज्राचार्यया धापू कथं “न्हापा न्हापा नेपाः देशय् स्वन्ति नखः लक्ष्मीपुजा कुन्हु निसें किजापुजा तक फुक्कं याना स्वन्हु जक न्यायेकेगु याइगु जुयाच्चन । उकिं श्व नखः यात स्वन्हु तिथि नखः या चीहाकःगु नामं स्वन्ति नखः धायेगु याःगु खः (बज्राचार्यः १०८४:५२ ५३) । नखः गुकथं हनेमाः धयागु खँ वय्कलं थुकथं प्रस्तुत यानादीगु दु ।

“आश्विन कृष्ण द्वादशी कुन्हु खिचायागु पूजा, स्वाती नक्षत्रं संयुक्त जूगु औंसीकुन्हु सुथय् सायागु पुजा व बहनी लक्ष्मीयागु पुजा व अथेंतुं कार्तिकशुक्ल प्रतिपदाकुन्हु सुथय् गोवर्द्धन पूजा, बलिराजाया पुजा व बहनी थःगु म्ह पुजा यानाः छुं म्हित्यगु नं यायेगु अले वयां कन्हेय् कुन्हु अर्थात् कार्तिक शुक्ल दुतिया कुन्हु ततां किजायात बा केहेनं दाजुयात पुजा यायेगु” (बज्राचार्य वहे ५३)

थी थी वंशावलीइ यमराजं थःगु न्हिं न्हिया ज्या त्वःताः थः केहे जमुनाया थाय् वयाः न्यान्हुयंक च्वंवःगुलि यमराजया उगु न्यान्हु दियात यमपञ्चक धकाः धाःगु खः धकाः नं उलेख यानातःगु दु । अथे जूगुलिं श्व न्यान्हु तक यमराजं सुयातं काः वइ मखुगु जूगुलिं श्व न्यान्हु तक सुयां मृत्यु जुइमखु धायेगु चलन दु । तर श्व यथार्थ नाप गुलि सती गुलि तापाः व धाये थाकु । धाथें धायेगु खःसा स्वन्ति नखः धार्मिक स्वया आध्यामिक खँयात वाः चायेका हना वयाच्चंगु नखः खः । श्वबल्य याइगु पूजा मध्यय् लक्ष्मी पुजा छगू द्यःया नामय् पुजा यायेगु जूसाः मेगु फुक्क पुजा पशु पक्षि,

थःत व थः दाजुकिजायात पुजा यानाः न्ह्याका वयाच्चंगु नखः खः । मूर्ति पुजा स्वयां व्यक्ति पुजा वनं थः म्वाना च्वंगु समाजयात भिं याइपिं पशुपक्षि व थः स्वयमयात पुजा याना न्ह्याका वयाच्चंगु नखः खः । स्वन्ति नखः विशेष याना थःगु म्ह थःम्हं अर्थात् थःगु आत्मायात थःम्हं हे पुजा याना संसारय् थःहे फुक खः । थः दुसा संसार दु, थः मदुसा संसार मदु धयागु भावनात्मक अभिव्यक्तिया नखः खः । स्वन्ति नखः हनेगु परम्परा गुबलेंनिसें न्ह्यात धयागु एकिन याये मफुसां नं थः म्वाना च्वनागु समाजनाप सम्बन्धित पशुपक्षिनिसें व्यक्ति विशेषयात पुजा यायेगु परम्परा नेवाःतय्सं थः आदिवासी खः धयागु परिचय बीगु कथं खः । छःछःपिन्ति पुजा यायेगु परिकल्पना याये मसःनिबलय् निसें थःत आवश्यक कथं न्ह्याका वयाच्चंगु नखः जुइमा स्वन्ति । थ्व नखःबलय् विशेष यानाः क्वः, खिचा, सा, थःगुम्ह दाजु किजायात पुजा याना न्ह्याकीगु नखः खः । न्हापा न्ह्यथनागु पशुपक्षि व मनूया पूजायानाः न्ह्याका वयाच्चंगुलि लिपा थी थी धर्म हनेगु जुयाः उकिया प्रभाव नेवाःतय्त नं लाःगु चिं लक्ष्मीपुजा धकाः यायेगु जुल जुइमाः । धार्मिक पुराण ग्रन्थ सृजना जुइ न्ह्यः हे मनूया सृष्टि खः । उगु सृष्टि दुने मनुखं थःत छिं कथं माः कथं म्वाये सये धुकल जुइमाः । मनुखं हे पुराण ग्रन्थ सृजना याःगु खः ।

क्वः पुजा

स्वन्ति वा यमपञ्चकया दकले न्हापांया दिं क्वःपुजा खः । क्वःयात ज्वनाः पुजा याइगु मजुसे क्वःयात यःगु नसा विशेष यानाः ला जा कें तरकारी व मरिचरि तयाः क्वःया नामय् क्वःवड्गु थासय् तया बी । व हे नसा क्वः वयाः नः वयेगु याइ । थुकथं क्वःयात नसा तयाबीगु हे क्वःयात तयाब्यूगु भाग मेमेपिं पशुपक्षिं वयाः नया वनेफु । क्वः व भंगः पछि वःथाय् क्वःया नामय् तःगु नसा अथें अथें नं लाना च्वनेफु । क्वःपुजा धकाः कार्तिककृष्ण तृयोदशी कृष्णपक्ष कुन्हु क्वःया नामय् नसा तया स्वन्ति सुरुवात यायेगु खः । भीगु नेवाः समाजय् क्वःयात सन्देशवाहक धकाः कायेगु याना वयाच्चंगु दु । न्हिं न्हिं सुथय् छः तुइल कि “सुथय् जुल” धकाः धायेगु हे क्वः हालाहःगु सलं न्ह्यलं चायेकाः वेंसिबं पुइगु, नीलः कायेगु, याइगु खः । अथेंतुं

भवखाय् वड्गु छुं ई न्हापा भंगःपछि नापनापं क्वः हालाः उखें थुखें व्वया जुइगु याः । समाजय् सु नं तापालय् वनाच्चन धाःसा क्वः वयाः लाय् लाय् बुयाः हाः बल वा क्वः हाः बल धासा विदेश वना च्वपिनि बांलाःगु वा बांमलाःगु सुचं वड्गु धाडपिं नं दु । उकिं पुलांगु परम्पराय् विश्वास याइपिं मिसापिसं क्वः हाःबल धाःसा “सुबोल सुबोल” धकाः धयाखतं सपः हिनाः तःगु सपः फ्यनाः सैं पिया हानं सपः हिनेगु चलन दु । जिमि थःहे मामं दाजुपिं विदेश वना च्वनीबलय् क्वः वयाः लाय् लाय् बुल धायेवं थःगु सपः फ्यना “सुबोल सुबोल” धकाः धायेगु याइगु खः । यदि पिने विदेश वनाच्चपिनि बांमलाःगु स्थिति जुल धाःसा अथे सैं फ्यनाः व्छयेबलय् बांमलाःगु स्थिति अथें तरे जुयाः बांलाना वड्गु धयागु विश्वास झीगु समाजय् दु ।

कार्तिककृष्ण तृयोदशी अर्थात् कौलागाः तृयोदशीकुन्हु क्वःपुजा धकाः हनेगु चलन दु । क्वःयात सन्देशवाहक जक मखु यमया दुत धकाः नं धायेगु याः । क्वः सन्देश वाहक धयागु खें सिन्हपता मय्जुया बाखेंनय् पुनुखुमैचिया चिरिमाया म्हाय्यायात लाखे लसितय्सं स्यानाः वयागु ला दक्क नयाः बाकीगु क्वय् लाखेलसितय्गु छैं पानाः तल धकाः पुनुखुमैचिया चिरिमायात “मांया धाःसा समाः समाः म्हाय् धाःसा कँलाय् कँलाय्” धकाः क्वखं म्हाय्यायात स्यायेधूकुंगु खें मांमहसित सन्देश ब्यूगु उल्लेख जुयाच्चंगु दु । थ्व बाखेंनय नं क्वःयात सन्देश वाहक कथं प्रस्तुत यानातःगु दु ।

क्वःयात वातावरण सफा याइम्ह प्राणी कथं कायेगु याः । छुं नं सीम्ह प्राणीयात क्वानाः नयाः सफा सुगर याइम्ह धायेगु नं चलन दु । अथें तुं पत्तिड माकः वा ताहाःवा छुं वःगु क्वखं खन धाःसा लाय् लाय् बुयाहाला मभिंगु पाखेनं बचय् याना बीगु याः । मांया मतिना दुपिं प्राणी मध्यय् क्वःनं छगू जातया प्राणी खः । उकिं सुनानं क्वःया खें थ्वयेकातःगु दुसा खूबम्ह मनूयात न्यानाः हालाः लाय् लाय् बुया छ्यानाव्छाइ । अथेंतुं सुनानं क्वः यात स्यानाबिल धाःसा उम्ह सीम्ह क्वः खनाः हाला विलाप यानाजुइ । स्याःम्ह मनू वा पशु अमिसं खंसा लितुलिना दायाः न्यानाच्चनी । अथे संकटया इलय् फुकं छप्पं जुइसःपिं क्वःतय्के समाजं स्यना कायेमा धकाः क्वःयात पुजा यानातःगु खः । क्वःयात चलाखम्ह प्राणीया रूपय् नं कायेगु याः । मनु म्वायेत न्ह्यायेत चलाख जुइमाः । उकिं क्वःथें चलाख जू धकाः शिक्षा बी कथं क्वःयात पुजा याना वयाच्चंगु नं जुइमाः ।

धन्वतरी पुजा

कौला कृष्ण त्रयोदशीकुन्हु वैद्यपिसं क्वःपुजा जक याइगु मखु धन्वतरीयात वैद्यतय् गुरु भाःपाः धन्वतरीया पुजा यायेगु नं याः । श्व दिनकुन्हु ताःआयुया कामना यासैं श्रद्धा व भक्ति कथं हनेगु याना वयाच्चंगु खः । आयुर्वेद शास्त्रकथं धन्वतरी धयाम्ह आयुर्वेद शास्त्रया धुरंधुरम्ह विद्वान खः । आयुर्वेद शास्त्र कथं उकिं वयागु नाम हे धन्वतरी त्रयोदशी धकाः धायेगु जुल । सक्व चंगुइ च्वम्ह हरिहरिहरिहरिहर वाहन लोकेश्वरयात हिन्दूतय्सं चांगुनारायण धकाः धायेगु याःथें हिन्दूतय्सं, आयुर्वेदिक वैद्यतय्सं धन्वतरी धायेगु याःसा बौद्धमार्गी वैद्यपिसं धन्वतरीयात भैषज्य तथागत धकाः धायेगु याना वयाच्चंगु दु । उकिं क्वःपुजाकुन्हु बौद्धमार्गी वैद्यपिसं भैषज्य तथागत धकाः आयुर्वेदिक छःयात पुजा यायेगु याःसा हिन्दू आयुर्वेदिक वैद्यपिसं धन्वतरी पुजा धकाः यायेगु चलन दु । वैद्यपिनिगु छँ छँय् धन्वतरी धकाः छगू कथंया स्वांमा पिना उकियात न्हिं न्हिं पुजा यायेगु नं चलन दु । कौलागा त्रयोदशीकुन्हु धन्वतरी छःया उत्पत्ति जूगु दिं धकाः दँय् दसं वया जन्मदिं हनेगु परम्परा दु ।

खिचापूजा

कार्तिकशुक्ल चतुर्दशी कुन्हु यमपञ्चकया निगूगु/निन्हुगु दिं खः । श्व कुन्हु थःपिन्त रक्षा याइम्ह, भैरबया वाहन वा यमराजया दूत धकाः धयातःम्ह खिचायात पुजा यानाः हनीगु खः । खिचा पुजा कुन्हुयात नरक चतुर्दशी धकाः नं धायेगु याः । छँ लहिना तःपिं खिचा दुसा लहिनातःम्ह खिचा वा लहिनातःपिं खिचात मन्त धाःसा लाछिइ च्वनीपिं खिचायात थःगु पिखालखुइ सःताः सिन्हः तिकाः स्वांमाः क्वखायेकाः पुजा यानाः विशेष नसा ला नाप नापं मरिचरी तयाः नकेगु याइ । श्व कुन्हु छँय् जा थुया दकले न्हापां खिचायात निं

तयाः नकेगु चलन दु । खिचा गुण स्यूम्ह प्राणीया रूप्य नं कायेगुयाः । अथेतुं खिचायात सुचं वाहाकया रूप्य नं कायेगु याः । भ्वखाय् ब्वइगु जुल धाःसा न्हापां खिचातय्सं उइगु याइ । अथें तुं त्वालय् चान्हय् सुनसान इलय् खँ वल धाःसा दकले न्हापां उया त्वाःयापिन्त सतर्क याना बी । अथेतुं च्थाः बलय् च्थाःछः लुल धकाः खिचां हे उयाः संकेत यानाबी । खिचां ऊगुया भरय् च्थाःछः लुल धकाः च्थाःछःयात पुजा यायेगु याइ । थुकथं थी थी समाजयात सचेत यायेगु जूगुलिं खिचायात पुजा यायेगु याना वःगु खः । अथे जूगुलिं हे नेवाःतय्सं सराद याइबलय् थः पुर्खापिन्त जक पिण्ड तयेगु मजुसे खिचा व क्वःयात नं पिण्ड तयाः थुमित थःगु हे परिवारया जः कथं कयाः वयाच्चंगु खः ।

लक्ष्मीपूजा

“नाय् नं जुइ ज्यू प्वः नं जुइ ज्यू ध्यबा छताः मदयेक च्वने मज्यू” धकाः गुगु धुवा खः सुं जाति विशेषयात हेबाय् चबाय् याःगु मखु उकीया मू अर्थ मनू जुयाः समाज्य च्वनेत ध्यबा दयेका च्वनेमाः उकिं धनया उपासना या धयागु सन्देश खः । नेवाःतय् थी थी खँ वा ज्याया छः थी थीपिं दु । अथें तुं धन सम्पति सम्पन्न याइम्ह धकाः पुजा याइगु लक्ष्मी छः खः । स्वन्ति नखःबलय् तःजिक हनीगु दिं मध्यय् छगू लक्ष्मीपुजाया दिं खः । लक्ष्मीपुजा स्वयां न्हापागु पुजा क्वःपुजा, खिचापुजा धकाः उलि तःजिक हनीगु चलन मदु । तर लक्ष्मीपुजा धकाः स्वन्ति नखःया न्हापां तःजिक हनीगु दिं धयागु लक्ष्मीपुजा खः । लक्ष्मीपुजा धकाः लक्ष्मी, महालक्ष्मी, बसुन्धरा व अन्नपूर्णायात पुजा याइगु खः । समुद्रय दुने दुगु ज्वाहारात गथेकि भिंपू, मोति, कौडी आदिया छः लक्ष्मी, पृथ्वीपाखें उत्पादन जुइगु वा क्छ अर्थात बुँज्या पाखें उत्पादन जुइगुया छः कथं बसुन्धरा, खानीपाखें पिहांवइगु सम्पति, हीरा, माणिक, लुँ, पन्ना आदिया छः अन्नपूर्णा व पशु धनया छः महालक्ष्मी खः । लक्ष्मीपुजा धकाः वा, जाकि हीरामोति, दां सायात पुजा न्ह्याकीगु पुजा खः ।

थःथाय् छँय् लहिना तयाम्ह सा दःसा लहिना तयाम्हेसित थःथाय् लहिना तयाम्ह मदुसा सा लहिना तःथाय् वा अथे नं मन्त धाःसा लँय वःपिं वा त्वःतातःपिं सायात लक्ष्मी धकाः पुजा यायेगु नं चलन दु । मामं दुरु त्वंकाः लहिना तयेथें साया

दुरुयात अमृत समान भाःपाः त्वनेगु याइगु जूगुलिं सायात नं सम्मान याना पुजा यायेगु चलन खः । मनूत सीबलय् सा नाप वैतरणी तरे याना वनी धकाः सीपिनि नाम्य वा बिरामी जुया च्वनोबलय् अन्त्यय प्राण त्वःते न्ह्यः सा दान यानाः बीगु नं चलन दु । थथे प्राण त्वःते न्ह्यः सा दान यानाबिल धायेवं सा नाप वैतरणी तरेयाना स्वर्ग्य वनी धयागु धापू दु ।

कृषि प्रधान देशया लागि कृषि उत्पादन यायेत साःनं माः । वहे साया गोवरयात बुँड साः छ्यलेगु याः । सायात जक पवित्र भाःपियेगु याना तःगु मखु सां दुरु साया सौयात नं पवित्र कथं हे भाःपियेगु याः । उकिं शुद्ध यायेत साया दुरु व साया सौ तयाः पञ्चगभ्य दयेकाः हाःहाः यायेगु धार्मिक परम्परा दु । थुकथं सायात पवित्रम्हा प्राणी धकाः मानेयाना वयाच्वंगुलिं यमपञ्चक दुने सायात नं पुजा यायेगु परम्परा दुगु खः । लक्ष्मीपुजा कुन्हु सायात पुजा याना गुंपुन्हि कुन्हु ल्हाःतय् च्यगु जनै साया न्हिपनय् चिना बीगु परम्परा नं जनै चीमाःपिनि धापू दु ।

लक्ष्मीपुजा व साःपुजा आश्विनकृष्ण औंसी अर्थात् कौलागाः आमाई कुन्हु याइगु खः । नेपाल संवत् कथं थव दिं दँया दकले लिपा यागु दिं खः । लक्ष्मीपुजा न्हुगु दँयात सःतेगु व पुंलागु दँया अन्त जूइगुलिं वइगु न्हुगु दँ बांलाक भलमल धायेमाः च्यायेमा, जः व्हेले फयेमा धकाः न्हुगुयात सःतेगु जुगुलिं भलमल जुइक मतः च्याकेगु परम्परा दु । लक्ष्मी धयाम्ह सुचुपिचु झलमल जः दु थाय् जक च्वनी धयागु भावनां लक्ष्मीपुजाकुन्हु छँय् छँय् लक्ष्मी दुकायाः छयँछयँ धाःसानिसँ पाल्चाय् चिकं तयाः मत च्याकेगु याइगु खः । लक्ष्मी छः मतः दुथाय् झलमल जूथाय् जक वनी धयागु छपु ऐतिहासिक प्याखं दु । जुजु भूपतीन्द्र मल्लं च्वःगु “विक्रमचरित” पृथाः प्याखं कथं लक्ष्मीपुजाया प्रादुर्भाव जूगु थथे खनेदु । बिक्रमादित्य धयाम्ह छम्ह थज्याम्ह जुजु खः । गुम्हसिया न्याययात सुयां संका मदु । निस्पक्ष रुपं न्याय बीम्ह जुजु खः । विष्णु भगवानया निम्ह कलाः मध्ये छम्ह लक्ष्मी मेम्ह सरस्वती खः । लक्ष्मी व सरस्वतीया दथुइ न्ह्यावलें ल्वापु सरस्वती स्वयेबलय् लक्ष्मी स्वयां सरस्वती तःधं, लक्ष्मी स्वयेबलय् सरस्वती स्वयां थः तःधं धकाः च्वनीगु खः । निम्ह कलाःपिं तःधं चीधंया खँय् ल्वापुं जूगु विष्णु भगवानं सु तःधं चीधंया खँय् ल्वापु जूगुलिं विष्णु भगवानं सु तःधं धकाः क्वछी मफुत । छायाधाःसां निम्हय् छम्हसित तःधं धाल धाःसा मेम्हसिनं यःम्ह जुया लित धकाः तं चाइगु जुल । अथे जूगुलिं विष्णु भगवानं पृथ्वी लोकय् बांलाक न्याय याइम्ह धकाः लक्ष्मी व सरस्वती मध्यय् गुम्ह तःधं धकाः सीक्यत

बिक्रमादित्य जुजुयाथाय् व्छ्याहल । जुजु बिक्रमादित्यं नं थःगु विवेकं स्वयाः लक्ष्मी स्वयां सरस्वती तःधं धकाः निर्णय बिल । तःधं धाःम्ह सरस्वती स्वर्ग्य लिहाँ वन । लक्ष्मी धाःसा लिहाँ मर्वसे थःगु चमत्कार क्यनाः बिक्रमादित्ययात लक्ष्मी तःधं हे धायेके धकाः पृथ्वील्य हे पियाच्वन । थःगु विरोधय् निर्णय याःम्ह बिक्रमादित्य यात अनेक कथं यानाः राज्य त्वःता गरीवम्ह महारोगी जुया वंगुलि वासः याके बिल । अथे जूसां बिक्रमादित्यं थव फुकं जाल लक्ष्मी यानाच्वंगु धकाः स्यू । लक्ष्मी बिक्रमादित्य च्वना च्वंगु जंगलय् च्वपिं दक्व पशुपक्षितय् अपा यानाबिल । थव खँ सियाः उगु थाय्या जुजुया थाय् अपाः मजूम्ह जनावर छम्ह पक्के व्छल । तर जुजुं ब्रिया हये मफूत । लिपा बिक्रमादित्यं फुक जनावरतय् अपा पाखें मुक्त याना बिल । थव खना जुजुं बिक्रमादित्ययात धाःगु बी धकाः धाःगुलिं कन्हय् बहनी निसँ सुना नं छँ मत च्याके मदु । थःगु छँ जक च्याके दयेमा धकाः पवंगुलिं जुजुं नं बिक्रमादित्यं धाःथें बिल । थव धयागु आश्विन कृष्ण औंसि जुयाच्वन । थवकुन्हु छयँगु औंसीया चान्हय् सुयागु छँ मत मच्यात खालि बिक्रमादित्यया छँ जक मत च्यानाच्वन । लक्ष्मी नं थः बास च्वनेत मामां वंबलय् अपागं जुयाच्वम्ह बिक्रमादित्यया छँय् जक मत च्याकूगुलिं अन हे वन । लिपा लक्ष्मी बिक्रमादित्ययात याःगु कुकृति फुकं मुक्त यानाः वयागु तारिफ यानाः स्वर्ग्य थाहां वन । थुकथं औंसीकुन्हु लक्ष्मीपुजा याइबलय मत च्याका याइगु खः । गन मत च्यानाच्वन अन हे जक लक्ष्मीं बास याइगु खँ यच्चुगु जूगु खः ।

“लक्ष्मी कलार्णव तन्त्र”य् लक्ष्मी छःयात थुकथं पुजा यायेमाः धकाः उल्लेख यानातःगु दु ।

लक्ष्मीपुजा कुन्हु छँय् बँ थिलाः सुचुपिचु याये धुंका सुथय् सा पूजा यायेगु, बहनी छँ सकभनं मत च्याकाः नस्वाःगु धुं धुपाँय् आदि च्याकेगु दुकुतिइ अबिर व मेमेगु नं न्याताजिगु रंगय् श्री लक्ष्मीमाजुया मन्दः च्वयाः ताय्, जाकि वा नस्वाःगु स्वां व चिकनं नं मन्दः च्वयेगु । अन हे तुफि व जाःगु लःघः नं स्वनेगु थुलि याये धुंकाः धौ, तःसि, केरा, लैं आदि अनेगु फलफूल व मरि छाया पञ्चोपचार कथं श्री लक्ष्मीमाजुयात पुजा यायेगु । पुजा यायेबलय श्री महालक्ष्मी म्हासुगु वर्णाम्ह, म्हासुगु वसः नं पुनातःम्ह, रत्नया तिसां तियातःम्ह, कुलिकुलि चिंगु सँ दुम्ह, मुसुहुं न्हिलाच्वना बिज्याःम्ह, पलेस्वांया छःने ललितासन यानाः काउलेया छःने फ्यतुना च्वना बिज्याःम्ह धकाः खँ लुमंका ध्यान व पाठ याये माः । अले ८४ व्यञ्जनं युक्त जूगु नसा त्वंसा व

दक्षिणा छाया प्रार्थना यानाः पुज्यायेगु । उलि सिधयेव श्री लक्ष्मीमाजुयागु प्रसाद स्वां व सिन्हः थःपिसं व थः जःपिसं कायेगु”

नेपाल वर्ष क्रिया सफुतिइ लक्ष्मीपुजा गुकथं याइ धकाः च्वयातःगु खः ।

छैय् लक्ष्मी पूजा

छै वा पसल्य् न्ह्याथाय् नं लक्ष्मी वासं च्वनेमाः, धन सम्पत्ति परिपूर्ण जुइमाः धकाः सुचुपिचु यानाः बै पुनाः अले बै इलाः वा फछिं फतले सफा यानाः धु धयागु खने हे मदयेक सफा यायेगु ज्या याइ । बहनी पसल्य् पुजा याये माःपिनि लक्ष्मी पुजा याये धुनकाः छैय् पुजा याइ ।

लक्ष्मी छः दुकायेगु :-- छैया म्हाय्मचां लक्ष्मी छः दुकायेगु धकाः पिखालुखुनिसैं छस्वा ज्वीक बै थिलाः गन लक्ष्मी छः पुजा यायेगु खः । अन तक हयेगु याइ । लक्ष्मी छः दुहां वयेमा धकाः बै थिलाः हःगु थासंनिसैं बैपुया उकिं छःने स्वां जाकिं पुजा यानाः लक्ष्मीपुजा यायेगु थासय् तक्क हयेगु याइ । बहनिइ छः छुं छुं धाःसांनिसैं चाया पाल्चाय् इताः व चिकं तया मतः च्याका लक्ष्मी छः दुकायेगु थाय् निसैं लक्ष्मीछः पुजा यायेगु थासय्, आगमय् छैया पिने, झ्यालय्, कःसिइ आदितक छैया दुने पिने मत च्याकेगु याइ । लक्ष्मी छः गन भः भः धायेक मतः च्याइ नापं सुचुपिचु जुइ अन दुहां वनीगु धायेगु धापू दु । उकि सकसिया फयां फछिं मत च्याका भः भः धायेका तयेगु याइ । लक्ष्मी छःयात वासा लायेथें पिखालुखुं निसैं बै थिलाः उकी छःने जाकि व तपवःस्वां तयाः तैगु जक मखु मूलुखानिसैं लुखा लुखा पतिं, अथें तुं झ्याः झ्याः पतिं तपवः स्वांया स्वांमाः हनाः छै भः भः धायेका लक्ष्मीछःयात लसकुस यानाः तयेगु याइ । थये झः झः धाःथाय् लक्ष्मी छः दुहां वइ धयागु जन भावना दु । छैया म्हाय्मचातय् विशेष यानाः लक्ष्मीछः धकाः धायेगु चलन दु । उकिं लक्ष्मीछः दुकायेगु या लागि पिखालुखुं निसैं बै इला हयेगु स्वांमाः हनेगु, स्वांमाः झ्याः लुखाय् तयेगु व पाल्चा मतः च्याकेगु आदि ज्या अप्वः यानाः म्हाय्मचातय्सं यायेगु याइ । म्हाय्मचाया लिमलाः वा म्हाय्मचा मन्त धाःसा छै भउमचातय्सं नं यायेगु याइ ।

लक्ष्मीछः पूजा

“नेपाल वर्ष क्रिया” सफुतिइ धयातःथें लक्ष्मीयात पुजा यायेगु म्हपुजा याइबलय् थें मन्दः च्वया उगु मन्दलय् थः थःगु छैया परम्पराया छसि कथं लः प्वताय्, अबीर, ताय्, वा, हाकुमुस्याः ग्वःमाय्, आखे, मन्दया दुने चिकंमन्दः थानाः मन्दः च्वयेगु याइ । लः मन्दःया च्वसं प्वताय् वा अबीरं मन्दः च्वयाः उकि छःने तःसि, छ्वःसि, स्यांगुलि, केरा, सुन्तलासि, पासि, हलुवावेद, स्याउ, चाकुसि आदि फलफूलया नापनापं खेलुइताः क्वखा, लक्ष्मीस्वां, गोदाबरीस्वां आदि स्वां तयाः तःसि ब्वयाः लक्ष्मीछःयात आराधना यानाः पुजा यायेगु याइ । लक्ष्मीपुजाबलय् दुम्ह लक्ष्मी छःयात सफा यानाः लक्ष्मीछः दुथाय् न्हगु भ्वंया लक्ष्मीछः तिकाः पुजा यायेगु याइ । पुजा धुंकाः म्हपुजा यायेबलय् थें लक्ष्मीयात नं खेंय्संग धउ सगं, मन्दलय् ब्वयातःगु तःसि नापंया फलफूलया सि सगं छायेगु याइ ।

पुजा सिधल धायेवं “नेपाल वर्ष क्रिया” सफुतिइ उल्लेख यानाः तःथें तुं चय्प्यता घासा तयाः थाय्भु तयेगु याइ । थाय्भुइ विशेष यानाः मोहनीबलय् स्याकुत्याकु कुन्हु स्वनातःगु वा यात बजि ल्ह्याः बजि, खंलायात सुकुला दयेका थाय्भुइ बजि व ला तयेगु याइ । लक्ष्मीपुजा कौलाकृष्ण औसिं कुन्हु जूगुलिं येया वजारय् वशेषयानाः औसिं कुन्हु म्ये, दुगु, खसि आदि स्यानाः ला मीगु मयः । अथे जूगुलिं मोहनीबलय् हे माःगु ला व बजि दयेकेगु जूगु खः । गुम्ह गुम्हसिया मोहनीबलय् वा स्वनेगु मयासे बजि हे स्वनेगु याइपिं नं दु । थथे स्वनातःगु बजि विशेष यानाः थः परिवार दुनेयापिं जःपिनि हे जक नयेगु याइ पिनेयापिन्त नकेगु चलन मदु । लक्ष्मी पुजा यानाः छाइगु थाय्भुइ हलुलप्ते तयाः बजिं त्वपुइगु याइ । थाय्भुइ म्वःसिप्वः मरिचरि आदि परिकारया ब्यञ्जन तयेगु नं चलन दु ।

लक्ष्मीछःयात छाःगु सि संग खेंसंग वँउ, पाउँ, लागवः लापिनिसैं धौउ म्वःसिप्वः मरिचरी प्रयान्त दुगु थाय्भुइ किजापुजाया कन्ह्यकुन्हु लक्ष्मीछः क्वः कायेगु धकाः लक्ष्मीछः पुजा यानाः म्हाय्मचा भिना मचातय्त सःता छैया जः सकसितं प्रसाद बीगु चलन दु ।

लक्ष्मीछः पुजा यानाः छै जःपिनि लक्ष्मीपुजाया सिन्हः तिनाः गुम्हसिया भव्य नयेगु चलन दुसा गुम्हसिया समय् बजि नयेगु चलन दु ।

लक्ष्मीपुजा याइबल्य छँ जःपिनि थःगु इच्छा अनुसार लक्ष्मीद्यःयात ध्यबा छायेगु नं चलन दु । गुम्ह गुम्हसिया लक्ष्मीपुजा याइबल्य दछिया दुने पिहांवःगु लुँम्बः वहःम्बः, दां छानाः दैयदसं पिहांवःगु दां सञ्चय यायेगु चलन दु । लक्ष्मीद्यःयात छाःगु दां लिकायेगु चलन मदु । तसकं हे खाचो जुलसा जक लिकयाः खर्च यायेगु याइ मखुसा हतपतं खर्च याइमखु । थव छगू कथं दां मुनेगु अर्थात छगू प्रक्रिया नं खः ।

व्यापारीतय् दछिया आयव्ययया खाता क्वचायेकेगु व न्हुगु खाता छयलेगु याइपिं दु । नेपाल संवत् कथं थःगु आयव्ययया खाता छयलिपिनि धाःसा लक्ष्मीपुजा कुन्हु पुलांगु खाता क्वचायेका म्हपुजा अर्थात लक्ष्मी पूजाया कन्हय् कुन्हु निसैं व्यापारया आयव्ययया लागि न्हुगु खाता छयलेगु चलन दु ।

लक्ष्मीया प्रतीक कथं लक्ष्मीया मूर्ति वा दां लुँ, ज्वाहारात आदियात नं पुजा यायेगु चलन दु । थव फुक्क वस्तु सम्पन्नता चिं खः । उलि जक मखु दां तैगु, लुँ वहः तिसा तैगु सेफ, दराज कन्तुर आदियात लक्ष्मीया वासस्थान धकाः नं पुजा यायेगु चलन दु । तःतःचवक धनिपिसनिसैं गरिवपिसं तक नं थःथःगु आत्मसन्तोष कयाः लक्ष्मीयात पुजा यायेगु चलन दु ।

म्हपुजा

म्हपुजायात कयाः चवसा न्ह्याका दिइपिसं थःथःगु कथं हे अभिव्यक्त यानाःदीगु खनेदु । संस्कृतविद् भाजु सत्यमोहन जोशीजुं म्ह व म्हपुजा सम्बन्धी लेखय् म्हपुजा धकाः सजीवतायात कयाः पुजा याइगुयात धयादीगु दु । अथवा मनूया Livingness यात पुजा यायेगुयात म्हपुजा धकाः धायेगु याः । भाजु बलदेव जुजुया म्हपुजाया अभिप्राय धयागु दच्छितकया लागि जीवनय् वयेफुगु अनेक कथंया समस्यात ज्यंकाः जीवनयात न्ह्याकाः यंकेत धिसिमिसि पलाः छिनाः बनेत तयार जुइगु म्हपुजा नखःया अभिप्राय खः । जीवन संघर्षमय खः । जीवन न्ह्याकाः यंकेबलय् प्रकृति निसैं मनू, पशु पंक्षि आदिया नाप नापं मनुखं याइगु आन्तरिक व बाह्य संघर्षय् त्याकाः जीवन सफल जुइमाः धकाः दैय् दसं कछलाथव पारु कुन्हु म्हपुजा यायेगु यानाः वयाचवंगु खः । भाजु यज्ञमानपति ब्रज्जाचार्यया धापू कथं म्हपुजा धैगु काय पुजा जक खः चित्तपुजा मखु । चित्त छुं खःसा काय मेगु हे खः । चित्तया वासस्थान हे काय खः ।

प्रत्येक मनूत दुने थःहे तथागत दु । गुम्ह तथागतं यानाः मनूया आत्मा दत ल्हा तुति, म्ह संकेगु, बुद्धिं विचार याये सयेकल, म्हयात नियन्त्रण यानाः न्ह्याः बनीगु धयागु तथागत खः । मनूया बाह्य रुप खनी तर मनूया दुने चवम्ह तथागतयात खनी नं मखुं म्हसीनं मखु उम्ह तथागतयात पुजा यायेगु हे म्हपुजा खः ।

म्हपुजा छाय् याइ धयागु खँय् रत्नाकर ब्रज्जाचार्यया खुन्हु तक हनेगु स्वन्ति नखः व न्हुदँया लेखय् थुकथं न्ह्यब्वया तःगु दु । थःगु म्हय् दिं दशा, मभिं, मफाः दुहाँ वयेमफयेमा करिपिनिगु साहु त्यासा क्वबिइ म्वाःलेमा व उन्नति व प्रगतिया लँय् न्ह्याः वने फयेमाः धकाः व ताःआयुया कामना यासैं थी थी कथं आशिका यानाः सगं कयाः स्वांसिन्हः तिनाः थःथःथगु गच्छे कथं म्हपुजा याइ (सन्ध्या टाइम्स विशेष तँसा पौ १११८ :९) ।

म्हपुजाया वारेय् नेपाल वर्ष क्रिया सफुतिइ थुकथं न्ह्यथनातःगु दु” “कार्तिकशुक्लपक्षया प्रतिपदा कुन्हु चन्द्रमा लुइगुया प्रमाण मानेयानाः सुथय् निगू घडि जक प्रतिपदा तिथि लाःवइगु जूसां थवकुन्हु चन्द्रमा न्ह्यःने लाका म्वःल्हुइगु दान यायेगु शुद्धगु, नीगु वसतं पुनाः गोवर्धन पर्वत व दोहंकांतयत् पुजा यायेगु अले वया नाप नापं बलिराजायात पुजा यायेगु धकाः बिचाः यानाः श्री चन्द्रमायात पुजा यायेगु वयां लिपा अबीर, सिन्हः आदि न्याताजि रंगयागु मन्दः दयेका वया द्यःने दश्वीलाक चिकं मन्दः नं थायेगु । व हे मन्दःया छचाखेरं वा ताय्, आपो, व स्वानं चाः हुइकेगु, मन्दःया न्ह्यःने तःसि, केरा ख्वसिं व मेमेगु नं तःताजिया सि, ग्वय्स्वां, जजंका औदि तयाः छाय्पेगु । जाःगु घः तुफि चवय् क्वय् स्वनाः पञ्चोपचार कथं थःथःगु म्हयात पुजा यायेगु वयां लिपा धौउ, खँय् आदि सगं कयाः मंगल यायेगु । दच्छि छकः थःगु म्हयात कल्याण यायेत सुथय् चन्द्र लुइगुया प्रमाण कथं थःगु म्हयात पुजा यानाः सगं कायेगु ज्यां यानाः दच्छि तकयात मंगल जुइ । तर चन्द्र मलुइवं ज्यायात धाःसा दच्छितकयात अमंगल जुइ । थव हे प्रमाण कार्तिकशुक्ल प्रतिपदा कुन्हु नेपाल संवत् हिलिगु खः । थव हे दिनकुन्हु सगं कयाः मंगल यायेत धौउ व खँय्या सगं कायेगु अले थःगु औकात कथं भवय् नयाः म्हुतु शुद्ध यायेत ग्वय् व ग्वाः नं नयेगु । थव कुन्हु चान्हय् द्यने मज्यू धिबा सःवयेका छुं म्हितेमाः । थव कुन्हु छुं म्हिता त्याके फत धाःसा दच्छितकयात भिं जुइ ”

म्हपुजायात आत्मा पुजा धकाः धाइपिं नं दु । थःत थःम्ह थःगु मन, वचन, आत्मायात पुजा यानाः थः स्वयम्ह तःधंम्ह द्यः खः धकाः पुजा याइगु म्हपुजा खः । थः

दुने हे ब्रम्हाण्ड दु । ब्रम्हाण्डया शक्ति दु । उगु शक्तियात पित हयेगु थःथःगु क्षमता खः । सुनां थःत बांलाका प्रस्तुत यायेफै व तःधम्ह ज्ञानी गुणि तथागत जुइ । सुना थःत बांलाक प्रस्तुत याये फै मखु थःत समाजय् स्थापित याये फै विश्व ब्रम्हाण्डय् स्थापित याये फै वहे तःधम्ह मन् जुइ ।

बौद्ध धर्मावलम्बीतय म्हुपुजा धकाः बुद्ध धर्म संघ, कुलदेवता व इष्टदेवतापिन्त पुजा याइगु जूसा हिन्दूतय्सं बलिराजायात पुजा याइगु खः । बौद्ध धर्मावलम्बी व हिन्दू धर्मावलम्बीपिसं म्हुपूजाया मूल आशा धयागु त्याग व दानशीलताया भावना कायेगु याः । अर्थात नेवाः मात्रं थःगु जीवनयात प्राणी मात्रयात उद्धार यायेत न्ह्याबलें तल्लिन जुयाच्चने फयेमा धकाः त्याग भावनायात दैयदसं स्मरण यानाः पुजा याइगु खः । म्हुपुजा यात पञ्चतत्वया पुजा धकाः धाइपिं नं दु । मनूया शरीर पञ्चतत्वं बने जूगु खः । पञ्चतत्वयात सञ्चालन याइगु विशेष गुणयात हे म्हुपुजा धकाः पुजा याइगु खः ।

शंखधर साख्वालं स्वनिगःया दक्क जनतातय्त् ऋणं मुक्त यानाः न्हु कथं जीवन हनेत म्हुपुजा यानाः दछियंक बांलागाः ज्या यायेफयेमाः न्ह्याः वने फयेमाः धकाः म्हुपुजा यानाः वःगु धकाः धाइपिं नं दु । म्हुपूजायात बलिराजाया पुजा धकाः धाइपिं नं दु । बलिराजां लक्ष्मीयात थःगु बसय् तयातःगुलिं लक्ष्मीया भाःत नारायणं वामन रुप कयाः बलिराजायाके स्वपला भूमि पवन । बलीराजा दान बीत तयार जुल । वामन अवतार विष्णुया छपा तुति स्वर्गतय् मेगु छपा तुति पृथ्वील्य व बांकि दनीगु छपा तुति बलिराजायागु छयनय् हे न्ह्या बलिराजायात पातलय् न्ह्या लक्ष्मीयात थःगु बसय् तल । बलिराजा पातलय् वनाः पृथ्वीयात क्वब्बीगुया भार काःगु जूगुलिं दैय दसं म्हुपुजा यानाः बलिराजायात पुजा यायेगु परम्परा न्ह्याका वयाच्चंगु धकाः धाइपिं नं दु । उकिं हे म्हुपुजा याइबलय् बलिराजायात नं पुजा यायेगु चलन दुगु खः धायेगु याः ।

म्हुपूजाया परम्परा नेपाल संवत स्वने स्वयां न्हापां निसैं न्ह्यानाः च्वंगु म्हुपुजा नेवाःतय् थःगु हे मौलिक पुजा खः । श्व पुजा गुवलें निसैं न्ह्यानाः वल धयागु सी मदु । जुइफू नेवाःतय्सं छः धयागु हे पुजा याये मसःनि बलय् निसैं पुजा यानाःवःगु नं जुइमाः । मनूया विकास क्रमया सुरु सुरुइ मन् सित धायेवं सीम्ह मनूया भिं भिंगु ज्या लुमंका तिनि अन्तस्ति क्रिया यायेगु परम्परा दु । मनुखं थःगु म्हुयात पुजा यायेगु परम्परा नं श्व नाप नाप हे जूगु जुइमा ।

म्हुपूजाया विधि

म्हुपूजाया विधिया बारे नेपाल वर्ष कृति सफुतिइ उल्लेख जुयाच्चंगुथें हे बौद्धमार्गी नेवाःतय्सं यानाः वयाच्चंगु प्रक्रिया खः । कछलाश्व पारु कुन्हु म्हुपुजा याइपिनि सुथय् वा म्हुपुजा यायेत म्वःल्हुया सुचुपिचु यायेगु याइ । म्हुपुजा यायेगु थाय् नीसी वा बें थिलेगु याइ बें थिइ धुंकूगु थासय् सउबें थिला उकि छःने लः हाहाः यानाः उकि छःने मण्ड च्वयेगु याइ ।

मन्द च्वयेगु ज्या

छैं परिवार दुने म्हुपुजा याइपिं ग्वःम्ह दु अपिं फुक्कसित म्हुतिं छगू छगू मन्दः च्वयेगु याइ । म्हुपुजा याइपिं पूर्व वा पश्चिम स्वयाः च्वनेगु याइ उकिं मन्दः च्वयेबलय् नं पूर्व व पश्चिम स्वयाः म्हुपुजा याइगु कथं च्वये माः । मन्दः च्वयेबलय् दकले न्हापां लःया मन्दः च्वयेगु याइ । लः मन्दःया दुने प्वतायनं मन्दः च्वयेगु याइ । प्वतायनं च्वयातःगु मन्दलय् दकले न्हापां स्वर्गया स्वां कथं तापः छ्वाः छयरं तयाः मन्दः च्वयेगु याइ । ताय्या दुने बसुन्धराद्यःया प्रतीकया रुपय् वा तयेगु याइ । वाया दुने शनिश्चरया प्रतीकया रुपय् मुस्या, मुस्याया दुने संकताया प्रतीकया रुपय् माय्, माय् धुंकाः करुणामयया प्रतीकया रुपय् आखे, आखेया दुने आत्माया प्रतीकया रुपय् चिकमन्दः तयाः थी थी छःछःपिनि दथुइ लाक थःगु आत्मा साधना यानाः मन्दःपुजा यानाः थःगु पुजा याइगु खः । मन्दःया प्रतिकपिनिगु विशेषता थःयाके दुबीमाः धकाः थःगु आत्मा दकले दुने लाकुगु खः धाइपिं नं दु ।

मन्दःया च्वय्लाक प्वताय् नं हानं मेगु मन्दः च्वयाः उकिइ छःने तःसि, ख्वःसिं, स्यांगुलि, केरा, चाकुसि, स्याउ, पासि, हलुवाबेद, खाइसि, भ्रमिसि, भ्रगत्या, अम्बः सतबेसि आदि तःताजि फलफूल तयेगु याइ । फलफूल मध्यय् तःसि-पवित्रताया चिं, ख्वःसिं अनन्तताया चिं, स्यांगुलि - दुर्दशिताया चिं श्व स्वता मदयेक मगाःगु सि जूसा मेगु सि थःगु गच्छे अनुसार तयेगु खः । विशेष यानाः कार्तिक महिनाबलय् न्हु न्हुगु फलफूल सैगु जूगुलिं स्वास्थ्यया न्हुघाः याइबलय् न्हु न्हुगु फलफूल नयाः शक्ति संचय यायेगु खः । तःसिया छःने नीछ्तु (ख) ल्हानाः दयेकातःगु क्वखा व उकी ५ ता

रङ्गया कापःया नायो । बौद्ध धर्मालम्बीपिसं न्याता रङ्गया नायोयात पञ्चब्रह्मया प्रतीकया रूप्य कायेगु याः । स्वांमाः, गोदावरी स्वां, तपस्स्वां, लालुपाते स्वां, गव्यस्वां दःसा फुकं मदुसा तपस्स्वां छगू अप्पोसिनं तयेगु याइ । म्हपुजा याइम्हसिगु गपायहाकः ख्वाःपाः खः अपायहाकः हे कापःयागु ४ पु दुगु खेलुइताः नं तयेगु याइ । खेलुइताः न्यातारङ्गया कापःया नायो दुगु क्वखा स्वांमाः, गव्यस्वां आदि स्वां फुकं तःसिया छःने तयेगु याइ ।

तःसि ब्वःगुया जवय् मन्दः च्वयः उकिइ छःने सुकुन्दा, त्वाःया देवाः मत, खवय् मन्द च्वय निलः तयाः शंख तयेगु याइ । म्हपुजा यायेगुया लागि सुकुन्दा गणेद्यःया प्रतीकया मांगलिक चिं व पवित्रताया चिंया रूप्य नीलखं जाःगु शंख खः ।

म्हपुजा जुइमा वा किजापुजा जुइमा पुजा याइपिं व्यक्तियात जक मन्दः मखु म्हपुजा याइपिनिगु सुरु जुइ न्ह्याः च्वय् छगू मन्दः च्वयेगु नं याइ । थथे च्वय् मन्दः च्वःगु धयागु आगं छःया नामय् जुसा क्वय् च्वःगु मन्दः यमराजया नामय् च्वःगु खः धायेगु चलनू दु । गुम्हगुम्हसिया म्हपुजा याइबल्य जहान परिवारया म्हपुजा यायेगु मन्दः सिधल धायेवं क्वय् हाःसा तुफियात नं मन्दः च्वयाः हासा तुफियात नापं म्हपुजा यायेगु चलन दु ।

म्हपुजा धकाः, मन्दः पुजा याइबल्य धलं नं दनेमाः । श्व धलं दनीबल्य छ्यः कस्ति तयाः पुजा याइगु मजुसे मुस्या पालु तयाः पुजा याइगु खः । म्हपुजा तःजिगु पुजा खः धयागु प्रमाण श्व पुजा याइबल्य क्वतल्य पुजा तयाः पुजा यायेगु याइ खः । साधारण पुजा याइबल्य पूजाबल्य पूजाः तयाः पुजा याइगु जुसा तःधंगु पुजा याइबल्य क्वतल्य तया पूजा यायेगु याइ । छै व दक्व जहानयात क्वतः मदैगु जूगुलिं क्वताःया पलेसा पुजाभः जक नं तयेगु याः । अथे जूसां दकले थजिम्ह छम्ह वा निम्हसित क्वतः हे तयाः पूजा यायेगु याइ ।

नेवाःतय्गु पुजा परम्पराय् ग्वजा तयाः पुजा यायेगु चलन दु । ग्वजा तयाः पुजा याइपिं बौद्धमार्गीया प्रतीक खः । छाय्धाःसा ग्वजाः धयागु चैत्यया प्रतीक खः । ग्वजाय् छग्वः ग्वःगु म्वाःतयेगु चलन दु । उगु ग्वःगुयात पृथ्वीया प्रतीक कथं कायेगु चलन दु । ग्वजा मन्दःया च्वय् क्वय्, तःसि मतः, शंखयात तयेगु चलन दु । धाथें ग्वःजा तया पूजा याइबल्य धुं धुँपाय् इताः तयाः च्याकाः तयेत छ्यलेगु यानाः वयाच्चंगु खनेदु ।

म्हपुजा याइपिं प्रत्येकसिया म्बःल्हया वा खौ कयाः थः थःगु म्ह शुद्ध यायेगु याइ । म्हपुजाया लागि न्हगु वसः वा नीगु वसः पुनाः छै दुगुलि तजिं कथं थःथःगु मन्दल्य न्हयःने च्वनाः छसि कथंनिसें पूजाभः थिया सोधन याइ । पूजाय् न्हापां थःगु कथु कपाः व नुगःयात थिया जाकि स्वां व सिन्हः तिकाः पुजा सुरु यायेगु याइ । जवं खवं जाकि व्हाला थःगु छ्वाःछ्यरं दुगु मभिंगु चिकाः थःत मन्दल्य शोधन यानाः थः थम्हं मन्दःपुजा याइ । श्व पुजाबल्य पुजा यायेमाःगु धयागु मन्दःया क्वय्च्वंगु ग्वःजा मन्दःया च्वये च्वंगु ग्वःजा अनं लिपा चिकंमन्दःया दथुइ मन्द पुजा यायेगु याइ । म्हपुजा याइबल्य तःसि, सुकुन्दा नीलः दुगु शंख आदि पुजा याये धुंकाः आगंछः व यमराजयात नं पुजा यायेगु याइ । म्हपुजा याइपिसं दकले च्वय् च्वंम्हसिनं च्वयेमयः आगंछःया मन्दल्य नं नापनापं पूजा यानाः विइसा क्वय् च्वःम्हं पूजा याःम्हसिनं यमराजया मन्दःनं पुजा यानाः बीगु याइ ।

सगं

म्हपुजाबल्य मन्दल्य पुजा याये सिधल धायेवं दछिं यंक भिं जुइमाः ताः आयु जुइमाः न्ह्याथाय् नं मंगलयम जुइमाः धकाः सुवाः फया स्वंगु कथंया सगं फयेगु ज्या याइ म्हपुजा छक्वः हे जक स्वंगु कथंया सगं फयेगु धाइ । मेमेबल्य गुबलें धौसगं कायेगु याइ गथेकि मचाबू ब्यकिबल्य मचाया मां अबु व मचायात खालि धौ सगं जक बीगु याइ । मेमेगु संस्कारगत ज्याखँ वा जन्मदिं कुन्हु धौसगंया नापनापं खँसगं नं कायेगु याइ । न्ह्यागु नं सगं काइबल्य सुकुन्दा च्याका मंगलयमय कामना यायेगु याइ । म्हपुजा याइबल्य स्वंगु कथंया सगं कायेगु थथे खः ।

- १) धौ सगं
- २) सि सगं
- ३) खँय सगं

सगं बीगुया लागि म्हपुजा यानाः च्वपिं मध्यय् नकिं व न्वकु नकिं दनाः कथं निसें सगं बीगु याइ । दकले च्वय् म्हपुजा याःम्हसिगु क्वतः कयाः सिन्हः तिकेगु याःसा न्वकु नकिनं धौ ज्वनाः सगं बीगुली गुहाली यानाः वनी थाकुलि नकिनं सिन्हः

तिकेगु या:सा न्वकु नकिनं मिजंतयत्त जवय् न्हकुड मिसातयत्त देपाय न्हकुड धौ तिका:
तिकां वनी । धौ सगं थ:नापं दक्कसित बी सिधल धायेव मन्द: न्हय:ने ब्वयात:गु
त:सि, क्वखा खेलुइता:, स्वांमा स्वां दुगु त:सि द्य:ने च्वंगु क्वखा व स्वांमा: कया:
क्वखायेका बी । अनं खेलुइता: सुकुन्दाय् च्याका प्यंगू दिसाय् क्यना: चा:हिला
म्हपूजा:याम्हसिया ऐश्वर्य कृति प्यंगू दिसाय् न्यनेमा धका: सुवा: बिया: खेलुइता: ल:
ल्हाना बी । म्हपूजा या:म्हसिनं खेलुइता:यात जाकिं पुजा याना: कया: थम्हं पुजा
याना:गु मन्दलय् वा प्यद्व तया: उकिइ द्य:ने खेलुइता: प्यंगू दिशाय् हे स्वका: च्याका
तयेगु याइ । प्यंगू दिशाय् थ:गु ऐश्वर्य कृतिया ज: बीगु जक मखु थ:थाय् लक्ष्मी नं
वास: याइ धका: वा द्दं तया खेलुइता: ल:ल्हाना कायेगु ख: । थुलि याये धुन धायेवं
त:सिनापं छव:सिं स्यांगुलि केरा आदि फलफूल ल:ल्हाना मंगलमय कामना यायेगु
याइ । थवयात सि सगं धाइ क्वखा स्वांमा खेलुइता: व त:सि दक्कसितं ल: ल्हाये धुनेवं
हानं छसिलिसें खें सगं बीगु याइ । नकिनं नं खें ल: ल्हाना वनीसा न्वकु नकिनं
धापिंचां थ्वें वा अय्ला ख्वलाय् लुना ल: ल्हाना वनी । दक्कसित सगं बीबलय्
मंगलमय तुत ब्वनेगु याइ । मंगलमय तुत: ब्वने सिधल धायेवं थ:त ल:ल्हा:गु त:सि
थ:गु मुलय् हे तया: खें नयेगु याइ । बुद्ध धर्म व संघया प्रतीकया रूपय् थ्वें वा अय्ला:
ख्वलाय् स्वक्क: तक लिसा तयेगु याइ । थाकुलि नकिंयात न्वकुनकि नं, न्वकुनकिंयात
थाकुलिनकिनं सगं बीगु याइ ।

म्हपूजाया भव्य

लक्ष्मीपूजाबलय् लक्ष्मी द्य:यात ८४ चयप्यता घासा तया: थाय्भुइ तया:
भव्य छायेगु वा स्वनेगु या:थें फयांफछि त:जिक भव्य ज्वरे याना: देमाब्ब: तयेगु
याइ । भानुं फणिन्द्ररत्न वज्राचार्य म्हपूजाया विधिइ च्वया विज्या:थें च्याता घासाता
देमाय् ब्वयेगु घासा हे जुल । उगु च्याता घासाया भव्य नापनापं मेमेगु लागव: लापि,
ख्वचासिमि, न्या, थीथी परिकारया ला, त:खा गोर्मा, सॅन्याखुना, व्छयला, पुकाला,
दायेकुला, तिस्या:, स:पुम्हिचा, न्ह्य:पु, मे, आदि तकुगु चिकुगु पुकला, धौ,
थरिथरिया मरिचरि फलफूल समेत तया भव्य नयेगु याइ । भव्य नये सिधल धायेवं
म्व:सिध्व:, ग्वा:ग्वय् आदि नापं बिया: भव्य कथं नैगु भव्य ख: । नख:चख: मध्यय्

दकले त:जिक भव्य म्हपूजाकुन्हु नयेगु याइ । देमाय् ब्व: तइबलय् बजिया त:लय्
हलूलपते छक् छक् खने मदयेक तयेगु चलन दु । भव्य नये सिधयेका नं हलूलपते बजिं हे
त्वपुया तयेमा: धयागु चलन दु । हलूलपते तया: बजिं तपुयात:गु नये सिध:गु चिप
धा:सा म्हपूजा याना:कुन्हु मन्द: द्य:ने हे भव्य नयेगु जूगुलिं अकुन्हु सिले मज्य् धयागु
चलन दु । छाया:सा बजिं त्वपुया त:गु हलूलपते कन्हय् कुन्हु लु जुया च्वनी धयागु
पुलांगु धारणा दु । जि मचाबलय् खाँ जिमि बा:नं धाइगु आ:नं लुमंसे व: म्हपूजा
बलय् नयागु देमा ब्व: प्यन्हु तक्क अथेतुं तया तल धा:सा लुं जुइ धाइगु चलन दु ।
धाथें कन्हय्कुन्हु जुइ बलय्बजिं त्वपुया त:गु हलूलपते म्हासुया च्वनीगु स्वाभाविक
ख: । जुइफु ख्वपया सिद्धिबन्त ज्योतिसं लखुतिर्यया फि लुं जुइगु मुहुत पिकया कायेके
हा:गु फि फुकं शंखधर साख्वा:या छैय् प्वंका प्यन्हु लिपा लुं जूगु खँयात लुमंके कथं
लुं जुइ धयागु परिकल्पना याना:त:गु जुइमा: ।

म्हपूजाया भव्य हलूलपते भव्य तया आगंछ:निसें द्य:पिन्त छायेगुया नापनापं
हासा, तुफि, माय् क्यलेगु ल्वहँमा तेप: आदि थ:थ:म्हं छय्लेगु ज्याभलय् समेत छाना
म्हपूजाया भव्य नकेगु नेवा:तय् परम्परा दु । मोहनीबलय् स्याकुत्याकु कुन्हु व
सुन्तिबलय् म्हपूजाबलय् द्य:द्य:पिं नाप थ:थ:पिसं छय्लेगु ज्याभ:यात समेत भव्य छायेगु
चलन दु ।

म्हपूजायागु मन्द:, चिप फुकं सफा कन्हय् कुन्हु जक याना: मन्द: पुना:
पिखालखुइ वायेगु याइ । थथे म्हपूजा याना: देमाब्ब तया भव्य नयेगु परम्परा जुइफु
म्हपूजायाइपिं फुक मदंसे हे मन्दलय् च्वना हे भव्य नये मा:गुलिं याना: गुलित नयेमा:गु
ख: म्हपूजा याये न्ह्य: हे देमाय् छाया पुजा याये सिधल धायेवं सगं बी थें देमाब्ब
जक मन्दलय् मन्दलय् देछाना व्यूसा गात । सकसिया नापं भव: छुना भव्य नं नये
जिल । म्हपूजा विशेषयाना: आकाशय् तिमिला खने दयेका: जक याइगु जूगुलिं न्हापा
न्हापा मत मदुनि बलय् तिमिला त्वये धुंका: धाल धायेवं छ्यँसे च्वनीगु स्वाभाविक
ख: । पुजा याना: भव्य नया: छ्यँस्य च्वंक सुचुपिचुयात धायेवं छुं बाँच्छये मज्य्गु
वस्तुनं वनेफु उकिं मन्द: स्यंकेगु मया:गु जुइमा: । नेवा:तय् परम्परा कथं द्य: छ्यँल
धायेवं धु पिने वां व्छये मज्य् धाइगु चलन दु । उकिं नं म्हपूजा याना: दुगु जाकि,
स्वां, फलफूल आदि धू छ्यँका वांमव्छयेगु जूगुलिं कन्हय् कुन्हु द्य: तुइका: पिखालखुइ
तयेगु चलन जूगु जुइमा: ।

म्हपूजा यायेगु चलन नेवाःतय् थःगु हे मौलिक पुजा खः । नेवाःया परिचय बीगु मध्यय् छगू “म्हपूजा” धकाः थःत थम्हं पुजा याइगु खः । म्हपूजाया लागि च्वइगु मन्दः छगू जात दुने हे पाः, थाय् कथं नं पाः । थीथी जातया पाइगु ला स्वाभाविक हे खः । म्हपूजा याइगु महत्व छगू हे तुं तर म्हपूजा यायेत च्वइगु मन्दः मनु पाःथें पाः । तर म्हपूजा या बारेया जीवन दर्शन धाःसा छगू तुं खः ।

गोवर्धन पुजा

म्हपूजाया सुथय् गुम्ह गुम्हसिया गोवर्धन पुजा धकाः यायेगु चलन दु । द्रह्यात पुजा यानाः याइगु थव पुजा कृषि प्रधान देशय् हलो जोते यायेत द्रहं छ्यलेगु यानाः पुजा याइगु धाइपिं नं दु । अथे जूसा पशुपतिनाथ दुगु थाय् उपत्यका दुने द्रह्यात हलो जोते याके मज्य धायेगु चलन दु । उकिं उपत्यका दुने अर्थात स्वनिगःलय् च्वपिसं मयाःसा ज्यगु खः । स्वनिगलं पिनेयापिसं द्रहंवा पुजा याइगु धयागु बुइ बालि बांलाका बी धकाः जुइमाः ।

गोवर्धन पुजा धकाः गोवरया पहाड दयेका उकी पुजा यायेगु परम्परा नं दु । थवया वारे छगू लोक धारणा दु । ट्वापर युग स्वयां न्हापा गोकुल धयागु थासय् च्वपिं मनुतय्सं इन्द्रयात पुजा याइगु जुयाच्चन । कृष्ण गोकुलय् वये धुंकाः अन च्वपिं मनुतय्त इन्द्रयात पुजा यायेगु पलेसा गोवर्धन पर्वतयात पूजा याः धकाः कृष्ण धासेलि अनया मनुतय्सं वं धाःथे यात । थव खना इन्द्र तं वयेका तच्चतं वा वयेका गोकुलय् च्वपिं मनुतय्त दुख बिडत स्वल । कृष्ण नं इन्द्रया तंयात प्रतिकार याये थें गोकुलबासि फुकसित गोवर्धन पहाड हे ल्हवनाः उकिया तःलय् तयाः तःधंगु वापाखें सुरक्षित यानाः बिल । थव खना इन्द्र शान्त जुयाः थःहे कृष्णयात दर्शन याः वल । थुबलय् निसें गोवर्धन पुजा धकाः गोवरया पहाड दयेकाः पुजा यायेगु परम्परा जुल धयागु धापू दु । बौद्ध धर्मावलम्बीपिनि गोवरया पहाड दयेका पूजा यायेगु चलन मदु । हिन्दुधर्मावलम्बी तय् जक खः ।

न्हुदें हनेगु

कछला थव पारुकुन्हु नेपाः देय्याः थःगु हे नांया संवत नेपाल संवतया न्हुगु दँया न्हुगु दिं खः । अर्थात नेपाल संवत कथं संवतया सुरु जुइगु दकले न्हापांया दिं खः । नेपाल संवत नेपाःया मौलिक संवत खः । नेपाःया सु नं जुजुं न्ह्याकगु संवत मजुसे छम्ह साधारण जनतां ऋण क्यपिं जनतायात ऋण मुक्त यानाः दक्वसित स्वतन्त्र याःगु उपलक्ष्यय् नेपाःया नामं न्ह्याःगु संवत खः । विदेशी इतिहासविद् भाजु कीलहर्नया धापू कथं इ.सं. ८७९ अक्टोबर २० तारिख कछला थव पारु बिहिवाःकुन्हु नेपाल संवतया सुरुवात जूगु खः । नेपाल संवत जुजु राधवदेवया पालय् सुरु जूगु खः । थव संवत लिच्छवि सम्बत ८०२ धुंकाः निसें अर्थात लिच्छवि संवत ८०३ जुइमाः थाय् नेपाल संवत न्ह्याःगु खः । नेपाल संवत सुरु जुइ न्ह्यः निसें म्हपूजाया परम्परा दु । म्हपूजा याइगु दिं कछला थव पारु कुन्हु नं लिच्छविकालय् म्हपूजा यानाः पृथ्वी पुजा यानाः न्हुदें हनेगु परम्परा थौंकन्ह्य नेपाल संवतया न्हुदें हनीगु थें खः ।

वंशावली कथं नेपाल संवतया प्रारम्भया थुकथं क्यनातःगु दु । ख्वपया सिद्धिवन्त जोतिष छगू मुहुंत दुने येंया लखु तीर्थया बाः वया च्वंगु फि कयाः प्यन्हु अथें तल धाःसा व फि दक्वं लुं जुइ धकाः पिकाल । थव हे कथं लखुतीर्थय् फि कायेत ख्वप मनुत वछ्याहल । फि कया वःबलय् येंया शंखधर साख्वालं ख्वप निसें फि काःवःपिन्त खनाः व फि थःगु छैय् यंकल । फि काःवःपिन्त सत्कार यानाःवछल । फि काःवःपिसं हानं लखुतीर्थ वनाः फि कयाः ख्वप लिहां वन । प्यन्हु लिपा यें शंखधर साख्वाःया छैय् च्वंगु फि लुं जुल । तर ख्वपय् यंकुगु फि लुं मजुल । शंखधर साख्वालं लुं जूगु फियात स्वनिगः दुने च्वपिं सकसित ऋण मुक्तयानाः स्वतन्त्र यात । वहे स्वतन्त्र जूगुलिं न्हुगु जीवन हने कथं न्हुगु संवतया स्थापना जुल । उगु संवतया नां देशया नामं नामाकरण यानाः नेपाल संवत् धकाः तल । थुकथं न्हुगु जीवन सुरुयानाः थःगु सुमंगलया कामना यानाः म्हपूजा यायेगु परम्परा जुल धाइपिं नं मदुगु मखु । तर म्हपूजाया परम्परा नेपाल संवत् स्वयां पुलां धकाः अभिलेखय् नं प्रशस्त जुयाच्चंगु दु ।

नेपाल संवत् धकाः नामाकरण यानाः न्हुगु संवत् न्ह्याकम्ह शंखधर साख्वालयत श्री ५ या सरकारं ने.सं. १९२० कछालथव एकदशी मंसीर ३ गते राष्ट्रिय

विभूति धकाः घोषणा यानाः जनस्तरं ज्या याःपित सम्मान यायेगु गुगु कुतः जुल व प्रशंसनीय जू ।

किजापुजा

यमपञ्चकया दकले लिपाया दिं अर्थात् कछलाश्व दुतियाकुन्हु ततापिसं थः किजापिन्त लक्ष्मीपुजाबल्य लक्ष्मीपुजा याःथें म्हपुजाबल्य थःथम्हं थःगु आत्मायात पुजा याःथें ताः आयु भिं जीवन्य न्ह्याः वने फयेमाः ? धकाः सुवाः बियाः पुजा यायेगु खः । भाजु पुण्यरत्न वज्राचार्यया धापूकथं मोहनि नखःया दकले लिपाकुन्हुयागु विजया दशमी चालं दिन्य मनूतयसं थः हनेमाःपिनिगु ल्हातिं सिन्हः तिइथें थः तता वा केहेंपिनिगु ल्हातं दाजु वा किजापिसं सिन्हः तिइगु याइ । किजापुजा याइबल्य न्हापां यमराज, यमुना, चित्रगुप्त व चिरञ्जीविपिन्त विधिकथं पुजा याइ । भाजु बलदेव जुजुया धापू कथं किजापुजा धयागु न्हँदें क्यंकुन्हु म्हपुजा यानाः जीवनया लँपुड पलाः छीत तयार जुया च्वंम्हसित तताकेहेंपिसं नं जीवन्य सफल जुइमाः धकाः सुवाः बिइत याइगु खः । किजापुजाबल्य नं ततापिसं किजापिन्त म्हपुजाबल्य थें मन्दः च्वयाः (च्वय् आगंछः व क्वय् यमराजयात समेत मन्दः च्वया किजायात धलं दंकाः मन्दः पुजा याकाः तताम्हं किजाम्हसित नं पूजाःयानाः धौ सगं, सि सगं व खँय् सगं बिया सुवाः बीगु याइगु खः । नापं तताकेहेंपिसं थः दाजुकिजापिन्त पुजा याये धुंकाः म्हपुजाबल्य थें देमाब्बः मन्दल्य दिकाः हे नकेमाः नके धुंकाः म्वःसिप्बः, ग्वाःग्वय् समेत बीमाः । तता तःकेहेंपिसं दाजुकिजापिन्त पुजा यानाः छःयात थें म्हय् थियाः अन्यायगु नं याइगु चलन दु ।

वास्तव्य ततापिसं किजापिन्त जक पुजा याइगु किजापुजा जूसां केहेंपिसं नं दाजुपिन्त पुजा यायेगु चलन दु । दाजु किजा मदुपिं तता तःकेहेंपिसं रानीपुखू दथुइ च्वंम्ह महाद्यःयात किजा भापाः पुजा यायेगु चलन दु ।

तता तःकेहेंपिसं दाजुकिजापिन्त छाप् पूजा यात धयागु खँय् शास्त्रय् थुकथं उल्लेख यानाःतःगु दु । “भातृ द्वितीया अर्थात् किजापुजाकुन्हु थः दाजुपिन्त यमराज व किजापिन्त चित्रगुप्त भाःपा विधिकथं चिकमन्दः नापं थानाः पुजा यायेगु खः । पूजा

याये सिधयेकाः भ्वय् नकाः म्हुतु शुद्ध यायेत ग्वाः ग्वय् नकेगु यायेमाः किजापुजा यायेत च्वःगु मन्दः दुने किजापुजा यायेत थाःगु चिकं मन्दः मगंतल्ले, सिसगं व्यगुली दुगु ख्वःसिं ख्वला लखय् माः मबू तल्ले, खेलुइताः न्यय् छ्तु दुगु क्वखानापं क्वखायेकगु ग्वय्स्वांमाःया ग्वय्स्वां सुखू मगं तल्ले यमराज व चित्रगुप्तं दाजुकिजा व ततातहःकेहेंपिन्त रक्षा याइ । अज्याःपिं दाजु किजा तता तहःकेहेंपिसं निरोगी, ताःआयु व कल्याण जुइ धयागु धापु दु ।

किजापुजा यायेगुया मेगु छगू लोक धारणा नं दु । न्हापा न्हापां कार्तिक शुक्ल द्वितीयाकुन्हु यमुनां थः दाजु यमराजयात निमन्त्रण यानाः पूजा यानाः भ्वय् नकाः तया तःबल्य केहेंम्ह दाजुम्हसित थःपिसंथें मनूतयसं नं ततापिसं थः किजापिन्त पूजा यानाः भ्वय् नका न्ह्याइपुके दयेमाः धकाः फ्वंवल्य यमराजं ज्यू धाःगुलिं परम्परा न्ह्यात धयागु धापू दु । किजापुजाकुन्हु यमुनां यमराजयात निसं मनूतयसं थःथः किजापिन्त पूजा यानाः किजापुजा न्ह्याकीगु खः ।

किजापूजाया बारे समाज्य चर्चित छपु लोक बाखं नं दु । गुगु बाखन्य आयु फुइ धुंकुम्ह किजायात यमराजं काः वःगु जुयाचवन । उबल्यलाक तताम्हसिनं किजायात पुजा याये त्यंगु जुयाचवन तताम्हसिनं किजापुजा याये धुंकाः किजापुजा याःबल्य मन्द लय् थःगु चिकं मगं तल्ले ख्वोसिं ख्वला लखय् माःमाबूतल्ले ग्वय्स्वां सुकू मगंतल्ले यमराजं किजायात यंके दैमखु धकाः फ्वन । किजाया नापनापं यमराज व यमराजनापं वःपिं दुततयत् नं पुजा यानाः व्यगुलिं यमराज लयताया ज्यू धाल । थुकथं तताम्ह किजाया ताः आयुया कामनायात मृत्युपाखें मुक्त यात धयागु लोकबाखं दु ।

किजापुजा सम्बन्धी न्ह्यागु हे खँ जूसां नं तता केहेंपिसं थः दाजु किजापिनि ताः आयुया कामना यासे न्ह्याकूगु पुजा खः ।

लक्ष्मीद्यः क्वकायेगु

कछला शुक्ल तृतीया कौलागाः औसिकुन्हु लक्ष्मीद्यः पूजा यानाः छाःगु थाय्भू मरिचरि फलफूल आदि क्वकायेत लक्ष्मीयात हानं पुजा यायेगु याइ । श्व पूजायात लक्ष्मीद्यः क्वकायेगु धकाः धाइ । थुबल्य छँया जहान फुकसितया नापनापं

बियाच्छये धूंकूपिं म्हाय्यमचा भिनामचातयूत सःताः लक्ष्मीद्यः क्वकाःगुया प्रसाद वीगु याइ ।

क्वःपुजा यानाः सुरु जूगु स्वन्ति नखः व यमपञ्चक लक्ष्मीद्यः क्वकया क्वचायेकेगु जुइ ।

क्वःपुजायात माःगु सामग्रीः-- लप्ते, जा, कै, ला, मरि, आदि

खिचापुजाया लागि माःगु सामग्रीः-- पूजासामान स्वां, सिन्हः जाकि, बजि स्वांमाः

खिचायात नकेगु नसा ला, जा, मरि

लक्ष्मीपुजानिसें किजापुजा तकः

पुजा सामानः-- स्वां, सिन्हः, तपवःस्वां, स्वांया स्वांमा, ग्वय् स्वांमाः धुं, इताः

(खेलुइताः, पुजा इति) जजंका, क्वखा (२१ तु लक्ष्मीपूजा, २१

तु म्हुजा, ५१ तु किजापुजायात, ताय्, अवीर, धौ, समय्बजि,

धाला, लः, सुकुन्दा, पूजाभः क्वत, शंष आदि

मन्दःज्वलः-- प्वताय्, आखे, ग्वःगु माय्, हाकुमुस्या, चिकं, वा,

फलफूलः-- तःसि, स्यांगुलि, ख्वःसिं केरा आमाःसि, भूमि, पासि, खाइसि,

चाकुसि, अम्बः, आदि बजारय् खनेदुगु न्हुहुगु फलफूल

भव्य ज्वलं -

हलूलप्ते, बजि, बुबः, वांउचा, ख्वःचासिमि, लैं, आलु, सुकुला, स्वनागु

बजि, लागवः लापि, छ्वय्ला, पुकला, मरि, मसला धौ वः ।

सगंज्वलं- खैं, धौ, न्याः, अय्लाया, आदि

स्वन्ति नखः कार्तिक महिनां हनीगु जूगुलिं नेवाःतय्गु परम्परा कथं नारांछःया स्तुति यानाः म्ये हालेगु चलन दु । विशेष यानाः भजन खलःपिसं चांगुनारायणयात स्तुति यानाः म्ये हालेगु चलन दु । जुजु भास्कर मल्लं छपु म्ये च्वयेगु यागु दु । थ्व म्येयात भजन याइपिसं हालेगु यायेगु याः ।

नारायणजु गुँया सीरस नं विज्याक

शिलस नागया मणि न्हसस कुण्डल थीक ॥

न्हिन्हिसिया स्वताउन अतिनं सुन्दार छ्वाल

जवनं चक्र जोस्यं खवनं शंख पुस्य

गलस कोखास्य तया तुलसीया माल प्रभुजु ॥

छि पालिया दरशन दया दयकि प्रभुजु

दडाव दरशन बिब जित नारायण जु ॥

अथेतुं स्वन्तियात तिहार धकाः नखः हनीपिसं द्यौसि व भैलो म्हितेगु धकाः तिहारया म्ये हालेगु याः । तिहार सुरु जुइ न्हय्य निसें लक्ष्मी पुजा तक्क भैलो म्हितेगु याइ । लक्ष्मी पूजां निसें लिपा द्यौसि म्हितेगु धकाः तिहारया म्ये हाला छैय् छैय् पसः पसलय् बना दां नसा आदि पवं वनेगु चलन दु । थौकन्हे थ्वबलय् चन्दा संकलन यायेगु खः थें जुइ धुकल । पुचः पुचः हे म्ये हालीपिं बाजं थाइपिं मुनाः द्यौसि व भैलो पवं वनेगु याइगु खः ।

सकिमिला पुन्ही:

बौद्धमार्गी नेवातयगु लागि सकिमिला पुन्ही धयागु दिं तःधंगु दिं खः । श्व हे दिनय् स्वयम्भू महाचैत्य प्रतिस्थापित याःगु धाइ । श्व कुन्हु स्वयम्भू भगवानया थाय् वनाः पूजा याः वनेगु परम्परा दु । स्वयम्भूई हलिमलि ब्वयेगु व तुतः ब्वनेगु परम्परा नं दु ।

कछला शुक्ल पूर्णिमा वा कार्तिकशुक्ल पूर्णिमायात सकिमिला पुन्ही धकाः हना वयाच्चंगु खः । श्व इलय् विशेष याना कृषि उत्पादन धयागु चाकुहि, सकि व बरां खः । श्व इलय् कृषि उत्पादन मध्यय अप्वःसिया वा लयाः छं दुकाये धुंकूगु जुइ । अनं वछ, कःनि मुस्या चना आदि गेडागुडी नं छैय् छैय् दुकाये धुंकूगु जुइ ।

सकिमिला खँवः सकि व मिला मिलेजुया बनेजूगु खः । सकि धयागु फकंया हाः थें खः । मिला धयागु चन्द्रमा जुल । श्व पुन्ही कुन्हु हि, सकि मनाः छःयात पूजा यानाः छायेगु याइ । हि सकि नापनापं बरां कःनि मुस्या, छुस्या आदि बूबः सिया छःछःपिन्त छायेगु याइ ।

हलिमलि ब्वयेगु:

सकिमिला पुन्ही कुन्हु बहनी बौद्धस्थल, स्वयम्भू, बाहाः, बही आदि थाय् थासय् व त्वाः त्वालय् छँखा छँखापतिं हलिमलि बाहाः बहिलिइ चुकय् ब्वयेगु याइ । नापनापं सकि, हि व फलफूल नं तयेगु याइ । बाहाः, बही, त्वाः त्वाःयापिसं तयेहःगु छुस्या मुस्या, हि सकि फलफूल फुकक जम्मा याना चिभाः नृत्योने स्वस्ति वा चिभा, वा छुं मुर्ति हलिमलिं हे कलात्मक धंगं च्वया ब्वयेगु याइ । हलिमलि ब्वये धुन धायेवं भगवान छःया थाय् व चिभालय् मत तयेगु याइ । मत तयेगुया नापनापं भजन खलःपिसं भजन नं हालेगु याइ । हलिमलि ब्वयाः छःयात पूजा नं याइ । पूजा नापं भजन सिधल धायेवं ब्वयाः तःगु दक्क हलिमलि मुना हलिमलि ब्वःगु स्वःवःपिं वा अन मुनाच्चपिं फुकसित इनाः बी । नापं सुनां सुनां

हलिमलि ब्वयेत कःनि, मुस्या, छुस्यामुस्या, खत्या, फलफूल आदि तःहःपिं फुकसित प्रसाद धका छैय् छैय् नं बीके व्छयेगु याइ । श्वबलय् कःनि, मुस्या, फलफूल, मरि आदि भौँचा वा मरिकसी तयाः बाहाः वहीलय् ब्वये यंकेगु जक मखु थःथिति इष्टमित्रपिं थाय् नं बीक्य व्छयेगु याइ । श्वबलय् कःनिमुस्या, फलफूल, मरि आदि भौँचा वा मरिकसि तयाः बाहाः बहिलय् ब्वये यंकेगु जक मखु थःथिति इष्टमित्रपिनि थाय् बीके छ्वयेमाः ।

श्व कुन्हु नेवाःतय् छैय् चाकुहि, सकि, तरुल आदि कण्डमूलायात मनाः नयेगु याइ । नापं छुस्या मुस्या खत्या, बरां आदि सिया नं नयेगु याइ ।

श्व पुन्ही कुन्हु भगवान बुद्धया चेला सारिपुत्र निर्वाण जूगु दिं धका धायेगु याः । बुद्धधर्मय् मृत्यु धयागु म्वानाच्चनागु जीवनपाखें मोक्ष प्राप्त जुइगु निर्वाण जुइगु खः । निर्वाण प्राप्त जूपिसं मेमेगु जन्म काः वने म्वाल धका धायेगु चलन दु । निर्वाण प्राप्त मज्जिपिनि मृत्यु लिपा नं हानं मेगु जन्म काः वने माः धयागु पुनरजन्मया विश्वास याइपिनि धापु दु ।

सकिमिला पुन्हीबलय् लःफय्या याम फूना चिकुला सुरु जूइगु जूगुलिं कःनि मुस्याः नयाः म्हाय् शक्ति दयेकेगु खः । म्हा क्वाकेगु खः । चाकु हि व सकि जमिनया तःलय् सइगु वस्तुलय् चिनि दैगुलिं हि सकि नयाः शक्ति दयावइगु नं खः । कार्तिक महिना अप्वः धयाथें फलफूल सइगु याम खः । उकिं श्व इलय् फलफूल नयेगु चलन दु । फलफूल भिटामिन “सि” दुगु वस्तु खः । अथें तुं हि, सकि, कःनि वछ आदि कार्वोहाइडेड व मुस्या सिम्पु बरां आदि प्रोटिनयुक्त नसा खः ।

आषाढशुक्ल एकादशी अर्थात हरिशयनी एकादशी कुन्हु चतुरमास सुरु जुइ । श्व प्यला तक न्ह्याइगु खः । सकिमिला पुन्ही कुन्हु चतुरमास क्वचायेकेगु दिं खः । चतुरमास प्यला धर्मकर्म यायेगु इवलय् गुम्हसिया बाखं कंकेगु याइ गुम्हसिया बाहाः बही वा छुं नं छःछःपिन्त पूजा यायेगु याइ । श्वबलय् बाखं क्वचायेकेगु धकाः पूजा याना क्वचायेकेगु याइ ।

कतिपुन्ही कुन्हु खुल्ला आकाशय् पंमा थना तःगु आलःमत नं सकिमिला पुन्ही कुन्हु दुकायेगु याइ । चन्द्रमायात पूजा याइबलय् विशेष यानाः हलिमलि छानाः पूजा यायेगु चलन दु । चथाः बलयनं चन्द्रमायात खुं छःया रुपय् पूजा याइगु खः । श्वबलय् नं कःनि मुस्या फलफूल तयाः पूजा याइगु खः । सकिमिला पुन्हीबलय् नं हलिमलि ब्वयेगुया चन्द्रमा लुइ धुंका बहनी खः । छःछःपिन्त चाकुहि नापनापं हलिमलि छानाः पूजा याइगु जूगुलिं श्व पुन्हीकुन्हुयात हलिमलि पुन्ही धका नं धायेगु याः ।

श्व पुन्ही कुन्हु जलबिनायक क्वयँला गणेशःया जात्रा नापं थानकोटया महालक्ष्मीया जात्रा नं जुइ ।

बालाचःहे / बाला चतुर्दशी

मंसिरकृष्ण चतुर्दशी (चःहे) कुन्हु दैय् दैसं पशुपति गुट्येश्वरी श्लेश्मान्तक वन, मृगस्थली आदि थासय् वनाः छं मदुपिनिगु (स्वर्गे जूपिनिगु) नामय् छःछःपिं थाय् सतविज व्हलाः मदुपिसं याना बंगु पापं मुक्त यानाः स्वर्गय् छयेगु दिं धायेगु परम्परा दु । थये वनाः सतविज व्हलाः वनेगुयात बालु वनेगु धका धाइ । मदुपिनिगु नामय् जक सतविज व्हलेगु मजूस्ये थःगु मृत्यु लिपा बालु वनिपिं सुं मदुसा थःम्ह हे म्वाःबलय् बालु वनातये ज्यू । छाय्धाःसां बालु छक्कः जक वन धाःसां वया न्हय्यगु पुस्ता तक्क पापं मुक्त जुयाः स्वर्ग वनी धयागु धापु दु । बालचःहे कुन्हु बालू वनेगु थासय् छवः जक सतविज व्हल धाःसा छक्क टुक्रा लुं दान यानाति ग्यं धका धायेगु सामाजिक परंपरा दु ।

बालाचःहे कुन्हु बालू वनीवल्य् विशेषयाना मृगस्थली वा श्लेश्मान्तक वनय् व्हलीगु सतविज मदये धुकूपिन्त नयेगु नसा पिया व्यगु खः । अथे सतविज व्हला बिल धाःसा स्वर्गय् वंपिं जहानपिसं उगु सतविजपाखें अन्न सया अमि नये दयाः गुवलें छां लाई मखु धयागु विश्वास दु ।

थुबलय् पशुपति गुट्येश्वरी लागा दुने लापिं छःपिं फुक्क चाःहिला सतविज व्हलाः छ्वाय् गणेशःया थाय् थ्यंकाः पूजा यानाः गणेशःया न्हायपं ज्वनाः, संकाः मदुपिन्त धयाब्यू धका हालाः न्यंकी । धार्मिक परम्परा कथं छ्वाय् गणेशः मनुस्यलोकया खबर तप्यं स्वर्गलोकय् थ्यंका ब्रीम्ह धायेगु चलन दु । गणेशः छ्वाय् जूगुलिं धयां मताइगु जूगुलिं वयात हे संका वा चायेका स्वर्गय् च्वंपिन्त खबर बीगु खः ।

बौद्ध, हिन्दू शैव धर्माबलम्बीपिं, धनिपिं, गरीबपिं फुक्क हे बालू वनेगु परम्परा दु । थव छगू नेपाःया धार्मिक सहिष्णुता कथं कयातःगु खः । गुहेश्वरी पशुपति व श्लेश्मान्तक क्षेत्र दुने लाःपिं गुहेश्वरी, पशुपति, भगवान बुद्ध, शिवलिङ्ग, गणेश, आदि छः छःपिन्त, भक्तिभाव यानाः सतविज व्हलीगु खः । नेवाः जाति जक मखु मराः, राई, तामाङ्ग, क्षेत्री ब्रम्हु, नेवाः आदि फुक जात जातिपिसं नं सतविज व्हःवनेगु परम्परा दु । उकिं थव नेवाःतय्गु जक दिं मजुस्ये राष्ट्रिय दिं हे खः । थुबलय् विशेष याना श्लेश्मान्तक वनय् च्वंगु ६४ ग्वः शिवलिङ्गयात इवः इवः याना चाहिलेगु चलन दु ।

बालु वनेगु शुरु थन अनं निसैं धयागु मदु । न्ह्याथासं सुरु याःसां ज्यू । तर गुहेश्वरी पशुपति, श्लेश्मान्तक वन, मृगस्थली कैलाश पर्वत आदि थासय् च्वपिं छःछःपिन्त दर्शन याना चाःहिलाः अन्तय् छ्वाय् गणेशःया थाय् थ्यंका थाय् थासय् व्हःले धुंकाः ल्यंगु सतविज दक्क गणेशःयात प्वंकाः सिधयेकेगु चलन दु ।

बालाचःहे कुन्हु बालू वनेगुया लागि तातापाकं नं मनूत वयाः पशुपति, गुट्येश्वरी, श्लेश्मान्तक वनय् अर्थात सतविज व्हलेगु थासय् मदुपिनिगु नामय् सवालाख मतः वा मार च्याका पूजा यानाः चा छ्यानाः सुथ न्हापां बागमतीइ म्बःल्हुयाः, छ्वाःसिलाः सतविज व्हलाः बालु वनेगु याइपिं नं दु । बालु वनीपिनि नं बागमती खुसिइ छ्वाः सिलाः वा म्बःल्हुयाः बालुया सतविज व्हलेगु याइ । बालु वनेगु सिधल धायेवं पशुपति क्षेत्र दुनेया सुन्दरीकुण्डय् छ्वाः वा म्बःल्हुयाः कैलाश पर्वतय् च्वनाः चिपं थियाः थःथःगु छैय् लिहां वयेगु चलन दु ।

स्कन्दपुराण महात्म्य कथं महाद्यः छपु जक न्यक् दुम्ह चल्ला रुप कयाः श्लेश्मान्तक वनय् च्वनाच्वंबलय् चल्ला रुपया महाद्यवं उगु थासय् मंसिर चतुर्दशी कुन्हु सतविज व्हल धाःसा तःधंगु पुण्य लाई धका धाःगुलि उगु दिनय् मनूतय्सं सतविज व्हलेगु परम्परा न्ह्याक्गु खः धकाः उलेख जुयाच्वंगु दु ।

मंसिर चतुर्दशी कुन्हु च्वये न्ह्यो थनागु थासय् सतविज व्हलेगु परम्परा गुकथं न्ह्यात धयागु छगू लोकबाखं दु ।

न्हापा न्हापा नेपाःगालय् बालानन्द धयाम्ह छम्ह मनु दु । बालानन्द नापं मेमेपिं जाना पशुपतिया मसानय् सीम्ह मनु उया च्वंगु जुया च्वन । सीम्ह मनु उनाच्वंपि गुथियारत मुनाः छुं नसा नयेमाःगु चलन दुगु जुयाच्वन । अथे नसा नयाः च्वंबलय् उनातम्ह सीम्ह मनुया न्ह्यपु मुया बालानन्द नयाः च्वंगु ब्वय् लाः वन । वनं अथे न्ह्यपु मुयाः थःगु ब्वय् लाःगु मसीस्ये नसा नापं तुं नया क्छत । वयात मनुया न्ह्यपु तच्चवं सात । लिपा जूलिसे थःहे याकचा चान्हे वया सीम्ह मनु उवनेगु यात । मनुयात उउं थःत यःयःगु लानं नयेगु यात । लिपा जुजुं मनु हे मउस्य थःम्ह हे नयेगु यात । थये मनुया ला नयेगु याःसां निसैं बालानन्दया छ्यंनय् व्हःयागु न्यक् दया वल । लिपा जू लिसैं छै मच्चंस्ये पशुपतिया मसानघाट नापसं च्वंगु श्लेश्मान्तक वनय् हे च्वनेगु यात । सुयां सिथं हःसा दथुइ तुं हे लाका यंका जंगलय् च्वना नयेगु यात । अले बालानन्द बालासुर नां जुल । बालानन्द मनु पाखें राक्षसय् हिल । थये सी उके मब्यस्य सीम्ह हे लाकाः यंकेगु यक्क जुस्येलि जुजुयात खबर यात । जुजु नं बालासुरया त्वाय् वृषसिंहयात सःता राक्षस बालासुरयात स्यायेगु जिम्मा बिल । नापं छै वुं इनाम बीगु धाल । जुजुं ब्यूगु वचन यात स्वीकार हे याये माल । उकिं वं महाद्यःया ध्यान यानाः तपस्या यात । महाद्यवं नं तपस्या च्वंम्हसित राक्षस स्यायेगु शक्ति बिल । बालासुर राक्षस स्याये धुन धायेवं वयागु व्हःया छ्यं महाद्यःयात छाये माः धका धाल । महाद्यःया शक्ति काये धुंकाःवृषसिंहं झिनिम्ह मनुनापं ला साःसाःगु नसाया अय्ला ज्वनाः जंगलय् वन । थः च्वना च्वंगु वनय् त्वाय् वःगुलिं बालासुर लय लयतायाः नापला वल । त्वाय् नं अथे मवंस्य नसा व त्वनेगु अय्ला ज्वना वंगुलिं त्वाय् यात थःम्ह ज्वना वःगु सकतां नकेगु यात । नये धुकूपिन्त अय्लाखं कायाः बालासुर राक्षस अचेत जुया क्वदल । अथे अचेत जूम्ह बालासुरयात वृषसिंहं यंका

तुथिइ क्वफानाः स्याना बिल । स्याये धुंका बालानन्दया छ्यं यंका जुजुयात लः
ल्हानाः बिल । जुजुयात लःल्हाय् न्ह्यो पशुपतिइ महाद्यःयात छानाः त्वाय् स्यानागु
पाप मलायेमाः धका महाद्यःयाके पवन । माहाद्यवं नं दैयदसं बालासुर स्यानागु दिनय्
पशुपतियात बालासुरया छ्यं पुइका पूजा यात धाःसा त्वाय् स्यानागु पाप लाइ मखु ।
पशुपति महाद्यवं बालासुरया छ्यं पुगु दिनय् सुनां महाद्यःया दर्शन यानाः श्लेष्मान्तक
वनय् सतविज व्हलेगु याइ वया न्ह्यय्गू पुस्तातक मोक्ष प्राप्त जुइ धका धाल ।
उबलय् निसैं बालासुर स्याःगु दिं बालचःहे कुन्हु पशुपति लागा दुने च्वपिं छःछःपिन्त
दर्शन यानाः सतविज व्हलेगु परम्परा जुल । सीपिनिगु नामय् नापनापं म्वाःपिनिगु
नामय् नं सतविज व्हलाः मोक्ष प्राप्त याना स्वर्गय् वनेगु जुल ।

थौकन्हय् धर्मय् कट्टर जुजुं वःपिसं बालाचःहे कुन्हु पशुपतिइ क्षेत्र
मवंस्य स्वयम्भू महचैत्य गःचा हुला सतविज व्हलेगु याइपिं नं मदुगु मखु । गुम्ह
पशुपतिइ सुथय् सतविज व्हलेगु याःसा न्हिनय् स्वयम्भू गःचा हिलाः सतविज व्हलेगु
याइपिं दु । वास्तवय् थ्व मदुपिन्त मोक्ष प्राप्तया लागि हे याइगु खः ।

मार्ग शुक्ल तृयोदशी कुन्हु येंया थी थी छः खः थंहितिइ हयाः
तयेगु याइ । कन्हे कुन्हु अर्थात् मार्गशुक्ल चतुर्दशी (बालचःहे) कुन्हु बान्ही तक अन हे
तयाः तइ अनं लिपा जात्रा याना लित यंकी ।

थये जात्रा याइपिं छःखः थये खः ।

- | | |
|----------------------|-----------------|
| १. लुति अजिमा | (लुतिइ च्वंम्ह) |
| २. भवरी गणेशः | (ध्वविचौर) |
| ३. ज्वालामाई | (मजिपाः) |
| ४. मां अष्टमातृका खः | (न्यत) |
| ५. स्वभाभगवती | (विजेश्वरी) |
| ६. स्वां छुना गणेश | (थंहिति) |

थुबलय् जात्रा विशेष याना येंया थने भेकय् च्वपिनि जात्रा खः
। गथांमुगः नखः निसैं स्वातु मतु स्वागू अथवा ससःतिक नखः न्ह्याना वयाच्चंगुली
थ्व जात्रां निसैं नेवाःतय्गु नखः चखः ताताः पापां वनेगु जुइ ।

बौद्धमार्गीपिनि बालु

बौद्धमार्गीपिनि बालाचहे कुन्हु बालु वनीबलय् दकले न्हापां
गुहेश्वरीया मूलुखाया न्ह्योने च्वंगु बागमती खुसी छ्वाः सिला नी याना फिया चिभा
छग्वः दयेका अन पूजा याना गुहेश्वरी थाहां वनेगु याइ । गुहेश्वरी छःयात पूजा याना
सतविज छायेगु याइ । अनं गुहेश्वरी पश्चिमया लुखां पिहां वनाः त्वाथः गयाः
श्लेष्मान्तक वनय् वनेगु याइ । दकले लिपा कैलाश पर्वतय् च्वंम्ह छुं हे मूर्तिया
आकार मदुगु ल्वहें गुगुयात बसुन्धरा छः धका माने यायेगु याइ । उगु ल्वहँयात

नेपाली भाषा धानधान्य धका धायेगु याः । बसुन्धराया छःया थाय् थयंका बालु
वपिंके च्वंगु फुक सतविज वा बिबः छायेगु याइ । उगु हे थासय् च्वना चिपं थीगु
धका नयेगु नं याइ ।

बिबः व्हलेगुली विशेष याना क्वये च्वंगु तयेगु याइ

बिबः	फलफूल	छःछःपिं चाहिलेगुली
ताये	चाकु हि	पिथ गुहेश्वरी
स्वांवा	सकि	भगवती
वा	लैं	महाद्यः (पशुपति महाद्यः नापं)
मुस्या	कय्गु पवया	गणेश
माय्	माय्	नारायण
इका	तप्वःस्वां	सरस्वती (ससुद्यः)
पःका	ताय्	विश्वरूप
हाकुहामो		वसुन्धरा आदि
तच्छः		
चिग्वः कयेगु		

फलफूल विशेष याना व्हलेगु अःपुक बिबः नाप मिले जुइक ची
ची कुइक तायेगु याइगु खः । थुबलय् विशेष यानाः गुहेश्वरी छःयात जक पूजा तथा
पूजा यायेगु याःसां मेगु थासय् खालि पूजा भलय् पूजा मतस्ये अथें जक पूजा यायेगु
याइ । तच्चतं हुल जुइगुया नापं बिबः व्हलेगु जूगुलिं पूजा सामान नं छगू हे थासय्
तथा छः दर्शन यानाः दक्षिणा छाना पूजा यायेगु याइ । गुलित छः दुगु खः फुकसित
पूजा तथा पूजा बीगु याइ मखु ।

वास्तवय् बिबः व्हलेगु खः बिबः हे जक व्हलेगु मू खँ खः । स्वां
जाकि सिन्हः तथा इच्छा कथं पूजा यायेगु याइ ।

यःमरि पुन्ही:-

यःमरि च्वामु, उकी दुने हाकु
ब्यूम्ह ल्यासे, मब्यूम्ह बुन्हिकुतिचा
छिमिनं चिकु, जिमिनं चिकु
पिया च्वने थाकु, याकनं ब्यू

परिभाषा:-

च्वय् न्हयः थनागु काव्यात्मक अभिव्यक्ति सुं विशेषं कविया आत्मां पिज्वःगु अभिव्यक्ति मजुस्य यःमरि पुन्हीया मूखंयात कया लोकोक्ति कथं जुयाच्वंगु अभिव्यक्ति खः । गुकी यःमरिया बां (आकार), यःमरि दयेकीपिं मिसात यःमरि पुन्हीया याम (ऋतु)यात मचायेक न्ह्यो थनातःगु दु । यःमरि पुन्ही धयागु दछियंकया १२ गू पुन्ही मध्यय् मंसिर महिनाया पुन्ही (मार्गशुक्ल पूर्णिमा) अथवा थिला शुक्ल पुन्हीयात धायेगु याना तःगु खः । थव कुन्हु विशेष यानाः नेवाः जातिं थःगु हे पहःया मरि यःमरिया नामं पुन्हीया नामाकरणं यःमरि पुन्ही जूगु खः । थिला पुन्ही वा मार्ग पुन्ही धायेगु स्वयां यःमरि पुन्ही, धान्य पुर्णिमा, गैडू पूर्णिमा कथं नं नां जाः । थव पुन्हीया दुने बुँड वा लयाः तःसिं दुपिनि तःसियात पुलाः बाकिगु वा, तःसिं मदुपिनि बुँडच्वंगु वा लयाः पानाः थःथःगु वा कुथिइ स्वथनेगु जुड धुंकीगु जूगुलिं थव दियात धनधान्य पूर्णिमा नं धाःगु खः । थुगु इलय् तसितय् नं म्हायतय्सं वा लयाः बाली पुले हये धुंकाः थःथःगु वा कुथिइ वा दुतिना वा जायेका तये धुंकागु जुड । थुकथं म्हाय् तसिं निगू वर्गयापिनि थःथःथु बुं वा दुतिनाः वाया भकारी जाये धुंकीगु जूगुलिं धान धान्य पूर्णिमा धका धाःगु खः । नेवाःतय् छुं नं ज्या व्यवस्थित रुपं यायेगु परम्परा दु । उकिं हे मोहनि नखःबलय् नःलास्वां पिना न्हापां नःलास्वां लयाः अनं निसें वा लयेगु ज्याय् न्ह्यायेगु याइ । नःलास्वां लयेगु मयास्यं वा लये मज्यू धयागु बुँज्याः याइपिनि धापु दु । यःमरि पुन्ही कुन्हु पहाडय् च्वपिनि सा, व्हं लहिना तःपिनि बुँज्या यायेत सा व्हं नं आपालं ग्वाहालि (हलो जोते यायेगु, दुरु, सउ साः आदि) याःगुलिं

वा लय् धुंका अर्थात सामाज्या धुंका सा व व्हं च्वनीगु गोथय् सुचुपिचु याना सा, इ च्वनीगु गोथ पूजा यायेगु चलन दु । उकिं अथे सा व्हंया गोथ पूजा याइपिसं यःमरि पुन्ही अर्थात मंसीर शुक्ल पूर्णिमायात गैडू पूर्णिमा धकाः नं धायेगु याः ।

नेवाःतय्गु थःगु हे विशेषता दुगु मरि यःमरि

नेवातय्सं नयेगु याना वयाच्वंगु आपालं मरिचरि दुसां नेवाः संस्कृति नाप भेलेपुंगु मरि मध्यय् यःमरि छगू खः । मरिया नाम हे नखः हनाः नैगु यःमरि मचायात निर्दे पुन्ही याःसां निसें ज्याथा ज्याथि जंकु तक संस्कारगत ज्याय् माःगु मरि खः । अथे तं हर्ष उल्लास याना याइगु छः छः पिनिगु खः जात्रा यानाः नं छः खःयात यःमरि लुनाः उल्लास पूर्वक छयलीगु मरि खः । न्हूगु छँ दयेकाः पलिं चिनाः, छँयात पूजायाना मचातय्त जन्मन्ही याना यःमरि लुइथें छँयात लुइगु खः यःमरि । यःमरि नामं हे यःगु मरि जूगुलिं विशेष याना भिंगु हर्ष उल्लासया ज्या खँय् छःखः छः छँ ज्याथा ज्याथि, मचातय्त यःमरिं लुइगु नेवातय् थःगु मौलिक परम्परा खः । मचातय्त विशेष यानाः निर्दे बुन्हीबलय् यःमरि निग्वः स्वांमाः हने थें हनाः जन्मन्ही याःम्ह मचायात क्वखायेका जन्मन्ही यायेगु प्रारम्भ याइगु खः । गुम्ह गुम्हसिनं निर्दे निसें भिनिर्दे तकया दुने जोड दँया जन्मन्ही याइबलय् ग्वदँ दुगु खः वःग्वः यःमरि सुकाय् स्वांमाः हने थें हनाः क्वखायेकेगु चलन दु । छगूला मचात थव दँ दत धका संकेत यायेगु याःसा मेखे यःमरियात गःपतय् हे क्वखायेगु याना उकीयात महत्व ब्यूगु दु । अथे तं प्वाथय् दुपित धउबजि नकीबलय् यःमरि मदयेकं मगाः । ज्यापुतय् न्हापां किजा पूजा यायेत कू छवइबलय् यःमरि दयेका तथा छवयेमाः ।

यःमरि दयेकीगु विधिः थज्याःगु सांस्कृतिक रुपं बिलिबिलि जाःगु यःमरियातै थुकथं दयेकेगु याइ ।

न्हूगु वा पुलांगु जाकिया जाकिचुं दयेका, जाकिचुयागु धेरहिनाः क्वाक लिकया बयात क्वाक क्वाक हे जाकिचुं फू ततं न्हायेगु याइ । यःमरि दयइबलय् तज्याइ धका जाकिचुं न्हायाः तःगुयात कापःतय् प्वःचिना क्वाक हे तथा तयेगु याइ । जाकिचुं न्हायातःगु क्वात धाःसा लसा दैगु जूगुलिं थःत इच्छा कथं ग्वारा कयाः क्वाःगु लखय् चिकं तथाः चिल्लो जुइक तयेगु याइ । उगु लःखय् पतिंचा थुनाः जाकिचुं न्हायातःगु ग्वारायात छेवे च्वामुक यानाः मेखेपति पतिचिंका उकि दुने पतिंचा दुछवया दुने प्वाः तथाः पिने सालुकेगु याइ । उगु प्वाल्य दुने चाकु, हामोचुं, नैकाः, यला, काजु (विशेष याना चाकु व हामो जक) तथाः दयेका छलुमुलु धाःगु दुने तथाः व हे जाकिचुंया ग्वारायात विस्तारं त्वपुइगु याइ । थथे त्वपुइबलय् भतिचा ल्याना च्वनी उकियात गुम्हसिनं निपु न्यकूथें गुम्हसिनं निहःथें गुम्हसिनं स्वहःथें थी थी आकार याना क्वचायेकेगु याइ । जाकिचुं मरि पिने चाकु दुने दुगु विशेष स्तूप आकारया मरियात यःमरि धका धायेगु याइ । गुम्हं गुम्हसिनं यःमरि थने जीकथं नं दयेकीपिं दु । गुम्हं गुम्हसिनं निगू च्वः दयेका बिलि यानाच्वंगु आभाषय् नं क्वचायेकेगु याइ । जाकिचुया

मरि पिने चाकु दुने तया दयेकीगु यःमरिया दुने चाकु हामोया पलेसाय् माय् फव्याः निनाः मसला तयाः मूपाः दुने तयेगु नं याः । अथे तु चिनी खुवा काजु, नैक्या छोरा आदि मसला चुं यानाः नं दुने तयेगु याः ।

द्यःपूजा यायेगु वा यःमरिं लुइके माल धाःसा हामो चाकु दुगु यःमरि जक दयां मगाः । यःमरि दुने गर्भय् हामो चाकुया पलेसा न्यागः आखे तयेगु नं चलन दु । ज्यापू पञ्चया धापु कथं थथे न्यागः आखे धयागु पञ्चबुद्ध अमिताभ, अमोघ सिद्धि, अक्षोभ्य, रत्नसम्भव, बैलोचनया प्रतिक खः । यःमरिया आकार बौद्ध चैत्यया आकार खः । चैत्यय् दुने पञ्चतत्वया प्रतीक कथं हामो चाकु, लः नापं याना न्याता ल्वाक व्छायेगु याइगु खः । थुकथं दयेके धुंका यःमरियात न्हापा जूसा प्वतासि, वा भालिंचाय् तयाः त्वपुया प्वसि वा कसौरी लः दयेका हाया बुकेगु याइगु खः । श्व मरि कलात्मक मरि खः । श्व मरि दयेकेसःपिसं जाकिचुंयात तच्चतं सालुक दयेकाः उकी दुने चाकु हामो तयेगु याइ । जाकिचुं अर्थात पिनेयागु व्व गुलि सालुक दयेके फत उलि कुसलपिसं दयेकूगु धका सी दै । हाया बुत धायेवं ल्हनाः गालाः ख्वाउंकेगु याइ । थथे गाल धायेवं यःमरि प्वाला प्वाला थिना वइ । छक्व थी धुंकूगु यःमरि लिपा तक नं थिना हे च्वनी ।

यःमरि दयेकेत न्हायातःगु जाकिचुंयात खें बाहां लुइका पतिचिकं ल्वहँचा मरि नं दयेकेगु चलन दु । ल्वहँचा मरियात गणेशःया प्रतीक धका नं धायेगु चलन दु । (सन्ध्या टाइम्स शुक्रवाःया तंसापौ सिलाथ्व ६, १९९६) यःमरि दयेकेगु इवल्य जाकिचुंया गणेशः, लक्ष्मीद्यः, कुबेर, ज्यापू, ज्यापुनी ख्याःचा, फैंचा, त्वाःदेवा, आदि थरी थरीया आकार दयेका हायेगु नं चलन दु ।

यःमरि पुन्हीया पूजाः

पुन्ही पतिकं बुद्ध भगवानयात पूजा यायेगु धयागु साधारण खँ खः । श्व दिन कुन्हु विशेष यानाः सुथय् धुकुति नीसी याना वा जाकि भखारी, त्यप, आदि थलय् वा, जाकि जायेक जायेक तयाः उकिइ जाकिचुं नं दयेकातःगु यःमरि, ल्वहँचा मरि, लक्ष्मी द्यः, गणेशः, कुबेर, तयाः स्वां सिन्ह, नैवैद्य फलफूल तया पूजा यानाः प्यन्हू तक स्वनेगु हे याइ । मोहनीबलय् थें यःमरि नाप थी थी द्यःपिं स्वनातःथाय् प्यन्हू तक पूजा याना प्यन्हू लिपा क्वकया प्रसाद कथं यःमरि ल्वहँचा मरि परिवार जःछि इना नयेगु याइ ।

श्व पुन्हीया महत्व वारे विष्णु पुराणय् थुकथं च्वयातःगु दु । मार्गशुक्लया पुन्ही कुन्हु वा जाकि तयेगु भखारीइ यःमिधयापिं कुबेर, लक्ष्मी व गणेशः दयेका तयाः प्यन्हूतक न्हिया न्हि विधि कथं पूजायाना मधि छायेगु, मेपिन्त नं मधि दान

यानाः थःपिसं नं नयेगु । श्व ज्या यात धायेवं दच्छितकयात धन सम्पति व अन्न स्थिर जुयाः कल्याण जुइ (पुण्यरत्नः १०८४:७३) ।

श्व पुन्हीबलय् द्यःपूजा याइपिं द्यःपिं फुक्क हे धन सम्पति अभिवृद्धि जूपिं जक खः । गणेश मंगलमयया प्रतिमूर्ति, कुबेर सम्पतिया धनि, लक्ष्मी सम्पति दाता हे जुल । यःमरि पुन्हीबलय् लक्ष्मी, वसुन्धरा, गणेश पूजा यायेगु चलन दु ।

धन धान्य जूगु वारे छपु लोक बाखं दु । यःमरि पुन्हीया लसताय् श्व बाखंयात लुमंकेगु याः । नापं श्व बाखं नं शिक्षा कयाः त्यःछिं त्यः फवंःपिन्त यःमरि वा, जाकि आदि बीगु व नकेगु परम्परा नं जुयाच्वंगु दु ।

यःमरि पुन्ही अर्थात थिला शुक्ल पूर्णिमा कुन्हु पांचाल देश (पनौती)या छगू गामय् च्वम्ह सुचन्द्र गृहस्थ धयाम्ह महाजनया निम्ह तिपु अतिकं हे गरीवपिंप्रति दया तैपिं जुयाच्वन । श्व निम्हतिपुलिं गुलित गरीवपिन्त श्रद्धा तै धयागु सीकेत कुबेर गरिवम्ह मनू जुया सुचन्द्रया छँ पवं वन । गरिवरुपि कुबेरयात धाथेंम्ह गरिवम्ह मनू भाःपाः सुचन्द्रया कलातं सःता थःथाय् छँ तलय् यंका न्हूगु लं फिकाः, सागु नसा नकाः माने याःगु जूगुलिं गरीवम्ह रुप धारण याःम्ह कुबेर लय् तयाः थःत सेवायाम्ह सुचन्द्रया कलाःयात ज्ञानगुणया खँ ल्हाना तःसि छवः बीया अन्तरध्यान जुल । लिपा थः भातयात कुबेरं व्यूगु ज्ञान गुणया खँ फुकं भातम्हसित कन । निम्हतिपुलिं जाना चाकु दुने तयाः यःमरि व कुबेर दयेका हायाः कुबेरं बिया थकूगु तःसि जाकिचुं नं दयेकूम्ह कुबेर व यःमरि फुकं अन्न तयेगु भखारी तयाः पूजा याना प्यन्हू तक अथें तया तल । यःमरि थःपिसं नं नल करपिन्त नं इनाबिल । गुलि दानयात उलितुं धन श्री सम्पति अभिवृद्धि जुया वल । कुबेर, यःमरि व तःसि तयाः पूजा याःगु भखारी न्ह्याक्व वा लिकासां क्वमलात न्ह्याबलें जाया अथेया अथे तुं जाया च्वन । थुबलय् नं निसें यःमरि दयेका वा कुथि वा तयेगु भखारी पूजा यानाः यःमरि थःपिसं नं नयेगु करपिन्त नं इनेगु, फवंःपिन्त वा यःमरि बीगु परम्परा जुल धयागु धाःपु दु ।

ग्वह पूजा

यःमरि पुन्ही कुन्हु सुथय् यःमरि, ल्वहँचा मरि दयेका कुथि वा भखारी पूजा यायेगुया नापनापं बहनी ग्वह पूजा यायेगु धका हासाय् ग्वहया नापनापं सफू तयाः पूजा याना यःमरि, ल्वहँचामहि लुयेगु चलन दु । ग्वहपूजा धुंका मकलय् मिं च्याका बरां नयाः मि कुइगु सुरु नं याइ चलन दु । यःमरि पुन्ही चिकुलां लाःगु जक मखु म्हपुजां निसें चिकुइगु सुरु जुयाः यःमरि पुन्ही कुन्हु निसें चिकुगु तःच्चतं बरे जुइगुलिं याना चिकुगु लंकेगुया लागि श्व कुन्हु मकलय् मि च्याका मकः कुइगु सुरु याइगु खः । थुबलय् सुरु याःगु मकः कुइगु सिलाचहे कुन्हु मकः कया क्वचाकेगु याइ ।

वास्तवय् यःमरि पुन्हीबलय् ज्यापुतय् वाया भखारी नापनापं बूं ज्या याइगु कू, तकू, खतांमुगः आदियात नं पूजा याइगु चलन दु । अथे तुं वैद्य ज्या याइपिनि वा ज्ञानगुनया खं थः विद्यापाखें धन कमाय् याइपिसं ग्वहपूजा याइगु परम्परा

दु । वायात जक पूजा याना मज्जु थःगु आय श्रोत छु खः उगुयात नं पूजा याइगु परम्परा खः । मोहनीबल्य थःगु आय आर्जन याइगु वस्तुयात पूजा याना शक्ति उपासना याइगु जुसाः यःमरि पुन्ही कुन्हु थःगु आयश्रोतया वस्तुयात पूजा यानाः सम्पति आर्जन यायेगुया लागि पूजा याइगु खः ।

यःमरिया दार्शनिक पक्षः

यःमरिया आकार धयागु बौद्ध स्तूप खः । उकिं यःमरि नयेगु धयागु हे बौद्ध ज्ञान प्राप्त यायेगु खः । शिक्षा कायेगुया लागि मनस्थिति स्थिर यायेगु खः । थःगु मनयात स्थिर यानाः बसय् तये फत धाःसा आत्माज्ञान प्राप्त याये फैगु खः । थःके दुगु ज्ञान थःयाके जक सीमित याना तयेगु मजुस्ये थःम्हं फक्व इना बीगु खः । अथे तं यःमरि नं थम्हं जक नयेगु मयास्ये सकसित इनाः नकेगु खः । अर्थात यःमरि पुन्हीबल्य बा जन्मन्हीबल्य यःमरि थःपिसं जक नयेगु मयास्ये त्यसिं त्यः काःवःपिन्त इना बीगु खः । जन्मन्हीबल्य धउ बजि नाप इनाबी सा मचाया निदैं पुन्ही जूसा थः थितिपिन्त नं इनाः बीगु याइ । अभ्र पाजु, निनि, तता तहकेंहेंपिं थाय् छैय् छैय् बीक्य व्छइगु चलन दु । गथे स्यूपिसं ज्ञान बी अथे तं यःमरि नं बी सुयाकें ज्ञान काये मछाले म्वाःथे यःमरि नं सुयाकें कयाः नये मछाले म्वाः । अथे जूगुलिं हे यःमरि पुन्हीबल्य छैय् छैय् वनाः यःमरि फवनाः नैगु खः ।

यःमरि ज्ञानया प्रतीक जूगुलिं यःमरि पुन्हीबल्य सफू वा ग्वहपूजा याइगु नं सान्दर्भिक खः । ग्वह सरस्वतीया प्रतीक खः । ग्वहलं मस्यूपिन्त ज्ञान गुण बीगु याइ उकिं यःमरि पुन्हीबल्य पूजा यानाः ज्ञान आर्जन याइगु खः ।

त्यःछिं त्यः

नेवाः जातिया न्ह्यागु छगू याःसां तःधंगु वा-चीधंगु दान मयाकं आत्मसन्तोष काये मसःगु जाति खः । मचा बुया ब्यकुसा आगं ब्वचा बीया दान याःसा जन्मन्ही यानाः यःमरि धउवजि दान, सीसां दान म्वाःसां दान, धर्म याःसां दान, पूजा याःसां दान यायेगु चलन दु । गुर्जुयात दान, सन्यासीयात दान, फवगियात दान, थःथितियात दान, न्ह्याम्हसित नं दान याइपिं खः । दान हे नं श्व हे धयागु मदु । तसा त्वंसा, दां, लं न्ह्याःगु जूसां म्वाःपिनिगु नामं दान, सीपिनिगु नामं दान, अथे तं यःमरि पुन्हीबल्य यःमरिया नापनापं वा, जाकि, ध्यवा, आलु न्ह्यागु नं दान यायेगु खः । थथे दान कायेगुयात त्यःछिं त्यः फवनेगु वा कायेगु धाइ । त्वाः त्वालय् च्वपिं मचात मुनाः छेँखापतिं त्यःछिं त्यः फवंवनीगु खः । छगू त्वालं मेगु त्वालय् नं त्यःछिं त्यः फवंवनेगु

याः । त्यःछिं त्यः फवं वःपिन्त यःमरि, जाकि, वा , ध्यवा न्ह्यागु नं बीफू । थथे त्यःछिं त्यः फवं वनीपिनि गुम्ह गुम्हसिया योजना तयाः हे फवनेगु याः । योजना तयाः हे फवंनेगु याः । अप्वः यानाः योजना दयेका त्यःछिं त्यः फवंवइपिनि सामाजिक ज्याया लागि कायेगु नं याः । उकिया लागि न्हापा हे सुचं बीगु नं चलन दु । योजना तयाः त्यछिं त्यः फवनाः वःगु वा, जाकि, फुकं दामय् हिला ज्याय् छयलेगु चलन दु ।

यःमरि पुन्हीबल्य त्यःछिं त्यः काः वइपिनि भाखा धाःसा थाय् स्वयाः वा व्यक्ति स्वयाः पाःगु खनेदु । येँ दुने त्यःछिं त्यः काःवइबल्य विशेष याना हाला वइगु भाखा थथे खनेदु । उगु भाखायात च्वय् न्ह्यः थने धुनागु नं दु ।

त्यःछिं त्यः बकछिं त्यः
लातावाता कुलिचां जुछिं त्यः
यःमरि च्वामु उकी दुने हाक्
ब्यम्ह ल्यासे मब्यम्ह बुहिकुति
छिमिनं चिकु जिमिनं चिकु
पिया च्वने थाक्

वहे भाखायात थुकथं नं हालेगु याः ।

त्यःछिं त्यः बकछिं त्यः
लातावाता कुलिचां जुछिं त्यः
यःमरि च्वामु उकी दुने हाक्
ब्यम्ह ल्यासे मब्यम्ह तितिकुति बुढी

न्हापांगु व लिपायागु वहे तं जूसां नं लिपायागु वाक्यं तितिकुति खंगवः छगू अप्वः खनेदु ।

श्व हे भाखायात बनेपाय् नेवाःतय्सं थुकथं नं हालेगु याः ।

यःमरि चुई च्वंथाय् लाक हइ
ब्यसा ल्यासय् मब्यसा कुरिति

श्वया सन्दर्भ यःमरि छुनाः (चुई मचाःभाषां) च्वना च्वंथाय् तक्क बी हयेगु याइगु खः । यःमरि छुना बीगु याःसा रितिथिति सःस्यम्ह धका धायेगु याइगु खः । बीगु मयात धाःसा रितिथिति मस्यम्ह धका धयातःगु खः । अथेतं

यःमरि चुई च्वकाय् लाक आई
ब्यसा ल्यासे, मब्यसा बुढीकुटी

श्वया सन्दर्भ यःमरि छुना च्वकानिसें वां न्याना नयेगु खः । यःमरि ब्रिल धाःसा ल्यासे मबिल धाःसा मतिमभिम्ह बूढी खः धका धाःगु खः ।

यःमरि पुन्हीबल्य् चलन चलि वःगु भाखा धयाःगु च्वये न्ह्यो थनागु भाखा खः । ज्या यायेगु योजना तयाः त्यःछिं त्यः फ्वनेगु जुल धाःसा त्यःछिं त्यः बकछिं त्यः, लातावाता कुलिचां जुछिं त्यःया भाखाय् म्ये दयेका हालेगु याइगु नं चलन दु ।

वसं वनेगु:

यःमरि पुन्हीयात मेमेगु जातिं स्वयां ज्यापु जातिं तःजिक हनीगु चलन दु । सिनाज्या स्यनी धका थःगु बाजं स्वथनातःगु थासं कागेश्वर अष्टमी कुन्हु पिकया ज्यापु जातिपिं मिजं मचातय्त धिमे बाजं थायेगु धुंज्या बुंज्या हिकेगु स्यनेगु याइ । थथे स्यनातःगु ज्यापु बाजं त्वाःत्वालय् यंका प्रदर्शित यायेगु यात वसं वनेगु धका धाइ । श्व वसं वनेगु ज्या यःमरि पुन्हीकुन्हु निसें सुरु यायेगु याइ । वसं वनी बलय् साधारण धिमेजक थाइगु मखु धिमेया तालय् धुंज्या बुंज्या चाःहिकेगु नं याइ । मनूया म्ह्य् छःने दना, बाजं थायेगु धुंज्या बुंज्या हुयेकेगु याइ । थथे मनूया छःने च्वच्चं प्यतं न्यातं जाः तःजा जुइक पंया छने मनू च्वनाः मनूया म्ह्य् छःने च्वनानं बाजंया नापं धुंज्या बुंज्या हीकेगु चलन दु ।

श्वकथं यःमरि पुन्ही धका यःमरिया नामं हे पुन्हीया नौं जुयाच्वंगु यःमरि गथे जाःगु खः अथें तुं तःसिं म्ह्य्, थःहे नं वा दुकया मूख्यत वायात पूजा याना यःमरि दयेका वायात यःमरि छाना थःपिनि नं नयाः कतःपिन्त नं यःमरि इनाः नैगु दिं खः । श्वबलय् वाया नापनापं लक्ष्मी, सरस्वती व वसुन्धरायात नं पूजा यानाः गुम्हसिया नखः कथं गुम्हसिया चखः कथं हनीगु दिं खः । नेवाःतय् यःमरि पुन्ही जः खः सनां गुथि व सी गुथि नं न्यायेका हनेगु परम्परा दु । अप्वःसिया मदयेक मगाःगु सी गुथि वा सनां गुथिइ ल्हापं तया हनीगु नखः खः । गुम्ह गुम्हसिया बुं अवस्था तयाः उकिया बालि कया हनेगु गुथि खः । वा दुकाये धुंका हनीगु सनां गुथि व सी गुथिया बं पुलेगु याना हनीगु जगुलिं थःथःपिंके बँ पुलेगु व ल्हापं पुले फँगु स्वाभाविक जुल । श्व गुथि न्यायेकेत श्वकि कायेगु परम्परा नं दु । श्व इलय् वा जाकि दैगु जगुलिं श्वकि पुले नं अःपुइगु स्वाभाविक खः ।

गुम्ह गुम्हसिया यःमरि पुन्हीकुन्हु छुं हे याये म्वाःपिं नं दु । गुम्हगुम्हसिया वाया भखारी जक पूजा याना यःमरि छुइ म्वाःपिं नं दु । पोखराय् च्वपिं नेवाःतय् यःमरि पुन्हीबलय् बँ इलाः, नीसी यानाः म्वःल्हुया लुसि ध्यना समेत तःजिक हनेगु चलन दु ।

मालख दिसि

बौद्धमार्गी नेवाःतय् विशेष याना बज्राचार्य शाक्य, तुलाधर जातिया चिकुला दिसि पूजा धका थिलागाः दशमी अर्थात पौष कृष्ण दशमी कुन्हु छःछःपिन्त पूजा यायेगु चलन दु । श्व कुन्हु विशेष यानाः छः थासय् लाइगु धका धायेगु चलन दु । श्व कुन्हु वज्रपाणी परम्पराया आराध्यदेवया पुन्ही धकाः भाःपेगु याः । अथें तुं गुरुजुपिनि धापु कथं महामञ्जुश्री नेपाःगालय् दुहां बिज्यानाः लः पित व्छ्याः नेपाःया निर्माण यायेगु स्वयां न्ह्यो नैरात्मादेवीया प्रादुर्भावं जगु दिं धका धायेगु याः । उकिं श्व कुन्हु विशेषयानाः सिन्हःपूजा व पञ्चशालीपूजा यायेगु चलन दु । यःमरि पुन्हीयाः जःखः लागु दिसि पूजा जगुलिं श्व पूजा याइबलय् छःयात यःमरि ममचा, चतांमरि त्वहंचा मरि आदि दयेका छःयात छायेगु नं चलन दु । दिसि पूजा कुन्हु यःमरि दयेका छःयात छायेगु याइपिनि यःमरि पुन्ही कुन्हु यःमरि छुनाः छःयात छायेगु मयाइपिं नं दु । थज्यापिनि यःमरि पुन्ही बलय् त्यःछिं त्यः काःवःपिन्त वा, जाकि वा दां बिया व्छ्येगु चलन दु ।

दिसिपूजा गुम्हगुम्हसिया गुथि कथं हनेगु याःसा गुम्ह गुम्हसिया थःगु हे परिवार जःछि च्वना पूजा यायेगु परम्परा दु । गुथि कथं मयास्य परिवार जःछि च्वनाः पूजा याइपिनि धाःसा म्हायमचा भिनामचा जिलाजं पिं समेत सःता तःजिक हनेगु चलन दु । श्व दिं कुन्हु भव्य हे नयेगु परम्परा दु ।

मिलापुन्ही:

पोहेलाश्व पूर्णिमा अर्थात पौषशुक्ल पूर्णिमा कुन्हुयात मिलापुन्ही कथं हनेगु याइगु खः । श्व दिन विशेष याना: नेवा:तय् स्वस्थानी बाखं कनीपिनि बाखं कनेगु सुरु याइगु खः । स्वस्थानी बाखं मिलापुन्ही कुन्हु न्ह्याका सिपुन्ही कुन्हु क्वचायेकेगु याइ । स्वस्थानी बाखं छँय् छँय् थः परिवार जःछि च्वना कनीगु खः । बाखं कनेत सफूयात पूजा यायेगु याइ । बाखं कने सिधल धायेवं बाखंपा: धका: बरां, कःनि मुस्या, गुलमरि लाखामरि आदि बाखं न्यनाच्वपिन्त सिन्ह: तिका: बाखंपा: धका: इना नकेगु चलन दु । स्वस्थानीया बाखं विशेष याना: हिन्दुमार्गीपिसं कनेगु या:सां बौद्धमार्गीपिनि नं कनेगु या:पिं दु ।

मिलापुन्ही बलय् विशेष याना: येंया जनबाहा:द्य:यात दर्शकर्म याइगु दिं खः । पोहेला शुक्ल अष्टमी अर्थात पौषशुक्ल अष्टमी कुन्हु जनाहा:द्य:यात जनबाहा:द्य: तयात:गु देगलं लिकया जनबाहालय् पूर्व दक्षिण कुनय् च्वंगु दबुली द्य: हया: लं पुन्यं छायेगु धका द्य:यात न्ह्या: याइगु खः । अर्थात ख्वालय् तुइक पाना मिखा, न्हाय्, म्हुतु, म्हुय् गनं स्यना च्वंसा दयेकेगु रङ्ग छीगु यायेगु याइ । अनं लिपा पुन्ही तक्क जनबाहा:द्य:यात निभालय् पाकेगु धका वहे दबुली तयातयेगु याइ । मिलापुन्हीबलय् गुरुजं व जनबाहा:द्य:या पांजु, पालात च्वना जनबाहा:द्य:यात मिसातय्त व मिजंतय्त याये मा:गु मचाबु ब्यंकेगु जकुं यायेगु, इही यायेगु, ब्रतबन्ध यायेगु आदि दश कर्म अभिशेष, याना: पुलांगु लं त्वका: न्ह्युगु लं फिका: जनबाहा:द्य:यात न्ह्याबलें तया तैगु देगलय् तये यंकेगु याइ । वया कन्हे कुन्हु जनबाहा:द्य:या पाला वा खल:तय् म्ह्याय्मचात भिनामचात, श्रद्धादुपिं ज्या:संपिं फुकसित भव्य नकेगु याइ ।

श्व कुन्हु निसें लछितक सुथय् सुथय् तीर्थ तीर्थय् म्व: ल्ह्या: शंख पुया: माघ हाला वयेगु नं चलन दु । विशेष याना चिकुला बलय् मचात यक्व सिल प्वालय् च्वना दनेगु अल्छी जुया च्वनी धका: मचातय्त सम्बोधन याना माघ हाला: वइगु खः ।

हय् जक मचात दं दं

माघ वने त्यल

द्य:द्य:पिं दर्शन याये नुं

ध्यः चाकु संलुहं

नेवा:तय्सं हना वयाच्वंगु नखः चखः अप्वः धयाथें तिथि अर्थात चन्द्रमाया गति कथं हना: वया: च्वंगु खः । बिस्का जात्रा व ध्यःचाकु संलुहं धका छगू निगू नखः गते कथं हनावया च्वंगु नखः खः । यःमरि पुन्ही थें हे ध्यः चाकु संलुहं नं नसाया नामं नां छुनात:गु नखः खः । प्रत्येक महिनाया न्हापांगु दिंयात संलुहं व महिनाया अन्त्यया न्ह्यात मसान्त धका धायेगु या: । ध्यः चाकु संलुहं धका: माघ महिनाया न्हापांगु दिं कुन्हु हनीगु नखः खः । श्व नखः बलय् नैगु वा विशेष छय्लीगु नसाया नामं नां छुनात:गुलिं श्व नखःबलय् ध्यः चाकुया नापं हामोग्वारा द्य:यात छायेगु व नयेगु याइगु जूगुलिं श्व संलुह्यात हामोसंलुहं धका नं धायेगु या: । भिनिगु राशी मध्यय् श्व कुन्हु निसें सुरु: मकर राशी चाहिलेत दुस्व:इगु जुगुलिं श्व दिंयात मकर संक्रान्ति धका नं धायेगु या: । श्व कुन्हु निसें सुरु:या गति उत्तरपाखे जुइगु खः ।

श्व दिं कुन्हु भक्तजनपिसं थाय् थासय् खुसिया दोभानय् वना: म्व: ल्ह्या जाकि, माय्, पलं, चिकं चाकु ध्यः तरुल, हामो ग्वारा, मकः, सिं आदि सिधा तया: दान यायेगु याइ । श्व दिन कुन्हु दोभानय् म्व:ल्ह्या च्वय् न्ह्यःथनागु दान याना थःमहिसिनं नयेगुयात धा:सा पुण्य लाना: थः हिस्तुपुस्त जुया: ल्वय् मदै धयागु धापु दु । उकिं श्व कुन्हु थः थः पुरोहितय्त च्वय् न्ह्यःथनागु सामग्री तया: सिधादान यायेगु याइ । सिधादान विशेषयाना मांमदुपिं वा अबुमदुपिं वा मांनं अबुनं निम्ह मदुपिसं याइगु खः ।

धर्मसिन्धु नांयागु ग्रन्थय् श्व संलुहुकुन्हु दानयात धा:सा छु जुइ दान मयात धा:सा छु जुइ धका च्वया त:गुदु । मकर संक्रान्ति कुन्हु गुम्ह मनुखं म्व:ल्हुइगु ज्या याइ मखु व मनु जन्म तक रोगी व निर्धन जुइ । सन्तान मदुपिं मनूतय्सं श्व कुन्हु अपसं च्वने नं भिं जुइ । श्राद्ध याये ज्यूपिं मनूतय्सं श्राद्ध याय नं बांला । श्व कुन्हु हामोग्वारा व वसः दान यात धायेवं विशेष फल प्राप्त जुइ । श्व कुन्हु याइगु ज्या खं अर्थात दोभानय् वना: म्व:ल्हुइगु ध्यःचाकु, हामो न्या, पल: आदि नया: चिकं बुल धा:सा ल्वये दैमखु ।

श्व कुन्हुया दिनय् नेवा:तय्सं जक मखु नेवा: मखुपिसं नं माघे संक्रान्ति धका वा मकर संक्रान्ति धका कण्डमूल नयेगु याइपिं दु । नेवा:तय् ला ई कथं दुगु नसा नया: नखः हनीगु स्वाभाविक खः । उकिं श्व इलय् विशेष याना पल:

व काउले विशेष जूगुलिं श्व निताजि तरकारी नयेगु याः । श्व इलय् कण्डमूल विशेष यानाः तरुल मनाः, छैय् संन्या कु थनेमाः धका संन्या छुया वा पुका कुं थना उगु संन्या नयेगु चलन दु । श्व कुन्हु विशेष याना समयलय् संन्या तरुल, ध्यः चाकु व हामोग्वारा वा हामोदुगु तिरौली, मुस्या पालु, लाभा तथाः नयेगु चलन दु । श्वबल्य् छयं निसैं दुम्ह संन्या नयेगु चलन दु । छायाःसां संन्या नयेबल्य् संन्याया छयं निसैं दुम्हसित न्ह्यया वडुगु खः । थथे संन्याया छयं न्ह्यइबल्य् शत्रुया छयं संन्याया छयं न्ह्यये फयेमा धकाः आशिस यानाः नयेगु चलन दु ।

ध्यःचाकु संलु कुन्हु गुम्हसिया समय जक नयेगु याःसा गुम्ह गुम्हसिया भव्य हे नये माःपिं नं दु । श्व कुन्हु छै परिवार मध्यय् दिवंगत जूपिनिगु नामय् सिकव्व तथाः सीपिन्त भव्य छायेमाःगु चलन दु ।

श्व कुन्हु भव्य नयेमाः वा भव्य नयेगु यायेम्वाः व छुं मखु छःछःपिन्त समयतयाः उकिया नापनापं तरुल ध्यः चाकु हामोग्वारा तथा पूजा यायेगु परम्परा दु । छःछःपिन्त पूजा याये धुंका छःया प्रसाद कथं छःयात छाःथेंतुं ध्यचाकु तरुल, हामोग्वारा संन्या तथा समय नयेगु चलन खः ।

नखःबल्य् नयेगु न्ह्यागु हे जूसां नयेगु नसा धाःसा नखः चखः कथं पाः । ध्यः चाकु संलु कुन्हु गुम्ह गुम्हसिया सुथय् जा नयेगु सत्ता माय्-बुजा धका ग्वःगु माय् जाकि, व पलः तथाः थुयातःगु जा नापं संन्या अचार नापं मेमेगु तरकारी परिकार दयेका माय् ब्वजा नयेगु चलन दुपिं दु ।

श्व कुन्हु छःया प्रसाद काये न्ह्यो वा न्हिछि लाछिया दुने थःत बुइकातःम्ह मामं मचाबल्य् जक मखु श्व कुन्हु नं चसुप्वाल्य् न्ह्यापनय् चिकं तथाः थः मचातय्गु भिं स्वास्थ्य, ताःआयु व भिंगु लंपु लिना न्ह्याये फयेमाः धका सुवाः बीगु खः । बिया छ्वये धुंकिं न्ह्याय्मचात समेत थःछै वयाः थः मांया ल्हातिं चिकं तये धुंका भातया छै लिहां वनीपिं दु । बिया व्छयेधुंकुम्ह न्ह्याय्मचाया मचा मदुनिगु जूसा भातपिनिगु छै ध्यः चाकु नये मज्यू धका थःछै वडुगु चलन दु । भमचातय्सं भातपिन्थाय् ध्यः चाकु नयेगुया धयागु मां जुया यायेमाः धयागु चलन दु । उकिं मचा मदुपिसं भातपिन्थाय् ध्यः चाकु नयेगु चलन मदु । श्व परम्परा स्थीर रुपं मजुसां नं ध्यः चाकु संलु कुन्हु धाःसा ध्यः चाकु नये माली धका भातपिन्थाय् मच्चंस्थे थःछै हे वनेगु याइगु चलन खः । यदि भातपिनिगु छै य्हे च्वनेगु याःसां फुक नयेगु याःसां ध्यः चाकु छता धाःसा नयेगु मयाः पिं दु ।

श्व दिं कुन्हु सुथय् दोभान वा खुसि म्वःलुयेगु याःसा गुम्ह गुम्हसिनं म्वःलुइगुया पलेसा छ्वाः जक सिलेगु याइपिं दु । श्व कुन्हु न्हिनय् भोछिं याउंक निभालय् च्वनाः म्हाय् चिकं बुइगु नं चलन दु । श्व दिं कुन्हु नैगु नसा, व निभालय् च्वना चिकं बुइगु खंय् विचा याना स्वयेबल्य् नेवाःतयसं श्व अथें यानातःगु थें मच्चं । छायाःसां माघ महिना धयागु चिकुलाया तःच्चतं चिकूगु ला खः । उकिं

धाइ नापं पौष माघंथें चिकू धकाः धायेगु याः । माघ महिनाया सुरु अर्थात माघ १ गते चिकूगुया चरम सिमाया दिं खः । मंसीर महिनां निसैं चिकुइगु बरे जुजुं वना पौष महिनां पु गायेगु सुरु जुइगु खः । दकले सकले तःच्चतं पुगाइगु दिं धयागु माघ १ गते खः । उकिं श्व इलय् म्हाः म्ही दक्व तच्चतं छ्वाउंस्थ च्वना च्वनी । उकिं निभालय् च्वनाः थःगु म्हाय् चिकं तथाः पाना वया नापनापं थःम्हं फीगु वसःनं चिकं बुइत त्वया निभालय् हे तैगु जूगुलिं क्वाना च्वनी । निभालय् च्वना चिकं बुइबल्य् म्हाय् च्वंगु दक्व चिमसं प्वाः तिं स्वाना चिकं नापं निभाःया क्वाःनं दुने दुहां वना म्हाय् क्वायेगु जुइ । श्व जुल चिकं म्हाय् दुहांवना क्वाइगु प्रविधि ।

मेगु क्वाःज श्व कुन्हु नैगु नसाः ध्यः चाकु तरुल पल्लः संन्या दक्व वस्तु हे आइरणयुक्तगु नसा खः । आइरणयुक्तगु नसां म्हाय् दुने शक्ति बी क्वाःज बी उकिं म्हाया पिने नं म्हाया दुने नसाया मार्फतं नं क्वाः जः बिया चिकुया छ्वाउंया च्वंगु म्हायात दुने नं पिनेनं क्वाकेगु ज्या याइ । उलि जक मखु च्वापु वा सितं कया छ्वाउंया च्वंगु छ्यंनय् चसुप्वाल्य् मामं चिकं तथाः दुने थ्यंक दुहां वनेमाः धका ल्हातं पातापाता याना क्वाःजःया नापं चिकं दुव्छयेगु कथं नं खः । विशेषयाना छ्यंनय् तयेकेगु चिकंयात विशेषरुपं माय् तथाः क्वाक तःगु हे चिकं दैगु खः । उकिं लुमुलुमु धाःगु चिकं छ्यंनय् न्ह्यापनय् तथाः छ्यंयात नं क्वाकेगु याइगु खः ।

श्व दिनकुन्हु तीर्थया दोभान त्रिवेणी आदि खुसिया संगमस्थलय् म्वः लुइगु छ्वाः सिलेगु भिं धकाः गंगासागर प्रयाग काशी मथुरा आदि थासय् वनी नेपाःया अधिराज्यदुनेया थी थी दोभान व त्रिवेणी नं म्वः लुइपिं छ्वाः सिलिपिं पूजा याइपिं, दानयाइपिनि भिड जुया मेला हे जुइ ।

समय ज्या न्ह्याइगुः

दैयदंसं ध्यःचाकु संलु कुन्हु छ्वपया थथुबहीया न्ह्योने छ्वपया न्याम्ह दिपंकर भगवान हयाः समय यायेगु याई । श्ववल्ययात समय धाःयायेगु अर्थात दिवंकर नापं छ्वपया वज्राचार्य शाक्यपिं फुकं भवः छुनायाः समयलय् नकीगु जा केँ बुबह, तरकारी, मरी आदि तथाः जा नयेगु वा प्रसाद बीगु याई नापं गुथियार व भक्तजन पिसं व्यूगु पञ्चदान नं दिपंकरया नापनाप वज्राचार्य शाक्य गुरुजुपिं नं कायेगु याइ ।

यें भिनिदैय् छक्व पौष मसान्त कुन्हु स्वःनिगः दुने च्वपिं दक्व दिपंकरनापनापं थाय् थाय्यापिं छःछःपिं हलुमान ध्वाकाय् ब्वयेहयेगु याइ । वया कन्हें कुन्हु ध्यः चाकु संलु कुन्हु स्वयम्भू क्वय् भुइ छ्यलय् छःछःपिं इवः छुका तयेगु

याङ्गु खः । श्व द्यःपिनिगु इव्य जुजु निसं वज्राचार्य व शाक्य जातयापि भवः छुना च्वनेगु याङ्गु । थुवल्य स्वयम्भुङ्ग भगवानया पञ्चदान द्यः निसं पञ्चदान याये धुक्पिं फुकसिनं थःथः द्यः हया तयेमाः । थथे द्यःपिं गुरुजुपिं इवः छुङ्गुकाः पूजा यायेगु पञ्चदान बीगु याङ्गु । उगु उपस्थितिङ्ग जा, कं लैं तरकार मरि आदि थरी थरी परिवारया नसा तयाः नकेगु याङ्गु । श्व पर्वयात समय बीगु धका धाई । थुवल्य अन्नया यक्व अहा जुङ्गुलिं वुंगद्यःवं स्वये मफूगुलिं व द्यः छम्ह हये म्वाः धयागु परम्परा दु । समय बी सिधल धायेवं द्यः द्यःपिन्त थःथःगु थाय् थासय् तिल यंकेगु ज्या जुङ्गु ।

थुकथं द्यःचाकु सँल्लु वा माघे संक्रान्तियात बौद्धमार्गीपिसं तःधंगु पर्व कथं हनेगु याः । विशेष यानाः भुङ्गुल्य समय जुङ्गुल्य हलुमान धवाका वा भुङ्गुल्य द्यःद्यःपिन्त पूजा यानाः थःगु गछे कथं दान यायेगु याङ्गु ।

बौद्धमार्गीपिन्त दान यायेगु मध्यय् दकले च्वयेया दान सम्यक दान खः । अथेतुं लखपा दानयात नं तःधंगु दान धाङ्गु । सम्यकदान न्ह्याम्हसिया याःसां ज्यू । सम्यक दान यलय् न्यादँय छक्व नागवाहालय् यायेगु जूसा, ख्वपय् दछि छक्व माघ १ गते जुङ्गु खः । माघ १ गत हे भिनिदँय छक्व समय यायेगु याः ।

सिलाचःहे

नेवाःतय्सं हनावया च्वंगु नखःचखः मध्येय् छुं छुं नखःचखः बहनिङ्ग वा सन्ध्याकाःइलय् द्यःद्यःपिन्त पूजा यानाः नखः हनेगु याना वयाच्वंगु दु । गथे पाहाँचःहे हनीबलय् सन्ध्याकाःइलय् वा बहनीतिनि लुकुमाद्यः पूजा यानाः भव्य नयेगु याङ्गु खः । चथाः हनीबलय् नं आकाशय् चन्द्रमा लुङ्गुकाः चन्द्रमा पूजा यानाः नखः हनेगु याङ्गु खः । अथे तुं लक्ष्मीपूजा व म्हपूजा नं बहनी हे जक यायेगु चलन दु । थथे बहनीया महत्व दुगु नखःचखः मध्यय् सिलाचःहे नं छगू खः ।

सिल्ला कृष्ण चतुर्दशीकुन्हुया दियात सिलाचःहे कथं हनेगु चलन दु । सिलाचःहेयात शिवरात्री, महाशिवरात्री धकाः नं धायेगुयाः । श्वकुन्हु विशेष यानाः महाद्यःपूजा यानाः, महाद्यःया नामय् अबुसं च्वनाः हनीगु खः । सिल्ला कृष्ण चतुर्दशी अथत फाल्गुण कृष्ण चतुर्दशीकुन्हु महाद्यःया उत्पति जूगु दिं धकाः नं धायेगु याः । अथे तुं श्वकुन्हु मन्या आत्मा मोक्ष जुङ्गु वा भिंगु मन जुङ्गु दिं धकाः नं धायेगु याः । श्वया बारे छपु परम्परागत चिबाखं नं दु । छन्हु छम्ह शिकारी न्हिछितक्क जंगलय् चाःचाः हिलं नं छम्ह हे शिकार याये मखं । सन्ध्याकाःइलय् वयाः छथाय् बेलपत्रमाया क्वय् वयाः भ्नाःसु लन । उगु बेलपत्रमाया क्वसं लः मुनाच्वंगु छगू थाय् नं दुगु जुयाच्वन । उगु लः दुगु थासय् हे बेलपत्रया हलं त्वपुयाच्वंगु छगः महाद्यःया मूर्ति दुगु जुयाच्वन । शिकार याये मखंम्ह शिकारी बेलपत्रमाया क्वय् भ्नासु ललं छपाः छपाः बेलपत्रया हः श्वयाः कुतुका च्वंगु जुयाच्वन । उगु कुतुवःगु बेलपत्रया हः महाद्यःया प्रतिमाय् लानाच्वंगु जुयाच्वन । अज्याःगु इलय् छम्ह मिसाम्ह चल्ला लः त्वने धकाः उगु थासय् वःबलय् शिकारी स्यायेत्यन । थःत स्याये त्यंगु खन्नाः मिसाम्ह चल्लां जितः आः स्याये मतेनि, जिमि मचातयत छक्वः नसा नकाः लिहां वये अले जक शिकार या धकाः धाल । श्व खँ न्यनाः शिकारी मिसाम्ह चल्लायात त्वःता व्छत । अनं लिपा नं उगु थासय् आपालं पशुपक्षित वल । दक्कसिनं छगू छगू त्वहः तल वन । दक्कसितं नं शिकारी त्वःताव्छल । लिपा मिसाम्ह चल्लानिसं दक्क भंगः पक्षितय् थःथःगु ज्या सिधयेकाः शिकारीयाथाय् थःत शिकार या धकाः बचं पुरा याः वल । तर शिकारीया धाःसा सुं नं पशुपक्षियात शिकार यायेमास्ति मवल । उलि जक मखु हिंसा हे याये मास्तिवल । थथे जूगुया मू हुनि श्व दिं धयागु फाल्गुण सिल्ला चतुर्दशीकुन्हु जूगु जुयाच्वन नापं शिकारी बेलपत्रया हः कुतुकु महाद्यःया प्रतिमाय् लानाच्वन । थुकथं श्व दिनय् महाद्यःयात पूजायात यायेवं हिंसक मन हे नं अहिंसा जुङ्गु वा भिंगु मन जुङ्गु जुयाच्वन । अथे मन भिनावःगु जूगुलिं महाद्यःया दूत वयाः शिकारीयात शिवलोकय् यंकाः हिंसकपाखें मोक्ष प्राप्त याकल ।

अथे मोक्ष प्राप्त जुडगु जूगुलिं हे थ्वकुन्हु मन्तयसं महाद्यःयात पूजा यानाः, महाद्यःया नामय सुचिनिचि यानाः, म्वः ल्हुयाः, नीगु वसः पुनाः अवसं च्वनाः, मन्त्यु लिपा हानं छुं हे जन्म कायेम्वाःलेमा शिवलोकय वने खनेमा धकाः विश्वास याडगु खः । महाद्यः धयाम्ह हे शक्ति खः । शिव धयाम्ह हे पशुपति खः । भाजु सत्यमोहन जोशीजुया धापू कथं “पशुपति” या अर्थ हे “आत्मायात मोक्ष बीम्ह मोक्षदायक” खः । (नेपाली चाडपर्व २०३९: ५८)

“सिलाचःऱेह” छाय् याडगु धयागु खँ स्व. पुण्यरत्न वज्राचार्य धापू थुकथं खनेदु । फाल्गुण महिना शिशिर ऋतुयागु निला मध्यय् लिपायागु लाय लाः । थ्व लाय माघ महिनाबलय् महाद्यःयागु रुद्रतत्वं अर्थात् जगतयात कल्याण याडगु तत्वं यानाः गना वनाच्चंगुलिं चुलि जायेकेगु याड । उक्तं जिर्णशिर्णं जूगु वस्तुयात न्हगु रुप बिडगु शिवत्व प्राप्त जुडगु थ्व ला जूगुलिं फाल्गुण महिनाय् सिलाचःऱे चखः कथं माने यानातःगु खः । (भीगु नखःचखः ने.सं. १०८४ पृ ८१)

सिलाचःऱेया महत्व बारे लिङ्ग पुराणय् महादेव वचन धकाः थुकथं न्हयब्वयातःगु दु । फाल्गुण त्रयोदशीकुन्हु म्वःल्हयाः, अबुसं च्वनाः, उकुन्हु हे चान्हय् जाग्राम च्वनाः त्रयोदशी फुनाः चतुर्दशी क्यने साथं महाद्यःया मूर्तिइ वा शिवलिङ्गय् अर्ध बियाः शिवरात्रीकुन्हु चान्हय् जाग्राम च्वनाः होमयात धाःसा सर्वसिद्धि लाभ जुइ । अथे तुं भारतीय् ब्रतोत्सव धयागु धार्मिक सफुतिइ सिलाचःऱे या महत्वबारे महादेवं पार्वतीयात कना बिज्याःगु धकाः थुकथं न्हयब्वयातःगु दु । पार्वती महाद्यःयात दकले सकले तःधंगु ब्रत धयागु गुबले धकाः न्याना बिज्याःबलय् महादेवं पार्वतीयात जवाफ बियाबिज्याः कथं दकले सकले तःधंगु ब्रत धयागु शिवरात्रीयागु ब्रत खः । थ्वकुन्हु मन्तयसं स्वःचित स्वःमन यानाः भिंगु मतिइ तयाः सुचिनिचि यात्राः महाद्यःया नामय् ब्रत च्वन धाःसा यमलोक वने म्वायेक छक्कलं मुक्त जुयाः स्वर्गलोक थ्यनीगु खँ धयाबिज्याःगु दु । उकिं मन्तयसं थ्वकुन्हु न्हयथुकुन्हुया चानिसैं अर्थात् फाल्गुण कृष्ण त्रयोदशीनिसैं जाग्राम च्वनाः शिवरात्रीबलय् अबुसं च्वनाः महाद्यःया पूजा याडगु खः । नापं शिवरात्री कुन्हुया चान्हय् महाद्यः व शिवलिङ्गय् न्हयःने यज्ञकुण्ड दयेकाः होम यक्ष नं यानाः जाग्राम च्वनीगु खः । थ्वकुन्हु न्हिछि महाद्यःया तोत्र भजन नं यायेगु याड ।

भाजु सत्यमोहन जोशीजुं पशुपतियात मोक्षदायक धायेगु यानादीसा भाजु पुण्यरत्न वज्राचार्यजुं भीगु नखःचखः सफुतिइ सिलाचःऱेयात बैज्ञानिक धंगं प्रकृतिइ वःगु ह्युपाः वा परिवर्तनशिलता धकाः उल्लेख याना बिज्याःगु दु । वय्कःया धापू कथं रुद्र व शिव धयागु हे परिवर्तन खः । न्हिन्हिं जुयाच्चंगु सृष्टि व विनास हे शिव खः । विनाश मजुइक सृष्टि जुइमखु । सृष्टि मजुइकं विनास जुइमखु ।

सृष्टि व विनास हे प्रकृतिया रित खः, शक्ति खः । शिवशक्ति अर्थात् प्रकृतिया सृष्टि व विनास थुइकेत हनेगु हे शिलाचःऱे हनेगु खः ।

प्रकृतिया सृष्टि व विनास थुइकेगु धयागु ज्ञानप्राप्त यायेगु अथवा शिवरात्री मानेयानाः ज्ञान जुडगु भिं जुडगु खः । उकिं शिवरात्री मानेयायेगु परम्परा वैदिक कालनिसैं जूसां नं थौतक्क नं थ्व विभिन्न धर्मात्मवीपिसं थःथःकथं चखः मानेयानाः वया च्वंगु दु । हिन्दू, शैव धर्मात्मवीपिसं महाद्यः वा शिवलिङ्गयात पूजा यानाः माने याना वयाच्चन सा बौद्धमार्गीपिनि ज्ञानया भण्डार ग्वरःयात पूजा यानाः मानेयाना वयाच्चन खयेतला थ्व परम्परा अप्वः धया थें बौद्धमार्गीपिसं मयाये धुंकल विशेषयानाः गुरुजुपिसं जक याना वयाच्चंगु परम्परा खः ।

नेवाःतय्सं थ्व सिलाचःऱेयात चखः कथं हनावया च्वंगुदु । विशेष यानाः सुथनिसैं त्वाः त्वालय्, दुवाःदुवातय् मचातय्सं हासा ज्वनाः खिपः प्यनाः लैय् माहाद्यःया चिकुल मि कुइकेत जगाः धकाः जगाः फवनेगु याडगु खः । न्हिछि तक्क जगाः फवंगु दामं घ्यः छुचुं चिनि आदि न्यानाः मरिचरि दयेकेगु याड । फवनाहःगु सिं दुवातय् दुवातय् छःछःपिनिगु न्हयःने वा महाद्यःया न्हयःने मि च्याकाः मि कुकुं मरि छुनाः हलुवा दयेकाः न्हिछि जगाः काःपिं, सिं फ्वःपिं मिक् वःपिं सकलें जानाः मरि इना नयेगु याड ।

छैय् छैय् च्वपिं मन्तय महाद्यःयात पूजा यानाः गुम्हसिया अबुसं च्वसा गुम्हसिया महाद्यःया न्हयःने होम यज्ञ यायेगु याड । गुम्हसियां अबुसं च्वनाः शिवरात्री हनेगु याड । बौद्ध धर्मात्मवीपिनि विशेष याना ग्वरः पूजा याये माःपिनि धाःसा सुथय् छैय् बँ इलाः सुचिनिचि यानाः मि कुइपिन्ति सिं दान यानाः बहनी छैय्जः सकसिया जा नये धुंकाः छै जःछि सकलें मुनाः हासाय् ग्वरः तयाः उकिइ छःने सकसियां थःथः ब्वनेमाःगु सफू दतनाः छैया मूलम्ह मिजंम्ह पूजा यायेगु याड । पूजा याडम्ह नं पुजा याडगु पूजाभः सकसियां थियाः संकल्प यानाः अर्थात् सकसियां पूजा याःगु सरह पूजा याड । पूजा याःतल्ले सकले पूजा याःथाय् च्वनाः मकलय् सिं तयाः, मि च्याकाः कुना च्वनेगु याड । पूजा सिधल धायेवं थैजिनिसैं सकसिनं ग्वरलय् पूजा यानाः ग्वरःन भागि यानाः सिन्हः तिनाः प्रसाद कायेगु याड । सकसियां सिन्हः ती सिधल धायेवं प्रसाद धकाः मरिचरि इनेगु नयेगु याड । नापं मकःकुकुं बरां गुलुमरि आदि नयेगु याड । थुबलय् ग्वरः पूजा याडबलय् यःमरि, पुन्हिबलय् थें ग्वरलय् न्हगु बरां व वां ग्वरःलय् लुडगु नं याड । ग्वरः लुयातगु थासय् सुथ न्हापां दनाः सुनां ग्वरःलय् च्वंगु प्रसाद लाये फत वया ज्ञान गुण अप्वः दै का चान्हय् हे अथवा थ्वकुन्हु सुथ न्हापां दनाः शिक्षा वा ज्ञान बीगु का जाग्राम याकेगु चलन दु ।

कन्हय्कुन्हु अर्थात् फाल्गुण कृष्ण पञ्चमीकुन्हु सुथय् दनाः छैजः सकलें पूजायानातःगु ग्वरः भागि यायां थःथःगु सफू लिकायेगु याड ।

सिलाचःऱे कुन्हु अर्थात् शिवरात्री वा महाशिवरात्रीकुन्हु काठमाडौं दुनेया पूर्व उत्तर दिशाय् न्ह्यानाः च्वंगु बागमतीया किनाराय् च्वंम्ह पशुपति छःयाथाय् यक्व भक्तजनपिं वया पूजा याः वडगु जूगुलिं उगु थासय् तःधंगु हे जुइ । फाल्गुण शुक्ल

त्रयोदशीनिसें जाग्राम च्वनाः चतुर्दशीकुन्हु महाद्यःयात पूजा यानाः फाल्गुण शुक्ल चतुर्दशीकुन्हुतक्क भक्तनजपिसं होम, जप तप यायेगु याइ । थुबलय् गाहस्थ्य जीवन न्ह्याकाच्वंनिसें सन्तमन्त जोगी महात्मापिं समेत सकसिनं बागमती वनाः म्वः ल्हुयाः पशुपति महाद्यःयात दर्शन यानाः पूजा यायेगु याइ । गुम्हं गुम्हं अबुसं च्वनेगु त्रयोदशीनिसें चतुर्दशीया चान्ह्य तक्क जाग्राम च्वनाः भिंगु चित्त याना थुगु जुनिं मोक्ष प्राप्तया कामना यायेगु याइ ।

श्री ५ या सरकारं शिवरात्री पर्वयात महानपर्वया रूप्य माने यानाः श्व कुन्हु राष्ट्रिय बिदा हे बीगु यानावया च्वंगु दु । शिवरात्रीकुन्हु न्हिनय् येंया तिनछ्यलय् शाहीसेना शिवरात्री बडाई धकाः बाडा पतका मुड्केगु यायेगु परम्परा दु । थुबलय् शाहीसेनाया ज्याभ्वः नं भव्यता बीगुया लागि जुजु नापं उपस्थित जुइगु चलन दु ।

धार्मिक सहिष्णुता दुगु नेयाः देशय् शिवरात्रीयात थःथः धर्मात्मबीपिसं थःथः कथं हे पूजा यानाः हनेगु याना वयाच्वंगु दु । नेवाःतय् नापनापं मेमेगु जातयापिसं नं थःथः कथं हनेगु यानाः वयाच्वंगु धयागु पशुपतिया महिमा अथवा जीवन पाखें मोक्ष, भिंगु चित्तया कामना, सृष्टि व बिनासया प्रकृया श्व फुकं प्रकृति हे खः । मनू जन्म जुइ, छुन्हु वया अन्त जुइ थुलि जक मखु जगतय् गुलि नं सृष्टि जुइ छुन्हुया छुन्हु अवश्य नं अन्त जुइ, श्व धुव्रसत्य खः । श्वयात धार्मिक सहिष्णुता कथं मानेयागु वैज्ञानिक धंग वा प्रकृतिया प्रकृया कथं न्हयागु कथंसां श्व माने यायेमाःगु हे खँ खः । उकिं महाशिवरात्रीयात सकसिनं मानेयाना वयाच्वंगु खः ।

श्रीपञ्चमी । वसन्त पञ्चमी

सिल्ला श्व पञ्चमी अर्थात माघ शुक्ल पञ्चमी कुन्हुया दिंयात श्रीपञ्चमी धका महामञ्जुश्री सरस्वतीयात पूजा याना हनेगु याना वयाच्वंगु खः । श्व कुन्हु महामञ्जुश्रीया थः शक्तिपिं वदां व मोक्षदा निम्ह ज्वनाः महाचीनं नित्सें स्वयम्भूया महारश्मीयात दर्शन यायेत बिज्यागु खः । नेपाः गाः दुने मुनाच्वंगु लः चोभाःया पहाड तछ्याना पित वछ्याः च्वनेगु वस्ति दयेका व्यूगु दिं धकाः धायेगु नं याः गुम्ह गुम्हसिनं सिल्ला श्व पञ्चमी कुन्हु सरस्वतीया जन्मदिं धका नं धायेगु याः । नेपाः गाःयात च्वनेगु थाय् (वस्ति वसे) याःगु जूगुलिं महामञ्जुश्रीयात हे सरस्वती धका धायेगु याना वयाच्वंगु खः । नेवातय्सं महामञ्जुश्री वा सरस्वती छःयात ससुद्यः वा ससुमांजु धका धायेगु याना वयाच्वंगु दु । श्व कुन्हु अर्थात सिल्ला श्व पञ्चमी कुन्हु खुगू ऋतु मध्यय् ऋतुराज वसन्त ऋतु क्यनीगु दिं जूगुलिं यानाः वसन्त पञ्चमी धका नं धायेगु चलन दु ।

श्रीपञ्चमीया महत्व वारे स्वयम्भू पुराणय् बुद्ध वधन धका थुकथं उलेख याना तःगु दु । श्व कुन्हु सुं मनुखं मञ्जुश्रीया स्तुति यानाः जप, तप, पाठ, पूजा श्रद्धा भक्तियात धाःसा व मनू अज्ञानम्ह जूसां ज्ञानीम्ह जुइ, दरिद्रम्ह जूसां धनि जुया वइ, धका धयातःगु दु । अथेतुं गान्धर्व पुराणय् श्रीपञ्चमी कुन्हु सरस्वती पूजा यानाः आखः सयेकेगु सुरु यात धासा ज्ञानी गुणी जुयाः सर्वसिद्धि प्राप्त याइ धकाः च्वयातःगु दु ।

बौद्ध धर्माबलम्बीपिनि मञ्जुश्री धयाम्ह हे बोधिसत्व खः बोधिसत्व धयाम्ह काल्पनिक व्यक्ति मखु । इतिहासकारपिसं बोधिसत्व धयाम्हसिगु ई विक्रम सम्बतया सुरु सुरुइ माने याना वयाच्वंगु दु । बुद्धधर्मय् मन्त्रवादया नां धलखय् दकले न्हापां श्वया नां वई । अथवा मन्त्रविद्याया प्रतिपादन हे श्व याःगु धका धाइ । मञ्जुश्री नं सृजनायाःगु “मञ्जुश्री मूल कल्प” धयागु सफू बौद्धसमाजय् तच्चतं चर्चित सफू खः । श्व सफुतिइ मन्त्र सिद्धिया वारे आपालं खं न्ह्यो ब्वयातःगु दु । मञ्जुश्रीयात हे लिपा वना सरस्वती धायेगु जूगु खः । महामञ्जुश्री वा मञ्जुश्रीयात विद्या सयके सीक्य न्ह्याःपिसं सरस्वती धकाः धायेगु याना वयाच्वंगु दु । नापं मनू स्वयां पाक परिकल्पना यानाः छःया मूर्ति दयेकेगु यात ।

ससूद्यःया मूर्तिया स्थानः

ससूद्यःया मूर्तिया वा तस्वीर छैय् ब्वने कुथिइ, सफू कुथि, बाहाः, वही, चुक निसैं मसानय् तक्कनं स्थापना यानातःगु खनेदु । येँ दकले प्रख्यातम्ह ससूद्यः धयाम्ह स्वयम्भूइ पश्चिम देगल्य् च्वंगु खः । अन पालि दुगु मन्दः क्वसनं ससूद्यःया मूर्तिया दु । थथे पालि दुगु मन्दःया वारे जनमानसय् थुकथं धायेगु चलन दु । महामञ्जुश्री या शिक्षार्थीपिं मध्यय् सर्वज्ञमित्र धयाम्ह छम्ह दु । उम्ह शिक्षार्थी नेपाः वयाः ज्ञान गुणया खँ ल्हानाः प्रचार प्रसार यायेगु जुल । अथेतुं ज्ञानगुणया खं ल्हानाः च्वं थाय् महामञ्जुश्री भ्वाथःगु लं फिनाः सुथां मलाम्ह बृद्धयागु भेषय् वयाः शिक्षा ज्ञानया खंल्लहानाः च्वं थाय् वयाः च्वंवल सर्वमित्र थः गुरु धका नाले मछालाः गुरुयात वास्ता मयास्य थःगु ज्याय् तलिन थें याना च्वन । लिपा ज्ञान गुण काःवःपिं सकलें मनूत लिहां वने धुंकाः जक थः गुरुयात सम्बोधन याःत । महामञ्जुश्रीया तुति भागि याःवल्य् थःगु मिखा निगलं गुरुया पालि तःलय् कुतुं वन । अथे मिखा कुतुं वंगु जूगुलिं हे पालितःलय् मिखा दुगु मन्दःयात ससूद्यः धका हना वयाच्वंगु खः । नापं उगु मिखा दुगु पालि खनाः थःपिं न्ह्याक्व हे सःस्यूसां गुरुपिन्त हेला याये मज्य धयागु लुमका बीगु कथंया छः खः ।

छें, सफूकुथि ब्वनेकुथिइ अध्ययन याइपिसं ससूद्यःयात आराधना यानाः ब्वनेगुलिइ एकचित याना ज्ञानगुण खँ सयेका काइ धकाः ससूद्यः तयेगु याइगु खः । अथेतुं छें पिने जव खवं ग्वाखं दयेका गणेछः व ससूद्यःया मूर्ति तयेगु धयागु छें दुहां पिहां जुइबलय् संयम जुइमा वा न्ह्याःगु ज्या याःसां सुथां लायेमाः, मंगलमय् जुइमाः धकाः गणेछः अले ज्ञान, विवेक, दया सःस्यूम्ह जुइमाः धकाः ससूद्यःया मूर्ति स्थापना याइगु खः । सरस्वतिं छेंया जःपिं फुकंसित सःस्यूपिं वुद्धिमान याना बिइमा धकाः खः ।

भिक्षुवंगु शताब्दीपाखे निसैं मनू उइगु थाय् मसान मसानय् नं ससूद्यःया मूर्ति तयेगु जूगु खनेदु । अथे ससूद्यःया मूर्ति दुगु थासय् गणेछःया मूर्ति नं दु । थन थाय् लाक मसानय् ससूद्यः छाय् तल धयागु खँ छगू ऐतिहासिक घटना न्ह्यो ब्वयेगु उपयुक्त खना । रणवहादुर शाहया यःम्ह रानी कान्तिमती विरामी जुयाः च्वंबलय् सःस्यूपिं वैद्य क्यनाः नं रोग क्वमलाः लिपा उम्ह रानी स्वर्गे जूवल्य् याःगु थी थी उपद्रह मध्यय् गिद्ध अपसगुनपिं प्राणी धकाः खंक्व गिद्ध स्यायेगु हुकुम जुल । स्थानाहःपिं गिद्ध दक्वं जाउलाख्यलय् छथाय्तुं तयाः उना वल्ल । लिपा उना वल्लःगु थासय् मचातयत् भूतं ज्वनी धकाः अन तान्त्रिकतय्सं ससूद्यःया स्थापना याना बिल (त्रिरत्नसौन्दर्यगाथा) थुकथं ससूद्यःयात तान्त्रिक छः कथं नं माने यायेगु याना

वयाच्वंगु दु । ससूद्यःयात भूततयत् नाश याइम्ह कथं नं माने यायेगु याः (हाम्रो चाडपर्व) ।

नेवातय् ससूद्यःया पूजा :

नेवातय् विशेष याना आखः ब्वनाच्वपिं मचातय् न्हिन्हिं धयाथें ससूद्यःया श्लोक ब्वनाः पूजा यानाः नुगः कायेगु चलन दु । तर थौकन्ह्य् ब्वनेमाःपिं मचातय्सं थथेयाःगु खने मदये धुकल । स्कूल वनीपिं व गनं ब्वनेकुथि ब्वनीपिं विद्यार्थीपिसं ससूद्यः पूजा याना भागियायेगु न्हापा जू । तर थौकन्हें श्रीपञ्चमी कुन्ह छन्हू धाःसा ससूद्यःयात पूजा यायेगु चलन दु । श्वबलय् थाय् थासय् च्वपिं ससूद्यःया थाय् छःपूजा याःवनेगुया नाप नापं छें त्वाल्य् च्वपिं ससूद्यः पूजा यायेगु नं चलन दु ।

ससूद्यः अमय छःजूगुलिं अमयपूजा तयेगु याई । ससूद्यः पूजा याइबलय् विशेष याना पूजा सामानया नापनापं कपाय् तयाः छः पूजा यानाः कपाय् निला ससूद्यःयात हे क्वखायेकेगु चलन दु । ससूद्यः पूजा याये सिधल धायेवं थःगु नुगलय् ससूद्यः वासं च्वं वयेमाः धका ससूद्यःया नुगः थिया थः थःगु नुगः थिया आराधना याइगु खः । छुं हे मनस्य न्हापां ससूद्यःया कि नयेगु धका न्यागः जाकि वां मथीक नुना वल्लयेगु चलन दु ।

विद्या प्रारम्भया दिं:

नेवाः परम्परा कथं मचातय् दकले न्हापां आखः च्वकेगु ब्वकेगु श्रीपञ्चमी कुन्ह निसैं हे यायेगु याई । आखः स्यनेमाःपिं मचाय् नापं ज्वना ससूद्यःया थाय् वनाः, पूजा यानाः, ससूद्यःया न्ह्योने वा जवखवं अंगलय् नमोवागिश्वरायः च्वकाः आखः च्वकेगु सुरु याई । ससूद्यःयात वागिश्वरा धकानं धायेगु याः । उकिं न्हापां आखः स्यनीबलय् ससूद्यःया नां कया वयागु हे नां च्वका सुरु याइगु खः ।

सुयानं छुं थाज्या वा सु ज्या स्यने माल धा:सा स्यनीम्ह नं
स्यनाकाइम्ह निम्हं ससुद्य:या थाय् वना: ससुद्य:पुजा याना थाज्या स्यनेगु व सयेका
कायेगु याई । उकिं ससुद्य: खालि आख: जक स्यनीम्ह द्य: मजुस्य थाज्या, सुज्या
नापनापं बाजं थायेगु नं स्यनीम्ह द्य: ख: ।

ज्या सयेका काइपिं वा ज्यास:पिं वा ससुद्य: प्रति श्रद्धा दुपिं मनूत
श्व कुन्हू ससुद्य: पूजायाना :अवसं च्वनेगुनं याइ । श्रीपञ्चमी कुन्हू अवसं च्वनीगुया
वारे पौराणिक बाखं कथं थुकथं खनेदु । छन्हू लक्ष्मी नारदयात सुनं मिसापिं
सौभागिशाली जुइमास्ति व:सा खिदंतक लगातार श्रीपञ्चमी कुन्हू अबुसं च्वन
धा:सा लक्ष्मी द्य:थें सुखी व भात:या य:म्ह जुइ धका: धायेगु या: ।

अथेंतुं श्रीपञ्चमी कुन्हू अवसं च्वना: ज्या स्यना: काल धा:सा
बांलाक सुथां लाक सयेका काये फै धैगु धारणा दु: । श्व बाहेक ससुद्य: प्रति
भक्तिभाव दुपिं मचां निसे) न्ह्याम्ह नं श्व खुन्हू अबुसं च्वनेगु या: । सकस्यां
ससुद्य:प्रति श्रद्धा भति तयेगु या:सां विशेष याना आख: ब्वना:च्वपिं विद्यार्थीपिनि
विशेषयाना श्रीपञ्चमी कुन्हू विद्याया सफलया कामना यायेगु या: । जांच विद्यात:गु
द:सा जांचय् उत्तिर्ण जुइमा धका: द्य:यात पवनेगु याइगु खनेदु ।

विशेषयाना: नेवा:तय् ससुमांजु ल्हासां व:म्ह धका: धायेगु चलन
दु । श्रीपञ्चमीया छन्हू न्ह्यो बहनी ल्हासां थ्यंक:व:म्ह धका: ससुद्य:या मूर्तियात
पूजा याना चिकं बुकेगु चलन दुसा वया कन्हेकुन्हू पुजा यायेगु चलन दु ।
श्रीपञ्चमीया छन्हू न्ह्यो अर्थात सिल्लाश्व चौथी कुन्हू ल्हासां ससुद्य: थ्यंक:व:म्ह
धका: ल्हासाया ससुद्य: हे धायेगु चलन दु ।

नेवातय् मूल वस्ति दक्क थासय् मूलम्ह ससुद्य:या मेला जुइ ।
नेवातय् परम्परा कथं श्व कुन्हू निसें न्ह्याइपुक छ्यालि न्हिले याना अवीर म्हिता:
छम्ह मेम्हसित अवीर तयेका बीगु चलन दु । श्व कुन्हू निसें विवाह वा लहदवाजि
याना: ससुद्य:या थाय् ससूपुजा याना: होलि म्हितेगु याइगु ख: । श्व कुन्हू निसें
ससूपुजा याना: फागुण शुक्ल पूर्णिमा कुन्हू तक्क होलि म्हितेगु याइ । फाल्गुण शुक्ल
अष्टमीइ बसन्तपुर हनुमान ध्वाकाय् चिरस्वाना: सार्वजनीक होलि म्हितेगु प्रारम्भ
फागुण शुक्ल पूर्णिमा कुन्हू चिर थना: त:गु क्वथला चिर वायेगु यात धायेवं
सावर्जनिक होलि म्हितेगु अन्त जुइ । नेवा: समाज दुने नं होलि पुन्ही सिधल धायेवं
अवीर म्हितेगु क्वजीगु ख: ।

दछिया दुने इहिपा या:पिनि ससूपुजा न्याकेगु धका श्रीपञ्चमी
निसें फागु पूर्णिमा तकया दुने न्यायेकेगु चलन दु । ससूपुजा धका: धाल धायेवं हे
लहदबाजि याना: न्यायेकीगु पूजा ख: ।

श्व कुन्हू निसें नेवातय् वसन्तया धुनय् म्ये हालेगु सुरु यायेगु
याइ ।

माघ ज्व:छि माघ वनीपिनि श्रीपञ्चमी कुन्हू सहश्रधारा धका:
प्वा:प्वा:दुगु ल:घ: (चायागु वा मेगुली । सिजा) छ्योनय् तया: ससुद्य:या थाय् वना:
पूजा यायेगु चलन दु । ससुद्य:या पूजा याये सिधल धायेवं तिनि अथे वंपिनिर्ले फीगु
याइगु ख: । चिकुवल्य, चिकुक, तां न्वइ वलय तां न्वइ कथं क्रिया कलाप यायेगु न
धर्म दुने हे ला:गु क्रियाकलाप ख: । अथवा पूरुषार्थ क्यनेगु ख: ।

श्री ५ या सरकार वसन्त पञ्चमीयात राष्ट्रिय पर्व कथं हनेगु
याना: श्व कुन्हू अधिराज्य भरि हे विदा बिया त:गु दु । श्व कुन्हू वसन्त श्रवण
यायेगु धका: हलुमान ध्वाका दुने जुजु सवारीया नापनापं श्री ५ या सरकारया
उच्चपादाधिकारीपिं हाजीर जुया: वसन्त ऋतूया धुन न्यायेका: वसन्त ऋतु प्रारम्भ
जुगुया खुशियाली माने यायेगु याई । श्व हे वसन्त ऋतूया धुन न्यंकेगुयात हे वसन्त
श्रवण धका धायेगु याइ । श्रीपञ्चमीया दियात भिंगु दिं कथं कायेगु चलन दु । श्व
कुन्हू छुनं संस्कारगत ज्या व्रतबन्ध, इहि, बाहा पिकायेगु विवाह, ज्याथाज्याथि जंक
याये मा:सा साइत स्वये मा: धयागु मदु । श्व कुन्हू साइत मस्वस्य संस्कारगत ज्या
खं याये ज्यु भिं धायेगु चलन दु । उकिं श्व कुन्हू पूजा धर्म कर्म निसें कया:
संस्कारगत ज्याखं यायेगु नं चलन दु ।

थुकथं श्रीपञ्चमीया दियात समाजय् मागलिक दिया रुपय् कायेगु
यानात:गु तच्चत हे स्वभाविक ख: । श्व दि ज्ञान गुण प्रारम्भ यायेगु दिं ख: ।
बुद्धि विवेक ज्ञान गुणया अविवृद्धि जुइगु दिं उकिं श्व कुन्हू न्ह्या:गु हे या:सां भिं
जुइगु स्वभाविक ख: । श्व दियात नेवा:तय्सं जक हनावयाच्वंगु दिं मखु सम्पूर्ण
नेपा:मिपिसं हे हनावयाच्वंगु दिं ख: ।

ध्य: चाकु संलु कुन्हू सुरु या:गु माघ वनेगु ज्या "सहस्र धारा"
श्रीपञ्चमी कुन्हू यायेगु या:सा सिपुन्ही कुन्हू अर्थात सिल्लागा: पूर्णिमा कुन्हू माघ
वनेगु क्वचाकेगु या । श्व कुन्हू अर्थात सिपुन्ही कुन्हू मिलापुन्ही कुन्हू सुरु या:गु
स्वस्थानी बाखं कनेगु नं क्वचायेकेगु याइ । श्व कुन्हू माघख: जात्रा यायेगु नं याइ ।

होलि

चिल्लाथव अष्टमी अर्थात फाल्गुणशुक्ल अष्टमीकुन्हु थाय् थासय् चिर स्वानाः सुरु जुइगु होलि, चिल्लाथव पुन्हु अर्थात फाल्गुण शुक्ल पूर्णिमाकुन्हु चिर क्वथलाः चिर वाये यंकल धायेवं तिनि होलि सिधःगु जुइ । होलि पर्वयात श्री ५ या सरकारं राष्ट्रिय पर्व कथं मान्यता बिद्याः होलि क्वचाइगु दिं होलिपुन्हु छन्हु राष्ट्रिय बिदा हे बिद्या वयाच्चंगु दु । होलि सुरु जुइगु दिं चिर स्वाइगु जूगुलिं उगु दियात चिर स्वाइगु अष्टमी हे धकाः धायेगु याःसा होलि क्वचाइगु पुन्हुयात होलिपुन्हु धकाः धायेगु चलन दु ।

चिर स्वायेगु

बसन्तपुर लँया दथुइ हनुमान ध्वाखाया न्ह्यःने व यलया कृष्णमन्दिरया न्ह्यःने आदि थाय् थासय् चिर स्वायेगु धकाः ताःहाकःगु पँथय् स्वतँया चाकलाःगु छत्रय् थीथी रङ्ग बिरङ्गया कापः कुचा कुचा चिनाः यःसिं थने थें थनातइगु खः । स्वयेबलय् स्वतँ दुगु छत्र थें च्वं । यलय् कृष्णमन्दिरया न्ह्यःने चिर स्वाइगु धयागु सिमाय् रङ्गी बिरङ्गीया कापः खानाः स्वाइगु खः । चिरया अर्थ खः वसः । विशेष यानाः अझ मिसापिसं पुनिगु वसः खः । बास्तबय् रङ्गी चङ्गी कापः कुचा कुचा चिनाः छत्र थनेगु स्वयां रङ्गी बिरङ्गीया कापः सिमाय् खानाः ब्वइगु चिरनाप सतिगु स्वापू खः । थथे चिर स्वायेगु धकाः कृष्णया पालय् अर्थात दैविककालय् गोकुलय् कृष्णं विभिन्न लीला क्यंगु मध्यय् छगू रास लीला खँनाप स्वापु दुगु खः । गोकुलया गोपिनीत छन्हु यमुना खुसिइ म्वःलुइत थःपिनि वसः दक्कं खुसि सिथय् तथाः थःपिं खुसिइ दुना च्वंगु जुयाच्चन । उगु इलय् कृष्ण नं गोपित म्वःलुयाः च्वंगु यमुना खुसिइ थ्यकःवल । गोपिनीतय्सं वसः त्वःताः म्वःलुयाच्चंगु कृष्णं खनाः दक्क वसः कयाः सिमाय् खानाः म्वःलुया च्वपिं गोपिनीतय् हायेका च्वंगु

जुयाच्चन । लिपा गोपिनीतय्सं कृष्णयात चित्त बुझय् यानाः थःथःगु वसः कयाः पुने खंगु खः । कृष्णं गोपिनीपिनिगु वसः सिमाय् खाःगु हे चिर स्वानाः सिमाय् कापः खायेगु खः धकाः धाइपिं दु । श्रीकृष्णं गोपिनीत नापं रसरङ्ग याःगु जूगुलिं होलिबलय् विशेष यानाः मिजपिसं मिसापिन्त, मिसापिसं मिजपिन्त अबिर, रङ्ग कयेकाः, ईकाः, पाकाः, तयेकाः, लोला, बेलुनय् रङ्ग जायेकाः कयेकाः म्हितेगु चलन जूगु धाइपिं दु । मिसा मिजया दथुइ जक मखु मिसा मिसा, मिजं मिजपिं दथुइ नं अबीर तयेकाः, रङ्ग छ्वाकाः, पचुकां रङ्ग छ्वाकाः, लोलाय्, रङ्ग भरेयानाः बेलुनं कयेकाः होलि म्हितेगु चलन दु ।

होलिया नामकरणः

फाल्गुण शुक्ल अष्टमीनिसें फाल्गुण शुक्ल पूर्णिमा तक्कया च्यान्हुया दियात होलि धकाः नामाकरण यानातःगु दु । थव नामाकरण गुकथं जुल धयागु बारे छपु धार्मिक अबधारणा थुकथं खनेदु । हिरण्यकसिपु धयाम्ह छम्ह राक्षस दु । उम्ह राक्षसया धारणा कथं छःपिं स्वयां राक्षस बल्लाः । छःपिं धयापिं हे शत्रुत खः । उम्ह हिरण्यकसिपुया केहँया होलिकाया गुण धयागु मिं थिइ मफैगु खः । हिरण्यकसिपुया काय् भक्तप्रल्हाद छम्ह दु । गुम्हसिया उपासना हे विष्णु भगवान खः । हिरण्यकसिपुं थः काय् प्रल्हादयात विष्णु भगवानया नां काये मते, व भी शत्रु खः धकाः गुलि धाल, नं खँ न्यँ हे मन्यं । उकिं थःमहं जन्म यानातःमहं काय् प्रल्हादयात स्यायेगु बिचाःयात । उकिं थः काय्यात स्यायेत मिं थिइमफुम्ह केहँया मुलय् प्रल्हाद तथाः मि च्याकाः दथुइ तयाबिल । मिं थी मफुम्ह मिसाया मुलय् प्रल्हाद च्वनाःनं भगवान विष्णुया हे नां कयाच्चन । लिपा प्रल्हादयात मिं मच्छसे मिं थिइमखुम्ह होलिकायात हे मिं नौ यानाबिल । व हे होलिकाया नां लिपा होलि धकाः नामाकरण जुयाच्चंगु खः । होलिका धयाम्ह मिसा असत्य पापि बांमलाःगुया प्रतीक खः । उकिं होलिया विशेष महत्व धयागु शत्रुया अन्त, पापि मथि धर्मया बिजय जूगुया हर्ष उल्लास माने यानाः हनिगु खः । विजय जुइबलय् अबिर तथाः सिन्दुर जात्रा याये थें पापि माथि बिजय प्राप्ति याइगु खः । उकिं हे चिर स्वानाःतःगु चिर क्वथलाः निश्चित थासय् थ्यंकाः चिर दाहा यायेगु धकाः चिर स्वानातःगु सिमा च्याकाळ्याः नौ यायेगु चलन दु । होलिकायात च्याका नौ याना वछ्ये थें चिरयात च्याकेगु खः । नौ यानाः वछ्येगु खः ।

छन्हु महाद्यः तपस्या च्वनाच्चबलय् वयागु तपस्यायात भंग यायेत कामदेवं थी थी लिला क्यनाच्चन । थव खनाः पौराणिक बाखं कथं महाद्यः तमं थःगु

कपालय् च्वंगु स्वंगःगु मिखा कनाः कामदेवयात भस्म याना वळत । अथेतुं चिरयात भष्म यानाः ज्ञानगुणया ज्याय् रतिकृदायात भष्म यायेगु कथं चिरयात दाहयात धायेगु नं याः ।

गुरुमापायात जा नकेगु :-

होलियात नेवाःतय् विशेष उत्सव कथं हनेगु चलन मदुसां इतुंबाहाःया केशचन्द्रया पाजु गुरुमापायात भव्य नकेगु चलन दु । इतुंबाहाःयापिसं केशचन्द्रयात केशचन्द्र आजु धकाः धायेगु चलन दु । केशचन्द्र, धनिम्हेसिया काय् खः । वया छगू बांमलाःगु बानि दु । व खः जू म्हितेगु । जू म्हितुम्हितुं थःगु छँ बूँ फुकं हे फुकल । लिपा थःगु छुं हे मदुसेलिं चकंछःयात बियातःम्ह तताया थाय् वनाः जा नःवनेगु यात । चकंछः नं तच्चतं धनिम्ह जूगुलिं किजायात जा नकीबलय् तताम्हसिनं लुँया देमाय् तयाः नकीगु जुया च्वन । लुँया देमाय् तयाः नकूगु देमा धाःसाः केशचन्द्रज् म्हिताः फुकिगु जुयाच्वन । थथे जू म्हिताः फुकुगु जूगुलिं तताम्हं ली, कँय्या देमाय् तयाः नकेगुयात वहे नं बाकि मतसेलि लप्तेय् तया जा नकेगु यात । श्व खनाः केशचन्द्रया थःत तताम्हं हेपे याःगु धकाः जा मनसे न्हिन्हिया जा मुनातल । छन्हु थःम्हं मुंकातःगु जा पानाः मी माल धकाः बिचाः यानाः पानाः थः पिवाः च्वना च्वन । पिवाः च्वंम्ह केशचन्द्रया न्ह्य वल । न्ह्यलं चायेकाः पानातःगु जा दुकाये धकाः स्वःबलय् जा छगवःहे मदयेक बखुनं नयाः तःगु जुयाच्वन । थथे जूगु खनाः केशचन्द्र खल । केशचन्द्र खःगु खनाः जा नयावंपिं दक्कः बखुंचात वयैः जाया पलेसा लुँ - खि फानाबिल । उगु हे लुँ मुनाः च्वंबलय् लाक्क छम्ह गुरुमापा लाख्य केशचन्द्रयात नये धकाः वल । श्व खनाः केशचन्द्र गुरुमापायात पाजु नालाः पाजुया छँया भलाकुसल यात । थःत पाजु नाःगुलिं गुरुमापायात धाःथें भिंचा भाःपाः केशचन्द्रयात नयेगु मयात । बखुंतय्सं फाःगु लुँयात गुरुमापायात हे ज्वंकाः इतुंबाहालय् वल । गुरुमापायात नं थः नापंतुं तल । केशचन्द्र मसीक मसीक गुरुमापां त्वाःयापिं मचात खुयाः खुयाः नयेगु यात । श्व खं यानाः त्वाःयापिसं केशचन्द्रयात गुरुमापां याःगु कर्तुत कन । श्व खं यानाः केशचन्द्रया नापं त्वाःयापिं जानाः गुरुमापायात तिनिख्यलय् वाये यंकेगु खँ धाल । केशचन्द्र नं गुरुमापायात एकान्तगु थासय् तिनिख्यलय् तयेगु यात । अन गुरुमापाया ज्या धयागु तिनिख्यलय् स्वपा अप्पा छथासं लानाच्वन धाःसा उकियात अलग यानाबीगु खः । न्हिन्हिं गुरुमापायात ला जा नकेगु तयेके हयेगु खँ नं धाल । व हे कथं थौंकन्ह्य् दछिया छक्कः मेय् छम्हसिया ला, भिंनिफा जाकिया जा थुयाः उकियात ल्वयेक ल्वसा घासा दयेकाः

होलिपुन्हिया चान्ह्य् यंकेगु चलन दु । थथे गुरुमापायात चान्ह्य् जा नके यंकीबलय् चिकिचा प्वाक मत छप्वाः च्याकाः खुफा बकुलाक नसा क्वबुया इतुंबाहाःया गुथिहारत तिनिख्यलय् वनेगु खः । अन थ्यंकाः गुरुमापायात भाग तयाः थःपिनि गुरुमापायात ज्वरेयानावंगु नसा नयाः लिहां वयेगु याइगु खः ।

केशचन्द्रयात लुँ खिफाना धनि याःपिं बःखुंतय्त गुला ज्वःछि न्हिन्हिं बःखुंतय्त वा नकेगु चलन थौं तक्क नं दनी । गुरुमापायात जा नकेगु दिन न्ह्याबलें चिर क्वःथःगु चान्ह्य् हे न्याकेगु चलन दु । श्व विशेष याना पःमाय् जातिं याःसां लिपा किलागःया ज्यापुतय्त जिम्मा बियातःगु दु ।

चिर क्वथयेगु :

फाल्गुण शुक्ल पुर्णिमा अर्थात चिल्ला श्व पुन्हि कुन्हु थाय् थासय् थनातःगु चिर क्वथलाः उकियात निश्चित थासय् यंकाः उना वळयेगु याइगु खः । यँया बसन्तपुरय् थनातःगु चिर क्वथलाः यँया तिनिख्यलय् यंकाः उइगु याइ । अथें तुं यलया कृष्ण मन्दिरया न्ह्यःने थनातःगु चिर बागमति खुसिया सिथय् यंकाः उना वळयेगु याइ ।

चिर स्वायेगु व चिर क्वःथयेगु साइत स्वयाः याये माःगु परम्परा दु । विशेष यानाः होलि म्हितेगु धयागु चिर स्वासांनिसें जूसा मुख्य श्री ५ या सरकारं विदा बिइगु पुन्हिकुन्हु जूगुलिं पुन्हिकुन्हु अप्वः जनतात होलि म्हितेगु याः । श्वः श्वः पासापिं जानाः त्वाः त्वालय् म्हितेगु याः । श्वया नाप नापं छथासं मेथाय् वनाः लँय् लँय् हे होलि म्हितेगु याइगु खः ।

होलि मिसा-मिजं दथुइ ख्यालि न्हिलिया उत्सव

नेवाःतय् खय्त ला श्रीपञ्चमीकुन्हु ससुपुजा यानाः होलि म्हितेगु सुरु जुइ धुंकीगु खः । श्रीपञ्चमीकुन्हुनिसें फागुपुन्हि तक्क होलि म्हितेगु याइगु खः । होलिबलय् थें लँय् लँय् त्वाःत्वालय् म्हितेगु यायेगु याइमखु । छुं बिबाह, व्रतबन्ध वा छुं पूजा यानाः वा ससुद्यःपूजा यानाः, ससुद्यःया देवस्थानया नापं पूजा वनावःपिं लिहां वल धाःसा थःथः हे लँय् लँय् होलि म्हितेगु याइ । लँय् नापलाःपिं मनूतय्त ख्याःयानाः, अनुरोध यानाः, अबिर तयेकेगु याइ ।

होलि विशेष याना: मिसा मिजंतय् मतिनामिपिन्त मिसां मिजंयात, मिजनं मिसायात थःगु मतिनाया भावना व्यक्त यायेगु खः । फागुबलय् अभिव्यक्त याना: तःगु फागु म्ये छुं कुचा थन न्ह्यब्वया:

भ्यालय् च्वंगु तुकंमा: व हे ल्यासे जित: मा:
व ल्यासे मदयेक जा हे मनया

श्व भ्रुव: छम्ह मतिनामि मिजनं अभिव्यक्त यानातःगु लोकोक्ति खः । अथे तुं मिसाम्ह थः मतिनामि नाप लायेगु खँ थुकथं व्यक्त यानातःगु लोकोक्ति दु ।
दाला दंक बजि तये

हँय् खँय् निग्व: काला तये
जिचाभाजु वडबलय् खापां काका छये

होलि यँया नेवा:त जक मखु विशेष याना: नेपा:या पाहाडय् बसोबास याना च्वपिं स्वयां तराइ बासिपिं नेपा:मिपिनि तःधंगु नखः कथं हर्ष उल्लास याना: म्हितेगु चलन दु । न्ह्याथाय् नं पासा पासापिनि दथुइ म्हितेगु या:सा थः यःपिं मिसातय् मिजंतयत्, मिजंतय् मिसातयत् अबिर तया: थःगु मतिनाया अभिव्यक्त याइगु चलन दु । तराईबासिपिनि गुम्हगुम्हसिया बिधुवाम्ह मिसाप्रति मतिना जुयाच्वन धा:सा होलि म्हिता: मिजनं अबिर, रङ्ग तया: बिधुवायात सधुवा याना कायेगु परम्परा नं मदुगु मखु ।

होलिपुन्हि बुद्धधर्म कथं छगू पर्व नं खः । श्व कुन्हु सिद्धार्थ राजकुमार थःगु गृहस्थी जीवन त्व:ता: बुद्धत्व प्राप्त याये धुंका: दकले न्हापां थःगु कपिलवस्तु क्षेत्रय् भिक्षाटन या:बिज्या:गु दिं खः ।

चकंद्य: जात्रा :-

चकं द्य:या जात्रा याइगु पुन्हियात चकं पुन्हि धका चकंद्य:या नामं हे पुन्हिया नां छुनातःगु दु । चकंपुन्हि होलि पुन्हिया कन्हें कुन्हु नं गुबलें गुबलें ला: अथे जुसां नं फाल्गुणपुन्हि धायेगु या उकिं हे सिल्लाथ्व पुन्हि अर्थात फाल्गुण शुक्ल पूर्णिमा कुन्हु दँय्दँसं ठमेलया भगवान बहालं ह्याउँ ख्वा:या चकं द्य:यात यँ जात्रा याना: अबिर तया: होलि म्हितेगु चलन दु । मेरि अन्दरसनया धापू कथं चकंद्य: धयाम्ह

सिंहसार्थबाहु खः । सिंहसार्थबाहु वा चकंद्य: धया:म्ह इतुंबाहा:या केशचन्द्रया तताया भा:त, जिचादाजु खः । (The Festival of Nepal 1988:260)

होलिपुन्हि कुन्हु चकंद्य: अर्थात सिंहसार्थबाहुयात जात्रा यायेगु परम्परा थुकथं न्ह्यात धयागु सी दु । सिंहसार्थबाहु ल्हासाय् वना: व्यापार याइम्ह छम्ह व्यापारि खः । सिंहसार्थबाहु थः सछिम्ह पासापिं ज्वना: ल्हासाय् व्यापार या: वंबलय् अनच्चपिं मिसातयसं सकसितं मायामोह याना: लहिना तःगु जुयाच्वन । छन्हु सिंहसार्थबाहु देने त्यंका: करुणामययात जप याना: स्व:बलय् करुणामय प्रकत जुल । करुणामयनं सिंहसार्थबाहुयात धाल थन छिमिसं व्यापार याना च्वन । छिपिं फुककसित छम्हछम्ह मिसापिसं मायामोह याना लहिना तल । अमिसं छिमित माया मोह याना: लहिना तःगु धयागु छिमित ल्हंक नका: लिपा छिमित नयेत खः । छिमित माया मोह यानातःपिं मिसापिं धयापिं लसितं खः । उकिं छिपिं फुक थन च्वनेमते नेपा: लिहाँ हँ धका: धाल नापं छिपिं लिहाँवनेत ब्रम्हपुत्र खुसि सिथय् छम्ह तुयुम्ह ब्वसल च्वना च्वनी । उकिइ हे छिपिं फुकक च्वना: लिहाँ हँ । सल गया: लिहाँ वनेबलय् लसितं वया: छिमित का:वइ अमित छिमिसं लिफ: हे स्वये मते । सुनां लिफ: स्वत व सी धका: धया: अदृष्य जुल । करुणामयनं धा:थें कन्हय् कुन्हु सकलें लिहाँ वनेत ब्रम्हपुत्र खुसिइ थ्यंबलय् तुयुम्ह सल: छम्ह च्वनाच्वन । उकिइ हे सकलें च्वना: नेपा: लिहाँ वयाच्चंबलय् लसितं नं थः मायामोह याना: लहिनातःपिनिगु नां काकां सल ल्यूल्य वल । सुनां सुनां स्वत अपिं फुकक सलं कुतु वना: सित । सिंहसार्थबाहु छम्हसिनं जक लिफ: मस्व: उकिं वहे छम्ह जक म्वात, लिथ्यन । सिंहसार्थबाहु ल्हासाय् च्वपिं लसितपाखें बचय् जुया: लिथ्यंगु धयागु फाल्गुण शुक्ल पूर्णिमा खः । अथे फुकं सिका नं सिंहसार्थबाहु छम्ह लसिपाखें बचय् जुया: लिथ्यंगु खँ सकसितं कन । अथे मृत्युपाखें बचय् जुयाव:गुलिं सिंहसार्थबाहुयात अबीरं व्हाला सिन्दुरजात्रा याना: छँय् थँहिति या भगवान बाहालय् दुतयंकल । लसितपाखें बचय् जुयाव:गु जूगुलिं दँय्दँसं होलिपुन्हि कुन्हु बाजं थाना: चकंद्य: जात्रा यायेगु परम्परा दुगु खः ।

छन्हु औसिया चान्हय् सिंहसार्थबाहु ल्हासां लसित नेपा: वया: सकसितं दु:ख ब्यवल धयागु सिल । अले छक्कलं वं तरवार ज्वना: करुणामययात आराधना याना: दक्क दु:ख ब्यव:पिं लसितयत् ख्याना: व्छया: लसितपाखें बचय् यात । अले सिंहसार्थबाहु धर्म, न्याय पक्ष लिना च्वनेगु धका: सकसितं जां बिल । श्व खं याना: उगु थाय्यापिं सकसिनं सिंहसार्थबाहुयात चकंद्य: धका: जुजु थें माने यायेगु जुल । चकंद्य: जातीय समानताया बिचा: दुम्ह द्य: धका: नं धायेगु या: ।

पाहांचःहे

नेवाःतय् हनेगु याना वयाच्वंगु ततःधंगु नखः मध्यय् पाहांचःहे छगू नं खः । पाहांचःहे नखः नेवाःत सकसिनं हनेगु यायेगु याःसा श्व नखः विशेष याना यें (दे) च्वपिं नेवाःतय्सं तःजिक हनेगु चलन दु । यें दुनेया नेवाःतय्सं विशेष यानाः पचलि भैरबया जात्रा तःजिक हनीगु थाय् क्वने व लुतिमरु अजिमाया जात्रा तःजिक हनीगु थासय् च्वपिं नेवातय् पाहांचःहे नखः हनेगु चलन मदु । उगु निगू जात्रा हने माःपिं नेवाःतय् तजिक हनेगु चलन मदु । पाहांचहे नखः तजिक हनेगु धयागु हे येंया नेवा तयेय म्हसिकेगु खः ।

पाहांचःहे हनेगु

पाहांचःहे धका चैत्र कृष्ण चतुर्दशी कुन्हु हनीगु नखः खः । श्व नखः कुन्हु मेमेगु नखः चखःवल्य् थें सुचि नियम यायेथें श्व नखः हनेत नं वं थिलाः म्वःमि ल्ह्याः सुचि नियम यायेमाः । श्व नखः कुन्हु विशेष यानाः त्वाः त्वालय् थाय् थासय् च्वंगु वा फोहरगु थासय् तःलय् दुम्ह लुकुमाःद्यःयात पूजा याना हनीगु नखः खः । श्व नखःया प्यन्हु न्ह्यो मिजं मचातय्सं साःगाः वा चां त्वपुया तःगु लुकुमाः द्यःयात म्हुयाः लुकुमाःगाः सुचुपिचु यायेगु याइ । प्यन्हु लिपा अर्थात् चैत्र कृष्ण चतुर्दशी कुन्हु लुकुमाः गालय् बें थिलाः नीसी यायेगु याइ । लुकुमाद्यःया गाः सुनां म्हूल वहे लुकुमा गालय् बें इलेगु ज्या याइ । थथे गाः खनांः सुनां सफा यायेगु याइ वहे मिजंमचा पाहांचहेया लुकुमाद्यःया पाला जुइ ।

लुकुमाःद्यः सुला च्वम्ह द्यः जूगुलिं श्व द्यःयात बहनी सन्धयाकाः ई निसें त्वाः जःछिया मन्तय्सं छेंय् छेंय् भ्वय् ज्वरे यानाः भ्वय् छानाः पूजा याः वयेगु याइ । पाहांचःहे बलय् मेमेपिं द्यःपिन्त सुथय् पूजा यायेगु याःसा लुकुमाः द्यःयात बहनी सन्धयाकाल निसें पूजा यायेगु याइ । पाहांचःहे कुन्हु लुकुमाःद्यःया

नापनापं थाय् थासय् च्वंगु पीठ वा अजिमापिन्त पूजा यायेगुया नापनापं गणेश, कुमार, कुमारी नं पूजा यायेगु याइ । श्व दिनय् न्ह्याम्ह हे द्यःद्यःपिन्त पूजा धयागु याःसां नं विशेष पूजा लुकुमाःद्यःयात हे खः ।

लुकुमाःद्यः पूजा याइबलय् विशेष यानाः मेमेबलय् थें पूजा सामान जूसां लुकुमाद्यःयात पूजा याइबलय् लुबुं वहुबुं स्वां तयाः पूजा यायेगु चलन दु । लुबुं धकाः तुकमाया बू व्ह्याच्वंगु जूसा वहुः बू धका लैमाया बू तइ । लुबुंयात लु व वहुः बूयात वहुःया प्रतीक धका धाइपिं नं दु । लुकुमाःद्यः पूजा याये धुकाः अनं द्यःया थाय् च्याका तःगु मत वा द्यः पूजा यानाः मतः ब्यूगु इतालथ् चम्चा वा माताःचाय् अजः फयाः छेजःछि सकसियां धुया मिखा कांकां जिगु मिखा तेलाक धकाः सिन्ह तिनाः अजः उलेगु नं परम्परा दु । छुबे अजः उला थःगु मिखा तेलाकेगु जूसा मेखे लुकुमाःद्यःया थाय् अजः फयाः अजः उल धाःसा भुत प्रेत, पिशाचतय्सं थी फैमखु अमिगु डरं मुक्त जुइ धयागु धापु दु ।

लुकुमाःद्यः पूजा यानाः द्यःयात छाइगु भ्वय् विशेष यानाः बाँगु लाभामा, अय्ला, श्वं तयाः भ्वय् छाइगु जक मखु लुकुमाःद्यःयात छाःथें छेंय् सकसिया बाँगु लाभा नं तयाः भ्वय् नयेमाःगु चलन दु । श्व नखःया विशेष नसा धयागु लाभा जूगुलिं पाहांचःहेयात लाभा नखः धकाः नं धायेगु याः ।

महायानी बौद्धतय् श्व नखः कुन्हु लुकुमाःद्यः पूजा याः वने न्ह्यो थःगु छें न्यागः स्वना तान्त्रिक पूजा यायेगु चलन दु । पूजा याना च्वंगु ई दुने हे लुकुमाःद्यःयात पूजा याके व्छयेगु नं चलन दु । थथे पूजा याये सिधल धायेवं छसिकथं इवः छुनाः विशेष यानाः वाउँगु लाभा तयाः भ्वय् नयेगु चलन दु । श्व नखः मोहनी नखः धुकाया तःजिगु नखः खः । श्व नखःबलय् मोहनी नखःबलय्थें न्हूगु वसः पुनाः द्यःयाथाय् देइके वनेगु, थःथितिपिं थाय् नखःत्याः वनेगु नं याइ । श्व नखःबलय् नं मोहनी नखःथें म्ठ्याय् मचा, भिनामचाः जिचाभाजुपिं नापनापं पासापिं नं नखत्याः सःतेगु चलन दु । श्व नखःबलय् पासापिन्त नं नखत्याः सःतेगु याइगुलिं पासाःच्चे धकाः नं धायेगु याः । श्व नखःबलय् पाहां सःता नकेगु याइगु जूगुलिं पाहाचःहे धका धाल धाइपिं नं दु ।

न्ह्याःगु हे धाःसा नेवाःतय्सं हनाः वयाच्वंगु नखः चखः मध्यय् श्व छगू नं खः । श्वबलय् विशेषयानाः फोहर थाय् वा चायातःलय् सुलाच्वम्ह महाद्यःया पूजा याना न्ह्याकीगु नखः खः । महाद्यः वैदिक काल स्वयां न्हापां निसेंयाम्ह द्यः खः, हिन्दू व बौद्ध मार्गी निखलं नं मानेयाइम्ह द्यः खः । विशेष यानाः महायानी बौद्धमार्गीतय् दुने महाद्यःया विस्कंगु थाय् दु । छगू दसुया रुपय् महायान पुरोहितपिनि देखा कायेगु इबलय् देखाया सुचि नियम मयासैं द्यालाना च्वने माःथाय् द्यालाये मफया देखा कयाः पूजा याना च्वंगु वसतं हे पिहां वःम्ह व्यक्ति चिकुलां महाद्यःयात भेषय् जाकि पवं वइम्ह व्यक्ति धायेगु याः । उकिं महाद्यःयात नेवातय्

दुने निगुलिं धर्मावलम्बीपिसं माने याइगु खः । नासःछःयात नाट्यश्वर नं धाइ व हे नं महाद्यः धका सकसिन स्युं ।

चाया तलय् महाद्यः

पाहांचःहे नखः हनेबलय् चाया तःलय् च्वम्ह लुकुमाःद्यः चाम्हुया खने दयेकेगु याइगु खं च्वये हे न्ह्यःब्वये धुनागु दु । लुकुमाःद्यः धयाम्ह “लुकुं ब्यूम्ह महाद्यः” खः । लुकुं ब्यूम्ह धयागु सुलाच्च्वम्ह खः । उकिं लुकुमाःद्यःया अर्थ सुलाच्च्वम्ह महाद्यः खः । महाद्यः लुकु बीमाःगु छगू घटना दु । व छु धाःसा दैत्य छम्ह महाद्यःयात लुमंकाः तच्च्वंत थाकुक् तपस्या च्वन । दैत्यं तःसकं दुखसिया तपस्या च्वनाच्च्वंगु खनाः महाद्यः खुसि जुया “जिं छंगु तपस्या खनाः प्रशन्न जुल उकिं छं छु पवन” धका धाल । महाद्यः प्रकट जुयाः थःयाके वर पवः धाबलय् व दैत्य तच्च्वंत खुसि जुयाः महाद्यःयाके थःम्हं सुयागु छयौने थिल व भस्म जूइमाः धकाः वर पवन । महाद्यःवं नं वैगु इच्छाकथं वर बीया बिल । थथे भस्म जुइगु पवंगुलिं उम्ह दैत्यया नां हे भस्मासुर जुवन । भस्मासुरं अज्याःगु वरदान पवंगु खनाः महाद्यः नं छकः छक्क चाल । भस्मासुरं वरदान काये धुंका महादेवं ब्यंगु वरदान धाथेगु खः, मखु सीक्यत मास्ति वल । उकिं व सीकेत दकले न्हापां महाद्यःया हे छयौं थीत स्वल । महाद्यः ग्याना बिस्म्यं वन । भस्मासुर नं महाद्यःयात थीत लितु लिना वन । महाद्यः थःम्हं वर बीया थःहे भष्म जुइगु डरं यानाः भष्मासुर मखंक फोहरगु थासय् दुने सु वन । अथे सु वंगुलिं लुकुमाद्यः जूगु खः । महाद्यःयात भस्मासुरं लितु लिना च्वंगु विष्णुं खनाः महादेवं ब्यंगु वरदानया अन्त यायेगुया लागि बांलाम्ह मिसा जुयाः भस्मासुरया थाय् वन । भस्मासुरया थाय् थ्यंकाः हावभाव यानाः वैगु मन सालाः तच्च्वंत बालाकं प्याखं हुया क्यन । भस्मासुर नं बांलाम्ह मिसाप्रति खनाः आकर्षित जुल । अले व मिसां धाःधाःथे यात । लिपा मिसारुपि विष्णुं भस्मासुरयात थःगु ल्हातं थगु हे छयौं, छक्क थ्यु धका धाल । मिसां धाःथे भस्मासुरं नं थःगु छयौनय् थिया ब्यबलय् महादेवं ब्यंगु वरदान महाद्यःयात थिया खः, मखु स्वयेगु पलेसा थःम्हंतुं थःगु ल्हातं छयौनय् थ्यबलय् भस्मासुर हे भस्म जुया अन्त जुल । थुकथं महाद्यः चायाःतलय् वा साःगालय् सुलाच्च्वंगु धयागु धापु थुकथं जूगु खः ।

पाहांचःहे बलय् महादेवं लाभा, ला, अय्ला श्वं नयाः जूगु नं पार्वती धया महादेवं याःगु धैगु प्रसंग दु । पार्वती गुवलें महाकाली, गुबले कालीया रुप धारणा यानाः मासाहारी द्यः जुइगु जूगुलिं, छन्हू पार्वती महाद्यःयात नं थम्हं

नःथे नयेत इनाप यात । महादेवं ज्यू धका तुकं व लैमायाः बूँ व्ह्याः च्वंगुलिं थःत कीकाः अय्ला श्वंया नापनापं ला, लाभा व भ्वय् नल । श्व हे लुमंके कथं पाहांचःहेबलय् लुकुमाःद्यः पूजा यायेबलय् लूँबूँ व बहबूँ तयाः पूजा याये माःगु खः । अथेतुं लुकुमाद्यः गाः म्हुयाः खने दयेकेसाथं हे लुकुमाःद्यः गाः खपिसं लूँबूँ व बहबूँ तया द्यः खने मदयेक यायेगु चलन दु । गुम्ह गुम्हसिया धापु ला महाद्यःया मध्यपान याकेत पार्वती हे अय्ला दयेकाः त्वंकल धकाः नं धाः । लुकुमागाः खनीबलय् गालं लः पिहां वल धाःसा पार्वती अय्ला कयाः लः वःगु धायेगु नं चलन दु । बास्तबय् गाः म्हुइबलय् लः मुनाः गनं प्यानाः च्वंगु नं जुइफ् ।

अथेतुं पार्वती महाद्यःया थःम्हंथे अय्ला श्वं त्वनाः मांसाहारी जू धकाः धाइबलय् महादेवं नं थः पिशाच रुप कयाः लूँबूँ व बहबूँ किकाः अय्ला श्वं त्वनाः धका नं धाल धायेगु चलन दु । उकिं पाहांचःहेया “पिशाच चतुर्दशी धकाः नं धायेगु याः । महादेवं मद्यपानया लागि पिशाच रुप धारण याःगु दिं धयागु चैत्र कृष्ण चतुर्दशी कुन्हु खः । अथेतुं भस्मासुरं महाद्यःया छयौनय् थीत बना लुकुं ब्यंगु दिं धयागु नं चैत्र कृष्ण चतुर्दशी कुन्हु खः ।

महाद्यः हे पिशाच जुयाः सुलाच्च्वंगु जूगुलिं पिशाचरुपि महाद्यःयातः पूजा यानाः अजः फयाः अजः उलाः थःगु मिखा तेलाकेगु व वरदानया नापनापं भूत प्रेतपिं पाखें दुःख वःगु पाखें मुक्त जुइगु खः ।

तान्त्रिक पूजा विशेष यानाः वज्राचार्य, शाक्य, तुलाधरपिनि पूजा यानाः वा मोहनी बलय् भुयुफसि, तुमा, पालुमा पाला वां व्छयेगु धयागु लुकुमाःगालय् खः । अथेतुं बउ वां व्छयेमाल धाःसा लुकुमागालय् हे बांव्छयेगु नं याः । उकिं महाद्यः लुकुमागालय् दैगु धयागु हे फोहर थासय् दैगु खः ।

तिनिख्यलय् सल ब्वाकीगु

पाहांचःहेया कन्हय्कुन्हु अर्थात चैत्र कृष्ण औंसि कुन्हु येया तिनिख्यलय् सल ब्वाकाः जात्रा यायेगु याइ । श्वबलय् श्री ५ महाराजाधिराज समेत तिनिख्यलय् सवारी जुयाः शाही नेपाली सेनां प्रदर्शित याइगु सलः ब्वाकीगु जात्रा स्वयेगु परम्परा दु । श्वबलय् श्री ५ या सरकारया उच्चपदाधिकारीपिया नापनापं तिनिख्यः छचाख्यलं यक्व मनूत वयाः स्वयेगु याइ । श्वबलय् सल ब्वाकाः धेंधें वल्लानं यायेगु याः । थथे सल ब्वाकाः धेंधें बल्ला यायेगु परम्परा जंगवहादुर बेलायतं लिहां वये धुंका जक जूगु खः । श्व स्वयां न्हापा छम्ह हे जक सल ब्वाकेगु

चलन दु । पाहांचःहे व सल ब्वाकीगु वारे महाकालतन्त्र शिव वचनय् थथे न्ह्यो यनाःतगु दु ।

“चैत्रकृष्ण चतुर्दशीया पिशाच चतुर्दशी धका धाइ । श्व कुन्हु चान्हय् लुकुमहाद्यःयात ला, लाभा, अयला श्वे लुँबुँ वहःबुँ आदि छानाः मत बियाः मतया कुँया अजलं उलेगुलिं व कंग, अजिमा लुंमडी अजिमा आदि अजिमापिंथाय् देके वना पीठ सेवा यायेगुलिं सर्वसिद्धि लाभ जुइ । कन्हय् कुन्हु चैत्रकृष्ण औसिं कुन्हु नं पीठ पूजा यानाः व अश्वयात्रा यानाः लहड् बहड् यायेगु ज्यां याना भविष्ययागु अर्थात् लिपायागु खँया प्राप्त याये फइ । अश्वयात्रा धका छम्ह सल ब्वाक्यबलय् व सल गुलि वेगं ब्वां वनी उलि हे याकनं देशय् दुःख कस्त मदया दुखः कस्त ब्यू वइपिं शत्रु लिचिला वनी । देशय् रोगं दुस्वः वये मफया अति सुख जुइ ।

अजिमापिनिगु छः खः ल्वाकेगु

पाहांचःहे नखःया छगू मेगु महत्वपूर्णगु छः खः ल्वाकेगु खः । पाहांचःहे नखःयातः तःधंगु नखः कथं हे हनेगु चलन दु । नेवातय् थः म्हायामचा भिनामचा जक नखत्या सःताः भ्वये नकेगु जक मखु नेपाःदेया संरक्षण यानाःच्वपिं अजिमापिन्त नं भ्वय् सःता नकेगु परम्परा छः खः ल्वाकेगु प्रचलनं स्पस्त याः । गुणकाम देवं यें दे निमार्ण याये धुंकाः श्व देयात सुरक्षा यायेगु ज्या येंदेया च्यागु थासय् च्वपिं अजिमापिन्त विल । गुणकाम देवं कलिगत सम्बतः ३८२५ लय येंदे स्थापना याना अजिमापिन्त सुरक्षितयायेत जिम्मा ब्यूगु खँ वंशावली उलेख याना तःगु दु । च्याम्ह अजिमा धयापिं थथे खः ।

१. लुँमधि अजिमा
२. कंगः अजिमा
३. म्हेपि अजिमा
४. तकति अजिमा वा टंकेश्वर अजिमा
५. मैति अजिमा
६. यतमरु अजिमा
७. बछला अजिमा
८. लुतिमरु अजिमा

लुतिमरु अजिमा छम्ह बाहेक मेपिं फुक अजिमापिं पाहांचःहे धुंकाः चैत्र शुक्ल प्रतिपदा कुन्हु खतय् तयाः जात्रा यायेगु चलन थौं तकनं न्ह्यानाः

वयाःच्वंगु दनी । अजिमापिं स्थापना यायेगु ज्या गुणकामदेवं याना वंसा अजिमापिनिगु खःजात्रा ने.सं. ५८० लय अमर मल्लं याना वंगु खनेदु । थुबलय् अर्थात् अजिमापिनि मूर्ति खतय् तयाः येंदेया थःथःगु क्षेत्रय् जात्रा याइगु खः । पाहांचःहे कुन्हु चान्हय् निसैं छःपाला व खः जात्रा याइगु गुथियारपिसं छः खःयात गमय् तये यंकेगु धका तयेगु याइ । अनं थथे गमय् तयेधुंकाः तिनख्यलय् सल ब्वाके धुंकाः चान्हय् लुतिमरु अजिमा छम्ह बाहेक मेपिं अजिमापिनिगु खः तिनख्यलय् हयाः छः खः ल्वाकेत हयेगु याइ । चान्हय् छगू निश्चित इलय् छःखः हैगुलि कंग अजिमाया खः बाहेक फुकं छःखः हया तयेधुंकूगु जुइ । छः खः छखलं मेगु खःया मिप्वाः हिलाबुला याइगु खः । दकले लिपा कंगः अजिमा हयाः दक्व खःयात चाहिलाः मिप्वाः हिलाबुला याना छः ल्वाकेगु ज्या क्वजिइ अनं फुक खः ल्वाकेगु ज्या जुइ । तिनख्यलय् चान्हय् छु इलय् छःल्वाकूगु खः वहे इलय् असनय् न्हिनय् ल्वाकेमाः धयागु दु । तर श्व निश्चित रुपं व्यवहारिक मजू । असनय् छः ल्वाकीबलय् अजिमातय्गु न्ह्यय् खः न्ह्यय्पु लँ हयेगु चलन दु । असंया न्ह्यपु लँ थथे खः ।

१. कमलाछि
२. असंगल्ली
३. भोताहिटी
४. बालकुमारी
५. न्हायकत्वाः
६. थहिटी त्यौड
७. तुंबाहा पिनेया त्योड

न्हापा न्हापा ७ खः अजिमा पिनिगु खः ल्वाकेगु जूसा थौं कन्हय् लुमरि अजिमाया खः कंगः अजिमाया खः तेवाहाया अजिमाया खःयाना स्वखलःया जक जात्रा जुयाच्वंगु दनी ।

असनय् अजिमापिनि छःखः ल्वाकीबलय् असंमितय्सं चतामरी, ताय् स्वां सिसाबुसा व्लाः पूजा याइ । थन नं लुमरि व तेवाहाःअजिमापिनिगु खः तयातये धुंका दकले लिपा कंग अजिमाया खः हयाः नि खःयात चाहिकाः छखतं मेगु खतय् चिलाख (मीप्वाः) हिलाबुला यानाः लिहां वनेगु याइ । थुनियात हे छः ल्वाकीगु धकाः धाइ । थुलि क्वचायेवं छःखः ल्वाकेगु ज्या नं सिधइ ।

असनय् व तिनख्यलय् अजिमापिं भेला जुयाः ल्वाकेगुया मू खँ धयागु लुँतिअजिमायात नखत्याः सःतुम्हेसिनं अन्याय्यात उकियात कयाः सहलह ब्याकूगु खः धका धायेगु याः । श्व खँ थुकथं जुल धयागु धापु दु ।

पाहांचःहेया नखःया नखत्या यंदेया च्याम्हं अजिमा व अजिमाया मचातयूत सःता नकूगु जुया च्वन । च्याम्ह अजिमापिं मध्यय् दकले मज्यम्हं व आपा मचाखाता दुम्ह अजिमा धयाम्ह लुतिअजिमा खः । मेमेपिं अजिमापिं थें लुतिमरु अजिमानं थःतता केहेपिं थें मचाखाचापिं ज्वना नखःत्या वंगु जुयाच्वन । नखःत्या सःतूपिसं लुतिमरु अजिमा छम्हसित क्वहेक व्यवहार याःगु जुयाच्वन । मेमेपिन्त बांलाक नसा नकाः सत्कार याना लुतिमरुअजिमा छम्हसित बांमलाक व्यवहार याःगु जुया च्वन । भव्य सत् थाय् अमित नकेगु सुनानं वास्ता मयाःगु नं जुयाच्वन । लुतिमरु अजिमाया मचातयूत नये पित्यात धकाः मांम्हसित पिरे याःबलय् नखत्या सःतुम्हेसिनं “का गुलिजक हाले फूगु का, नः” धकाः बासिगु मरिं मचातयूत कयेका धाल । उगु मरिं लुतिअजिमाया मचातयू छयोल्य लाना हि वल । हि बःम्ह मचाया छयोनय् हि हुया व हे भ्वाथ नखत्याः सःतुम्ह मनूया ग्वाखंचाप्वालय् सुचुका वल । नखत्या सःतुम्हेसिनं बांमलागु व्यवहार याःगुलिं लुतिमरु अजिमा थः मचाखातायात छुं हे मनकुस्य छैय् लिहां वल । लैय् छथाय् मिसा छम्हसिनं फसि छग्वः मिया च्वंगु लुतिमरु अजिमां खनाः व हे फसि छग्वः ज्वना छैय् वनाः मचातयूत दयेकाः नकेत स्वःबलय् व फरि फुकं लुं जुल । अनं लिपा लुतिमरु अजिमा मेमेपिं अजिमापिं स्वया तःमि जुल । लिपा दँया पाहाचःहेबलय् न्हापा दक्व अजिमापिन्त नखत्याः सःतुम्हेसिनं हानं नखत्या सतल । मेमेपिं अजिमा व अमि मचात स्वयां लुतिमरु अजिमां थः मचातयूत उप्चः झः झः धायेक तिसा वसतं तिडकाः नखत्या वन । न्हापा अपमान याम्ह नखत्या सःतुम्हेसिनं मेमेपिं अजिमापिन्त स्वयां बांलाक तिसा वसतं छायापियावम्ह लुतिमरु अजिमायात उप्चः स्वागत सत्कार यात । भव्य नं बांलाक तयाबिल । भव्य इबलय् लुतिमरुअजिमां थः मचातयूत तयाब्यगु भव्य नके मब्य । थःयाके च्वंगु व मचातयूके च्वंगु तिसा फुकं भव्य ब्वयय् तयाः “थव भव्य भीत नकूगु मखु तिसा वसःयात नकूगु खः” धका धाल । न्हापाया पाहाचःहे बलय् नखत्या वःबलय् मचातयूत नये पित्यात धकाः धाःबलय् का नः धका गंगु बासिगु मरिं कयेका हुयाः धाः जुयाः हि पिहां वःगु लुमंके कथं न्हापा हि हुयाः ग्वाखंचाय् स्वचाका थकूगु भ्वाथः लिक्का कयन । लुतिमरु अजिमां अथे याःगु खनाः नखत्या सतुम्ह मछाला अन न्ह्योने मच्चंस्य वन । अथें जगुलिं लुतिमरुअजिमा छम्हसित पाहांचःहे स्वयां प्यला न्हयो जात्रा याना नखः न्यक्कीगु जगु खः । उगु जात्रा धयागु बालाचःहे कुन्हु थःने लुतिमरु अजिमा जात्रा याना थंहिति तये हैगु खः । थुकथं लुतिमरु अजिमा छम्ह बाहेक मेपिं फुक अजिमापिं चैत्रशुक्ल पारु कुन्हु जात्रा यायेगु याइ वया कन्हय् कुन्हु लुमरि अजिमा, तेबाहाः अजिमा व कंग अजिमा स्वम्ह अजिमापिं छः जात्रा यानाः चान्हय् तिनिछलय् व न्हिनय् असनय् छः त्वाकेगु याइगु खः ।

मरः / मलःजा नकेगु

चिल्लागाः आमाई अर्थात चैत्रकृष्ण आमाइकुन्हु पाहांचःहे नखःया दुने लाःगु दिं कुन्हु तिनिछलय् सल त्वाकेगु याइ । थुबलय् नेवाःतय् थी थी त्वाः त्वालय् छःछःपिं पूजा यानाः छःयात जा छानाः इहि मयाःनीपिं मिसामचातयूत व चूडाकर्म, व्रतबन्ध मयानीपिं मिजंमचातयूत नं जा नकेगु याइ । थथे छुं मस्यूपिं वा समाजय् तःधिक जुल धकाः मान्यता मयाःनीपिं मचातयूत छः पूजा यानाः जा छानाः जा नकेगुयात मरः/मलःजा नकेगु धकाः धाइ ।

इही मयानीपिं मिसामचात व व्रतबन्ध, चूडाकर्म मयाःनीपिं मिजंमचातयूत मरः/मलः धकाः धायेगु याः । उकिं अज्याःपिं मचातयूत नकीगु जा हे मरः/मलःजा नकीगु धकाः धाइगु खः । भाजु इश्वरानन्द श्रेष्ठाचार्यया बःचाधगुखँग्वः धुकुतिड इहिपाः मयाःनीपिं मिसामचा व चूडाकर्म वा व्रतबन्ध मयाःनीपिं मिजंमचातयूत मरः धकाः उलेख यानातःगु दु । मरः/मलःया अर्थ छुं मस्यूपिं मचातयूगु व्यक्तित्वया प्रतीक धायेथें तुं मरःया अर्थ प्राकृतिक शक्ति प्राप्तम्ह मिजंमचा वा मिसामचाया व्यक्तित्वया प्रतीक खः । गथे कुम्ह नकेगु धकाः इहि मयाःनिपिं मिसामस्तयूत भव्य नकेगुया अर्थ शक्ति प्राप्ति या नितिं खः । अथे हे मरः नकेगु नं कयतापूजा मयाःनिपिं व इहि मयाःनिपिं अज्ञानी मस्तयूत शक्ति प्राप्ति या नितिं यानाःतःगु चलन खः । मचातयूत मलःजा नकल धायेवं छुं ल्वचं थी मखु धयागु परम्परागत धापू दु । उकिं त्वाःत्वाःयापिं मचातयूत ल्वचं रक्षा यायेत त्वाःत्वालय् हे छःपूजा यानाः मचातयूत मलःजा नकीगु खः । मलःजा विशेष यानाः त्वाःया मूल मूलपिं छः गणेछः, अजिमा छः स्थानीय रक्षकया रूपय् स्थापित छःपूजा यानाः छःया नापनापं मचातयूत जा नकीगु खः ।

मलःजा नकीबलय् त्वाःत्वालय् मलःजा नकीगु इलय् मचातयूत इवः तयेगु याइ । मलःजा नकीपिं व्यक्ति वा गुथियारतयूत पूजासामग्री हुयाः स्थानीय गणेश वा अजिमा वा स्थानीय मुख्यम्ह छःयात पूजा यायेगु याइ । पूजा याये धुन धायेवं मलःजा नइपिं मचातयूत इवःलाक तयाः सिन्हः तिकाः, स्वां ब्यु ब्यु वइ । अनं लिपा

द्यःपिं नापं मचातयत् इवःलाक जा, कें, लैंचा, तरकारी, मरिचरि आदि तयोः नकेगु याइ । थये इवःलाक मचातयत् हये मफुसा मलःजा नकूथाय् जा कयाहयाः छैय् चर्वपिं मचातयत् प्रसाद कथं नं नकेगु चलन दु । मलःजा नकेगु बारे ज्यापु पञ्च भुइजःसिं थुकथं न्ह्यःथनातःगु दु ।

मरः जा नकेगु धैगु हे मूलम्ह द्यःपूजा यानाः द्यःयात छाःगु विशेष कथंया जा भव्य ज्वलंछि परिकारया नसा द्यःयात छाये धुंकाः मस्तयत् प्रसादया रूप्य विधिपूर्वक द्यःब्व तयाः थाकुलिनिसें इवः छुकाः नकेगु छगू कथंया धार्मिक सांस्कृतिक मचाभव्य खः ।

मरः/मलःजायात समाजय् पवित्रगु जा कथं कयातःगु दु । नेवाःतय् मिसामचा न्याला व मिजंमचाः खुला दत धायेवं जा नकेगु वा अन्नप्राशन धकाः याये माःगु संस्कार दु । थज्याःपिं मचातयत् मलःजा नकीगु थासय् इवःछुकाः मचातयत् न्हापां जा नकल धाःसा छैय् छैय् जा नकाः च्वनेम्बाः । मलःजा नकेगु भिं धकाः थज्याःगु थासय् यंकाः मचातयत् जा नकेगु याइपिं नं दु ।

मरःजा नकेगु ज्या धाःसा, गुलित मलःजा नकीगु थाय् दु फुक थासय् ज्वः धाःसा मलाः । मलःजा नकीबलय् गनं पाःचालप्ते, गनं केरा लप्ते गनं पंलालप्ते, गनं क्वंसालप्ते गनं तुच्चालप्ते आदि थी थी लप्ते तयाः नकेगु चलन दु । मलःजा नकेगु लागि थाय् थासय् गुथि हे स्वनातैगु जूगुलिं मलःजा नकेगुलिइ छु छु तयेगु धकाः गुथिं हे निश्चित याइगु खः । उकिं मलःजा नकीगु थासय् गुथिं तयेमाःगु विशेष यानाः जा कें, लैं आदि निश्चित यानातःगु जुइ । अथे मलःजा नकीथाय् भक्तजनपिसं मचातयत् दां, कापः, चकलेत, मरिचरि आदि थःथःगु इच्छा अनुसारं मचातयत् बिया त्वपः नं वयेगु नं याः । गनं गनं मलःजा नकीगु थासय् ला जक मखु फाया ला समेत तयाः नकेगु चलन दु । गनं गनं धाःसा ला मतसे मलःजा नकेगु चलन दु । मरुनं भिंछः न्ह्यःने च्वंम्ह गणेद्यःपूजायाना मलःजा नकीबलय् फाया ला समेत तया नयेकु चलन दु । थव बलय् प्रसादया रूप्य तधिकपिसं नं नयेगु चलन दु । गन गनं ८४ ता घासा तयाः हे मर/मलःजा नकेगु चलन दु ।

नेवाः समाजया जातिय व्यवस्था दुसां इहि मयानीपिं मचातयगु लागि जातिय व्यवस्था मदु । थीज्य थीमज्य, नयेज्य नयेमज्य धकाः मदु । जा ज्य मज्य धकाः मदु, मचात सकलें समान खः । मचातय् न्ह्यागु नं नयेज्य, उकिं नेवाः समाजय् फाया ला नयेमज्यगु आपालं जात दुसां नं मलःजा नकीबलय् दक्कसित समान रुपं नकेगु याः । मचात द्यःया मेगु रुप धकाः नं धायेगु याः ।

यें दुने मलःजा नकीगु थाय् थुकथं दु ।

मरु गणेश

भिंछः

क्वहिति

यतखा

त्यंगः

क्षेत्रपाति

युता ननि
भलननि
लसक :ननि
तःननि
वदे
किलागः
न्यत
वैतु
तेबाहाः

असं
कमलाछि
त्यौड
न्हाय्कत्वाः
बालकुमारी
वंगः
कंग
केल
आदि

अव्वः धया थें थासय् तिनछयलय् सल ब्वाकीकुन्हु अर्थात पाहांचःन्हेया सिलसिलाय् नकेगु जूसा गनं गनं मोहनिबलय् चालंकुन्हु नकेगु नं याः । अथेतुं असं चालंकुन्हु असंचुकय् दुने नकेगु याइ । ल्हुतिपुन्हिकुन्हु कमलाछि गणेद्यः जात्रा यानाः उबलय् हे मलःजा नकेगु याइ । कमलाछि गणेद्यः पूजा याना मलः जा नकीबलय् नं फाया ला तयाः क्वंसालप्ते तयाः नकेगु चलन दु । फाया ला तया मलःजा नकिपिनि सकसिया क्वंसालप्तेय् तया नकेगु परंपरा दु । अथेतुं कंग अजिमायाथाय् व कमलाछि गणेद्यःया थायथें कंग छथाय् हे ७ गू थासय् ७गू खलःतय्सं मरःजा नकेगु यानाच्वंगुलि थौं कन्हय् स्वखलकं नकावयाः च्वंगु हे दनी ।

बालकुमारीइ मलःजा नके थें ३६० म्ह मिसामचा कुमारी नकेगु धकाः नं नकेगु चलन दु ।

मलःजा नकेगु परम्परा न्हनाः वंगुलिइ विशेष यानाः न्हापा मलःजा नकेगुया लागि तयातःगु आयस्था न्हनावंगु जूगुलिं नं खः । अथे तुं गनं गनं मलःजा नकेगु चलन दु । तर आयस्था मदुगु कारणं यानाः नं मलःजा नकेगु परम्परा न्हनावंगु जुइमाः । मलःजा नकेगु ज्या गनं गनं न्याम्ह खुम्हनिसें सलंसः तक्क नकेगु चलन दु । न्हापा न्हापा त्वाःत्वालय् हे मलःजा नकेगु चलन दुगु खः । तर थौंकन्हय् थाय् थासय् मलःजा नकेगु परम्परा न्हनाः बनावंगु दु । मलःजा त्वाः त्वालय् द्यःद्यःपिं न्ह्योने न कीबलय् छगू त्वालय् नके सिधल धाय्वं मेगु थासय् नकेगु चलन दु । गथे येंया भिंछःया न्ह्योने च्वंगु गणेद्यःया थाय् व महामाया पूजा यानाः ज्यापुतय्सं मलःजा नकेगु क्वजित धायेवं भिंछः पाःचाय् चिकंसाःया द्यःपूजा यानाः लायकुसाया सायमितय्सं चुंला नापं मेमेगु धाःसा तयाः मायकें जा तयाः मलःजा नकेगु याइगु खः । थव धुंका परोपकार दुने थकूजुपिसं तःजिक धासा तयाः गणेद्यः पूजायानाः मलःजा नकेगु याइ । अनं भिंछः धुंका क्वहिति वनेगु लैय् दथुइ च्वंम्ह गणेद्यःपूजा यानाः थीथी जरिबुति तयाः जा, मायकें तरकारी आदि परिकार तयाः मलःजा नकेगु याइ । थन नकेगु क्वजिल धाय्वं क्वहिति पाःचाय् मलःजा नकेगु याइ । थये

छग् थासय् नके धुंका मेगु थासय् नकेगुलिं याना: मचातय् छथाय् सिधयका मेथाय् वनानं न: वनेगु या: । न्हापा न्हापा मचातय् सुकु लाना: बांलाक फ्यतुका पूजा याना: हे मल:जा नकीगु जुइमा: तर थौं कन्हय् धा:सा अथे जूगु खने मदु । मचात इव:लाक दना च्वनी न्हापां सिन्ह: तिकी अनं छसि कथं जा, केँ तरकारी आदि परिकारया नसा त:वनी । जा नं प्रसादथेँ हे जक तयेगु याई उकिं त:थाय् वनानं मचातय्सं मलजा नये हे फै ।

मल:जा नकेगु पा:लाम्हसिया दाजुकिजा तता तहेँकेपिनि मल:जा नैपिं मचातय् चकलेत, पौष्टिक नैक्या आदि त्वपं तयेगु नं चलन दु ।

मचातय् पूजायाना: जा नकेत ल्हा: सिका नकेसिधल धायव नुसिकेगु समेत व्यवस्था दुसां मचातय् मल:जा नकेगु मखु प्रसाद इनेगु थें जुयाच्चंगु खनेदु । संस्कृति म्वाकेगु ख:सा थ:गु संस्कृति अनुरूप हे सुव्यवस्थीत कथं याना च्वंसा बांला मखुसा खालि गुथि ख: । मचातय् इनेमा:गु ख: इन सिधल मयास्य नेवा: संस्कृतियात संरक्षण जुइकथं याना ब्यूसा बांला ।

सुयानं छेँ मां अबु वा परिवारया ज: सुनं स्वर्गे जूगुदुसा थथे मल:जा नकेगु थासय् दुरु हया मचातय् दुरु त्वंकेगुनं चलन दु ।

लिधंसा

अमात्य, साफल्य,

“यँया: बलय् पिदनीगु सब: भक्कु प्याखं”

विश्वभूमि, ने.सं. १११४ यंला थ्व १२ शुक्रवार तँसा पौ ।

खत्री, प्रेमकुमार,

“नेपाली समाज र संस्कृति”

वि.सं २०३६

काठमाडौं, पाठक्रम विकास केन्द्र ।

चालिसे, रवि

“हाम्रो चाडपर्व”,

वि.सं. २०३९

काठमाडौं, श्री.५ को सरकार सञ्चार मन्त्रालय सूचना

विभाग,

जुजु, बलदेव,

“नेवा: संस्कृतिया दृष्टिं म्हपूजा नख:”

भितुना दैपौ -९ ।

जोशी, रास,

पचलि आजुया जात्रा पचिमन्ह: व थ्व लिसे स्वानाच्चंगु

किंवदन्ति”

सन्ध्याटाइम्स ने.सं. १११७, १२ चिल्लागा:, शुक्रवा:या तँसा ।

जोशी, सत्यमोहन,

“ब:चांधंगु खँव: धुकु”

ने.सं. ११०७

यें, लाकौल प्रकाशन,

,, वि.सं. २०३९

“नेपाली चाड पर्व”

काठमाडौं, नेपाल राजकीय प्रज्ञा प्रतिष्ठान ।

,, वि.सं. २०५२

“थलदेया नेकूजात्रा व स्वपु म्ये”

नेकु जात्रा मतया: स्मारिका, ।

जोशी, हरिराम, वि.सं. २०३७	“हाम्रो संस्कृति” काठमाडौं, श्री ५ को सरकार, सञ्चार मन्त्रालय सूचना विभाग ।
ज्यापु, पञ्च भुइजःसि	“पाहाँचःहेः नखः, मरःजा नकेगु व छःखः ल्वाकेगु” सन्ध्याटाइम्स ने.सं. १११९ चौलाथ्व २ शुक्रवाःया तँसापौ
बज्राचार्य, चुन्दा, ,, ,, ने.सं. ११०५	“यँयाः (इन्द्रजात्रा छपुलु”, विश्वभूमि न्हिपौ), दँ २ ल्याः २४२, २४३ । “म्हपुजा व आत्मापुजा”, इनाप” (वाःपौ) दँ ८ ल्याः ३९ । “मल्लकालया छु संस्कृति” यँ, नेपालभाषा अध्ययन व अनुसन्धान केन्द्र । “यँयाः (इन्द्रजात्रा) छपुलु”, विश्वभूमि न्हिपौ), दँ २ ल्याः २४२, २४३ । “म्हपुजा व आत्मापुजा”, “इनाप” वाःपौ) दँ ८ ल्याः ३९ ।
बज्राचार्य, धनवज्र सं, वि.सं. २०१९ ,, ,,	“पण्डित सुन्दरानन्द विरचितत्रिरत्न “सौन्दर्य गाथा”, काठमाडौं, नेपाल साँस्कृतिक परिषद । “चलन दर्शको एक प्रमुख अङ्ग” यति वर्ष ९ अङ्क ३४ । “वर्षकृति एक अप्रकाशित थ्यासफ” कन्ट्रिब्यूसन टू नेपालीज स्टडिज, सिनास भोलुम १४ अङ्क १ पृ ७ ९० ।

बज्राचार्य, पुण्यरत्न, ने.सं. १०८४ ,, वि.सं. २०२० ,, वि.सं. २०२५	“भीगु नखः चखः”, यँ च्वसापासा । “हाम्रो संस्कृति”, काठमाडौं, एडुकेशनल इन्टरप्राइज प्रा.लि. । “हाम्रो चाडपर्व”, काठमाडौं, रत्नपुस्तक भण्डार
बज्राचार्य, पं. कविराज जोतिष मोहनराज ने.सं. १०९७	“सर्वज्ञामंत्रावदान नराहुति तारादेवीयागु प्रशंसा” यज्ञ ललितपुर, स्वयम् ।
बज्राचार्य, फणीन्द्ररत्न, ने.सं. १११८	“म्हपुजा विधि । म्हपुजा पद्धति ” यँ, जःसफ्कुथि ।
बज्राचार्य, बद्रिरत्न, ने.सं. ११०४	“श्रृङ्गभेरी” यँ, श्रीमाया मानन्धर ।
बज्राचार्य, मदनसेन, गुला बाजं ब्वज्या लुमन्ति पौ, ने.सं. १११८ पृ. ११ १६ ।	“गुलाधर्मय् गुला बाज.”
बज्राचार्य, मनवज्र, वि.सं. २०२५	“हाम्रो चाड पर्वहरुको विवेचना”, काठमाडौं रत्नपुस्तक भण्डार ।
बज्राचार्य, यज्ञमानपति, भित्तुना दँ १०, ने.सं. ११११, पृ. ७ --१० ।	“म्हपूजा छगू संस्कृति” भित्तुना दँ १०, ने.सं. ११११, पृ. ७ --१० ।

बज्राचार्य, डा. रञ्जना, ने.सं. १९२०	" पञ्चदान बौद्ध पर्व" काठमाडौं, शाक्य जः ।
बज्राचार्य, रत्नकाजी, वि.सं. २०३९	"भीगु संस्कृतिया ब्व घासाः" येँ, नेपाल बौद्ध प्रकाशन ।
बैद्य, कविराज सिद्धिगोपाल, ने.सं. १९२० वि.सं. २०३९	"म्हपूजा पद्धति" यल स्वयम्, "बौद्ध स्तोत्र संग्रह" ॐ बुद्ध धर्म संघ
भुइजःसि, ज्यापुपंच, ताम्राकार, पूर्णकाजि,	"पाहाँचन्हे नखः मरःजा नकेगु व छःखः ल्वाकेगु " सन्ध्याटाइम्स शुक्रवाःया तँसा पौ ने.सं. १९९९ चौलाथ्व २ । "नेवाः तजिलजिकथं मनू हे छः जुल व खः सिंहसार्यवाहु, विश्वभूमि ने.सं. १९९९ चकपुन्हिया लसताय्
प्रजापति, कृष्णकुमार,	"गुंलाधर्म व नगदेश" विश्वभूमि (न्हिपौ), ने.सं. १९९४ गुंलागाः ६ ।
मुनंकमी, लीलभक्त, वि.सं. २०४१	"नेपालको सांस्कृतिक तथा ऐतिहासिक दिग्दर्शन" भक्तपुर, श्रीमती भवानी केशरी मुनंकमी, ।
,, वि.सं. २०५३	" भक्तपुरको संस्कृति एक अध्ययन" शाही नेपाल प्रज्ञा प्रतिष्ठान, (अप्रकाशित)
राजवंशी, श्यामसुन्दर,	"नेपाःभिया तःधंगु नखः स्वन्ति नखः"

सेवक, आशाकाजि, वि.सं. २०५५	विश्वभूमि (न्हिपौ) ने.सं. १९९६ कौलागाः ४ । "बनेपाका चाडपर्वहरु", नाला, अनामणि प्रकाशन, ।
स्थापित, रमेशकाजि,	"मोहनि व दशैं व हे मखु", स्वनिगः वाःपौ मोहनिया विशेष तँसा पौ ने.सं. १९९९ कौलाथ्व ४ ।
श्रेष्ठ, कल्पना,	"काठमाडौं वलिम पायाः एक अध्ययन" भ्वाइस अफ कल्चर, भोलुम १ सेप्टेम्बर १९९५ पृ ३५ ४० ।
श्रेष्ठ, गंगालाल,	"गथांमुगः व घण्टार्ण व हे खःला ? सन्ध्या टाइम्स शुक्रवाःया तँसापौ, ने.सं. १९९७ दिल्लागाः १३ "बालाचःहेबलय् जुइगु इन्द्रायणी जात्रा व थुकिया विशेषता" सन्ध्याटाइम्स शुक्रवाःया तँसा पौ ने.सं. १९९८ कछलाथाः १४
श्रेष्ठ, सुरेन्द्रमान,	"मलःजा नकेगु" इनाप वाःपौ, दँ ९ ल्याः ने.सं. १९९९, चिल्लागाः १२ ।
श्रेष्ठ, सुरेन्द्रमान, जुजु वलदेव, ने.सं. १९०८	"कान्तिपुर" येँ, पासापिं,
शाक्य, विक्रम,	"मतयाः (भृङ्गभेरी जात्रा) यात्रा" सन्ध्याटाइम्स (न्हिपौ) दँ १ ल्याः ३०२ ने.सं. १९९६ गुंलागाः २ ।

- शाक्य, दुर्गा, "कुमारी रथ यात्रा हयूमत टोल बत्ती बाल्ने नाउँको आधारमा रहन गएको हो " मधुपर्क वर्ष ३० अङ्क ८ पौष ।
- शाक्य, हेमराज, "इल्हने सम्यक इतिहास व श्रवया ज्याभवः" ने.सं. १११२ ललितपुर, वेखारत्न शाक्य ।
- ज्वाली, सूर्यविक्रम, "नेपाली संक्षिप्त शब्दकोष", वि.सं. २०४० काठमाडौं, नेपाल राजकीय प्रज्ञा प्रतिष्ठान ।
- Anderson, Mary M. "The Festivals of Nepal", 1988 Calcutta, Rupa Paperback.
- Chattopadhyaya K.P. "An Essay on The History of Newar Culture", 1980 kath, Educational Enterprise
- Deep, Dhurba K. "Mataya The Buddhist Festival of Lights", Neku Jatra MaB.C. 2052 taya Smarika p. 29
- Manandhar, Thakur Lal, Newari English Dictionary Modern Language of Kathmandu Valley " 1986 Delhi Agam Kala
- Nepali, Gopal Singh "The Newars", 1988 Kath, Madhab Lal Maharjan Himalaya Booksellers, Printed.

- Regmi, D.R, "Mediavl Nepal Part IV", 1966 Patna The Author
- Shresthacharya, "Concise Dictionary Newari-English Iswarananda Kath, Kaanibha. 1987
- Vajrachrya, Dhana Vajra "The Gopal Rarajavamsovali", & Mall, Kamal P Kath, Nepal Research Centre, 1985
- Vergati, Anne "Gods, Men & Territory Society and Culture in Kathmandu Valley", 1995 New Delhi Agay Kumar Jain, Monohar Publishers & Distributors

नखःचखः हना

नखः

नसा

खाई सँलु
बैशाख १ गते

बैशाख शुक्ल १

अक्षय तृतीय
बैशाख शुक्ल ३

बैशाख शुक्ल ४

स्वाया पुन्हि
बैशाख शुक्ल पूर्णिमा

सिधि नखः
जेष्ठ शुक्ल ६

दशहरा
जेष्ठ शुक्ल १०

जेष्ठ शुक्ल ११

ज्याः पुन्हि
जेष्ठ शुक्ल १५

भलभल अष्टमी
आषाढ कृष्ण ८

खाइच्चःचा नापं लैसि, कःछे, कुनबुं,
बकुला प्याज आदि तयाः खाइक्वाति
त्वनेगु

सत्तु, साखःति दान याइगु, मचातय्
प्लाः सफायायेगुया लागि पाःलाःभि
त्वंकीगु

साकाहारी नसा

माय्, मू, कःसु, मुसु वः नाप
चतांमरियानाः ५ गू थरिया वः

फकं, फसि, तुसि, वाउँ मल्ला पोलःचा
चिचिंदा आदि न्हून्हु तरकारी ल्वाक
छ्यानाः छःयात छानाः नयेगु

अन्य

छःयात छाना छैय् परिवार च्वनाः
खाइक्वाति त्वनेगु

बुंगछः रथय् तैगु

ज्यापुतय् सायात न्हूगु वछमनाः नकीगु,
ज्यापुतय् भुतिसलय् बौ तयाः शक्ति सञ्चय
याइगु, देगुपुजा सुर

बुंगछःया जात्रा

भगवान् बुद्धया जात्रा पलाञ्चोक भगवती
चण्डेश्वरी जात्रा

कुमारपुजा, कुमार जात्रा तुं बुंगाः जन्हु सफा यायेगु देगुपुजा
मन्याःपिनि देगुपुजा यायेगु,
नागःयात पुई हायेगु, आगंछः पुजा यायेगु

गंगापुजा, रामेश्वर पूजा, फकं तयाः गणेशः पुजा, तिर्थय् म्वः
लुइगु ऋषिकेश्वर महाछःपूजा

तुल्लि पुसा तयेगु / तुल्लि पुसा व्हेलेगु

दछिया दकले ताहाकःगु दिं थुबलय् थाज्या सुज्या आदि याये
मज्यू धयागु धापु दु । थ्व कुन्हु ज्या यानानं ज्या सिमधःसा भाः
खनिमखु धायेगु चलन दु ।

देवपाटनय् म्ये प्लाः खनाः जात्रा । ग्वलमितय् जात्रा, त्रिशुली
जात्रा

दिसिपुजा
आषाढ कृष्ण १०

चतामरि, ममःचा, छुतुमरि वः, हलिमलि,
भव्य

हरिशयनी एकादशी
आषाढ शुक्ल ११

शुद्धगु भोजन, छुचुं फलफूल, फलाहार
नयेगु ।

आषाढ शुक्ल १२

गुरुपुन्हि
आषाढ शुक्ल १५

गुला
श्रावण शुक्ल १

गथांमुगः
श्रावण शुक्ल १३

हाकु कछला, वः लाभा, छाः,
हाकुमुस्याः, पालु समय ज्वलं भव्य
नयेगु

नाग पञ्चमी
श्रावण शुक्ल ५

यल पञ्चदान
श्रावण शुक्ल ८

खीर भोजन, स्वारी मार्पा, ककचातयाः
अचार,

छः ब्वयेगु
भाद्र कृष्ण १२

पञ्चदान
भाद्र कृष्ण १३

खीर भोजन स्वारी
मार्पा फकं सना

तुलसिमा पीगु

गुरु पूजा भिक्षुपिनि वर्षावास प्रारम्भ

गुला धर्म प्रारम्भ, बौद्धमार्गीपिं देव मन्दीर, तिर्थ स्थल्य सुथय
सुथय चाःहिलीगु । गुला बाजं थानाः स्वयम्भु वनिगु

सिनाज्या नी व्यंकेगु, भुत वायेगु, बौ वायेगु बलिपुजा, नैया
अंगु, लुखाय नकिं, स्वकिंदुगुकि तायेगु, पञ्चरत्नया अंगु
न्यायेगु, आदि द्वाःपति गथांमुगः थनेगु, आजु जय पवनीगु
आगंपुजा, धूप थनाः धैय, कुसि, पति आदि कछयेगु, घण्टाकर्ण
वा जगाः कायेगु ।

सादुरु, सौ, सितु तयाः पुई हायाः लुखाय लुखाय
नागपुजा यायेगु

यलय पञ्चदान पूजा, शाक्य, बज्राचार्यपिन्त पञ्चदान

पञ्चदान यायेत छः ब्वयेगु पञ्चदां जा थुइगु पञ्चदान
न्यायीकिपिनि स्वयम्भूइ पञ्चदान छः हयेगु

पञ्चदान बीगु । त्वाः त्वालय पञ्चदान गुथिं पञ्चदान बीगु
पञ्चदान पूजा यायेगु

छः क्वकायेगु
भाद्र कृष्ण १४

बौया छवाः स्वयेगु
भाद्र कृष्ण औसि

चथाः
भाद्र शुक्ल ४

यैयाः
भाद्र शुक्ल १२

क्वनेयाः
भाद्र शुक्ल १४

यैयाः पुनिह
भाद्र शुक्ल १५

गातिला
आश्विन कृष्ण ३

नानिचायाः
आश्विन कृष्ण ४

सर्गनाप मरिचरि फलफूल नापं अबुया
यःगु नसा नकेगु

छुस्यामुस्या, वसुपति हाकु वछयला, वः
फलफूल तयाः भव्य नयेगु

कुमारी, गणेश, भैरवयात समय
छानाः नयेगु

समय बजि

म्हासुगु मरि, म्हासुगु अन्न फलफूल

पञ्चदनया छः क्वकायेगु पञ्चदान न्यायेकपिनि पञ्चदान छः
स्वयम्भुद जात्रा यानाः लित सये यंकेगु पञ्चदान छःयात
छानातःगु पञ्चदान ज्वलंया नापनापं मरिचरि फलफूल
स्वयम्भुया मुलम्ह भगवानयात छाये यंकेगु

अबुया ताःआयुया कामना यायेगु, अबु मदुपिनि गोकर्णय वनाः
म्बःलुह्याः अबुया नामय सरादयानाः दान धर्म यायेगु । अबुया
नामय सिधा दान यायेगु । बौद्धमार्गीपिनि अबुया नामय थाय
थासय्या करुणामय पित्त नं निसला छायेगु याः ।

मोहनि नखःया समय चथाःछः पूजा (चन्द्रमापूजा)
खुं पोले यानाः हइ धका क्वथाय खापा तिना सुनेगु पुतुइ
मल्ला, खाइसि घायेगु

यःसिं थनेगु । यैयाःया सुरु छैय् छैय् पिने सीपिनिगु नामय
दलूमतः च्याकेगु, इन्द्राद्यः ब्वयेगु, हाताद्यः ब्वयेगु, उपाक् बनेगु,
थासं थाय्या प्याखं पिदनेगु दीप्याखं, लाखे, तानाकिसि,
सवभक्कु, महाकाली आदि प्याखं पिदनिगु ।

कुमारी, गणेश, भैरवया रथयात्रा मरुं चिकमू जुका लगं यंका
भिंछःया थाय्मं मरु बसन्तपुरय् लित हयेगु । मरुं दागिं पिदना
कुमारी रथ चाहिलीगु फुकथासय् चाःहिकथगु, बौमत जात्रा,
क्वनेया हाथुद्यः पूजा

सोन्ह सरादया सुरु, यंकिदह मेला छैय् छैय्पतिं
दलूपूजायानाः समय इनेगु नयेगु । कुमारी, गणेश, भैरवया रथ
थनेयाः धका न्यत जुकाः असं हयाः हलुमान ढोकां बसन्तपुर
लित हेगु

म्हासुगु कापः, लुँया प्रतिक वसः तिसा तयाः बसुन्धरा पूजा
यायेगु, तिलाव्रत दनेगु

कुमारी, गणेश व भैरवया रथयात्रा किलागलय् सालीगु यःसिं
क्वथलीगु पिने ब्वयाःतःगु दल् दुत कायेगु, इन्द्राद्यः क्वकायेगु,
हाथुद्यः दुत कायेगु, यैयाबलय् पिदंगु प्याखं क्वचाइगु ।

नःला स्वना चन्हे
आश्विन कृष्ण १४

पचिमन्हः
आश्विन शुक्ल ५

फुलपाती
आश्विन शुक्ल ७

कुछिभव्य महाअष्टमी
आश्विन शुक्ल ८

स्याकृत्याकु / महानवमी
आश्विन शुक्ल ९

चालं
आश्विन शुक्ल १०

असंचालं
आश्विन शुक्ल ११

सीगः पुन्ही
आश्विन शुक्ल १४

कतिपुन्ही
आश्विन शुक्ल १५

स्वन्ति क्वःपूजा
कार्तिक कृष्ण १३

ला, समय भव्य

पचलि भैरव पूजा यानाः भव्य
नयेगु (क्वनेयापिनि)

भव्य

सिकाःभू। ला भव्य

सीघःपिनि भव्य

क्वःयात ला मरिचरि तयाः पूजा याना
नकेगु

नवरात्रीया सुरु, छैय्छैय् दःदःया थाय नःला स्वां पीगु

पचलि भैरवया पूजा, पचलिइ वःला, वहनी पचलिभैरवया जात्रा

फुलपाती जात्रा। पूजा

केरालप्तेय् कुछि कुछि बजि तयाः भव्य नयेगु
(जहानपि जक चवनाः)

आगम्य तरवार वा खड्ग भुयुफसि तु, पालुमा स्वनाः पूजा
यायेगु, बाहाँ स्यायेगु पीठ पूजा

थाय् थासं नं पायाः पिहाँवडगु थकालिपिं पाखें सिन्हः तिनाः
सुवाः फयेगु, नखत्याः ब्वनेगु भिनिर्दय् छक्क जुजुनाप
भद्रकाली/ पचली भैरव प्याख्या अजिमा/भैरवनाप खड्ग
हिलीगु, मरुगणेद्यः गमय् तडगु

असनय् च्वपिनि चालं, असंपायाः पिहाँवडगु, मरु गणेद्यःया
जात्रा

सीघः दःया पूजा, सीघःया खलःपिनि मोहनी नखत्या ब्वनेगु,
नःलास्वांया चा पिखालखड्ग वायेगु

भिक्षुपिनि बर्षबास सिधैगु आलमत तयेगु

छैय् चायागु पाल्वा मत तयेगु

खिचापुजा
कार्तिक कृष्ण १४

लक्ष्मीपुजा
कार्तिक कृष्ण १५

महपुजा
कार्तिक शुक्ल १

किजापुजा
कार्तिक शुक्ल २

मुखः अष्टमि
कार्तिक शुक्ल ८

वैकुण्ठ चतुदशी
कार्तिक शुक्ल १४

सकिमिला पुन्हि
कार्तिक शुक्ल १५

नह्यगां जात्रा
मार्ग कृष्ण १

गुहेश्वरी जात्रा
मार्ग कृष्ण १०

खिचायात पूजा याना ला मरिचरि तया
नकेगु

फलफूल, तःसि, स्यांगुलि, खवसिं
केरा, मोहनिबलय् खैला सुकुयाना
तःगु ला, स्वनागु वाया बजि ल्हयाः
भव्य छानाः भव्य नयेगु मसलाया नापं
चिनियाम्ह किसिचा आदि तयाःलक्ष्मी
छःयात पूजा यानाः छायेगु

घउ सगं, सि सगं व खैसगं कयाः
नयेगु, बजि दुने हलुलपते तयाः देमाब्ब
नयेगु

घउ सगं, खैय् सगं सिसगं बीगु, देमा
व्वया भव्य नकेगु

चाकुहि, सकि, अलुमना, फलफूल,
हलिमलि

भव्य

छैय् छैय् विशेषकथं चाया पाल्चाय् मत तयाः भूः भूः धायेकेगु
लुखा, झ्यालय् तफवः स्वांया स्वांमाःतयेगु, व्यापारीतय् न्हगु
बहि सुरु लक्ष्मीयात, पूजायाना सी सगं घउ सगं व खैय् सगं
स्वंगुलिं सगंबीगु हलुलपते छयला थायभू छायेगु

थःथम्हं पूजा यायेगु, मन्दः दयेकाः, मन्दः दनाः पूजा यायेगु
महपूजा यायेगु, खेलुइताः च्याकेगु, छैय् छैय् व्यवहारय् हैगु लुसि,
उगः, हासा, तेप, ल्वहूमाः, घः तुफि आदिनं पूजा यायेगु

किजायात ततापिसं मन्दः यदनाः पूजा यायेगु ५१ तु दुगु क्वखा,
ग्वय्स्वांमा क्वंखायकेगु खेलुइताः बीगु

पशुपति महाछःयात बुद्ध भगवान दुगु मुखः पुडका पूजा याइगु

तःधंगु पर्व, यमराजया लुखा न्हिछिं चाइ धायेगु धापु दु

छःछःपिन्त चाकुहि सकि फलफूल तयाः पूजा याइगु त्वाःत्वालय्
बाहा बहिलय् हलिमलि व्वयेगु । हलिमलि व मरिचरि तयाः
कसि व्वइगु । मरिचकसि हलिमलि कसि नापनापं हलिमलि
इनाबीगु, चतुरमास सिधइगु

थानकोट, किपु, पांगा आदि दक्षिण भेगया न्हय्गु गांया जात्रा

गुहेश्वरी, छःजात्रायाना यैया लायकुली हैगु

बालाचन्हे
मार्ग शुक्ल १४

विवाह पञ्चमी
मार्ग शुक्ल ५

यःमरि पुन्हि
मार्ग शुक्ल १५

मालखः दिसि
पौष शुक्ल १०

दिसि चन्हे
पौष शुक्ल १४

मिलापुन्हि
पौष शुक्ल १५

घ्यःचाकु संलु
माघ १ गते

श्रीपञ्चमी
माघ शुक्ल ५

माघ शुक्ल १५
सिपुन्ही

सिलाचन्हे
फाल्गुण १४

यःमरि, ल्वहँचा मरि

यःमरि, चतांमरि, ममचा, ल्वहँचामरि,
तु, सतवेसि

बरां, हलिमलि

कःनि मुस्या, बरां गुलुमरि चाकुमरि
बाखंपाः

घ्यःचाकु, तरुल, सन्या हामोग्वारा,
लाखामरि पलं आदि

छुस्या मुस्या, बरां मापां
स्वारी हलुवा

थँहिदिइ छःछःपिं जात्रा याइगु स्वर्गे जूपिनिगु नामय् श्लेस्मान्तक
वनय् सतविज व्हलेगु

जनकपुरय् राम व सीताया विवाह उत्सव याइगु

कूपुजा, भखारीपूजा, ग्वन्हपूजा, मीच्याकाः मकः कुइगु सुर,
ज्यापुतय् वसं वनीगु, त्यःछिं त्यः फवनेगु

छःथास लाइगु धका
आगंछः पूजा याइगु

मकलय् मि च्याकाः तु मुइकीगु

स्वस्थानीया बाखं कनेगु सुर

छवपय् पञ्चदान, मकः नापं सिधादान, चिकं बुइगु, न्हायपनय्
चिकं तयेगु, मामं थःमचातयत् छयोनय् चिकं तयेकेगु, भिंनिर्दय्
छक्व भुइछ्यलय् समय् न्यायेकीगु, त्रिवेणी मेला, कुम्भ मेला

ससुछःया पूजा, अक्षराम्भ, शीप आरम्भ, वसन्त ऋतु प्रारम्भ,
वसन्त श्रवण, माघ वनीपिनि सहश्रधारा तयाः ससुमांजु थाय्
वनीगु, ससुछःया नामय् अबसं

माघखः जात्रा स्वस्थानी व्रतया बाखं सिधइगु

पशुपति मेला । सन्ध्याइलय् निसैं दुवाः दुवाःपतिं, त्वाःत्वालय्
मिच्याकेगु, छँय् छँय् मकःलय् मि च्याका मिक्कुइ गाकेगु सिं
फवनेगु, जगा फवनेगु

होलि

फाल्गुण शुक्ल १५

पार्श्वन्हे
चैत्र कृष्ण १४

घोडाजात्रा
चैत्र कृष्ण १५

असनम् द्यः ल्वाकीणु
चैत्र शुक्ल १

येंया वसन्तपुर, यलया कृष्णमन्दिर न्ह्योने चिरस्वना येंसिं
धमिणु होलिया सुरु

चिर कवथलाः चिर वाना होलि कवचायेकीणु

तुँतु वटःतुँ तथाः लुकुमाःद्यः पूजा यानाः श्रैँ अयला छाना भव्य
छायेगु लुकुमा द्यःप्राथय् अजः फयाः छैँय् सकसिन सिन्ह तियाः
अजः उलेगु महायनीधिनि छैँय् आगमय् न्यागः स्वना कृशपुजा
यायेगु

नेपाल शाही सेनापाखँ येंया तितिथल्य सल ब्वाकीणु यलय्
महालक्ष्मीइ छन्हसल ब्वाकिणु, येंया थाय्थासय् मचातयत्
मलःजा नकिगु बहनि थास थाय्थाद्यः गमय् तथा जाना

घोडाजात्रा वलय् गमय्त्तःपिं फुक द्यः त्वाल त्वाल जाना याना
अजिमापिं असनय् नामलायेगु याइ व चान्हय् तितिथल्य
अजिमापिं नापलाइगु

त्वमिया त्हरिका

नां : डा. चुन्दा बज्राचार्य

शिक्षा : विद्यावारिधि (नेपालभाषाया नाटक)

एम.ए (अर्थशास्त्र व नेपालभाषा)

अबु : भाजु वेदानन्द बज्राचार्य

मां : मयजु ज्वालादेवी बज्राचार्य

लजगा : प्राध्यापन



नेपालभाषा केन्द्रिय शिक्षण विभाग, त्रि.वि.वि., यलधवाका, यल ।

थाय्बाय् : ७/८४१ मरु ख्यःक्यब, यै ।

पिदने धुंकुगु सफू :

- ❖ नेपालभाषाया आधुनिक नाटकय् मिसा समस्या
- ❖ भिक्षु सुदर्शनया नाटक छगू बिबेचना
- ❖ जितामित्र मल्लकालीन धरःपौ
- ❖ मल्लकालया छुँ संस्कृति
- ❖ मध्यकालीन छुँ घटनावली
- ❖ रणजीत मल्लया विवाहया लागि भम्चा काःवंगु धरःपौ
- ❖ मोतिलक्ष्मी उपासिकाया जीवनी
- ❖ नेवाः तजिलजिइ नखःचखः